

Colleg. Rhed. In Locum

THOMÆ HOBBI

Philosophiam

EXERCITATIO

EPISTOLICA.

En. Non Collegij Savilianus
Ad Amplissimum Eruditissimūque
Virum D. IOHANNEM WILKINSIUM. 1712.
S. T. D. Collegij Wadhamensis
Gardianum.

Autore SETHO WARD, in Academia,
OXONIENSI *Astronomia* Professore
SAVILIANO.

Cui subicitur

APPENDICULA,

Ad Calumnias ab eodem Hobbio (in sex
DOCUMENTIS nuperrimè editis)
in Authorem congestas, Responsoria.

OXONIÆ,

Excudebat H. HALL Academix Typographus,
Imponis RICHARDI DAVIS. 1656.

3875

12/16/38

Se

45300



*Illustrissimo atque Excellentissimo
Nobilitate ac Literis*

D. HENRICO Marchioni de Dor-
chester, Comiti de Kingston, Vice-Comiti
de Newark, Baroni Pierrepont & Manvers.



Uanquam non sit illud forsan
Consuetudinis, (Heros Nobilif-
sime) Epistolæ viro alicui inscrip-
tæ, patronum aliunde quærere;
illud tamen in hac nostrâ qua-
licunque exercitatione faciendum censui, neque
à judicio hoc ullo modo me potuit dimovere
rei istius novitas aut insolentia. Videbam equi-
dem admirationi hoc istis fore, qui rerum inte-
riora negligentes in cortice hæreere solent; at
sperabam aliquos futuros, qui formulis istis
paulisper neglectis, res ipsas altiùs pensitare
velint, earumque rationes & causas ab initiis
contemplari: atque hoc quidem ipse si obtinue-
ro, faciam (opinor) ut cætera cùm admirentur

EPISTOLA

plurima, hoc ipsum non sine ratione summâ factum esse arbitrentur. Nolit E.V. existimare velle me (quod dicere solent) à bello Trojano exordium ducere, etiamsi à decennali hoc faciam. Quàm fuerit discordiis civilibus lacerata atque afflicta Patria hæc nostra; quàm fuerit literatis hominibus, ipsisque adeò Academiis funesta rerum nostrarum perturbatio, utinam nesciret orbis universus. Fieri non potuit ut inter partium studia & contentiones acerrimas, inter bellorum fulmina, intacti evaderent (lauro muniti licet, & coronati) musarum cultores, eorumque domicilia. Atque hoc quidem omni bello commune est, ut sit literatis hominibus atque Academiis infestum; verùm habuit hoc nostrum illud peculiare, ut miles utramque Academiam occuparet, atque ut nostra hæc *Oxoniensis*, belli sedes esset perpetua, ubi partis vincendæ, atque tandem penitus subactæ principalia stativa spatio aliquot annorum ponerentur. Silent leges inter arma diverbium est vetus; adjicere certè potuerunt et Artes stupere, & Linguas obmutescere solere. Atque reverà si bello sæviante, si repetitâ atque diuturnâ obsidione pressa Academiarum alterâ, alterâ interim militibus occupatâ, negligantur artium studia, ejiciantur professores, diruantur ædes musarum sacrae, quis illud miretur? nempe ex ipso Belli ingenio ista proficiuntur, neque est ut aliquis

DEDICATORIA:

aliquis aliena ab istis cum ratione possit expectare. Quænam igitur (inquit E.V.) sunt ea mira quæ pollicemur? Nempe *mirum* illud est nullam in utrâvis Academiâ pietati ac literis dicatam ædem, injuriam aliquam à militum nimium plerumque infensorum rabie tulisse, quin omnia in Collegiis, in Musæis, in Bibliothecis facta atque tecta, quasi miraculo, manuque Dei fortis conservata fuisse. Imò est & illud admirabile, defervescente paulisper bello, datoque spatio nonnisi admodum exiguo (imminutâ licet præmiorum spe, fremente licet pietatis atq; literarum hoste) revixisse statim literarum studia, Scientias, Artes, Linguas in Academiis refluuisse, majoresque vires (quod de Antæo dictum est) continuò sumpsisse. Novi certè quàm fuerit illud invidiæ aliquorum hominum expositum quod sum dicturus; dicam tamen, adigente ad hoc (meo saltem judicio) veritatis vi, vix aliàs floruisse magis unquam pietate atque eruditione omnimodâ Academies, quàm nunc florent. Habet certè Oxonia hæc nostra viros in omni studiorum atque professionum in omni Scientiarum atque Linguarum genere eximios, eosque jam scriptis editis celeberrimos, vel olim celebrandos, quorum ipse à nominibus recitandis difficulter abstinere, nisi notissimi ipsi forent Excellentiæ vestræ, nisi ipsorum modestia, imò & numerus illud prohiberent.

EPISTOLA

Neque verò effoeta interim facta est alma mater Cantabrigia (quæ me teneris unguiculis existentem excepit olim, sinuque fovit indulgentissimo, æternùm eo nomine à me colenda) habet ea viros omni in arte summos; vigent illic literæ, florent Artes, imò statim à bello aliquantulùm pacato floruerunt: Hæc certè miranda esse judico, imò opus hoc Dei ipsius est, oculis reverà nostris admirandum: quare

---illius aram

Sæpe tener nostris ab ovilibus imbuet agnus.

Verùm hæc cùm ita sint, est & aliud impensius mirandum, non deesse viros, eosque ex iis quos gremio olim complexæ sunt Academia, nunc autem (nescio quo sydere percussos) aut Enthusiastas, cerebrosos, eruditione vacuos, furore percitos; aut inhonestâ tumentes philautiâ, seipsos solos eruditos inverecundè profitentes: qui conclamatum de Academiis fuisse præsumentes, easque in ignem positas, in cineres maternos sævire non exhorruerint; vel saltem illas (uti sunt opinati) barbarorū hominum inimicitiiis afflictas, jacentes, jamjam dissolvendas, contumeliis probrisque sint insecuti, sperantes illud impunè se ferre posse. *Quenam est (inquiunt) Academiarum utilitas? quenam Academicorum scientia? quanam est ea doctrina quam*

DEDICATORIA

quam Scholis debemus? Mitto verba eorum magis ad contumeliam composita.

Atque ipse quidem ab iis libentissimè discere vellem, quem percontentur -- *Min' tu istud ais?* Num ab Academicis hæc quærunt? Paratum certè responsum habent; retulit ejusmodi responsum, non ita pridem *Academiæ Vindex*; At ipse, cùm aliis ferè omnibus (quod ad eam rem attinet) cumulatè satisfecisset, ipsis tamen non placebat. Utinam dicere vellent quid facerent Academia, quid ab iis expectent, ut earum utilitas atque eruditio ipsis innotescat. Quàm vellent Academia ut illuc venirent, ut de Scholæ, Magistrorum, Professorum, eruditione & literis inquirerent, factoque demum examine periculum ipsi facerent: vel si tutius illud & melius ipsis videatur ab isto probationis genere abstinere, utinam tamen accedere huc vellent (non est ut metuant) ut templorum fores intueri, ut columnas librorum à nostris editorum, titulis ornatas, aspicere possint, atque de iis judicium sincerum ferre. Magnum librorum proventum, unusquisque à sopito bello civili annus tulit, nostro quidem judicio optimorum; prodeunt in omni disciplinarum & linguarum genere digna Cedro-- Dederunt anni septem supremi libros (opinor) plures ab Academicis compositos, quàm antea solebant viginti, libros in omni Theologiâ præclarissimos

EPISTOLA

mos in speculativâ, practicâ, polemicâ. Dedit Academia hæc nostra Hebraicos, Arabicos, Persicos, Græcos, Latinos, Juridicos, Historicos Poeticos, Grammaticos, Geometricos, Astronomicos; hæc omnia (inquam) intra septennium hoc supremum non aliena, sed sua dederunt Academici Oxonienses, quin & adhuc majora pollicentur. Hæc illi si viderint, cupimus certè ut de iis censuras singulatim ferant; si non viderint, æquum esset ut à præjudiciis istis atque præsumptionibus, imò calumniis, abstinerent.

Cernit interea E. V. durissimâ Academiarû conditionem: cernis de utilitatè earum atque dignitate importunè invec̃tam iisque ingestam controversiam, cujus quis finis aut exitus est expectandus? quem (quæso) judicem appellare possumus, ut de rerum nostrarum statu, de utilitate Academiarum aut inutilitate statuatur? Nūquid viros in singulis excellentes appellabimus? In Theologia, Jure, Medicina, Linguis, Scientiis præstantissimos, utpote ea profitentes, singulos singula? Non stabunt eorum judiciis, hauserunt ab Academiis ista (inquiunt) omnia, quare non est illis (minimè nimirû ingratiss) hæc irre credendum. Quid igitur? num ad plebem ipsam & vulgus eundum est? -at nesciūt literas.

Imò verò magno providentiæ divinæ beneficio

DEDICATORIA.

nescio factum esse existimamus, eoque prorsus admirando, tulisse ætatem hanc nostram causæ istius arbitrum, aliquem cujus & stupendam simul eruditionem, & in literatos homines benevolentiam, non immeritò colunt atque venerationur Academia, quo demùm patrono eorum existente, nil metuendum ab adversariorum impetu aut importunitate, clamēt licet ad raudedinem, seipfos licet immensum efferant, nos omnes, nostraque studia contemnant. Nempe tu ipse es (Heros Nobilissime) cujus ad Asylum (post summum illum rerum Britannicarum Arbitrum) in hac causa confugimus; Te judicem, Te vindicem & patronum (illud à profundissimâ atque omnimodâ eruditione, hoc ab humanitate atque clementia) submissè petentes, atque ingenuâ fiduciâ expectantes. Imò verò ad quem potius confugiamus quàm ad Te ipsū (H. N.) cui nihil usquam simile aut æquale nostra vel ætas, vel parentum, neque (opinor) multa retrò sæcula viderunt. Dixit Eunapius olim Proæresium fuisse *ἐμψυχον βιβλιοθήκην*. Quo (quæso) nomine nisi *vivētis* forsâ Academia, vestrâ excellentiâ cōpellaret? Illud certè habet (vocabuli ipsius usu hoc postulâte) Academia nomē, ut artes & scientias, ut disciplinas omnes intelligant illic viri eruditi ac profiteantur: atque habet certè nostræ alios in Theologiâ, alios in Jurisprudentiâ, in Medicinâ alios & Philosophiâ,
alios

EPISTOLA

alios in linguis aliisque in rebus alios admirabiles; verum qui hæc omnia profundius intelligat, eorumque vim omnem percipiat, & memoriâ teneat, qui scientiarum numeros omnes expleverit, vix habet orbis universus unum aliquem. Varro equidem olim doctissimus Romanorum unâ omnium confessione habitus est, ejusque laudes hoc quasi fasciculo complectitur Cicero. "Tu (inquit) ætatem patriæ, tu descriptiones temporum, tu sacrorum jura, tu Sacerdotum, tu bellicam disciplinam, tu sedem regionum, locorum, tu omnium divinarum humanarumque rerum nomina, genera, officia, causas aperuisti, plurimumque Poetis luminis attulisti, -elegans Poema fecisti, Philosophiamq; multis locis inchoâsti. Magna hæc certè & admiranda, nisi forsitan iis Ciceronis facundia aliquid quasi detrahendum monere videatur. Magnum certè illud est, posse mentis vi ista tam variâ quovis modo comprehendere, *Historiam* nempe *Furisprudentiam*, *Geographiam*, *Philologiam*, *Poeticam*, & *Philosophiam*; verum his omnibus ipse excellis H. N. non umbratilem aliquam atque ad pompam acquisitam, verum profundissimam eorum scientiam consecutus. Nempe ut de historiâ nihil dicam, in *Theologiâ* scientissimum te norunt & prædicant profundissimi Theologi; *jus* omne tum *Civile* Romanorum, tum *Patrium*, quotidie justitiæ unius amore


DEDICATORIA.

amore (quod antiquorum uni aut alteri solenne fuit) exponis, atque interpretaris; linguam non solum Romanam, sed & Græcam calles universam, nulloq; habes discrimine *Philosophiam* universam, non antiquorum modò, sed & recentiorum penitissimè perspectam habes; imò verò & *Anatomiam* quam cominùs creberrimâq; αὐτοψία non ex libellis, verùm ex ipso corporum sectorum intuitu didicisti: Medicinam universam non intelligis modò, verùm & (humani generis amore) magnâ (ut aiunt) felicitate exerceas. *Geographiam* non modò intelligis, & γεωγραφικὴν, verùm *Mathematicas* omnes: neq; autorum lectione contentus, aut intellectione, observationes instituis *Astronomicas*, paratis ad hanc rem instrumentis præstantissimis, omnibusque necessariis subministratis. Atque in his singulis (aliisque forsan) ita eruditus es, ita ab imis fundamentis instructus, uti solent præclarissima hominum ingenia, cùm se uni alicui impensius dant studio, in eo aliquando excellere. Atque hæc omnia viro alicui contigisse, quis non miretur? Viro Nobilissimi generis splendore, in maximâ & quasi regiâ rerum omnium abundantia collocato; viro summâ humanitate, atque in bonos omnes præcipuè litatos benevolentia, quis non gaudeat & triumphet? Quare nemo deinceps mirabitur ad E. V. nunc Academiæ nomine me venire,
ut

EPISTOLA

ut vestrum ipsis patrocinium ambiam, benevolentiam invocem: falluntur enim (Heros nobilissime) qui existimant mei ipsius, hujusve exercitationis gratiā institutam hanc orationem fuisse; novi ipse certè quàm sit hæc impar tanto patrono, ipseque certè modestior sum quàm ut rei tam impolitæ, imò ludicræ, defensionis tantum numen conciliare velim: imò verò audiam ipse quodcunque huic Academiarum Antagonistæ placuerit: fieri vix potest ut abjectivus de me meisve loquatur quàm ipse sentiam; neque quia personam initio susceptam sustinere necesse habuerim, existimabit prudens aliquis atque eruditus, me ita de meipso sentire, quasi hunc hominem eruditione superarem; fateor equidem me permovisse Academiarum quas non intelligit, & Religionis quam vix satis colit, contemptum, ut ostenderem absque omni ratione factum esse, ut triumphata hæc esse existimaret. Hoc si forsan effecerim, ego quod meum est vici, de cæteris non admodum sollicitus, modò velit Excell: V. inter Clientes obsequentissimos humillimèque sibi devotos, numerare

SETHUM WARDUM.





Insignissimo Amicissimoque viro
D. IOHANNI WILKINSIO, S. T.D.
Collegii Wadhamensis Gar-
diano S.



Nestas mihi (Vir dignissime) querendo
quid ego, inter tot atque tam dissens-
tientes plurimorum opiniones, de
Thoma Hobii, Philosophi nostratis, o-
peribus sentiam, illudque expectare
ais viros, non de plebe, aut vulgo (quos
inter, eos hoc in loco numerandos censeo, qui Philo-
sophiz atque Mathematicarum artium rudes sunt, et
iamsi alias literatissimi fuerint) verum ex aliis pri-
marios, ut de re proposita sententiam ipse feram,
eamque in lucem publicam statim emittendam.

Quamquam autem multa sint, quae faciant, ut nihil
postulanti sedum importune & sollicitè urgenti,
eam negare, multa sunt tamen è contrario, quae
suadent, ut hoc, sive oneris, sive muneris, detrectare
velim, & si sal. o hoc fieri posset officio, ut cupiam
me imperio aliquantulum duriori subducere.

Res est alicuiusquam maximè dubia, ad quam me vo-
cas, & quocunque modo geretur, effugere haud po-
tero eorum hominum proterviam, qui, vel in parte
Hobbianas, vel in adversas jurasse, (plurimi) videntur

Renunciandum erit mihi forsan hac ratione deinceps quieti, quam teneo, quam felicitatis meæ maximam partem judicare soleo, atque ad inimicitias atque lites procedendum; ad quas tamen me minime sive naturā, sive usu atque exercitio comparatum esse satis intelligis.

Deferenda erunt aliquamdiu studia illa, quibus me ipsum oblectari sentio, eritque cogitationum earum tela rumpenda, quibus (in scientia illa quam profiteor) inſervire me poſſe aliquo modo hominibus non deſpero, eritque, neſcio quom magna pars vitæ (brevis futura) illi tribuendus, cui etiamſi optimè cupiam, iſta tamē chariſſima me debere, nō ſatis habeo perſpectū.

Suſcipiendus eſt labor, iudicio noſtro durus, ſuo verò improbus, ut ſententiam illius perfectè intelligere poſſim, ut mentem eruere, ut ea quæ diſſita ſunt & diſperſa, in conſpectum unum producere, & ſedulò queam comparare, ut ſincerum hoc modo fiat ſive noſtrum ſive lectorum (ſiqui futuri ſint) de rebus ſuis iudicium, nè noſtra, quæcunque futura, ſit ſententia, non tam ex ſuis enata atque exoriens, quam ex noſtris ſenſibus præſumptiſque iudiciis prolata, fuiſſe videatur.

Induenda nobis erit pectoris quædam durities, animuſq; obſirmandus eſt adverſus bonorum hominum querelas, qui Eruditorum exercitationes huiuſmodi veluti bella quædam civilia intueri ſolent, eaque piâ quâdam lamentatione gemituque ſerio excipere; illudque non ſine cauſa occinere, uniendas eſſe atque conjungendas eruditionis atque eruditorum hominum vires; eaſque omnes adverſus ignorantia atque ingruentis barbariei indomitum robur conſtringendas, quin diſſimulandos eſſe eorum hominum lapſus, qui boni aliquid in communem Scientia acervum attulerint.

At-

Cap. I. *Computatio* Hobbiana. 3

Atque ego quidem ista, atque alia ejusdem farinae tibi regerere solebam excitanti atq; provocanti me ad militiam hanc Philosophicam suscipiendam; imò verò & istud, præreptum esse mihi atque præoccupatum illum locum ubi non sine laude forsan aliqua, certè non sine decoro me exercere possem, Mathematicas aliquas disciplinas profitentem. Atque hæc omnia non esse ratione vacua; cum ipse judicem, tu interim ea diffare soles, & nescio quo modo efficere auctoritate eâ quâ plurimum apud me vales, ut plus ego tibi asserenti tribuam, quam mihi ipsi rationes asserenti. Illud nimirum nostris omnibus soles reponere, hoc unum, *temperanter rem gerere*, scrupulis meis omnibus satisfacturū esse, neque enim hoc modo aut inimicitias meritò contrahendas, aut studiis tempus nimium detrahendum; non hoc modo aut crabrones excitandos, aut bonis viris molestiam creandam esse, atque ego quidem, nescio quo modo ista, quoties à te audio, assentior, à colloquio verò statim recedens, meditari denuò incipio, quàm sit difficile incommoda ista à me enumerata, rigidâsque dissentientium censuras, vel effugere, vel non mereri; quàm sit difficile contentionis modum, sicubi ab ipso dissentire contingerit, tenere; imò si modo ex sententiâ tuâ, Philosophia *Hobbiana* processerit, quàm sit difficile *Satyrâ non scribere*, à qua tamen, viro cuicunque ingenuo, etiamsi provocato, abstinendum esse judico. Cernis (vir dignissime) quàm sit mihi mens pendula, & quanta me teneat hæsitatio, subeundi fluminis profunditatem, atque frigus (puerorum instar) ad ripam, contemplantem. Geram tamen, ut potero, tibi morem mihiq; interim geniòq; meo paulisper valedicam, fave tu modo, amicūque tuum, quâ vales auctoritate, adversus lividos sciolosque, defende, neque patiaris, ut

malevolentia hoc tribuant ii, quibuscum tibi versari contigerit, quod à me extorsisse noveris plurimorum vota atque consilia amicorum.

CAP. I.

Enumeratio Librorum eorum quos in Philosophia edidit Hobbius, eorumque per notas designatio. Censura Hobbiana de reliquis Scriptoris nonnulla. Iudicia item de suis. Suscepti operis designatio, ejusque una & methodi propositio.

IActa igitur sit jam tandem alea, nobisque fas sit in tanti Hierophanta mysteria aliquantulum penetrare, ejusque sacra, quæ à communi hominum sensu, arte quadam subducta sunt, in lucem proferre, atq; tandem in illa, more Philosophico, inquirere: hanc autem in re quoniam efficere nullo modo possumus, quin erumpat, atque legentibus sese ostendat (illa, quam fovere solemus atque profiteri) libertas Philosophica; ne quis, hac occasione de conamine nostro durius, sentiat, illud initio statim hujus Exercitationis præmittendum esse duximus, solere & ipsum *Hobbius*, ligonem non alio quam suo Nomine vocare, non illum solere, vel à severiore aliorum hominum notatione abstinere, vel à laudibus, quas sibi deberi, judicat, sibi ipsi (pro jure suo) sumendis temperare.

Editi sunt ab ipso, vel illo saltem annuente, intra paucorum supra elapsorum annorum spatium, Idiomate partim Latino, partim Anglicano (præter illud, à *Marrino Merfeno* inter cogitata Mathematica editum de Refractione, opusculum) Hi libri, *De Cive* (quem C. notâ designare in citationibus decrevimus,) *De Homine* libellus Anglicus (H,) *Leviathan* (L), *De Libertate & Necessitate*, adversus *Bramhallum* Episcopum; uterq; Anglicè scriptus (N), & tandè *De Corpore*, (C); quibus

Cap.I. Computatio Hobbiana. 5

quibus adjungere licet objectiones tertias in Meditationibus Metaphysicis *Cartesii*(o): quos libros mihi perlegenti contigit, loca plus centū notare, ubi ingenii sui ac indolis specimina, vel in alienis, vel in suis censendis effert; horum aliqua (libris atq; paginis ipsis laudatis) in exercitationis hujus limine proferre mihi animus est, ne quis à nobis deinceps libertatis nostræ (quæ tamen non immodicam spero futuram, aut in licentiam inhumanā prorupturā) rationes Apologeticas requirat.

Ne quis eum igitur in censuris ferendis parcum esse nimis existimet, ad opera ipsa *Hobbiana* provocamus, quæ non patiantur, ut aliquid ultra, hoc in negotio requiratur: si quis etenim vel generales omnium, sive Philosophorum, sive hominum, vel speciales, Gentium, Tribuum, Rerum: vel singulares, Antiquorum, Recentium, censuras expetat: dabunt hæc abundè scripta hujus viri, facientque, ut nihil uberius ab ipso, hoc in genere orationis, desideretur. In Epistola ad Excellentissimū Devoniz Comitem, libro de Corpore præfixam, *Philosophiam Civilem*, libro suo de Cive non Antiquiorē fuisse asserit: hoc parum. Nullos fuisse apud Antiquos Græcos neq; Physicos, neq; Civiles, verecundè proficitur, quin esse versatum in Antiqua Græcia phantasma quoddam, intus plenum fraude & sordibus: verbo, non nisi spectrum quoddam, *Empusæ Atheniensis* (pedibus altero aneo, altero asinino) simile, pro Philosophia ab Antiquis cultam disertè pronunciat. Malè certè metuo, ne bilis tibi modestissimo maximoque ingenuo viro, in doctissimorum atque profundissimorum (*Hippocratis, Democriti, Empedoclis, Aristotelis*, aliorumque seculi eruditi Philosophorum) causa moveatur: verum continendus est tibi paulisper animus, donec cætera ante oculos posuero.

Hæc quidem hætenus generalia, eoque nomine

6 *Computatio Hobbiana.* Sect. I.

neminem laceſſere, ad neminem pertinere ſentire po-
teſt: hoc eſt, nempe, quod in quaſtione de laſis ab ipſo
Academiis, regerere eum ſolere audio, ea quæ omnes
ex æquo tangunt neminem attingere. Viſ igitur ut de
eruditorum hominum Tribubus loquentem eum aus-
dias de *Scholasticis*, de Theologis, de Scholis, atque
totius terrarum orbis Academiis.

Scholasticorum *abſurdos* eſſe ſermones aſſerit, *ni-
hilq̃, ſignificantes*, ipſoſque *deceptos* eſſe & *decipientes*:
circumforaneis iſtis *nebulonibus* confert, quos *Ægyp-
tios* vocamus, eorūque loquelam linguæ, ab iis ad
animorum ſenſus ſcleratos ab aliis hominibus tegan-
dos, excogitatæ. L. 11. 17. 21.

Quod ad ſcientiam illorum attinet, illud ſemel
pronunciat (L. p. 379.) *nil aliud ferè eſſe Scholasticos
rum ſcripta, præter ſeriem quandam vocum peregrina-
rum & barbararum minimèq̃, intelligibilium*. Ipſos au-
tem iſta ſcribentes *inſanos* priuſus eſſe iudicat (L. p.
40.) temporis ſpatiola illa quæ *libidini* impendunt,
lucida eſſe eorum intervalla, (ea vero quæ vel diſpu-
tando vel ſcribendo inſumunt furoris habere paro-
xyſmos.)

Verū, eſt forſan (à Scholasticorum aliquo pro-
vocatus, vel quod ſubtilitatem eorum attingere non
poſſit, vel alio aliquo nomine) ipſis paulò iniquior,
atque propenſior interim Theologis aliis, iis nimis
rum, qui vel Scripturas interpretantur, vel Conciones
ad populum inſtruunt. Aſt ego cavendum eſſe tibi
moneo, nequid tale expectes. *Opiniones* etenim *paci atq̃,
regimini pernicioſa* (in hiſce mundi partibus) ex lingua
tal. miſq̃, Theologorum indoctorum exorta ſunt, qui
*verba Scripturæ, modo rationi minimè congruo, compo-
nentes* (quantum in ſe eſt) efficiunt, ut credant homines
conſiſtere non poſſe rationem atque ſanctitatem (L. p.

Cap. I. Computatio Hobbiana. 7

169.) Quæres fortasse quænam sint istæ, de quibus loquitur, opiniones: quanquam non sit adeò tempestivum hoc loco ista referre, de quibus fusiùs erit alibi agendum, dicam tamen, ut ista, tam periculosa si judices, possis effugere, sin minus, de Philosophia Hobbiana rectiùs judicare. Sunt autem illæ tres. 1. *Posse etiam privatos homines de bono & malo judicare.* 2. *Peccatum esse quod sit reclamante conscientia.* 3. *Fidem & sanctitatem non esse studio & ratione, verum inspiratione vel infusione supernaturali acquirenda.* Hujusmodi plura apud ipsum ubique invenies. Verùm in præfatione, opusculi de libertate & necessitate, quam vel scripsisse eum vel probasse constat, saltem improbasse nullo modo constat, videbis ipsum in Theologos omnes, satis pro sua & suorum modestia, triumphantem. *Quis* (inquit præfationis istius author) *eventus est tot Concionum, Doctrinarum, Predicationum, Exercitiorum, Conventuum, Disputationum, Collationum, Conventiculorum, librorum editorum? Nempe (seminaria hæc sunt rixarum & controversiarum inutilium (p. 5.) & paulò postea (p. 9.) hoc suscipit, plus illum tribus Chartæ schedis in quæstionibus de prædestinatione, libero arbitrio, gratia &c. præstitisse, quàm voluminibus tot ingentibus, Presbyteros omnes atq; ministros, quin esse in universum homines istos nigella amictos tunicâ, sartorum genus arariorum, plus in conscientiis rimarum facientium quàm invenerint ad opus accedentes. Imò tandem, habere illud opusculum (certè tenue satis) quod labem injiciat æternam pileis Jesuitarum & Presbyterorum angularibus (p. 13.) imò & istis sive albis, sive atris Ministrorum.* Habes itaque suam, de cæteris Theologis præter Scholasticos, sententiam. Expectas, ut dicam quid de Scholis sentiat atque Academiis, quarum pars aliqua sumus ipsi. Quanquam animi s
me-

meminisse horret, luctuque refugit: quis etenim ma-
 tris suæ opprobrio immotus referatur; obfirmabo tamē
 eum, hujusque viri de iis omnibus iudicium proferam.
 Verum, quid est, quod à Scholis expectare possit ali-
 quis (Etymologicis saltem rationibus assuetus) cum
 ab otio atq; garrulitate, nomen ipsæ traxerint suum (l.
 p. 368, 369.) suamq; originem; cum decā tata per multa
 retro secula, ipsiq; æternitati consecrata Academia *Stoa*
Lycæum, nil aliud fuerint, quam senum otiosorū, sedu-
 ctæ atq; desidiosæ juventutis Ambulacra? (ibid.) Imò
 verò, inquit, *Qua unquā fuit Scholarū utilitas? quānā*
est ista scientia qua nostris temporibus (Academicorum)
sive prælectionibus, sive disputationibus acquiritur. Geo-
metriam, scientiarum omniū matrē, Scholis non debemus;
Philosophia naturalis (eorū) somnium est merum, vocibus
iis descripta, quibus sensus non subest ullus: Moralis eo-
rum Philosophia, non nisi descriptio est affectuum suorum:
Logica captivularum fasciculus, verborumq; eo fine
inventorū ut intellectū implicent & stupefaciant. (l. 370)
Scholæ per universum orbem Christianum visionem
fieri per species visibiles: Auditum per species audibiles,
quin intellectum per intell. gibiles, docent (l. p. 4.) nempe
harum omnium rerū totiusq; scientiæ naturalis rudes)
Doctrina politica omnino impares esse, ideòq; ab ipso docen-
das proficetur (L. p. 180.) Quin ut rumpamus tandem
 fastidiosam hanc, tuisq; auribus molestam nimis ora-
 tionem. *Philosophia studium nullum omnino in Acade-*
miis aut scholis locum habere dicit, nisi ut ancilletur Ro-
manæ (s. u. papist. &c.) Religioni. Geometriam (ante tēpus
nupercimū) nullū omnino ibi locū invenisse, quin Geo-
metras magos habitos ab Academicis, artemq; eorū dia-
bolicā (L. p. 370.) Tandemq; Academiis ipsas, Lamia-
rū Lemurumq; officinis conferēdas esse censet (L. 386.)

Scio permotum esse jam tibi stomachum, & te ma-
 ximè velle, ut reprimatur ista hominis ferocia, melio-

Cap. I. Computatio Hobbiana. 9

rem in frugem ut redigatur; verum nollem ego quemquam hominum, cui bene cupio, hoc ad opus importunius urgere; nostri sat, scio, fatum *Vindiciis Academicarum*, quanta & passus est, & forsan passurus, eo solo nomine, quod pede (uti existimavit) impuriore conculari noluit Academies, nempe cornu ferit ille, cavendum est. *Pejorem ego hominem magisq; verius malum, nunquam edepol quenquam vidi, quam hic est simia. Nimisq; ego illum hominem metuo, & formido malum, ne malus item erga me sit, ut erga illum fuit.*

Illi certè (*Vindici*) robur, & triplex circa pectus erat, qui ausus est leonem hunc expergifacere, qui ausus est maculas notasq; Almis Gentis nostræ Academicis iniustas eluere, simulq; ostendere, falli aliquando hunc virum, eaq; asserere, quæ defendere nullo modo possit; qui ausus est indicare, ubi eorum aliqua invenirentur in scriptis aliorum pressis & expressis, quæ tamè ipse sibi vindicare visus est; qui ausus est evincere Geometriam, quæ habemus, nos scholis debere; qui ausus est prædicere & vaticinari, non eum erepturum fuisse Apollonio, magni Geometriæ nomen, quod assecutus est, quin inter Tetragonistas, qui capite doluerint, insignem fore. Hæc & alia quia ausus est ejusmodi, nostri quid homini acciderit, nempe ut audiat huic viro mendax, stultus, sceleratus.

Verum nollem ego vindicem istum, quicumq; fuerit, animo nimis despondere, nempe facit ille pro ingenio suo, & iniquum foret expectare, ut, cujusquam, mortalis gratiam indolens ille suam deponeret. Nempe hic idem est, qui *Græcos simul Latinosq; Autores, Politicos, Historicos*, rabido cani (certè metuo ne morsus fuerit) conferendos esse censet (L. 170, 171.) *Cedite Romani, Scriptores cedite Græci. Aristotelis Metaphysicis nihil absurdius esse posse, Politicis ejusdem nihil Imperio repugnantius, & tandem, Moralibus ejusdem nihil imperitius*

aut rudius esse affirmat. (L.p.370.)

At forsan offendit eum ipsa Autorum illorum antiquitas, illudque habet hic vir jam senescens, (*atq̃ adeo atate provectior, quam fuerint Scribentes ii, qui in honore habentur.* L.395.) ut hactenus laudatis infestus sit, quod illum multis sæculis præcedentes, venerationem præmaturam solâ atate sint consecuti; imò verò sive veteres fuerint, sive moderni, sive Philosophi, sive Theologi, (quos maximè omnium odio habet) sive tandem Juristæ, Pyrgopolynicis instar, flatu uno eos omnes prostermit. *Sauretius* illi *insanus* audit, (L.39.) *Dn. Ed. Cocu Miles*, quem plurimi nostratum, velut legis Anglicanæ oraculum, venerantur, *inter stultos Legistas* ab eo numeratur. (L. p.140.) Verùm tædet me hac in re diutius morari; hæc hactenus pro ingenii atque indolis Hobbianæ specimine sufficiat collegisse: proximum est, ut quid de seipso & suis operibus sentiat, deinceps dicamus.

Atque hic quidem cavendum atque metuendum tibi mihiq̃ue est, ne quid humile aut moderatum, ne quid non magnificum, imò divinum de *Thomâ* nostro ejusque scriptis sentiamus; ne forsan eum inter *homines* aut Philosophos, qui humanum aliquid pati solent annumeremus. Certè, æquum est, ut putemus eum, & seipsum & sua penitus quàm nos possumus, intelligere, quærenda igitur atque anxie investiganda est ipsius de seipso sententia, ne quid forsan judicii errore in illum committamus. Primum autem, suspiciendus est ille, tanquam *omnis Philosophia, tum Civilis tum etiam Naturalis, vel primus vel summus Autor atq̃ inventor*, tanquam *Empusæ, tum Philosophicæ tum etiam Theologicæ, abactor, atque profligator*, (Ep.c.) quod est certè honores non humanos & sobrios, verùm divinos meruisse. Hinc certè enata illi spes est, ut
pro

Cap. I. Computatio Hobbiana. 11

pro Academiarum (quacunque per univcrsum terrarum orbem sparsæ sunt & disseminatæ) doctore legitimo habeatur; sola ad hanc rem apta sunt, ea, quæ ex ingenii sui scriniis educta sunt, φιλοσοφίματα, Leviathanis (Cap. 30. p. 180.) has ipse movere dignatus est quæstiones. *Annùm Academia Anglicana satis erudita non sunt, disciplinam Civilem ut doceant? Annùm tu ipse es, (Thoma) qui suscipies Academias instruere?* quarum ad primam respondet, nescire ipsas veram doctrinam seminare, omninò *κατασκευῶς*. Ad alteram, non necesse esse, ut vel affirmando vel negando respondeat, nunquamq; enim, qui ad id quod facit, attenderit, facile percepturum quid eâ de re cogitat. Verùm hæc te cæte aliquantulum & modestiùs quam solet, vis igitur eum clarè atq; remotis ambagibus suum sive iudicium sive spem conceptam enunciare. *Librum illum (Leviathanem) utilem esse iudicat ut imprimatur, utiliorem autem ut in Academiis doceatur.* (L. p. 395.) fortasse; neque dubitandum est, quin plures hoc idem de suis ipsorum libellis a que inventis iudicent. *At ipsi spes est, futurum aliquando ut in Magistratus supremi aliqujus manus incidat iste liber, qui imperii absoluti atque integri exercitio, facturus sis ut publicè doceatur.* (L. 193.) atque hoc quidem fortassis, tuo iudicio, satis pro dignitate suâ, satisque pro imperio quod ambit Philosophico, neque tamen portentosum, aut quod reliquorum (si sibi daretur optio) hominum vota saltem atque desideria excedat.

At nondum, crede mihi (vir amicissime) supremum illius scopum summamq; ambitionis ἀχυνὲς cogitando attigisti; censes forsan Hobbeo nostro satisfactum iri, si in porticu ac Lyceo, si forsan in Triviis ac Scholis; verbo uno, si in subscelliis Philosophorum, studiolorum juventuti exponatur, eiq; depulsis reliquis omnibus,

nibus, magister unicus imponatur, imò verò parva sunt ista, si cum votis *Hobbianis* conferantur: consensendum est suggestum, ipsoque ex pulpito, unde sacri sermones solent, inculcanda est hominibus, à Concionatoribus sacris, ipsius doctrina, illudq; vel Evangelii ipsius loco veteris, vel tanquam Novum Evangelium. Magna (inquis) narras, atq; inexpectata, eaque, quæ de Antichristo vel legere solemus, vel audire. Tu igitur dic, obsecro, quis sit sensus hujus orationis (*Leviathanis* c. 30. pp. 176, 177.) ubi postquam hæc sibi objecisset, (nam ipse sibi audet aliquando (quædã leviora) objicere) *Nō esse quenquã doctrinã suã civilis (sublimioris) capacẽ.* Respondet, *Nūc eò adduci poterūt nationes integræ, ut in mysteriis Religionis Christianæ, quæ rationem excedunt, acquirant — Et non poterunt homines institutione & predicatione (quæ lege protegatur) efficere, ut accipiantur eã doctrinã (nempe Leviathanis) quæ est tam rationi consona, ut apud homines præjudicio non laborantes, non ultra opus sit ad eam discendam, nisi ut quis auribus eam percipiat? Quin igitur tandem opinor, fidem liberavi, neque magnoperè mirandum est, pro Mago eum aliquando habitum: quid enim obstat, ut Deum sanctum se esse prædicet: ego certè in animo jam nunc habui, ut eum, nō *Thomam* deinceps vocarẽ sed *Simonẽ.**

Sed tamen amoto queramus seria ludo.

Unde inquires, hos animos sibi sumpsit hic vir, quem nos mortales mortalem esse credidimus, Malmesburiz natum, ut alii infantes solent, ibique lacte primùm nutritum, deinde flagris exceptum pro ingenio & fato reliquorum puerorum, denique non eum magis esse *Jovis* sobolem credidimus, quam *Amphitruonis*. Discendum est unde hos animos. Nempe, *Si quid possint rei tractandæ dignitas & utilitas, tractandi recta methodus, causa & consilium in scribendo probum, scribens*

Cap. I. Computatio Hobbiana. 13

vis deniq; moderatio, ea omnia leſtoribus pollicetur (in præfatione libri de Cive, qui omnis eſt liber in Leviathanẽ conſcriptus, hæc itaq; de illo etiam libro intelligenda) *Officiorum civilium Elementa* evidentiffimã demonſtrat connexionẽ (ep. de C.) libros ipſe ſcribit (non ut ſolent cæteri) nervoſos, utiles, non vulgares (ibid.) Non differis ille (quod reliqui mortales ſolent) ſed computat (Præf. C.) Res unica eſt, quam in libro de Cive non demonſtratã, ſed probabiliter poſitam eſſe conſitetur, in libro autem de corpore, omnia eſſe legitimẽ demonſtrata conſidis (c. ep. d.) Imo pollicetur ejus nomine *Marinus Merſennus* (ep. ad Sorberium libro de Cive præfixa) quod ab ipſo accepiſſe cenſendum eſt) nos viſuros Nobilem illã *Philoſophiam* (Hobbianã) non minus quã *Euclidis Elementa* demonſtrari. Hæc certẽ ea ſunt, quæ ſecum dum recolit, altiorq; meditatur, excitatus eſt ipſi animus excelfus atq; magnus, ut de reliquis omnibus ea loquatur, quæ nos ſupra commemoravimus, ſcilicet, ut ludibrio habeat, & contemptui, quicquid eſt uſpiã hominũ, ſe verò ipſũ dæmonẽ, aut ſaltẽ heroẽ, faceret, cœlõq; locaret. — *Mediis* (inquit) *videor diſcumbere in aſtris*

Cum Jove, & Iliacã porrectum ſumere dextra

Immortale merum.

Nunc autem quid vis me facere, decus mœum? num adverſus demonſtrationes pugnare (quod eſt caput rupi objicere) non (inquis,) verũ experiri modò, an demonſtrationes ſuæ ejusmodi ſint, qualia ea eſſe ſolent argumenta, quæ nos ſolemus Academici, nomine tã præclaro inſignire. vis igitur hoc ſaltẽ, ut omnes ejus libros excutiam, eoſque ad examen ſeriatim reducam. Neque verò hoc ipſum præſtare poſſum, non ſolum, quia multi ſunt, & eos defendit numerus, verũ quia ſolet ille res ſuas coquere & recoquere, ita ut vix aliquid in ſuis libellis reperiri exiſtimem (Geometrica iſta & Phyſica in libello de corpore ſi excipias)

24 *Computatio Hobbiana.* Sect. I.

quod non bis tēve variis in libellis variisq; linguis repetatur. Fieri igitur nullo modo potest, ut libros suos omnes ordine persequar eo, quo scribuntur, ne molesta sit tibi nimis Crambe recocta.

Quinimò hoc, si tibi libitum fuerit, facturum sum, in Philosophiæ Hobbianæ (certa ad capitula reductæ) Fundamenta quam potero brevissimè inquiram, missâ omninò Geometriâ suâ, quam pro dignitate exceperunt in Elencho Geometriæ Hobbianæ, Collega meus *Johannes Wallisius* S. T. D. vir doctissimus, & in animadversionibus suis. v. cl. *Andreas Tacquet*: Missaq; uberiore inquisitione in tractatulum de Libertate & Necessitate, quem sibi reprimendum sumpsit R. *Bramhallus* ab ipso provocatus; cætera autem, favente Numine, hoc ordine disponam. Nempe ut dicatur

1. De Dialecticis.
2. De prima Philosophiâ.
3. De Naturali Philosophiâ.
4. De Hominis natura.
5. De Civilis disciplinæ Fundamentis.
6. De iis quæ ad Religionem propius spectant.

In istis si qua minùs mihi legenti satisfecerint, dissensus mei rationes quàm potero brevissimè & modestè explicabo. Ista autem tria priora de Dialecticis, Metaphysicis, & Naturali Philosophiâ, ad seriem & methodum libri sui de Corpore, prosequemur.

CAP. 2.

De Philosophiâ.

EXordiendum itaque est à Dialecticis iisq; quæ ad Philosophiam universam pertinent. Miraberis forsan

Cap.I. Computatio Hobbiana. 15

forſan virum hunc, qui maturæ à ſecretioribus conſiliis haberi perpetuò ſatagit, iſta tenuiora, ab infinito Scribillatorum numero tractata, non omiſſiſſe; verum non deſunt ipſi huius rei rationes eæque plures, utpotè, myſteria ab ipſo explicata ut capiant homines, ſingendam eſſe ab ipſo mentium humanarum ratiocinationem: hinc etenim eveniet, ſi homines eodem modo prorsus ratiocinentur, quo ipſe ſolet, eadem cum ipſo ſenſuros eos eſſe. Neque de demonſtrationum ſuarum viribus quicquam detracturos, hoc primum regerere poteſt, verum & illud *Intenui labor at tenuis non gloria.* At at non ille opus habet iſtiusmodi excuſatiunculis, non ille res tractat, uti cæteri mortales ſolent: at at *In nova fert animus*

Avia Pieridum peragit loca nullius ante

Trita ſolo: juvat integros accedere fontes

Atque haurire, juvatque novos decerpere flores

Inſignemque ſuo capiti petere inde coronam,

Unde prius nulli velarint tempora muſæ.

Hoc ipſum nempe eſt, quod Coronidem Leviathanì imponit, *redire ſe ad intermiſſam* (diutiùs reverà quam erat tanti nominis Philoſopho) *corporum conſiderationem, ubi non minùs eſſe placituram ſperat operis novitatem, quam in opere civili diſplicere ſolet.* Ecce quid ille pollicetur, ecçùm autem eum promiſſa implentem. Nonne vides titulum ipſum eſſe novum? (*Computatio ſive Logica*) Solebant hætenus autores trito vel *Logica* vel *Dialectica* vocabulo ratiocinandi artem inſignire. Non ſic *Æacides*. Dices tu forſan Computationem potiùs *Logiſticam* eſſe dicendam quam *Logicam*, iſta nimirum potiùs ſe mutuò referre vocabula, atque ita perpetuò ea reddere ſolere Mathematicos; quaſi verò ipſe Mathematicus non ſit, quaſi te fibræ tuæ rigorem aliquantulum remittere, certè ſi

si Mathematicus non fuerit, frustra ab illo vel philosophiam naturalem, vel Logicam (sive Computatorem) expectabimus. *Fieri non potest, quin somnum, eumq. linguâ prorsus insensatâ explicatum, potius quam scientiam naturâ efferant illi, qui philosophiam docere volunt absque multa Geometria cognitione (l. 369.) & acquiratur ratiocinandi ars, non praeceptis, sed usui & lectione eorum librorum, in quibus omnia severis demonstrationibus transfiguntur, Corp. p. 40.*

Quin physicus ille est, (imò primus philosophorum naturalium) qui etiam λογιστικῆς est omniaque demonstrativè tradit, necessum igitur est, ut sit etiam Mathematicissimus; novit igitur quid sit logistice tum numerosa, tam etiam speciosa, ideoque de vocum interpretatione non est cum ipso litigandum. Cernis, ut ultima primis apud eum respondeant, quam strenuè evincit, ipsi omnia esse credenda asserenti, quam sit iniquum ipsi negare, quod est olim Pythagoræ concessum (cui omnia numeris tribuenti, rationis omne opus fuit Computatio) ut reclamanti os obstruat illud, *δὲ τὸ ἐν ἐμῷ*. Neq; ego in hac re multus laboro, at erunt interim, quibus fas erit dubitare (Elenchum quendam jam nuper editum legentibus) an erit ipse omnium mortalium γαλουατῆς ἡλικίας, brevique ratiocinio proum erit concludere, illo ipso preeunte pro Mathematica scientiâ, quæ in illo est, mensurâ, de reliquis esse statuendam. Neque certè deerunt unquam huiusmodi quædam submurmurantes, mihi potius respondendum illis est, qui neque nova esse admittunt, quæ pro novis ipse venditat. Nam neque novum esse, quod differendi methodus eadem dicatur esse quæ est numerandi; Nempe, hoc ipsum Pythagoricis solenne fuisse, quin Platonem in Epinomis
mide

Cap. II. *Computatio Hobbiana.* 17

vide notionem hanc fusius explicare, hoc idem Cabalistas paginæ utrique suorum operum inferere solere, unde illud quasi carmen legitimum ab ipsis effusum *eum omnia nosse qui noverit numerare.* Fortasse! Verum hæc Thomæ forsan inaudita, ideóque ab ipso pro novis non inhonestè venditata.

At arctius ea virum urgent, quæ sequuntur, aiunt eum plurima libello de Corpore protulisse, quæ neque ipsi nova sunt, sed sæpius in aliis libellis tradita, quæ etiam in Autoribus, quos reticer, parum variata inveniuntur, atque hæc ipsa non alia ratione, *quàm quia non aliter fiet (Avite) liber.*

Magna certè pars hujus capitis aliundè desumpta est, ex operibus vel suis vel alienis: paragraphe de utilitate Philosophiæ (viz. 7) omnes ejus ferè libellos antehac parum variata ornavit; viz: Librum de Cive, de Homine, Leviathanem. Illa de veteribus Philosophis querela eorumque contemptus quoties in reliquis occurrit? adeo ut clamare illud necesse habeant, — *Nec dnm finitus Orestes.* Quinimò, quod dolendum est, ipsum libri hujus primum exordium est à Leviathanis p. 367, 368. traductum. Nos quid ad ista dicemus? Sit nobis Amicus *Plato*, Amicus *Thomas*, at magis est amica veritas. Quare istis omissis ostendemus brevissimè, quænam ea Nova sunt, quæ in Capite de Philosophia effundit.

In ipso operis limine hæc habet. *Philosophia, id est, Ratio naturalis, in omni homine innata est.*

Deinde statim *Philosophiam* definit esse *Cognitionem acquisitam.* Hoc certè novum est, in limine statim discursus de Logica, experiri juvenum ingenia, an possint

18 Computatio Hobbiana. Sect. I.

sint ea, quæ sibi contradicere videntur, recipere; atque ita ab initio, ad mysteria similia ubique secutura, eos præparare.

Dices præclarum eum equum fore, qui nunquam celsitaverit, concedo hoc quidem, neque tamen amo, hoc, quicquid est, in limine impingere; certè aliquid mali ominis videtur habere. Nos cætera intueamur.

Certè novam habet philosophiæ definitionem.

Ejus explicationem novâ methodo prosequitur.

Nova plurima inter loquendum de philosophiâ aspergit.

Philosophiam hoc modo definit; *Philosophia est effectuum sive phenomenarum ex Conceptis eorum causis seu Generationibus, & rursus Generationum, quæ esse possunt, ex Cognitis effectibus, per rectam ratiocinationem acquisita cognitio.*

Nova est hæc planè philosophiæ definitio, si cum reliquorum hominum cogitatis atque definitionibus conferatur; ipse autem eam (paulò mutatam) tradidit Leviathanis Cap. 46. sub initio: ubi inveniri poterunt & ea quæ sequuntur.

1 Hujus definitionis, primò, terminos explicat & tractat.

2 Differit deinde, stylo rhetorico, de philosophiæ Fine, utilitate, defectu.

3 Tum subjectum philosophiæ exponit, illudque limitibus (facta extraneorum ejectione) coercet.

4 In partes eam dividit.

5 Et cautè admodum concludit.

1 Est (inquit) *Cognitio acquisita per ratiocinationem, idè quæ ea excludit, quæ data sunt à natura; Idè quæ non est philosophia ratio naturalis, in omni homine innata; evertit igitur illud, quod in ipso orationis vestibulo protulerat. Interea, excluduntur ex hac definitione*

Cap.II. Computatio Hobbiana. 19

tionem *sensio & memoria*, quæ homini communia cum brutis esse asserit contra Cartesium, at nusquam illud demonstrat.

At, inquit, *Experientia (cum sit memoria) excluditur, ergo etiam prudentia (qua nihil aliud est quam expectatio rerum similium us, quas jam Experti sumus.)*

Uc de definitione prudentiæ, quæ omnino manca est, nihil contendam; annum idem est *Experientia & habitus expectationis rerum similium &c?* annon tibi labascere videtur logicus noster & ratiocinio deficere? Verum, quid si memoria hîc eum destituat, facio atque, ut sibi alibi contradicat? In præfatione ad lectores libello de Cive præfixâ ait *Platonem, Aristotelem, Ciceronem, ceterosque philosophos, Græcos, Latinos (omnium gentium) despecta ab eo capita) libenter illud pati, ut reliquarum scientiarum studiosi habeantur ingeniosi, imò quidlibet præter prudentes, nomen autem illud peritiæ civili deberi. Quid autem? Annon peritia civilis philosophia pars est? Annon ipse est primus Autor philosophiæ (id est prudentiæ) civilis?* Ep.ded. c.

Per Ratiocinationem autem Intelligit Computationem. Quæ jam est, quæsumus, differentia inter differere & ratiocinari? ipse autem se non differere, sed computare prius affirmavit; Sentio hunc hominem memoriâ multum destitui, sed senex est, ne simus adversus ipsum morosiores, quid est tandem Computatio? Est, inquit, *Additio & subductio, & si quis velit, multiplicatio item & divisio, (neque contendet, opinor, si quis cupit, ut radicum eductiones, & quicquid est Algebraicæ Exegetices huc referatur.)* Magna, inquit, narrat & plane nova; imò, vocabula potius nova, res pervetusta, lippis jamdiu nota atque (Academicis) Tonforibus, hæc etenim omnia si penitus confide-

tantur, nil aliud sonant quam compositio illa atque divisio vulgarium dialecticorum. Consular, si cui sit otium, exemplum (§ 3.) nihilque inveniet causa, cur hac ratione antiqua Dialectices notatio in novam *Computationis* permutetur.

At, inquit, non putandum cum Pythagora, *computationi in numeris tantum esse locum*. Nam magnitudo magnitudini, corpus corpori, motus motui &c. addi potest adimique: quasi mercatores, quia nummos computant & merces, illud in numeris non faciant: imò peractâ hâc Additione vel Subductione, erit ista nonnisi per viam numerorum intelligenda, neque minus est operatio Arithmetica, sive quis per cyphas, sive per species opereatur, sive merces sive motus reliquâque ab eo enumerata in calculum trahat.

Est, inquit, Philosophia cognitio *Effectuum seu Phænomenon*. Quid illud significat? Nempe effectus atque phænomena sunt corporum facultates sive potentia, quibus alia ab aliis distinguimus.

Jam tandem cernis nova illum protulisse. Philosophia est cognitio phænomenon, phænomena sunt corporum affectiones; solet quidem definitio sua hucusque Physica antiquorum convenire, quæ pars est habita Philosophiæ, non tamen credita est hactenus eam integram exhaurire. Quanam est hæc hominis Logicam docentis ἀπὸ τοῦ ἀποδείξεω illud generi universo tribuentis, quod non nisi speciei convenire solet?

At, inquires, Philosophia est rerum cognitio, res autem ex mente illius non sunt nisi Corpora. Frustra itaque Philosophiam physicâ ampliorem quis dixerit. Credo ego quidem hanc esse mentem illius, verum hoc non est eum excusare, nisi quis alicui opprobrium hoc modo tollere velit, dicendo accidisse, quod obijcitur, non ex errore atque inadvertentia quadam fortuita, verum ex læsis omnino principiis, aut innata

Cap. II. *Computatio Hobbiana.* 21

quadam insania. Ostendendum erat ab illo primum, nihil aliud in universo contineri præter corpora eorumque motus, ideoque tolli Deum, Angelos, mentesque hominum perennes. Nempe hoc est, quod in Leviathane ubique asserit, non esse *Spiritus*, verum absurdam esse verborum connexionem, ubi (*substantias Spirituales* in ore habere solent Philosophi. Atque erit in progressu (spero) orationis, ubi istâ de re accuratius dissetetur. Interim hoc in loco ubi ex primis omnia deducere proficitur, istud μέγα λιβαν ἀτιμία non evicisse, sed postulasse, hominis in logica ratione non utentis, verum (quod dicimus). absque hospite *computantis*, esse videtur.

Verum est & aliud, ubi à communi omnium sensu abhorret ista definitio, etiamsi concedamus (quod est nullo modo tamen faciendum) Philosophiam atque Physicam reciprocari.

Nempe *Philosophiam* esse ait *cognitionem Effectuum ex conceptis causis seu generationibus; & rursus, generationum quæ esse possunt ex cognitis effectibus.*

Hoc est, *Philosophia est cognitio effectuum ex causis quæ esse possunt, & causarum quæ esse possunt ex effectibus.* Bellè admodum, quis unquam ante *Thomam* hoc iudicavit, illud esse opus Philosophi naturalis, ut res non per causas earum naturales & certas, verum effectus à nobis ipsis uti possibiles cognoscantur. Ego quidem hætenus illud esse opus Philosophi naturalis, ut quo molimine & qua *αἰτία* proveniant phenomena naturæ, altius inquirat atque investiget, existimabam; neq; me ab hoc meo iudicio Computista dimovit. Certè aliud est causas rerum naturalium intelligere, aliud hypotheses excogitare, neque solebam ipse Astronomorum sive veterum sive recentiorum, (beneficio Excentricorum atque

Epicyclorum, eorumque combinatione, corporum caelestium phaenomena, solventium) excogitatas hypothesas, veluti partem philosophiae naturalis intueri: neque credidi aut verum esse, aut verisimile, naturae conditorem, qui solet omnia simplicissimo opere & maximè compendioso absolvere, tot tricus opus suum implicasse, quinimò in humana imbecillitatis subsidium ab hominibus ista fuisse excogitata, ut planetarum syderumque positus vel futuros, quoquo modo, praedicere possent, vel dicere praeteritos.

Certè (ne forsan excurrat oratio) non hac conveniet scientiae *naturali* definitio, verum doctrinae cuius *hypothetica*, sive hypothesium investigationi, quae hactenus Mathematicorum opus iudicata est, non autem philosophorum naturalium: quin definitionis huius exempla ex Geometria peti posse aliqua concedo, verum corporum motibus reliquisque affectionibus (ubi ex materiae dispositione phaenomena quaruntur) frustra dicimus eam applicari; neque enim Medicus aut Architectus in eo quod esse *potest*, acquiescit, quos tamen ex philosophia operari nullo modo debet negare. Sed de his satis.

2. Tempus est, ut de Fine philosophiae loquentem audiamus, ejusque utilitate. *Finis*, inquit, & *scopus* est, ut *praevisis effectibus uti possimus*, & è *contra*. Verum quamnam potest esse praevisio, ubi non nisi possibilis rei causa habetur.

Enumerat (§. 7.) *utilitates* quasdam *Physica* & *Geometriae*; verum non ille debuit ista separare: cui physica est hypothesium inventio; hac enim est omnino Geometria. Ego autem utilissimas esse existimo, neque novi, qui *Herculem* unquam illaudaverit.

Frui horum beneficio Europaeas ferè gentes omnes asserit, Asianos plerisque, Africanos aliquot, ac ceteras
Gentes

Cap. II. Computatio Hobbiana. 23

Gentes Americanas, causamque hujus phaenomeni inquirat. *Annum* (inquit) illa, his *Acutiores sunt*? *an non sunt omnibus hominibus eadem Anima*? *quid ergo*? (inquit) *Alteris adest, alteris deest philosophia*. Praeclare admodum & rhetoricè. Verum hoc ipsum philosophiam invenisse annon est acuminis amplioris? quorsum igitur in hujus paragraphes sequentibus, instituta est sui aliorumque importuna & fastuosa comparatio, ex Leviathane aliisq; libellis suis corrasa? (vide l. 176. ep. C.) Nolo ego in loco isto mihi admodum molesto morari. Festinamus ad subjectum philosophiae, eaque, quae inde excluduntur. Solent reliqui scientiarum subjecta in definitionibus comprehendere, quid est, quod apud ipsum hæc sequuntur tam longo diffusa Intervallo? At, inquires, hoc ipsum in definitione continetur, hoc esse, quod ex definitione jam supra evici, philosophiam suam nil nisi Corpora complecti, ideoque cum S. 8^a. asserit *subjectum philosophiae esse Corpus*, habendam hanc esse pro explicatione *phenomenon quæ esse possunt &c.* Eum itaque in terminorum Explicatione adhuc versari.

Fortasse verum quid tum sibi voluit interposita ista dissertatio de utilitate philosophiae, num licebit mihi ariolari? videbat se jam tum strenuè rem suam egisse, neque potuit à laudibus sibi debitis abstinere. *Annon est virtus remuneranda? annon Honos alit artes?* *annon hoc est invidiam augendo ulcisci* (Ep. De. C.) Imò verò Thoma, *Tu ne cede malis, sed contra audentior ito*. Verum (urgebunt invidi) quo nunc evasit istud. *Si quid possit tractandi recta methodus, si quid scribentis moderatio &c.* quæ sequuntur? multa habet quæ referre potest. Locutum illum esse tum temporis de opere politico, ibique methodum esse necessariam, non autem in Logica sive Computatione, (cujus

jus est methodum ipsam docere) verum ego dicam, quod res est. Definitionem hanc transcripsit ex Leviathanis cap. 46. at illam quæ ibi est, non integram, sed omissâ parte eâ quæ finem atque utilitatem Philosophiæ (quam illic in definitione posuerat) completur; quoniam absque verbis istis, longam satis esse definitionem existimabat. Verum ut ea de causa laudes ipse suas negligeret, hoc nulla unquam evincet ratio. Habes itaque *quædam* hujus rationem: progrediendū est ad ea, quæ sunt ex Philosophia exclusa.

Illud opinor (vir amicissime) mecum existimas, quicquid est rerum in natura, intra Philosophiæ ambitum contineri; non hoc volo, illa omnia intra Physicam propriè dictam comprehendere (quanquam istud ex suis principiis asserere hic Autor debere videatur) sed intra partem aliquam Philosophiæ: quæ igitur à Philosophia excluduntur, ea etiam ex universo sive ex naturali omnium rerum Systemate excludi ab eo sunt intelligenda.

Excluditur autem à Thomâ scientia omnis de Deo, quanquam in Leviathane p. 190. in libello de Cive p. 269. Scientia de Deo Naturalis ab ipso exponatur.

Excluditur doctrina de Angelis; Scientia omnis quæ oritur ex divina inspiratione; postremo, doctrina de cultu Dei.

Miraberis forsan doctrinam de Anima ab ipso non excludi, verum doctrinam de corpore illam omnem continere judicat, *animam* enim à Corpore *diversam*, *nullam* esse existimat: uti posthac dicetur.

4. Quid sit Philosophia, jam satis (ut opinor) intelligis; sequuntur partes ejus, est autem Philosophia secundum hunc Autorem, vel Naturalis, vel Civilis, Ethica, vel Politica.

Nempe *Philosophia est illi scientia de Corpore. Corpus*

Cap. II. Computatio Hobbiana. 25

pus est vel à natura compaginatum, vel à conventionibus hominum & passionibus constitutum.

Prima dat nobis Philosophiam *Naturalem*, secunda *Civilem*. Euge vir ornatissime! dic tamen, quæso, Arithmetica omnis an est pars Philosophiæ Naturalis, an Civilis? dicet forsan naturalis, quia numerat corpora naturalia. Quin & numerantur animi motus & passionibus, & quicquid est rerum earum quas ille Civiles appellat, ideòque ad neutram Philosophiæ partem est referenda, vel ad utramq;. Quin doctrina ipsa de homine ejusque ingenio ad quam partem referenda est? dicet Civilem. Verùm neque homo neq; ingenium ejus à passionibus hominum constituitur, potius igitur ad naturalem pertinebit.

Reverà, vir amicissime, multa sunt quæ adversus istam Philosophiæ distributionem dici possint, neque unquam ex ingenti dialecticorum numero, quencquam observando notavi, qui vel definiendi vel dividendi, vel methodi leges Hobbio minus intelligere visus est. Neque verò hoc ipsi multum exprobrandum judicarem, nisi & Logicam scriberet, & solus sibi sapere videretur, reliquosq; omnes contemneret. Certè non omnibus illud concessum est, & rectè sentire, & ea quæ sentiant clarè atque ordinatim proferre; imò licet hoc quidem cæteris, contemnere si velint differendi à *χρίσιν* & elegantiam, at *Logicis* & *Geometricis*, hoc minimè indulgendum, quorum opus ipsum ipsaque professio scribendi illud suscipit, ut de rebus propositis accuratè & minimè confusè dicatur. Quod ad me tamen attinet, ne infinitus sim tibi; permolestus, polliceor in sequentibus me non nisi parcè admodum istiusmodi lapsibus in hæsurum, verum passurum esse, ut inelegans sit sive Rhetor sive Dialecticus (non barbarissimos insectabor aut solæcismos) modò rectè sentias, at, verbisq; non subsit falsum,

5. Superest, ut gratias ipsi agamus, quod liceat nobis, si velimus, à sua ipsius Philosophiæ definitione dissentire; magna certè est ista indulgentia, ut relinquat nobis sentiendi libertatem ille, qui neque in natura, neque in Civitate libertatem ullam hominibus concedit; spero quòd non minor ipsi habebitur quàm debebitur gratia. Sed alia illius prosequamur.

CAP. 3:

De Vocabulis, ubi de Universali, & de Substantia Incorporea.

Quàm sint cogitationes hominum fluxæ & caducæ, quàm sit fortuita & perturbata earum repetitio; imò quàm sit periculosum, hominum etiam eorum, qui Philosophos se esse profitentur, promissis fidem adhibere, Non aliunde potius quam ab hoc authore discendum erit. Hic etenim in fine Leviathanis nova pollicitus, vix quicquam in universa Logica, præter tum sui ipsius, tum aliorum hominum multoties, cantatas, auribusque nostris importunius ingestas sententias occinit. Hoc quicquid est ferè de vocabulis, vel in Leviathanis, cap. 2 & 3, vel in Tractatus sui de Homine capite 5 & 6, vel in aliis innumeris authoribus reperitur. (Quot etenim existimas esse viros, qui de vocibus & signis, eorumque speciebus positivâ, negativâ; communi, propriâ; (sive universali, singulari,) primæ intentionis, secundæ intentionis; definita, indefinita, cæterisque quæ apud eum enumerantur speciebus ad nauseam usque disseruerunt?) Annum tu, quæto, expectabas, ut ista tractantem invenires illum, qui in intimos naturæ atque artis recessus penetravit, naturamque ipsam, in obscuro antehàc latitantem, veluti

Cap. III. Computatio Hobbiana. 27

novus, Hercules in lucem extraxisse gloriatur? imò (inquis) expectabam, ut qui de Dialectica sermonem instituit, de istis minimè sileret. Verum quid opus erat, ut Dialecticam scriberet? Nempe novum ille hujus disciplinæ nomen invenerat, quod ne homines nescirent, scribendus erat libellus hic lepidus. Hæc forsitan erat causa hujus rei præcipua, verum & aliæ non defuerunt ipsi hujus phœnomeni rationes. Nam habet & hic nova nonnulla & mira, quæ sparsim immiscenda erant, quorum (omissis istis vulgatoribus) mihi sunt aliqua leviter attingenda.

In Capitis secundi libri de Corpore (cui titulus est de Vocabulis) initio, hæc habet. *Nos neq; quantitatum sine sensibilibus & præsentibus mensuris, neque colorum sine sensibilibus & præsentibus exemplaribus, neq; numerorum sine nominibus numeralibus meminisse posse.* Video certè mihi spem omnem concordia cum hoc viro ferè præcisam esse, cui in ipsa sensatione & memoria, unde omnis ratiocinatio enascitur, dissentire contigit. Sentio ego me enim & quantitatum & colorum, profundâ nocte, ubi lumen abest, meminisse, numerosque ingentes, quales esse solent ii, quorum in Canone Mathematico usus est, melius ego vel ciphrarum vel potestatum notis intelligo, quam si nomina eorum in longum disponantur. Quin absque ullo vel verborum vel signorum visibilium subsidio, novi pueros triennes, qui modulos cantusque musicos ediscere multos valuerint eosque retinere. Si dixerit ad *memoriam utilem* esse verborum notarumque supellectilem, non litigabo; cum *absque illis* memoriam esse nullo modo posse enunciet, non hoc facit pro *ἀξιόβεια* sive Logica, sive Mathematica.

Ejusdem farinae illud est (§ 2,) ubi dicit ad *Philosophia acquisitionem*, necessarium esse ut sint signa aliqua, quibus

quibus quæ ab aliis excogitata sunt, aliis patefieri & demonstrari possint.

Concedimus ad Philosophiæ traditionem atque doctrinam, necessaria esse signa, verum, est & alia Philosophiæ acquisitio, per *Inventionem*, ibiq; rerum intellectio signorū institutionem necesse est, ut præcedat.

Nolo illud exagitare, ubi asserit (§ 4) *voces à Deo doctas, ad turrim Babel in desuetudinem abiisse*; quam ego illud nullā eum ratione evincere posse existimem, mihiq; credibile sit *labiorum* illam confusionem, de qua loquitur Scriptura, ad *animorum* potius discordiam, quam ad *linguarum* discrepantiā, esse referendam.

Cum dicit (§ 5) *Quoniam nomina signa sunt conceptuum, ideo manifestum esse signa ipsarum rerum ea non esse, nil aliud mihi prodit præter animum in eos, à quibus ista de vocabulis vel mutuatus est, vel mutuari potuit, ingratum*. Quid enim est aliud esse signum rei, nisi aptum esse (sive naturā sive instituto) ut rei istius in animo conceptum excitet? neque enim absque relatione ad conceptum significatio est ullā, etiamsi similitudo major vel minor esse possit. Potest igitur (ad mentem Dialecticorum) idem esse & signum rei & conceptum. Ubi disputatio illa reperitur, *an nomina significant Materiam, an Formam, an Compositum*, ego planè nescio, verum existimo finxisse illum ejusmodi disputationem, ut de *Metaphysicis* pro solenni suo triumphos agat.

Sectione 8. ait *duorum nominum contradictoriorum, alterum cujuslibet rei nomen esse, alterum non esse*. Atq; illud rectè. Ubi verò sententiæ ejusdem enunciandi hanc formulam, (*Idem non potest esse & non esse*) obscuram esse queritur, vereor ne contra communem hominum sensum, proterviùs hoc asseruerit, ut possit denegò

Cap.III. Computatio Hobbiana. 29

denuò in *Metaphysicos* suo pro ingenio insultare. Certe quid sit *esse*, quid *non esse*, omnes statim prolatis his verbis intelligunt; verùm quid sit illud ipsum *nomen habere*, quid sit *esse contradictorium* ex Logica petendum est, vel ab ipso Hobbio, qui in omni contradictionum genere tantoperè est exercitatus.

Atq; hæc hæctenus forsan leviora, sequuntur ea, quæ majoris sunt momenti. (§ 9.) hæc habet. viz. *Nominibus universalibus respondentes in animo conceptus esse singularium rerum phantasmata, ideoq; non esse opus ad vim Universalis intelligendam, aliâ facultate quàm imaginativa, qua recordamur voces ejusmodi modo unam rem, modo aliam in animo excitasse.*

Nosti V. C. ab iis qui animæ humanæ immortalitatem ex principiis naturæ evincere contendunt, solere illud pro argumento non contemnendo (imò irrefragabili) adduci, quòd excedat operatione suâ mens humana, Sphæram omnem corporeæ actionis, eaque perficiat quæ *neq; motus Corporei neq; phantasia* (quæ hominibus cum brutis communis creditur) *actiones* assequuntur.

Existimat hic Philosophus, sui interesse plurimū, ut *anima non sit immortalis*; hoc est quod aperto capite & verbis conceptis in Leviathane contendit, animam morte dissolvi: imò verò sententiæ contrariæ assertores, non esse ferendos in civitate, utpote turbas, seditiones, bella civilia, ex hausta *immortalitatis* opinione exoriri. Quare obviâ eundum esse censet, omnibus iis argumentis quibus uti homines solent, ut sibi vindicent, atque asserant Immortalitatem. Nos integram hanc quæstionem, quæ est de mentium humanarum natura, infra (cum bono numine) discutiamus: interea juvat demonstratoris hujus vires atque acumen experiri.

Sen-

Sententia quam ex Sectionis istius ratiocinio infert, hæc est. *Non esse opus ad vim Universalis intelligendam, aliâ facultate quàm imaginativâ.*

Atque hoc, inquis, manifestâ infert probatione, si etenim conceptus respondens nomini alicui universali sit phantasma rei singularis, (phantasma autem rei singularis sit imaginationis opus) sequetur sua demum conclusio. Imò concedo hoc sequi ex ista hypothesis: verum attende, quomodo demonstret conceptus nomini universali respondentes esse ejusmodi phantasmata.

Aut, inquis, (nempe vis hæc est argumentationis suæ) conceptus voci universali respondens est phantasma alicujus singularis, aut voce universali significatur, esse in natura quoddam universale quod ista voce designatur. Exempli gratiâ, aut conceptus respondens huic voci (Homo) est phantasma *Petri* vel *Johannis*, &c. vel est aliquis Homo universalis, cui vox ista respondet.

Quis non videt, quam sit laxum & fluens minimèque firmum illud argumentationis genus, quod nomine demonstrationis venditat novus hic homo: consequentia hæc est; aut conceptus huic voci (Homo) respondens est conceptus *Petri* &c. aut est conceptus rationis alicujus communis, in quo *Petrus*, *Johannes* ceterique conveniunt, id est, conceptus communis de *Petro*, &c. explicabilis. Non est itaque conceptus iste phantasma rei singularis, neque conceptus hominis cujusdam universalis in natura existentis, verum Idea rationis cujusdam communis omnium sub eadem specie singulorum; cujus Ideæ formatio ab imaginatione quæ singulorum est, esse nullo modo potest.

Verum, ut & mentem nostram aliquantùm explicemus, simulque strophæ ejus in lucem protrahamus, commu-

Cap. III .Computatio Hobbiana. 31

communi aliquo exemplo rationis humanae methodum in universalibus efformandis exponamus.

Proponatur ante oculos *Triangulum* rectis lineis descriptam; quod aliquis aliquanto temporis spatio contempletur; occurrit primum, *Trianguli huius imago*; huius, inquam, uti describitur, tum quoad *colorem, situm, magnitudinem, figuram* imago, id est phantasma huius objecti singularis, productum ab ipso objecto, motum in cerebro excitante. (Loquor ex mente Hobbii; ego n. aliud ad phantasma requiri posthac me sentio evicturum.) Triangulum hucusque contempletur, donec invenerit tres illius angulos duobus rectis æquales esse. Duplici autem modo hoc inveniri posse novimus, nempe vel *experientiâ* (quantum de æqualitate rerum *sensu* innotescit) exempli causâ circini beneficio angulos arcubus circularum metiendo, vel *altâ* atque *defixâ animi cogitatione*. Si priori modo hoc inveniri contingat, adhuc in *phantasia* res continebitur, & exorietur iudicium de *Triangulo isto singulari*, habere illud tres angulos æquales duobus rectis: sin *cogitatione* atque *meditatione* illud invenerit, fieri potest, ut eousque progrediatur, ut percipiat *non ex longitudine, colore, situ, figura* seu *angulorum & laterum ratione*, iudicium illud enatum sibi esse, quin *habere tres angulos duobus rectis æquales, non alia ratione quam quia triangulum est*, sive illud esse de ratione communi Triangulorum, ut ejusmodi habeant symptoma. Manifestum est, excedi hoc in exemplo vim *imaginationis*, hac etenim Ideas non facit, verum ab objectis recipit, neque objectorum sphaeram potest egredi, objectum autem nonnisi sub certa circumstantiarum (*coloris, figuræ, &c*) completionem phantasma aut excitat, aut excitare potest. Idea itaque ista communis ut *phantasma hoc singulare* excellit,

cellit, nihilq; habet in se corporeorum istorum Symptomatum, ita & vim ubi sedem habet hæc Idea, vim etiam seu facultatem imaginationis, excellere necessarium est.

Manifestum est hoc in exemplo, nomen hoc *habens duos angulos duobus rectis æquales*, denotare neque *singulare* illud Triangulum, unde enatum est iudicium mentis de æqualitate, neque Triangulum aliquod quod sit *universale*, (nempe & Rectangulum & Obtusangulum simul & Acutangulum,) verum *rationem*, vel *Ideam*, vel *conceptum*, communem omnium Triangulorum, id est de quovis Triangulo explicabilem.

Sed dices, non solet ex unius Trianguli contemplatione, venire in tale iudicium quod omnibus conveniat, verum & plurium & pluriformium accurata atque diligenti perpensione. Esto; (quanquam illud aliud sit possibile, & facile) hoc tamen manebit, phantasiam qualis Hobbio est, excedere non posse, circumstantias illas quibus objecta fuerint vestita, neque ad rerum naturas posse attingere, quæ tamen in istiusmodi conceptibus fiunt, & propositionum sive nominum universalium constitutione exprimuntur. *Manet igitur homini non obstante crassâ hujus hominis rationatione, mens sua, neque ille nos ab immortalitate detrudit.*

At detrudet inquires, Ecce enim animam humanam aut in corporum seriem redactam, aut omnino ex rerum numero exclusam. Ecce etenim eum prædicamentum corporis ita ordinantem, ut sit, nescio quid illud quod dividendum est: (neq; etenim licet illud, aut Entis, aut Rei, aut Substantiæ, aut sublimioris ejusmodi alicujus nomine, appellare) vel *non Corpus* seu *Accidens* vel *Corpus*. Quicquid igitur non est Corpus, Accidens illi est: anima igitur aut Accidens erit,

aut

Cap. III. *Computatio Hobbiana.* 33

aut Corpus; quicquid erit, erit naturâ suâ dissolubilis & mortalis.

Statui certè mecum de omni hâc controversiâ hoc in loco silere, eâque in quæstionem de animæ humanæ naturâ, ejûsque immortalitate, servatâ, illam accuratius, si mihi concessum esset, illo in loco tractare; verum cùm viderem hunc hominem non solum ubique tum in Leviathane, tum in hoc opere, illam dicendi formulam, ubi *Substantia sc. incorporea*, vel *Essentie separata*, (quomodo quicquid immortale est & æternum, Deum, Angelos, Animos indigitare solemus) tanquam ridiculam vocum se destruentium instantiam, convellentem, verùm & istam omnem sententiam, quæ Deum Spiritusque immortales supponens, Religionis atque pietatis omnis fundamentum est, summo studio atque conatu non solum indefesso, sed & importuno atque absurdo, funditùs ex hominum animis eripere, satagentem, eâque de causâ hanc ipsam Logicam, sive Computationem, ita instituentem ut nihil omnino novum aut consideratione dignum contineret, præter indecoras homini Philosopho, de rerum natura *πολύθεος & ἀσθηατα*; verbo, cùm nihil habeat Logica sua præter novum, præter hoc unum, *omnia esse Corpus*, sive, *quod Corpus non est*, illud in rerum natura non esse, illud mihi occurrebat, ipso statim initio (adeoque hoc in loco) inquirendum esse in hanc rem, eâque vel admittendam esse sententiam, si uspiam eam ipse demonstraverit; sin verò, obviam illi statim eundem, eumque principiis obstando reprimendum. Quare libros ejus omnes evolvi, loca ea, ubi de Substantiis incorporeis locutus est, singula, consideravi; argumenta ea quæsi, quibus evertere contendi

dit contrariam suæ sententiam. Verùm (quod minimè sperabam) illum hanc positionem suam indecèter primò emendicantem inveni; deinde, quod mendicis aliquando equitantibus solet contingere, statim ex præsumpto hoc principio, animo elatum atque effe-
 rum, pro more potius scurrili, quam Philosophico, in univèrsum Philosophorum, Theologorum (quidni dicam eruditòrum hominum) cætum invehentem.

Ingens est quidem locorum numerus, ubi sannis eos excipit, qui de substantiis incorporeis loquuntur; hoc illud est quod in Scholas, Academias, Philosophos antiquos, recentes omnes, tot ipsi ubique triumphos administrat. Demonstrandum igitur illi erat, ejusmodi substantias non esse; idque hoc ipso in opere de Corpore, ubi omnia esse legitimè demonstrata apud nobilissimum Patronum suum profitetur.

Attendas igitur (obsecro) & succurre mihi, vir doctissime, siquid invenias in iis, quæ hic habet, quod sententiam istam evincat; si qua vola, si quod vestigium sit demonstrationis, ostende mihi hoc anxie perquirenti. *Supponit hoc* (inquis) ipsa Philosophiæ definitio, pro concesso hoc habet ipsa prædicamentorum suorum distributio, imò verò pro fundamento hoc habet omnis sua Philosophia, tum Naturalis tum Civilis, vel (ut cum ipso loquamur) de Corpore tum Naturali tum Politico; mirum igitur nisi hoc ipsum alicubi demonstraverit.

Dicam ingenuè quid in aliis operibus ejus inveni, nam hic ubi maximè expectares, & *de 280*. In Leviathanis sui cap. 34. cui Titulus est de Spiritibus, Angelis &c. hanc rem maximè ex professo tractat; illuc igitur referendus est lector, ut de Philosophi hujus demonstrandi vi atque modo specimen sibi sumat, nisi velit mihi argumentum sincerè tradenti fidem adhibere.

Corpus

Cap.III. Computatio Hobbiana. 35

Corpus est (inquit) quod locum implet, & est pars realis Universi: cum etenim Universum sit omnium corporum aggregatū, nulla est pars ejus quæ non sit Corpus, neq; Corpus quod non sit illius pars; Corpus autem quia mutationi obnoxium est, utpote motui, quieti &c, Substantia appellatur: idem ergo significans Corpus & Substantia. Ideoq; Substantia incorporea verba sunt, quæ juncta se, mutuo destruunt, tanquam qui diceret Corpus incorporeum.

Hæc certè est ista demonstratio cujus fiduciâ se jactat adeo, & reliquos mortales contemnit omnes: & quidni habeat contemptui, cum hoc argumento effecerit ut sint penitus mortales. Ego eam in lucem produxi tibi; tu qui melioribus es oculis vim forsan aliquam argumenti cernis: mihi certè videtur illud (pro more tuo) petere, atque importunâ, ne dicam inverecondâ, postulatione arripere, quod ratione debebat potius atque argumentis extorquere.

Verum ut in lucem clariorem trahatur, duo hîc evicisse videri vult. 1. Non esse partem universi (seu Rem) quod non est corpus. 2. Quod corpus non est; substantiam non esse. Disponamus, si placet, in formam illius argumenta. Si universum sit corporum aggregatum, tum nulla pars ejus est, quæ non sit corpus. Sumendum est; Sed universum est ejusmodi aggregatum. Ergo.

Rectè nunc habet, Euge Computista! quam tu, quæso, v. d. negas propositionem? dices minorem: at oportuit te consequentiam negasse, neque enim paratus est, ut istam minorem probet; sperabat enim te saltem illud largiri voluisse, universum ex corporibus solis constare. Ideoque nullibi ullam vel umbram argumenti protulit ad illius propositionis probationem. Mirum, inquires, at forsan illud aliud argumen-

36 Computatio Hobbiana. Sect. I.

tum melius procedet; prodeat igitur in aciem.

Corpus mutationi obnoxium (utpote motui, calori, &c.) *est Corpus. sed Substantia* (nempe sub ratione substantiæ) *est Corpus mutationi obnoxium; Ergo Substantia sub ratione Substantia est Corpus.*

Nonne vides clarissimè illatum esse illud , *quod non est Corpus, Substantiam non esse*, ideòque voces *Substantia, incorporea* se mutuò destruere? dic (obsecro) denuò, quam partem negas Syllogismi? ais minorem.

At annon præmonui te magnum hunc Philosophum ad res *Majores* solum se comparasse, *Minores* autem non curare. Ego quidem (vir dignissime) ad hæc attendens difficultè me continere possum; nòsti me satis & quàm sim petulanti splene cachinno: verùm seria res est, ubi de maximarum rerum fundamentis agitur. Tale est autem negotium hoc omne de Deo, de Angelis, de statu animorum separato, & eorum (pereunte corpore) perenni existentia. Quis autem credidisset, in luce hac omnis eruditionis, ausum fuisse hominem severiores Matheseos atq; Philosophiæ musas colentem, istiusmodi nánias pro demonstrationibus venditare? qualis est hic virorum eruditorum contemptus? Ecce tamen & labra invenit Lactucis suis non indigna, illud in popinis cantant, illud in Tabernis, sustulisse hunc virum, Spiritus omnes eosq; ex natura rerum exterruisse, quare *Nunc est bibendum* — & quæ sequuntur. Ast ego existimo viris Philosophiam profitentibus non illud satis esse adversus recepta hominum dogmata, novam sententiam confidentèr asserere, nisi & argumenta adducant, quibus ostendunt se posse ex principiis evidentibus eam in cognitionem ducere, hominúque assensum ratiocinatione firmâ
con-

conciliare & cogere: Verum ad Syllogismos ejus paulò distinctiùs. In ea sententia sunt omnes sanioris mentis homines, Deum non esse ab universo secludendum, sed esse Deum, quid inde? (inquis:) inde sequetur Universum non esse aggregatum Corporum: immò verò (inquis) illud nondum sequetur; fieri enim potest ut Deus ipse (quod tamen absit ut dicamus) sit Corpus; age igitur, quid est tandem Thomæ Hobbio Corpus? *Corpus* (inquit jam supra) *est, quod locum implet, & est pars Universi, Corpus est quod spatium occupat eique coextenditur.* c. 8. §. 1. (obiter, si Corpus in extensione sua seu summa latitudine sit Universi pars, non ex solo corpore constabit Universum.) Verum Deus neque locum implet, neque alicujus rei pars est (neque totum aliquid) imò neque figuratum aliquid, neque quid motum, aut quiescens (ut ista adjiciamus) neque mundus ipse, Deus igitur Corpus non est: aut igitur Deum esse negandum est illi, illudque palàm enunciandum, quod corde eum tegere (nisi talis ipse sit, qualem Vindicem quendam esse sibi fingit (*ineptus & stultus*) nollem suspicari, aut Universum ex solo corpore constare non est illi asserendum, nisi dicere mavelit Deum ipsum locum implere, cum spatio coextendi, esse alicujus rei partem, aut totum quid esse, eaque cetera quæ recitavimus Corporum attributa ipsi Deo velit assignare. Imò vero (inquis) quidni hæc omnia vel eorum saltem aliqua Deo suo ascribat, nodique hujus implicationem effugiat?

Equidem hoc ipsi non est difficile, cui solenne est sententias se mutuò destruentes proferre: Nescio quid jam sit dicturus, quid antehac (tum in Leviathane. p. 190. tum in libello de Cive mihi p. 270) ediderit, novi: Nempe *indignè & parum honorifi-*

cè de Deo sentire eos quicunq; eum aut locum implere, aut esse figuratum, aut esse totum aut partem, motum aut quiescentem, aut esse mundum ipsum existiment. Quare mihi constrictus videtur, annon & tibi illud necesse habet, ut vel Deum esse disertè neget, adeoq; ex latebris suis prodeat; vel non neget esse substantiam aliquam incorpoream, adeoque seipsum tot dicteriorum & scommatum deliciis spoliet, & honestâ tandem cum palinodiâ valentiori succumbat veritati.

At (inquis) nondum nos rem absolvisse; nihil n. de *Substantiâ* adhuc protulimus, quo minùs hæc verba *Substantia incorporea* sibi juncta (veluti quod de Mezentii facto habemus) se mutuò destruant. Substantia enim est, quod substat Accidentibus, Accidentia sunt Motus, & Figura, & similia, (corporea ea omnia.)

Nos igitur de vocibus litigare nolumus, concedat Res esse vel saltem Rem esse incorpoream.

Verum non illud patietur sua distributio, quod Ipsi non est Corpus, illud est Accidens; Accidentia autem sunt ipsi corporum modi vel phantasmata. Dicit igitur Deum esse Accidens, ac ipsi paulò saniori existenti vox hæc Deus mundi causam significat, (Civ. 269.) vercor itaque, ne ipsi sit phantasma

Hæc igitur, ut demonstratorem hunc tandem debita cum laude dimittam, eum non adeo honestè, (quidni n. liberè jam loquar post detecta ista superiora) emendicantem cernis.

Substantiam non esse nisi quod substat Accidentibus, cum tamen illud, *per se subsistere* (sive esse, neq; tamen esse rei alicujus modum; magis sit de ratione substantiæ, eique primo & per se conveniat. Deinde *Accidentia nulla esse nisi quæ sint modi corporum* (ut putà motum, figuram, & similia) cum tamen sint etiam

Cap. III. *Computatio Hobbiana.* 39

tiam substantiarum sive rerum *incorporearum* modi, iique vel non accidentales qualia sunt Attributa D. O. M. vel accidentales, quales sunt cogitare, non cogitare; amare, vel non amare; quæ creatis rebus iis incorporeis aliquando absunt, aliquando unâ adsunt: neque ipse quicquam in contrarium, quod illud evincat, aut protulit unquam, aut est aliquando prolaturus. Interea, quoniam ex vocabulorum usu atque determinata significatione procedendum est cuique rectè ratiocinanti, illud ab ipso peterem, ut dicat quo nomine istiusmodi discursus insignire debeam; dicet opinor hoc esse philosophari: gratias; & tamen scrupulus me tenet; nam si istud sit philosophari, velim submisè ut dicat, quid sit tandem ineptire.

Atque hucusque in caput illud de vocabulis inquire visum est: quanquam etenim alia sequuntur quæ longam, dum discutiantur, desiderare orationem videri possint, ut putà Tempus non nisi propter lineam & motum, Velocitatem nonnisi propter lineam & tempus, Vim nonnisi propter solidū & velocitatem, quantitates dici. Quia tamen recurrent eadem in Metaphysicis suis cum mille aliis ejusdem farinae, nos hinc ad alia transibimus.

CAP. 4.

De Propositione, ubi de Veritate & Falsitate.

QUanquam initio V. D. cum ex voluntate tua primum animum ad scribendum appuli, illud prævidebam, fore ut mentem meam liberè exprimendo ipsi huic Philosopho non adeo forsitan placerem; illud

lud tamen sperabam futurum, ut moderationem ani-
 mi, quâ uti soleo, non omnino exuerem, adeoque mi-
 hi ipsi displicerem, sperabam jucunditatis saltem
 atque ingenuæ cujusdam hilaritatis fines non fuisse
 mihi transfiliendos, quin fugiendam orationis omnem
 acrimoniam, atque à durioribus & inurbanis (*stulti,*
inepti, reliquisq; ejusmodi quæ senum morosorum
 esse solent) vocabulis abstinendum. Ad hanc itaque
 normam res meas composui; subridere initio potui, i-
 rasci aut pugnare non potui. At caput illud jam nunc
 absolutum relegendo, inveni imminutam esse mihi
 planè improvisò & nescienti hanc animi temperatio-
 nem. Video excidisse mihi vocem illam *ineptire*, quin
 sentio redire mihi perturbatam atque injucundam
 animi dispositionem, quæ nisi omni contentione reni-
 tar, factura est ut judicis atque censoris officio omni
 neglecto, in eas redarguendi formulas prolabar quæ
 solent ab adversariis, virisq; inimicitiam Scholasticam
 profitentibus erumpere. Imò verò quid me vis facere?
 Scio quam sis ipse totus ex tranquillitate placidæque
 mentis constantia compositus; sperabam me aliqua
 tam potentis atque excellentis exempli tui beneficia
 tulisse, hunc tamen hominem ferre ulterius non pos-
 sum, adeo omnia sua vel vetusta atque ab aliis petita
 (quos pueri olim legimus) repetitione ingrata, vel
 nova atq; ab ipso vel inventa, vel potius primum affir-
 mata (neque enim ultra nudas affirmationes solet
 Philosophari) insolentiâ inani cæperunt offendere.
 Quid, quæso, à te commerui ut in elementaria ista de
Propositione ejusq; partibus Subjecto, Predicato & Copu-
ta, de propositionum speciebus, universali, particulari;
affirmativa, negativa, reliquaque Dialecticorum qui-
 bus & Scholæ Sophistarum & aulæ Collegiorum
 toties

Cap. IV. Computatio Hobbiana. 41

toties recentibus olim nobis intonuerunt, relegandum me esse judices. Vetera hæc sunt, hæc pueri crepant, millies ea volentes audivimus aut nolentes. Esto (inquis) at ipse nova in istis pollicetur, & profert. Primum, lemma capitis sexti de corpore legas, & nihil quicquam invenies quod non sit ab aliis tractatum. At ab aliis (inquis) dissentit, immò verò, & ea in quibus dissentit à Leviathane & libello de Homine (illius Cap. 4 & 5 hujus C. 5.) traducta sunt & tralata. At hoc (inquis) non prohibet esse hæc ipsa mundo nova, etiamsi neque sibi neque nobis: quare novorum specimen exhibeamus.

Incipit igitur ab increpatione Metaphysicorum, eosque initio castigandos decernit, quod verba jungant sæpe incohærentia &c. Nempe huic usui perpetuò ipsi inserviunt, ut stylum in eos acuat, ut ipsi possint — *fungi vice coris, acutum*

Reddere quæ ferrum valet ipsis ipsa secandi.

Eidem usui sunt ipsi *Aristoteles*, & Logici, neque eos neglexit; illum Articulo 15. hos Art. 18. Contractum igitur hoc modo acumen ejus contemplemur; mirum est certè quod margini non ubique inscripserit, *subtil.* & *subtiliss.* Quin cætera brevissimè perstringamus, quia leviora sunt: illud de veritate quod habet, paulò accuratius discutiamus.

Definiverunt hætenus Dialectici propositionem, ut sit vel *Sententia quæ unum de altero affirmatur vel negatur.* Vel ut sit *oratio verum vel falsum indicans.* Verùm quid ipsi est propositio? *Propositio* (inquit S. 2.) *est oratio constans ex duobus nominibus copulatis, quæ significat is qui loquitur concipere se nomen posterius ejusdem rei nomen esse cuius est nomen prius.* Bellè admodum. Ita ego nimirum

rum quendam ex iis quos odio plusquam Vatiniano prosequitur, conscientiam: hoc modo definientem auidi: Conscientia est res per quam is qui habet Conscientiam, scit se habere Conscientiam ejus rei, cujus habet Conscientiam. Annon & ipse intelligit propositionem esse orationem, qua unum de altero affirmatur &c. vel verum aut falsum indicantem? imò hoc vult sua ipsius definitio: quid igitur opus erat tot verbis inconcinnis? nempe hæc vetera sunt & recepta, & est natura Hobbii novitatis avida; quin pauca ea sunt, & ad libelli molem parùm conferunt, neque verò alia defunt ipsi rationes: verùm hæc satis.

Ait prædicatum respectu *Subjecti esse continens, subjectum respectu prædicati, contentum*. Est autem ipsi prædicatum sapissimè pars subjecti, pars igitur ipsi totum continebit. Ait *Gentes esse nonnullas*, (vel certè esse posse) *quæ vocem respondentem verbo nostro est nullam omnino habeant, quæ tamen formant propositiones solâ nominis unius post aliud positione*. Verùm quænam sint illæ Gentes, dicat, si valeat, neq; tergum vertat, sin minus, ista utcunq; inania ad pompam finxisse patiatur ut credamus.

Ait ad finem Sectionis tertiæ, *Accidentia ideo dici quòd ita res ipsas comitantur ut (exceptâ extensione) perire & destrui possint, abstrahi non possint*. Quænam est, quæso, ratio, cur extensionem solam excipiat? an non eadem est ratio figuræ, quæ est extensionis? annon æquè impossibile est corpus absque figura ac absque extensione existere? at dices manente corpore eodem figuram ejus mutari posse: quanquam hoc illi absque demonstratione (quibus ubique destituitur) non opus est ut concedamus, ostendere tamen omninò debuit corporis ejusdem in condensatione & rarefactione extensionem interim non mutari. Ait (§ 4) vo-

Cap. III. *Computatio Hobbiana.* 43

ces has *Substantia Abstracta, Essentia Separata* (cujusmodi vocibus Deum, Angelos, hominum animos morti superstites indigitare solent Philosophi,) *voces esse insignificantes*, verum ostendi capitulo superiore hoc illum absque omni rationis specie sibi que ipsi contradicendo asserere. Quin igitur quousque tandem abuteretur patientiâ nostrâ, sentio me v. d. hâc occasione datâ excandescere, ferre non possum hominis absque omni ratione insanientis importunitatem. Aiunt nonnulla ex animalibus magis generosis conspecto Gallo protinus commoveri, & sese ad pugnam accingere: movet me certè quoties cristam eum erigentem intueor: at inquis Gallus non est, quin potius ex animalium eorum numero quæ calcaribus indigent, imò ex Gallorum numero & consortio se nuper subduxit, ne ab ipsis pro meritis exciperetur, ut posset in Anglia hac nostra impunius ista effutire: nempe hoc illud est quod facit, ut incalescam; non feram, non sinam, non patiar, ut effrenatâ sua libidine ista Religionis omnis semina, imò & civilis societatis, ex juventutis nostræ animis impunè extirpentur, ut seductos liberè in fraudem illiciat. O si nunc Vindex ille hic adesset, quem in Elencho Geometriæ Hobbianæ à turpi hujus hominis injuria vindicavit nuper vir doctissimus! quam opportunè hic posset bella & pulchra ista *stultus, mendax, sceleratus* in os ipsi refundere? Nempe qui in illa est sententia, quæ astruit Deum non esse: qui Deum se credere profitetur, quin Deum non esse posse illud, cuicumque competunt Attributa corporis, & tamen nullam esse substantiam separatam, aut naturâ suâ à corpore sejunctam. Qui sceleris omnis fundamenta hoc modo collocat, dic, quæso, quibus sit nominibus insigniendus? Scio, vir modestissime, displicere tibi hanc libertatem, quin

& mihi molestum est in cœno hoc volutare : quare reprimō me, & ad alia progredior. Liceat autem mihi ordinem illius aliquantulum mutare, (neque enim illius refert, cui neque ordo constat neque methodus accurata) ut omnis de veritate disquisitioncula in finem reservetur.

Ait (§ 11. 12. 13.) propositionem Hypotheticam cum Categorica sua eandem esse (sive ipsi æquipollere) nonnisi cum Categorica est necessaria (id est, ut loquuntur alii, cum prædicatio est saltem *κατ' αὐτὴν*, verum nunquam evincit ut (ad mentem Dialecticorum) hoc ipsum non fiat in iis quæ dicuntur *κατὰ πᾶν* : si etenim vera esse concedatur ista propositio, *omnis homo est niger*, vera & illa erit, *siquid est homo, idem est nigrum*.

In §. 14. quid sit Articulus ultimus præcedentis, vel quid sibi velit, planè non intelligo. Ait § 15. contra Aristotelem, *Æquipollere duas has propositiones, homo non est arbor, & homo est non arbor*. Verùm mihi posterior hæc illud sumit, hominem esse, quod prior illa non præsupponit, quanquam de istis nolim litigare.

Alia sunt quæ reprehensioni non iniquæ sunt quam-maximè obnoxia, ut insultus in Logicos § 20. ubi rem esse Attributi sui, sive proprietatis, sive modi, causam dicere soleant, illudq; ubi cognitionem cognitionis, id est, modum modi esse causam efficientem asserit, (ne animum agnoscat) hoc tamen neq; explicet, nedum evincat, aut evincere posse videatur. Verùm nos ad doctrinam ejus de veritate transeamus, hîc n. ipsi quam maximè congruet quod de Africa dici solet, quod semper aliquid apportet novi.

Nosti (vir doctissime) summos in omni ætate viros in veritatis naturam atq; definitionem inquirentes eamque altius investigantes, in illud tandem consensisse,

Cap. IV. *Computatio* Hobbiana. 45

esse (neque n. occurrit mihi varias hominum sententias versanti, quis in istis dissensionem animi vel ^{intellectus} professus fuerit) primò res esse, esse, quod sunt, ab invicem distinctas, ideòque unamquamque rem unam esse; fieri posse easdem objecta tum intellectus tum voluntatis, ideòque veras esse & bonas.

Deinde ferri in hac objecta humanam mentem, eorum naturam atque proprietates scrutari, de iis (componendo vel dividendo) sententias intùs formare, & judicia perficere, quæ quidem judicia sicum rebus ipsis consentiant vera ea esse, sin verò dissentiant, falsa.

Atque tandem vocabulorum usu aliorumve signorum quæ visui non minus quam auditui parari possunt (uti in Scriptura Sinensium aliisque plurimis exemplis manifestum) ista animorum judicia proferre, & enunciare; illudque habere istas enunciationes, quod si sententias veras sive judicia quæ ex ipsis rebus rectâ ratiocinatione mentis vel rerum intuitu, hausta sunt, exprimant atque significant, tum veras esse enunciationes seu propositiones; sin verò, falsas eas esse. Ideoque veritatem propositionum seu enunciationum ex veritate iudiciorum eorum quæ exprimunt omnino derivari, seu, quod idem est, veritatem primò & per se iudiciorum esse, secundo & derivativè Propositionum verbis vel signis aliis enunciatarum aut indicatorum.

Cogitemus vocabula nondum inventa, sumatur in exemplum figura quam nunc Triangulum Rectangulum appellare consuevimus, feratur in hujus figuræ considerationem mens, donec affectiones ejus invenerit (quod ut absque verbis fieri non possit, nulla unquam ratio evincet) incideritque in iudicium de
compa-

comparatione *quadrati* (nondum nominati) lateris maximi, & summæ quadratorum reliquorum laterum. Fieri potest, ut rem sive figuram propositam penitiùs intelligendo judicet æquale esse quadratum illud prius, posterioribus istis simul sumptis. Hoc hæcætenus asserunt omnes mortales, verum esse illud iudicium, etiamsi nulla forent vocabula aut signa ab hominibus excogitata. Quare progrediatur, & rebus simul & notionibus ex rebus haustis nomina imponat. Constet & conveniat hominibus de vocibus, Angulus Triangulum, Rectangulum: Sit latus Angulo recto objectum Hypotenusa: sit maxima figura rectangula, quæ linea aliqua facere potest, Potestas ejus appellata: sint latera comprehendentia rectum, Crura ejus vocata: Tum demum hæc oratio *In Triangulo Rectangulo hypotenusa æquè potest cruribus*, vera erit propositio, ideo nimirum quia verum indicat, seu verum enunciat resque ipsi consentiens animi iudicium. Imò verò cum voces sint signa solummodo rerum, ut concipiuntur, unde Philosophus hic noster eas conceptuum solum signa esse voluit, & cum iudicium orationem in rectè ratiocinantibus semper præcedat, nihilq; habeat oratio, nisi ut mentem sive animi iudicium exprimat, mirum esse videatur, si quis veritatem etiam & falsitatem auferens iudicio, illam vocabulis tribuat. Quid interim noster Hobbius? Voces hæc, *verum, veritas, vera propositio, idem valent.* §7. *Veritati & falsitati locus non est, nisi in iis qui oratione utuntur.* (§. 8.) imò *veritates omnium primæ orta sunt ab arbitrio hominum, qui nomina rebus imposuerunt &c.* Sect. 8.

Leviathan c. 4. p. 15. *Verum & falsum attributa sunt orationis, & ubi oratio non est, ibi neq; verum est neque falsum.* Miraris, credo, quid sibi velit monstrum hoc

Cap.III. Computatio Hobbiana. 47

hoc assertionis: dicam, nisi me fallat conjectura. Leviathan ejus in eo perpetuus est, ut doceat (ut & libellus de Cive, uti postea erit manifestum) *nihil esse in se bonum aut malum*, imò fluentem esse omnem ejus naturam atque pro arbitrio Imperatorum incertam. Hoc in loco contendit, neque esse *in se verum aliquod aut falsum*, quinetiā ex hominum arbitrio illud omne dependere, Quo spectent hæc, nescis? quo ducant, non vides? — Nempe hoc assidue, — omnis in hoc est. Conscientiæ habenis ut per eum laxatis, lorisque effusis

— *homines aliqua ratione valerent*

Religionibus atq; minis obistere vatum.

Atque ipse quidem, si rationum aliquarum pondere & momentis ad ista premeretur, suæque modestius efferret, non esset mihi adeo intolerabilis: verum cum destituentibus illum argumentis nihil omnino ad novitatum suarum *magdō* confirmationem afferat præter confidentiam solā nitentem sui ipsius affirmatione; quis est, quæso, tam ferreus ut teneat se? Verum (inquis) hic Rhodus, hic saltus: ostendendum est illud quod objicimus.

Quare age, videamus ejus argumenta.

Affirmat veritatem soli propositioni competere, audi qua ratione.

Sectione 7 pro more suo confusè garriendo, potius quam disserendo, nedum computando, hæc innuit.

Aut (inquit) veritas & vera propositio idem valent, aut veritas in re consistit.

At in re non consistit veritas (nam Metaphysici pueriles sunt & nugatores) *Ergo.*

Expectas forsan, ut utramque probet demonstrator hic Propositionem, neque n. manifestæ sunt veritatis, verum hoc tibi mihi que faciendum reliquit, neque vel

48 *Computatio Hobbiana.* Sect. I

vel minimum probationis apposuit. Dicimus (si forsan alii in re constare veritatem opinentur) neque veritatem in re consistere, neque cum vera propositione reciprocari, verum in iudicio mentis primum consistere, deinde in oratione mentem exprimente.

Ex his tamen Corollaria deducit, tanquam ex legitimè demonstratis, ea nimirum quæ ex ipso descripsimus, *verum & falsum non esse nisi in oratione utentibus, eaq. ex arbitrio dependere.*

Verum & aliud Sectione 10. argumentum profert, unde hoc idem concludit.

Sunt nempe (inquit) quædam propositiones necessariae, quæ sunt æternæ veritatis.

Quare manifestum est veritatem (non rebus, sed) orationibus adhaerere.

Nescio certè an quisquam alius hoc poterit argumentum ita instituere, ut, quod vult Hobbius, evincat: mihi nibilo magis concludit, quam si baculum in angulo jacentem traxisset in argumentum, vel anserem agellum supervolitantem.

Nolo in illud involare, ubi præpositiones æternas præsupponit (nempe propositiones verbosas quales nusquam intellexerunt ipsi unde hæc oscitanter transulit.) Dicat modò, si qua sit ipsi Philosophiæ imò Dialecticæ vel computationis cognitio & peritia, qua ratione possit oratio æterna esse adeoque æternæ veritatis, excluso interim ab hoc privilegio mentis ipsius opere & iudicio, unde omnis in vocabula (inertia atque invalida) vis atque veritas derivatur. Imò si vera erit semper hæc propositio, Homo est animal, verum erit & iudicium illud in æternum quo notio animalis in hominis notione comprehendendi iudicatur. Cernis quam leves sint demonstrationes Hobbianæ; quantillâ ratione quantas res inferat, quam sit *negligens*

atq; Corollariorū prodigus, quā parcus demon-
strationum, quæ quidē hæcenus ostendisse visum est.

CAP. 5.
De Syllogismo.

Quum sit ab innumeris Scriptoribus tractatus hic
locus omnis qui est de Syllogismis, adeo ut im-
possibile fuisse existimarem, ut quis vel nova & ab
aliis autoribus omissa inveniret, vel vetera transfe-
rendo errorem committeret; transiliendum mihi pro-
sus hoc capitulum ad alia quæ majora sunt festinanti
existimabam; verum dum oculos huc etiam conjicio,
sentio me ingenii Hobbiani ista cogitantem penè ob-
litum fuisse, cui solenne illud & legitimum videtur,
vetera malè intelligendo larvamque quandam mutati
systematis iis inducendo, aliorum hominum inventa
ab ipso depravata, pro suis & novis gloriosè efferre
atque effutire.

Primum autem, illud notare non erit, opinor, impor-
tunum, quam sit sollicitus ut sententiis iis quas nos es-
se fædas (ut nihil gravius dicam) judicamus, disci-
pulorum suorum mentes sint præoccupatæ, hinc nemo
est quod repudiata istâ differendi formulâ quâ ho-
mo, animal, sentiens, & ejusmodi alia pro Syllogismo-
rum exemplis exhiberi à Dialecticis solent atque in
Syllogismos componi, substituat ipse novam quâ ho-
minem esse Corpus concludatur. Nempe decies sal-
tem vel undecies illud hoc capite infertur. Dices tu
pro candore tuo, non illum præ se terre hoc in loco ut
evincat integram hominis naturâ à corpore absorptâ
esse & comprehendere: ego vero mallet ut istud apertâ
hic facie conaretur, ut conferta manu de illa re statim
ageretur, nempe ab arte sua quæ est ars veteratoria nō

E

discedit.

discedit. Novit versutus homo sententias sæpe recitando paulatim imbelles juvenum animos invadere, ad illud proclives, ut pro veris admittant formulas eas dicendi, quæ fuerint ipsis repetitione crebrâ familiares. Atque hanc quidem ejus licentiam pluribus castigare vellem, nisi viderem & libelli à nobis instituti molem hoc modo excrecere nimium, & sentirem infinitum fore omnia ejus non modò quæ confusa sunt & indigesta, non modò quæ falsa sunt & Philosopho indigna, verùm ea, quæ turpe est virum Philosophum absque probatione asserere (utpote quæ ad impietatem viam sternunt) fusiùs castigare. Quare sufficiat mihi deinceps brevior nota aliqua, insolentiam ejus, occasione illud postulante, reprimere: Ea autem quæ mihi displicuerint, unà cum displicentiarum rationibus brevissimè proponere. Nihil esse mihi videtur in hoc capitulo, ubi versamur (nempe quarto lib: de Corpore) quod non sit vel quia Tritum est (ne nauseam creet) negligendum, vel quia Falsum aut puerile contemnendum. Nos pauca libemus.

In Sectione secundâ quoniam ex duabus propositionibus quæ terminum communem non habent conclusio nulla sequitur. Hoc inde sequi asserit Corollarium. *Itaq; in Syllogismi præmissis tres tantum termini esse possunt.* Verum quidem hoc esse norunt omnes etiam pueri decennes, Corollarium hoc esse ex priore sententia deductum ostendere non valet ipse jam Senex sexagenario (ut aiunt) major, neq; si sexaginta adhuc annos prioribus adunet, opinor esse valiturum.

Ait (§. 4) In omni Syllogismo illam propositionem quæ habet medium terminum pro subjecto debere esse vel universalem vel singularem, non autem particularem aut indefinitam. Certè elapsæ sunt festinanti

Cap. IV. Computatio Hobbiana. 51

nanti è memoria figuræ tertiæ modi *Disamis, Darisi, Bocardo, Ferison.*

Ait §. 6. post multa non admodum profunda, manifestum esse Syllogismum nihil aliud esse præter collectionem Summa ex duabus propositionibus sibi junctis. Quanquam autem in conclusionibus affirmativis dici hoc possit, nullam ego rationem percipio quare in negativis non sit differentiæ potius inventio. Novit certè, si speciosam calluerit Arithmeticam, signum negativum affirmativo additum Subductionis opus potius quam Additionis reverà perficere, indeque colligi quantitatem non summam, sed differentiam.

In Sectione septima novum quid assert omnibusque quotquot hætenus fuerunt, sive Logicis sive Logistis inauditum. Nempe fieri posse ut tam major quam medius terminus nomen sit negativum, atque constitui hunc legitimum Syllogismum ex omnibus propositionibus negativis.

Quin proferat igitur Syllogismum, en autem eum præstò ad manum.

Nullus homo est lapis,

Quicquid non est lapis non est silex,

Ergo nullus homo est silex.

Num tu jam credis nullum hominum esse lapidem? ego certè credo lapides à Deucalione projectos à tergo, fuisse magis Philosophicos, neque ab ipsis extrahi potuisse assertionem, qua astrueretur minor ista propositio esse negativa, quibus vel minima ignei vigoris scintillula aliquando emicuit.

Sectione 8. ait homines Syllogismum contemplantès concludere tria nomina esse ejusdem rei nomina, ac proinde conceptum respondentem Syllogismo ex propositionibus universalibus nullum esse in iis animalibus quibus deest usus nominum. At nos supra

ostendimus conceptus & conclusiones rationum speciei integræ alicui communium, non ex verbis dependere, sed tacitâ mentis operatione absolvi. Sectiones sequentes de propositionum conversione consideranti, cum nihil occurrit quod non sit protritum puerisq; notum, quamvis sibi forte nova omnia & ab ipso primum inventa videantur, hanc partem penitus omitam. Concludit hoc capitulum monendo (quod verissimum est) *docendos esse homines veram Logicam citius feliciusq; qui Mathematicorum demonstrationibus quam qui logicorum Syllogizandi præceptis tempus conterunt.* Erit igitur, opinor, Logica hujus viri ex Mathematicis suis æstimanda, Mathematica autem ejus ego in procinctu eram (uti nosti) ut ad examen redirem, eaq; pro dignitate sua & meritis tractarem, cum monuit me V. Cl. *Iohannes Wallisius*, se illud idem in manus sumpsisse; ab hoc igitur doctissimo viro, & rerum Geometricarum peritissimo ejusque Elencho Geometriæ Hobbianæ, ut & ex *Andree Tacqueti* Epistola ad *Moranum*, discent ignari, qualis & quantus sit Mathematicus *Thomas*, imò quàm sint stupore potius aliorum animalium quam ingenio humano digna, quæ ab ipso sunt inventa, & quam fuisset æquû ut iis omnibus inscriberetur sequentis capituli *incipit* quæ est, *de Erratione, Falsitate & Captionibus.*

CAP. 6.

De Erratione, Falsitate & Captionibus.

DE errore & fallaciis pro reliqui Dialecticorum gregis more dicturum, si errare & ipsum contingit,

Cap. VI. *Computatio Hobbiana.* 53

gerit, & falli aut captione uti, non est ut queramur, cum ejusdem sit & regulas & regularum exempla exhibere.

Dixerat supra, Veritatem & Falsitatem ex arbitrio hominum pendere atque oriri (nempe *ἐννοια τοιοῦτων*) hoc ipsum primâ (cap. 5. de Corp.) sectione latius explicet, imò & *ἐν τῇ* demonstret, discrimen erroris & falsitatis ostendere aggreditur, missisq; demum ambagibus sententiæ Hobbianæ hæc summa est. *Errare posse homines non modo affirmando & negando, sed etiam sentiendo atq; in tacita cogitatione; at Falsitatis nomen solum hoc genus Erroris mereri, quod à temeritate oritur, pronunciandi.*

Quod si errare sentiendo homines possint, an non & rectè sentire? Sententiam autem rectam eandem esse veram, omnes quotquot hætenus fuere homines senserunt, vel si veritas non sit, dicat tandem quid sit errori oppositum.

At (inquit) Falsitatis nomen solum hoc genus Erroris meretur, quod &c. Primum rationes ejus intueamur, quibus infertur mereri hoc nomen, solum hoc genus. Datum est, hoc nomen omni errori & illud immeritò. Cur immeritò? Nempe Falsæ neq; res neq; imaginationes dici possunt (dicere debuit neque judicia animorum. Sed ut videtur — *indulset natura Conditor illi tantum animam*. Cur autem falsa hæc esse non possint? quia nimirum *verè sunt id quod sunt* (p. 36. § 1.) itane verò? annon hoc ipsum est puerile illud & nugatorium dicendi genus quod ab ipso supra C. 3. § 7. ridetur. At inquit non promittunt aliquid, ut signa, quod non præstant. Ohe! Jam satis est, mentem ejus licebit tandem expiscari. Propositiones & verba veritatem pollicentur, neque tamen præstāt. At quid inde? fallunt igitur inquis; fallunt? ergo hac ratione

54 *Computatio Hobbiana.* Sect. I.

fallentes, non autem falsa dici merentur. Annon hoc est (quæso) pulchrè philosophari, verba fallunt, ergo falsa dici merentur, ergo sola falsa dici merentur, ergo veritas & falsitas ex arbitrio hominum omnino dependent. Dic obsecro v. d. quo nomine ratiocinationem hanc insigniam, Erroris, Falsitatis, an Captionis?

Ait (c. 3. s. 8.) *Habere orationem* (quod dictum est de Solonis legibus, cum quo tamen Solone vix quicquam habet ille commune) *simile aliquid tela aranearum, nam hærent in verbis, & illaqueantur ingenia tenera, fortia autem perrumpunt.* Mirandum est certè in Corpore tam vetulo lentoque tenerum adeo ingenium esse ut hanc telam minimè perrumpat; imò quid est, quæso, quod ipsa aranea venenosum animalculum suâ ipsius telâ complicatur? Sed nobis non licet esse tam otiosus. Ad cætera pergamus.

Erroribus (inquit) qui contingunt ex signis naturalibus, occurreret primò & ante ratiocinationem, si ad hujusmodi conjecturalia comparemus nos tanquam ignorantes, deinde per ratiocinationem. Expectas, opinor, aliquid quod sensum expleat, at frustra illud quidem, imò tibi incumbit ut illud præstes, qui vigilans & vegetus legis quod ipse vel dormiens (uti de ipso dixisse fertur Cartesius) vel oscitans saltem scripsisse videtur.

Fallacias in materia propositionis enumerans. § 2. Primam esse ait ubi nomen Corporis cum nomine Accidentis copulatur. Benè illud quidem, videamus exempla; exemplū hujus est *cum dicitur Intellectus intelligere.* Intellectus igitur est corpus; atque hoc obiter, atque aliud agendo insinuandum est, — Nam si non aliquà nocuisset, mortuus esset. Quòd si reverà tantus sit Philosophus quantum se esse arbitratur, si sint omnia legitimè ab ipso demonstrata (quod ad Patronum nobilissimum virum in epistola ad illum

jacti;

Cap. IV. *Computatio Hobbiana.* 55

jactitat) ostendat modò ubi hoc demonstraverit, ne irrita videatur & vana hæc ipsius jactatio, ne Philosophia hæc omnis non modò respuenda, sed & conspuenda videatur.

§ 4. Pro exemplo secundi generis Fallaciarum, ubi nomen Corporis cum nomine phantasmatis copulatur, hoc affert. Ubi dicitur *Lumen esse corpus vel mos veri*. Est igitur ipsi lumen phantasma, mirum autem mihi videtur resillire à speculo phantasma & quoquo quis modo velit reflecti, quin lente aliquà collecta in unumque aliquod punctum projecta phantasmata ignem prorsus generare, motumque partium minimarum rapidissimum in flamma concitare.

§ 8. *Sexto modo* (id est, nomen phantasmatis cum nomine Nominis copulando) errare eos ait qui dicunt *Ideam alicujus rei esse Universalem, tanquam esset in animo Imago quedam hominis simpliciter &c.* Verùm error in eo consistit, quod ipse nunquam intelligere potuit quid esset notio universalis. Nam ubi dicitur e, g. *Omnis homo est animal*, neque intelligitur esse hominem aliquem simpliciter, neque Ideam universalem esse alicujus rei Ideam, seu Ideam à re aliqua in animum impressam; verùm illud denotatur excessisse mentis opus, Imaginum omnem sphæram, quæ à sensuum objectis creantur, atque evedtum esse animum in apprehensionem notionis seu rationis cujusdam communis, quæ est unicuique homini congruens.

At errant (inquit) *septimo modo* (propositionem cum nomine copulantes) qui *Ideas alias in intellectu, alias in phantasia ponunt; quasi alia esset Idea hominis que orta à sensu in memoria retinetur, alia que in intellectu est, quando intelligimus hominem esse animal.*

Imò verò. Idea quæ in memoriâ retinetur est eadem ipsa quæ oritur à sensu, Ideam quæ oritur à sensu

56 Computatio Hobbiana. Sect. I.

circumstantiæ sive accidentia objecti (*Magnitudo, Figura, Color, Positio, & si qua sint ejusmodi*) comitantur, neq; efficere potest aut sensus aut memoria ut aliter se res habeant. At Idea quæ est in intellectu, (si ita nos loqui requirat) est notio ubi omnes circumstantiæ secluduntur atque rejiciuntur, seu apprehensio *rationis* sub negatione omnium accidentium, & circumstantiarum, quæ singulorum objectorum Ideas vel constituunt, vel comitantur; *rationis* (inquam) in quâ omnia speciei alicujus singularia conveniunt.

Cernis interim V.D. quanto molimine, quantâ sive constantiâ sive pervicaciâ, imò quàm importunè contendat argumenta immortalitatis convellere;

— *tu fortè rearis*

*Impia cum rationis inire elementa, viamq;
Endogredi sceleris.*—

Neque ego quidem paratus jam sum, ut possim eum hoc crimine levare, adeo perpetuus in eo est, ut brutis animantibus nos annumeret fecitq; demum, hoc opere penitiùs considerato, ut ferè credam è nobis aliquem ea non nisi brevi intervallo superare.

Sect. 10 ait, *omnem propositionem universaliter veram aut definitionem esse, aut partem definitionis, aut esse ex definitionibus demonstrandam*, dicat igitur an hæc propositio, *quæ eidem sunt equalia, sunt inter se equalia*, aut non sit universaliter vera, aut sit definitio &c, aut sit ex definitionibus demonstranda, quòd si ex definitionibus eam demonstraverit, ego (nisi tu aliud censes) eum è pecudum numero eximendum esse judicarem.

Caput concludit hoc monito, *artem ratiocinandi non præceptis acquiri, sed usu & lectione eorum librorum, ubi omnia se veris demonstrationibus transiguntur*. Imò verò & fugiendo ut pestem libros illos qui rerum accuratam tractationem præ se ferentes, atq; demon-

stratio.

strationes ubique profitentes, paralogismis interim scatent, nihilque in iis quæ maximè demonstranda forent, habent, præter petitiones principiorum absurdas atque indecentes. Cujusmodi autem sint libri Hobbiani, specimina quædam exhibendo ostendimus, quin porro ostendere conabimur.

C A P. 7.

*De Methodo, ubi de Analytica Geometrarum,
nonnulla.*

VEreor ego admodum V.D.ne quod mihi ipsi jam antehac accidit, illud tibi etiam contigerit, nempe non sine molestiâ in istis Dialecticorum tricis versari; atque ego quidem magnopere cupiebam ab istis, si instituti ratio pati illud potuisset, abstinere; imò renuente hucusque genio, animoque plurimum resistente me ista tetigisse ex leviori atque fastidiosâ summorum apicum rasurâ, cuivis me minimè monente constabit: Eò magis certè tibi mihi que gaudendum esse existimo, ad finem hujusmodi nugarum Dialecticarum properare orationem, nihilque manere nisi ut eorum aliqua notemus, quæ in Capitulo de Methodo aut imperitè, aut aliquo modo incommode ab ipso prolata fuisse existimemus.

Tale autem illud mihi videtur quod habet initio Sectionis secundæ, ubi ait, *omni Methodo commune hoc esse ut procedatur à cognitis ad incognita, id quod manifestum est ex Philosophia definitione.* Quis illi, quæso, hoc indulsit, ut ex definitionibus suis contra veritatem ipsam & communem omni-
um

um hominum sensum & cognitionem, conclusiones eliciat? imò verò ex accurata atque profunda rerum contemplatione (ubi de rebus agitur, non de hypothesis) eruendæ sunt definitiones, non autem ex præsumptis definitionibus contra rerum naturam, earumque veras rationes atq; genuinas, disputandum. Ait ex sua ipsius definitione Philosophiæ, sequi *omnem methodum procedere à cognitis ad incognita*, utrum hoc ex definitione suâ sequatur, nullus ego inquirō: hoc solum volo, excludere Mathematicum hunc ingentem, methodum eam quâ omnia ferè sublimiora in Geometriâ atque Arithmeticâ inventa fuisse constar, *Analyticen nimirum Geometrarum*. Vindex ille Academicarum, quicumque celato nomine is fuerit, ausus est ex paucis quibusdam in Leviathane ab illo elapsis, tanquam ex pede Herculem metiendo, illud suscipere, non esse Thomam hunc nostrum è numero Geometrarum profundissimorum; verùm naviculam illam suam quâ in novum orbem se navigaturum credidit, ventis ludibrium debuisse: quid existimas dicturum eum fuisse, si hæc vidisset? Nōsti tu (vir clarissime) magnam Analytices Geometricæ partem, imò maximam ex istis duabus (*Zeteticâ atque Poristicâ*) exhauriri; harum autem opus atque professio illud est, ex ignotis ad notiora animum deducere, unde per Syntheseos regressum possint ex adverso ignota à notioribus concludi atque demonstrari. Nempe accidere hoc sapissimè, nōrunt ii quicumque in problematis solvendis aut Theorematis demonstrandis versari solent, destitui eos plerumque mediis iis quibus ipsi possint problema Syntheticè construere, aut Theorema propositum ostendere, quare viam capeffunt retrogradam, & naturali demonstrationis viæ adversam initium sumunt ab ignota aliqua quantitate, vel

Cap. IV. Computatio Hobbiana. 59

ex problematis ipsius tanquam soluti suppositione, factaque per continuas (quantitatum variis modis comparatarum) consequentias resolutione, veniunt tandem ad æquationem inter datas duas aliquas sive notas quantitates; hoc quidem habet omnis Analytice Geometrica. Proponuntur aliquando fortuito quædam propositiones seu Theoremata: nescitur an vera, an falsa fuerint; hoc quæritur. Supponuntur igitur sive vera sive falsa esse, eruntur ex positione ista consequentia, si in vera deducunt plerumque vera, si in falsa, semper esse falsa concluduntur ea enunciata, unde orta est resolutio, quæ quidem Analytice pars *Poristice* vocatur: verbo, hoc habet utraque Analytice, ut ab ignotis ad notiora deducat, unde possit Synthesis (quia convertibilia sunt Geometriæ axiomata) ab istis notioribus, ubi desinit Analysis, incipiendo, ad eorum, sive Theorematum demonstrationem, sive problematum solutionem, quæ fuerant quæsitæ, assurgere. Ista cum nescivisse, dum hæc scriberet, hic autor videatur, non est ut mireris clarissimorum v. v. Iohannis Wallisii atque Andreæ Tacqueti Elenchum atque animadversiones legendo. Perplexum est illud mihi quæ admodum obscurum quod habet initio §. 5. *Causa universalium (eorum quorum causa aliqua omnino sunt) manifestæ sunt per se, sive naturæ (ut dicunt) notæ; ita ut nulla omnino methodo indigeant. Causa enim eorum universalis una est, motus: nam & figurarum &c. causa est motus, quanquam qualis ille motus sit sine ratiocinatione cognosci non possit.* Quænam est hæc animi confusio in ipsa de methodo tractatione? Quænam sunt (quæso) illa quorum causæ aliquæ non sunt? Quid est quod dicat initio causas esse universalium easque per se notas; deinde eam unam esse, nempe motum? Quid est quod

quod causas universalium manifestas esse asserit, ita ut nullā omnino methodo indigeant, post verò cognosci non posse sine ratiocinatione, qualis sit motus ille, qui sit causa Figuræ alicujus, Coloris, Soni, &c. Dices forsan hanc esse mentem suam, ut asserat causam omnium varietatum esse motum, atque hoc esse per se notum, sine ratiocinatione; causas autem varietatum in objectis esse motuum varietatem, quæ ratiocinatione indiget ut investigetur. Et ego quidem credo tale quid illum aliquando loqui voluisse; at nescio quomodo errat fluctuatque illi oratio sua; & vix unquam contingit, ubi in verba similia incidit (ut hic, ubi causa universalium, & causa universalis ab ipso nominantur) ut seipsum absque sensus deliquio expediat.

At (§ 7) possibile non esse absq̃, vocabulorum vel notarum usu progredi (ratiocinando) à principiis, uno aut altero Syllogismo longius. Temerè hoc quidem minimèque philosophicè; quin difficile potius hoc esse dicere debuisse videtur.

Non illud mihi profectò cum ratione dictum videtur, ubi asserit (§ 13.) Definiri (satis ea nomina quæ res significant, quarum causa aliqua intelligi potest (ista enim sunt quæ prioris generis esse illic determinatur) si oratione brevissima fiat, ut Idea earū clara in animo excitetur. Et quod dicit in fine (§ 14.) definitionem esse propositionem cujus predicatum est subjecti resolutionum ubi fieri potest, & ubi non potest exemplificativum. At ista exemplificativa non sunt mihi crede definitiones, etiamsi causa intelligi non possit: quòd si possit intelligi, debet illa Philosopho res accuratè tractanti in definitionibus curæ esse ut intelligatur, ut tradatur. Quanquam etenim omnis definitio accurata claram excitet in animo defi-

Cap. VII. Computatio Hobbiana. 61

definiti Ideam, nempe inde concludit, quæcunque vocabula claram excitent Ideam, definitionem statim Idealem comprehendere.

Transio quod habet de Euclidis principiis (S. 13.) nempe axiomata Euclidis principia non esse, sed esse demonstrabilia ex definitionibus. Nempe tentavit ille Axioma hoc *totum est majus sua parte*; ex definitione Totius & Partis demonstrare (G. 8. S. 25.) & respicere solet ad pauca, unde orta est ipsi facilitas pronunciandi; quod de uno se invenisse credidit, illud omnibus convenire existimavit; quod nullam tamen ratione evicturum eum aliquando esse credo.

Sectione 16, ex definitione demonstrationis illud deducit, *omnem legitimam ratiocinationem quæ initium habet in principiis veris esse scientificam & veram demonstrationem*. Rescinduntur obiter ab illo omnia quæ fidei sunt, in iisque omnis ratiocinatio; Scientifica ea non esse, veram demonstrationem non habere, millies in Leviathane vel inuit vel profitetur; quin igitur vera ea esse ut neget (sibi ipsi, si constare velit) est necessarium. Imò cujus est hæc vox l. p. 238.

Quicquid verum est, idem demonstrare se posse putat Geometria recens, sedatior facta, non item; habetq; vino illud simile, recens ut inflat. Quid primum dicam, V.D. quid postremum? quomodo me hac occasione geram? Soleo nimirum errores ejus infinitos, modò nihil illis subesse impietatis videatur, sedatus intueris verum cum in religionem eum sive rectè machinantem sive apertè involantem cerno, condonabis hoc spero mihi si paulò vehementius commovear. An in illo ingenium, an judicium, an memoriam, an religionem, requiram? in quam quæso partem vehetur oratio? imò verò

62 *Computatio Hobbiana.* Sect I.

verò (vir dignissime atque moderatissime) sentio non modo severitatis, verum & crudelitatis summa futurum illud ab ipso exigere cui non est solvendo, Quin patiamur ipsum absque hac molestia atatem agere, sive nimium senescere contigerit, sive repuerascere.

Fecit hæc animi perturbatio, ut alia in hoc capite multa quæ falsa sunt aut temerè enunciata omitterem: tale est illud p. 52. § 15. 3. ubi dicit, *de definitionibus an sint admittenda necne non esse necesse disputare.* Nempe hoc illud est quod sibi postulare perpetuò videtur, ut pro libito possit definire, ut inde ducat Corollaria: verum quis est, qui nesciat quodcunq; libet hoc modo inferre. Solent Mathematicis studiis dediti non illud curare quibus nominibus insigniantur res suæ, modo termini quibus utuntur, definitione clara explicentur: verum libertatem hanc ad Philosophiam transferre omnemque ejus partem, ubi ex nominibus jam constitutis quærantur rerum naturæque ipsius explicationes, hominis est parum admodum sive naturam sive Geometriam sive artes reliquas sive hominum consuetudinem intelligentis. Verum & alia habet quæ faciunt ut Geometriæ si non ignarum, attamen non nisi parçè admodum scientem eum existimemus. Dicit (§ 19) Geometras vocare artem illam quam nos supra descripsimus (initio hujus Capitis) Logisticam; quoniam sint illi Geometræ qui hoc nomine hanc artem insigniant, mihi certè non occurrit neque ipse (credo) novit. Est hæc ars Geometris iis in quibus mihi versari contigit ars *Analyticae*. *Logistica* autem vocatur ars ipsa computandi (quod fecisse credo ut Logicam vocaret computationem) sive illa in numeris, sive in speciebus atque literarum notis exercetur. At methodum Analyticam neq; exerceri neque intelli-

Cap. IV. Computatio Hobbiana. 63

intelligi posse, nisi ab iis qui in Geometria versati sunt, totusque in eo est (tum in hoc loco, tum infra, postquam ad caput 20 perveniens de Analytice loqui didicit) ut Analyticen (istam cujus partim restitutione, partim inventione, factum est ut plus Geometria paucorum annorum spatio, ætate nostra & parentum, accesserit quam multis antea actis sæculis,) vilem omnino reddat & contemptam. Sed nunquam (spero) excutiet è studiosorum manibus atque studiis Analyticen illam Geometrarum, speciosamque quantitatum designationem. Facit hæc Ars ut unusquisque impensius aliquantò in eo versatus, non solum ea quæ à veteribus inventa sunt & demonstrata, facillimè possit intelligere, verum & alia insignia pro re nata invenire. Dedit hæc ars *Vietas, Ghetaldos, Harriotos, Oughtredos, Cartesios, Wallisios*, nomina æternitati consecrata: quin & nova dat indies huic Inclytorum numero adjicienda. Dedit artis hujus ignorantia & neglectus, *Orontios, Scaligeros, Severinos*, & hunc demum autorem paralogysmis in omne ævum insignes futuros, sædisque infames Tetragonismis. Certè duas esse res constat (præter paralogysmos infinitos summamque arrogantiam quibus omnis ferè pagina impletur) quæ facturæ videntur, ut neq; inter bonos neque doctos viros sit Hobbius olim nomen aliquod insigne habiturus. Importuna nempe Spirituum, animique immortalis (absq; omni rationis specie) rejectio, & insignis ἀναγωγία.

Discite Analyticen moniti, & non temnere Divos.

Atque hæc hætenus V. D. summas rerum oras lambendo in Logica Hobbiana, sive Computatione, animadvertisse sufficiat. Transeo nunc ad secundum illud rerum genus quod erat initio propositum, cui titulus est *Philosophia prima*.

SECTIO II.

De prima Philosophia.

CAP. I.

*Ubi animadversiones in Hobbi caput septimum libri
de Corpore, de Spatio, Tempore,
Contiguo, &c.*

Scilicet asserui jam me fugique catenas, à Dialecticis extricavi me telamque istam perrupi, ut ad sublimiora tandem assurgat paulatim oratio, atque in his quidem si præclare eum se gessisse invenerimus, si sitim illam qua in naturalium rerum scientiam anhelamus, sedatam ab ipso senserimus atque restinctam, noli obsecro ut ipsi sint apud te dedecori, quæcunq; adhuc liberius in eum animadversa sunt. Magnam certè rem aggreditur Philosophiam naturalem ab imis fundamentis excitare; à notionibus communibus qualia esse solent axiomata Geometrarum, ad maximarum rerum atque complicatissimarum intellectiorem, nos, methodo non minus accurata quam est Euclidis in elementis (ubi nemo unquam tot sæculis paralogismum invenit) adducere. Hæc si præstiterit manebit eum certè laus insignis, etiamsi in Dialecticis non fuerit adeò egregius, multa certè habebit quæ se defendunt, uti illud, non omnia possumus omnes; pluribus intentus minor est ad singula sensus; Bos lassus fortiter figit pedem; & siqua sint similia; verùm inquires, quid si nos hoc etiam loco deluserit, nihilq; hinc reportemus præter stomachum vel bile vel ad-aucto sitis ardore laborantem? tum certè nobis recurrendum erit ad Philosophiam, ut injuriam hanc patienter feramus, cum levius fiat patientiâ quidquid corri-

Corrigere est nefas. Quanquam igitur & illud difficile sit viro, saltem in Stoicorum disciplina minimè exercitato, continere se provocatū atq; delusum, tentabo siquid possim, & in ea quæ meam non excitaverint assensionem, brevissima oratione inquiram.

In Epistola Dedicatoria hæc habet. *Confero siquam fiduciam scripti scribentis timor, respectatio, diffidentia præstare potest.* (Annon autem mirandum est nisi timor & diffidentia præstent fiduciam?) *in tribus libelli hujus partibus prioribus ex definitionibus omnia esse legitimè demonstrata.* Pertimescere incipio hæc intuens. Tertiam hujus libelli partem, quæ Geometrica est, primò omnium (pro more eorum qui Mathematicis delectantur) perlegi, legerunt eum & alii, judicium tulerunt clarissimi viri D. D. *Wallisius & Tacquet*, forsan aliique. Atque ipse jam totus sum in metu, ne forsan elabatur ex animo spes olim de hoc opere concepta, effugiatque denuo & se abscondat natura, cujus ipsius intuitum obtinuisse se professus jam diu est Hobbius, eumque nobis pollicitus. Metuo certè ne sit mihi illud querendum, nempe quod

Malo me Galatea petis lasciva puella,

Et fugit ad salices. —

Siquid etenim possit ad metum hunc creandum scribentis arrogantia, reliquorumque omnium qui unquam extiterunt hominum contemptus (de qua re initio hujus Epistolæ nonnulla) siquid falsi sæpissimè & fallentis experientia, siquid hominis efferentis sese in rebus iis, ubi maximam de se opinionem & conceperat & in discipulis suis excitaverat, lapsus insignis & in æternum pudendus, metuendum esse sentio, ne nos fallat, (egregia expectantes) hæc omnis Philosophia Hobbiana. Verùm

66 *Computatio Hobbiana.* Sect. II.

inquis, non esse conjecturis atque ariolationibus immorandū: quin igitur de re ipsa agatur, & pensitentur aliquantulum definitiones istæ, quæ Philosophiæ universæ fundamenta esse voluit.

Incipit igitur Philosophiam naturalem à *ficta universi sublatione* (§. 1.) rerumq; (id est corporum) *annihilatione*.

Cernis statim initio magnum à nobis (imò quod imaginatione præstare non possumus) eum postulare, nempe ut cogitemus, id est, imaginemur corporum seu mundi ipsius annihilationem. Cum nullo interim phantasmate apprehendi possit vel rerum è nihiloeductio, vel eorundem in nihilū reditio: imò verò mentis illud opus est, non phantasiæ, si modo poterit comprehendī; & novi ego plurimos, qui hunc autorem esse credunt.

Agroti veteris meditantem somnia, gigni

De nihilo nihilum, in nihilum nil posse reverti.

Quare noluissem ut illud statim initio à nobis exegisset; sed fruatur hoc concessio: gestio videre orientem hinc Philosophiam tanquam ex Chao olim universum. Quid tum porro?

Tum inquit (§. 2.) *Si meminerimus, seu phantasma habuerimus alicujus rei quæ extiterat, nec consideremus qualis ea erat, sed simpliciter quod erat extra animum habemus, quod appellamus spatium imaginarium, — Est enim spatium phantasma rei existētis, quatenus existētis.*

At multa sunt, quæ faciunt, ut vel veritatem vel uberiorem saltem terminorum explicationem in ista definitione requiram. Primū enim etsi usus jam ante sit sæpius, & deinceps usus sit per omnem hanc primam Philosophiam vocabulo *phantasmatis*, nondum tamen *phantasma* definivit, cujus tamen natura magis in profundo latet plerumque, quam earum re-

rum

Cap. I. Computatio Hobbiana. 67

rum quæ eo nomine definitur. Ego quidem in ea sum sententia, non illud opus esse prima simplicium rerum genera definire, ea nimirum quorum claras atque distinctas notiones habemus, cujuscmodi sunt motus, duratio & similia, verum licere in disciplinis de iis rebus accuratissimis, à notis earum affectionibus ad ignotiora absque omni Logicæ dispendio statim procedere: verum si illa definire velimus, cavendum illud esse summoperè, ne quis notiora per magis ignota velit explicare. Tale autem hoc in loco contigisse sentio: quid sit spatium omnes ferè apprehendunt; quid sit phantasma Hobbius ipse & nobis jam nescire videtur, & sibi ipsi non multum antehac (ut audiendo accepi) ignorasse visus est. (Nempe durior erat ipsi penèque fatalis libelli hujus partus, diuque sub operis obstetricibus laboravit.) Petenti mihi causas, responsum est, contigisse hoc partim ob Quadraturam non benè conceptam, partim ex eo quod quid esset sensus (& proinde quid phantasma) nescire se profiteretur. Imò verò excusa est hæc pars operis aliquot annis antequam ab ipso in prælum prodiret capitulum illud deensione; prodisse autem existimandum est illud quamprimum ab ipso conceptum & formatum est, ita ut sensus ipsius, terminos in prima Philosophia per phantasma definientis, hic fuerit; spatium, tempus, &c. est quid ignotum. Sed missa hæc faciamus, & quæramus quid ipsi tandem sit phantasma, sine cujus rei cognitione latebit earum rerum natura, quæ esse phantasmata definiuntur. Parte 4. cap. 25. §. 3. *phantasma* (inquit) *est sentiendi actus, neq. differt à sensatione aliter quam fieri differt à factum esse.* Quærendum itaque est quid sit sensio. Est autem *Sensio* ibidem §. 2. *ab organi sensorii conatu, ab extra, qui generatur à conatu ab objecto versus interna eorū, aliquandiu manens*

nente, per Reactionem factum Phantasma. Sensio est factum Phantasma; & Phantasma est actus sentiendi: Umh! vereor ne hæc se destruant invicem, priusquam ad istud Capitulum nostra perveniat oratio. Sed datam Phantasmatum definitionem Spatio applicemus. *Spatium igitur est actus sentiendi ortus à conatu rei existentis quatenus existentis, ad intra.* Præclare hoc quidem, quid interim est Res? Res est corpus aliquod, quæ est pars Universi. Est igitur Spatium actus sentiendi ortus à conatu alicujus Corporis. At ego existimabam hoc esse Phantasma Corporis istius: Est igitur Spatium corpus quodcunque. Non (inquis) quia non est Phantasma corporis, ut corpus est; sed corporis ut Existentis. Benè habet: hoc saltem debet concedere, res existentes quatenus existentes Phantasmata excitare. Verùm enimverò non alio modo Phantasmata excitantur, quàm ut sensum feriant objecta, neque sensum feriunt sub ratione existentia nudæ, verùm sub rationibus circumstantiarum, motûs, figuræ, positionis, &c. quæ illa comitantur: Impossibile est itaque, cum Phantasmata ab objectorum operatione (per reactionem, ut supponit, ab ipsis objectis omninò dependentem) generentur, ut sit aliquod Phantasma existentis quatenus existentis. At (inquis) annon sentimus nos ista percipere, nempe considerare nos posse corpus aliquod, non ut est circumstantiis vestitum, verùm iis omnibus rescissis, sub eâ solùm ratione ut est? Imò verò possumus, & inde exorta sunt vocabula ista essentialia, existentia, reliquaque ejusmodi, quibus Gentes aliquas esse, vel saltem esse posse, quæ careant, suprâ eum dicentem introduximus. Habemus (inquam) hujusmodi notiones; Phantasmata hujusmodi ut habeamus, ex iis quæ aliquoties suggestimus, est impossibile.

bile. Concludendum est igitur, si quis rectè velit ratiocinari, vim esse quandam in homine, quæ Phantasiâ excedat: quod unum conclusisse, ejusque conclusionis necessitatem indicasse, est omnes ferè Philosophiæ Hobbianæ nervos incidisse. Interim definitionem istam, quâ dicitur *Spatiũ esse Phantasma rei existentis*, & in seipsâ obscuram, imò & falsam esse evicimus.

§. 3. Tempus definit, quòd sit *Phantasma motus*. Nempe grande quid sonat istud vocabulum Phantasma, habetque quod obscuritate suâ stupefaciat, ipsoque sono attonitos reddat imbelles juventutis animos: quæ sola mihi ratio videtur, ut ipsi sit adeò in deliciis. Coincidere concedit definitionem istam cum Aristotelis illâ, *Tempus est numerus motus &c.* Quid igitur opus erat ab illa recedere? imò verò (inquit) tenuia sunt ista & mollia vocabula, nos — paulo majora canamus. At mihi quidem videtur ipse non Aristotelem, multò minus rei naturam intellexisse; neque n. est durationis continuæ (in quo quicquid naturale quod est, in tempore consistit) eadem notio, quæ est motus; seu (quod idem est) duratio non est motus; atque hoc quidem adeò manifestum est, ut ostensione non indigeat: Permanere in statu aliquo, non est moveri. Cum igitur Aristoteles aliique Tempus numerum motus esse definiverunt, non illi de ipsâ rei naturâ locuti sunt, sed de mensurâ ejus potius, quæ sit usui humano accommodata. Durarent certè res & manerent, etiamsi motus omnis cessaret; verum durationem ipsam metiri abique motu non tam facilè possumus. Verbo, cum annis, mensibus, &c. rei alicujus durationem metimur, annosque & menses diurnis Terræ revolutionibus computamus, non illud intelligimus, revolutiones Terræ inire rationem durationis, de qua quæstio instituitur, verum rem (exempli gratiâ) vel permansisse vel præteritam fuisse, i. e. vel rem durasse,

vel mundum absq; re ista durâsse, donec Terra tot super axem suum revolutiones compleverit: non est igitur Tempus phantasma motûs, magis quam Angulus est phantasma arcûs circuli quo mensuratur, quod tamen nemo sanus dixerit. Verùm in istis notandis tempus insumere noluissem, nisi maximam de xpi beatæ pollicitus nihil ipse interim præstaret.

Multa certè habet in hoc capite, quæ vel subtilissima sunt, vel erit mirandum in opere tam sublimi locum invenerint. Ait §. 5. *Notandum esse per divisionem spatii vel temporis non intelligi unius temporis vel spatii ab altero distractionem, vel divulsionem; quis enim hamisphaerium ab hamisphaerio, vel horam primam à secunda dirimi posse putat? Annon profunda sunt ista? annon summâ admiratione digna? Placent, opinor, tibi, habebis & alia.*

Numerus (inquit §. 7.) est unum & unum; vel unum, unum, & unum, & sic deinceps. (Poterat ad viginti procedere;) quæ tamen vel falsa sunt, vel puerilia. Placuit, opinor, tibi quod habuit de divulsione temporis (§. 5.) sensit hoc Magus hic noster, quare eam omnem notionem repetit §. 8. dicitque Tempus vel spatium componere, non esse partes eorum (in manus) sumere, easq; sibi admovere ut se mutuo contingant. Quin igitur cavendum erit tibi V. D. ne tempus aliquando hoc modo vel spatium componere nitaris.

Hinc inquit §. 9. manifestum esse. *Cum res aliqua divisa sit, tot solummodo ejus partes esse quoties sit divisa. Verum quid, est ut Geometriam atque Aritmeti- cam ab illo expectemus, qui neque digitos suos enumerare meminit? Si foret in manum Philosophi elegantem, findendus pes alter istius animalis quod ipse abigere se dicit, cerneret quatuor divisionibus quinque digitos fieri: non ergo tot solummodo esse partes, quoties divisa est ungula. At (inquis) pueris*

Cap. I. Computatio Hobbiana. 71

lis est ista exceptio, neque opinandum est ipsum ita sensisse prout verba sonant; fortasse, neque admodum renitar. Interim hæc ea sunt de quibus *timendo, respectando, diffidendo*, fiduciam concepit, poteritque illud perpetuo regeri, benè eum & rectè forsan sentire, etiamsi perversa, falsa, puerilia eloquatur.

Transio ad illa quæ habet § 10. de Spatio, & Tempore, Contiguo, & Continuo; ubi obiter dejicitur ipse (à quo tamen religionem hausisse videtur) cujus est hic versiculus — *tangere enim & tangi nisi corpus nulla potest res*. At (inquit) *Contigua* sunt immediata, Continua quorum est aliqua pars communis. Supponimus ex atomis omnia constare, neque ipse aliter sentit, quæ tangere se possunt, ingredi se non possunt: ex hoc præsupposito expectamus, ut Contigui atque Continui differentiam explicet. Contigua (inquit) sunt immediata, rectè; Atomi itaque sibi invicem immediata contingere se dicuntur, rectè & planè intelligibile; at quid est interim Continuum? Dicuntur (inquit) Continua quæ partem habent communem. Potest igitur illud esse Continuum quod ex solis constat Contiguis. Sumatur, exempli causâ, granorum quorumlibet quævis mensura, contigua inter se erunt granula quæ sunt immediata; itaque unumquodque granulum non nisi aliis aliquibus Contiguum. Verùm si sumantur partes mensuræ initio sumptæ, quæ semissè excedūt, erunt duæ istiusmodi partes continuæ dicendæ, quia partem aliquam necesse est ut habeant communem. Pulchrè admodum! Satis est, mentem ejus intelligimus: at (inquais) non loquitur hîc de Corporibus Contiguis, aut Continuis. Imò, inquit, horum est eadem ratio, quæ est spatii. C. 8. §. 9. Reliqua quæ hoc capite sequuntur (numerum e. g. non esse infinitum, neque plura spatia infinita, & de quan-

titate in infinitum divisibili) & vetera sunt, & vera esse iudico. Transeo ad sequentia.

CAP. 2.

*Examinatur operis Hobbiani de Corpore
Caput octavum.*

NE sit phantastica & vana omnis ferè Philosophia Hobbiana, exinde metuere incipio, quòd omnium ferè rerum definitiones, quæ earum naturam explicare debuerant, ingreditur *Phantasma*; quasi animi imaginantis Phantasma foret de ipsa rerum eas generantium natura. Nempe s. i. definitionem Corporis huiusmodi proponit, *Corpus est quicquid non dependens à nostra cogitatione cum spatii parte aliqua coincidit & coextenditur*. Hanc autem definitionem brevissimè excutiamus.

Hoc nempe vult ista definitio, eam esse Corporis naturam, ut coincidat cum spatio & cum eo coextendatur. Est itaq; nobis (ut definitionem hanc intelligamus) reducenda in memoriam definitio *Spatii*, *Spatii nimirum imaginarii*. Est autem spatium *Phantasma rei existentis quatenus existentis*: Phantasma nimirum in animo relictū. Est igitur *Corpus* illud quod coextenditur & coincidit cum *Phantasmate*; quare & Phantasma cum corpore etiam coincidit & coextenditur, sunt etenim termini isti reciprocantes: quare illud quod intra animum est, ibiq; solum existit, coextenditur cum eo quod est extra animum; Imò *Phantasma rei existentis quatenus existentis*, habebit coextensionem cum eo quod extra animum extenditur. Quod si Phantasma habeat coextensionem cum eo quod est extra animum, habebit & extensionem extra animum; quod

quod nonnisi ab insano dici posse mihi videtur. At existimas tu forsan Sophisticam esse omnem hanc disputationem & per Phantasma intelligere eum potius Phantasmatis objectum, non autem ipsum Phantasma, & corpus cum eo objecto coextendi. Quòd si hæc esset ejus sententia, foret istud objectum aliquid extra animum ab eo non dependēs, quæ est ipsa notio Corporis, imò evertit ista suppositio Philosophiæ suæ prima fundamenta. Quare quocunque se vertet inanem prorsus esse hanc definitionem constabit.

Quin etiam ejusdem farinæ est definitio Accidentis quam affert §. 2. *Nempe Accidens est concipiendi Corporis modus.* Si *Accidens modum* esse solum dixisset, habuisset me certè sibi consentientem, verùm cum in definitionem Accidentis conceptum infert, i.e. Phantasma, perperam mihi fecisse visus est: quærimus nimis rum ab eo, jussitq; ut expectemus rerum naturas; ipse autē eas ita definit, quasi absente earum imaginatione, atq; absq; relatione ad Phantasiam, nihil in rerum naturâ foret, nempe neq; Corpus neque non Corpus si-ve Accidens, quæ duo hujus Philosophi judicio universum integrum absorbent. Ego verò & Corpus fore existimo, etiamsi contigerit deficere ubiq; Phantasiam; quin & fore Corpora, ea quæ sunt, iisdem Accidentibus vestita, iisdem modis circumscripta, neq; ingredi naturam si-ve Corporis si-ve Accidentis, ut illud cum *Phantasmate* coincidat, Hoc autem *concipiatur.*

Quin pergamus. Ait §. 3. *Corpus absq; extensione aut absq; figurâ concipi non posse.* Benè haber, quod extensioni adjunxerat figuram; secluserat eam suprà Cap. 3. §. 3. nolo ego contradictionem ei objicere, quin potius resipiscentem fovere.

§. 5. *Spacium* (quâ voce semper, inquit, intelligo *Imagi*

74 *Computatio Hobbiana.* Sect. II.

Imaginarium) quod cum corporis magnitudine coincidit, illius corporis vocatur locus. Quin §. eâdem, locum nihil esse extra animum, magnitudinem nihil intra, alioque plura ejusdem generis. Quin dicat (obsecro) quomodo illud quod intra animum est totum, nihilque extra, coincidat cum eo quod totum est extra, nihilque intra. Quidnam est illud coincidere? & coextendi? totum cum toto, partem cum parte? quid est illud plenum esse & occupari? Narrer, ut ista phantasmati convenient.

Sectione 7^a concludit, *omne quod est alicubi, esse in loco propriè dicto, qui est pars spatii majoris*. Nescio quid sibi velit, nisi ut tacitè evertat illud Scholasticorum, ubi asserere solent Angelos habere non *locum* sed *ubi*, non *circumscriptivum*, sed *definitivum*. Et ut argumentum hinc petatur quo evincat omnia esse corpus. Quoniam *quicquid est, alicubi est; quod alicubi est, est in loco propriè dicto; quod est in loco propriè dicto, extenditur, & est corpus*. Ego quidem profiteor me istam Scholasticorum doctrinam non assequi intelligendo, neque concedendum mihi videtur alicubi esse (vel in agro, vel in urbe &c) *quicquid est*. Verùm ex Hobbii doctrinâ illud potiùs inferam, esse posse debere Angelos in loco, neque interim corpora eos existere. Nempe *locus est spatium, spatium est phantasma existentis, quatenus existentis* (non quatenus extensi vel figurati) ideoque *quicquid existentiam habet*, quidni possit cum ejusmodi phantasmate (ut verbo ejus utar) coincidere?

Sectione 9. miratur eos *qui corpora contigua fore judicant, inter quæ nullum aliud corpus intercedit*, aitque illos verborum specie, tanquam igne fatuo seduci. Intellegit autem (opinor) *Digbeum, Thomam de Albiis, Cartesium*, aliosque viros eximios, & de Philosophiâ meritissimos.

Cap. II. Computatio Hobbiana. 75

meritissimos. Videamus quâ ratione seipsum hoc in loco expediat. Quæritur, an corpora sint necessario Contigua, inter quæ nullum est Corpus? asserit A, negat H. Quare? *Nempe si intercedat spatium Corporis recipiendi capax, non sunt duo Corpora contigua.* Pæclarè! Sint A, B, C, Corpora Contigua, annihiletur B, nihilque aliud fiat, non erunt A & C contigua, quia intercedit spatium capax recipiendi Corporis B, vel illi æqualis. Clara sunt hæc & admodum intelligibilia. Verùm illud quæro; annihilato B, si annihilentur phantasie omnes humanæ, annon erit idem spatium inter A & C? annon A & C eodem modo se habebunt ad invicem? an inter A & C ingredi non poterit denuò B vel Corpus illi æquale? Certè fieri hæc omnia posse manifestum est, quare capacitas ista non omnino ab imaginatione pendeat, eritque spatium hoc interjectum, de quo loquitur Thomas, non imaginarium, sed quod vocant Reale; erit aliquid extra animum, non solum intra animum; reddenturque inania ea omnia quæ de spatio hoc capite disseruit, quæ nihili omnino esse mihi videntur. Quinimò miratus sum V. D. cur ille Philosophiam ab obscurissimâ Spatii contemplatione inceperit, quæ nullius (quantum ego intelligo) usus est ad Philosophiam: Cur item omnia esse phantasmata definiverit, neque ulla unquam hæcenus mihi ratio hujus phænomeni emicuit, præter hanc unam, ut vacuum haberet, ubi Chimæræ bombinarent, spatium, ubi phantasmata volitarent.

Ait §. 10. *Moveri aliquid nisi in tempore concipi non posse; Fortasse! Sed neque quiescere. Quare autem non possit nisi in Tempore moveri? Nempe est Tempus, ex definitione, phantasma, id est, conceptus motus; itaq; concipere aliquid moveri non in tempore, est concipere*
motum

motum non concepto motu, quod est impossibile. Ubi nunc ignis ille fatuus verborum qui solebat Philosophos seducere? vel quid est, si hoc non fuerit irretiari, turpique prorsus modo hallucinari. Primum, Tempus non fuisse Phantasma motûs, suprà ostendimus, quin temporis τὸ φυσικόν esse durationem, durationem esse quiescentium æquè ac motorum; utramque hanc durationem metiri solere homines motu terræ, atque durationem hoc modo mensuratam esse illud quod solent homines omnes appellare Tempus.

Non esse (inquam) tempus Phantasma motûs, non motum cujuscunque corporis temporis rationem ingredi, sed Terræ solius, ideoque cum quis possit capitis Hobbiani vertiginem absque motûs diurni terrestris consideratione contemplari, non esse reciprocantes, multò minùs eosdem conceptus Temporis & Motus cujuscunque est manifestum.

Verùm quid est, quod ista sectemur? Ait ipse S. II. Tempus ingredi rationem Quietis, non minùs quàm Motûs; viz. *Quiescere dicitur quod per aliquod Tempus in eodem est loco.* Annon quiescunt res per Phantasma motûs? annon vides quàm sit puerilis ista ratiocinatio quæ 10. Sectionem claudit. Imò hoc dicendum est, quiescere rem aliquam donec Terra tot revolutiones earumque partes absolverit, atque hâc ratione exhiberi nobis durationem quietis in datâ mensurâ; pariter de motûs alterius cujusque corporis duratione esse statuendum, verborumque specie pueriliter delusum ex definitione mala, tum pessimè & Sophisticè ratiocinari, ideoque frustra ab eo Sophismatum solutiones (quod tamen hoc ipso in articulo pollicetur) esse expectandas. Quin videamus eum (si velis) certantem, quin triumphanti si mereatur, *acclamemus, & Herculeum pæana canamus.*

Quiescere

Quiescere dicitur, quod per aliquod tempus est in eodem loco. Motum esse vel fuisse quod siue nunc quiescat; siue moveatur, fuit prius in alio loco quam nunc est. §. 11. Hæc ipsi si concesseris, videbis proculdubio eum armis victricibus præclara admodum gerentem. Dices forsan illud motum esse vel fuisse tibi non idem sonare. Quin recurrendum igitur est illicò ad Grammaticos, qui verbum hoc *moveor* ita solent inflectere, *move or, eris vel ère, motum esse vel fuisse*. Satis est; videamus quid ex istis evincat. Infertur primò, *Quicquid movetur, motum esse vel fuisse*. Secundò *quod movetur motum iri adhuc*. Tertiò, *quod movetur non esse in uno loco per ullum tempus quantumvis exiguum*. Præclara hæc quidem, si ista etiam explicasset, quâ posset ratione motus vel exordiri primùm, vel tandem esse definire; vel ostendisset quomodo posset Corpus motum neque in loco uno esse per minimum tempus; neque omnino in pluribus simul, quod suprà, §. 8. asserit. Sed non est ut ab ipso hæc expectemus, seipsura ad certamen accingente, viresque adversus hostem stringente. Vereor V. D. ne ad hostis mentionem tremiscas, sed ferendum est quicquid averti non possit; quinimò gratiæ habendæ sunt Thomæ nostro, qui hostem istum aggredi ausus est solus, nobisq; spectaculi reliquit voluptatem.

Suave mari magno, turbantibus æquora ventis,

E terrâ magnum alterius spectare laborem.

Suave etiam belli certamina magna tueri

Per campos instructa, tuâ sine parte pericli.

Ne te cruciet forsan expectatio, rem breviter sic accipe. Est quoddam *Sophisma* antiquum illud, obscurû, Philosophis hætenus omnibus (ex compositionis continui ignoratione) infensum.

Monstrû horrendû, informe, ingens cui lumen ademptû,

Horribili super aspectu mortalibus instans.

Hoc nempe est spectrum illud, quod abigere vult & profligare: quin proprius accede, & spectabis illico conflictum *Phantasmatis cum Sophismate*. Quin dic igitur *Sophisma* &

Incipe siquid habes, Thoma mora non erit ulla.

Hæc igitur *Sophisma*; *Si corpus aliquod movetur, movetur vel in loco ubi est, vel in loco ubi non est; quorum utrumq; falsum est: ergo nihil movetur.* Eja *Sophisma*! Vereor ne malè sit *Phantasmati*; at metum hunc eripuit: Ecce enim dicit *Sophisma* mentiri, quod enim movetur, neq; in loco ubi est, neq; in loco ubi non est, movetur. Sed à loco ubi est, ad locum ubi non est. Gaudeo certè repulsâ esse à *Phantasmate Sophismatis* vim; ob-
rutum à *Sophismate* si fuisset *phantasma præscissa* foret spes omnis perficiendæ *Philosophiæ*. Expectas forsan ut vires resumeret *Sophisma*, atque illud rege-
reret, moveri à loco ad locum non prohibere quo minus moveatur etiam in loco; potest enim esse in loco & simul moveri; quare etiam in loco ubi est, moveri. Est autem in loco, eoque propriè dicto, quoniam est alicubi.

§.7. Quid ad hæc *phantasma*? Negari non posse quin quicquid movetur alicubi (id est, intra spatium aliquod) moveatur, at locus non est illud spatium totum, sed pars ejus. Quin, clames, Io! vicit *Phantasma*; tu forsan expectas, ut replicet denuò *Sophisma*, neminem unquam cogitâsse moveri corpus in toto spatio; verum in parte illius istâ quam occupaverit, hunc autem esse illius locum. Expectas forsan, at nihil ejusmodi reposuit *Sophisma*, imò obmutuit, nihilque habuit quo objectam retelleret sententiam; cernis vicisse Thomam suo cum *Phantasmate*.

Dicite Io paan, & Io bis dicite paan.

Ex illo Corydon Corydon est tempore nobis.

Vereor

Cap. II. *Computatio Hobbiana.* 79

Vereor ne tibi ingrata sit levitas hæc nostra, verum quid faciam? nam sum petulanti splene cachinno. Quis poterit absque aliqua hilaritate Andabatarum prælia spectare. Quis nescit Continuorum omnium eandem esse difficultatem ut intelligantur? quis nescit itaque Loci, seu Spatii, Temporis & Motûs easdem esse rationes? ideoque si de præsentis tempore quæratur (quod tamen non est, sed fingitur esse minimum seu instans) moveri Corpus in loco ubi est, eandemque esse rationem utrinque temporis instantanei & loci unici. Quin hoc modo solvendum esse Sophisma; non asserendo moveri aliquid, neque in loco ubi est, neque in loco ubi non est, aut idem esse, motum esse, vel motum fuisse; seu verum esse, quicquid movetur motum antehac fuisse; aliaque ejusmodi.

Sectiones 12. 13. 14. exagitavit in Elencho Cl. D. Wallisius, earumque indolem prolixius ostendit; non est igitur ut istis inhæreamus. Nempe proponit hic prima Geometria sua elementa, definitiones, nimirum Puncti, Lineæ seu Longitudinis, Latitudinis, Profunditatis & demum Æqualitatis Corporum, dicitque unius ejusdemque Corporis eandem esse magnitudinem. Ut autem intelligamus definitiones suas, illud prærequirit, ut consideretur Corpus absq; magnitudine. Quomodo hoc fieri possit, quam maximè cuperem, ut explicaret; annon Corpus, Magnitudo & Locus ejus uno & eodem actu animi dividitur? §. 8. Dicit autem Corpus hoc modo consideratum punctum appellari. Velim, ut dicat à quo sic appellatur; punctum, illud est Euclidi, cujus pars nulla est, neque quenquam memini à quo punctum appellatur corpus, vel corpus motum, absque magnitudine consideratum. Quin Lectorem potius ad laudatum Elenchum remittendum censeo, si modo ipsi non statim occurrat quàm sit

fit vana & quàm multiplex ἀκρολογία, dum punctum, lineam &c. quæ Mathematica (ut dici solet) intelligenda sunt, per corpus & motum &c. quæ naturalia sunt & ὕλην habent, non quovis modo explicat, sed definit; quid est hoc quæso aliud nisi mentes Tyronum (neq; enim expectat, spero, ut Geometrarum ad elementa sua recurrant) præoccupando corrumpere? dices ingenuum hoc non esse, aut Philosopho decorum; esto. Manebit tamen eum laus aliqua, quoniam hoc modo — *omne tulit punctum*. Cum interim (uti habet S. 14.) *Corpus, magnitudo & locus animo comprehendendi non possiat nisi ut coincidentia*. Manifestum est & prima ejus Geometriæ elementa non posse animo comprehendendi. Corpora æqualia ea esse asserit, *quæ eundem locum possidere possunt*. Scilicet quæ possidere possunt idem *Phantasma rei existentis quatenus existentis*.

Ait unius & ejusdem Corporis unam & eandem semper esse magnitudinem. S. 14. Ait (inquis) imò probatque. Quin igitur argumentum audiamus. *Coincidunt (inquit) Corpus, Magnitudo & Locus; quiescat Corpus per tempus in loco aliquo. Sit q. magnitudo ejus nunc major, nunc minor, locus idem major & minor erit seipso*. Cernis inferri hoc argumēto corpus manens in eodem præcisè loco non posse esse nunc majus, nunc minus: imò vero ex suppositione coincidentia (ut loquitur) Corporis & loci concedimus hoc legitimā illatione educi. Sed quid tum postea? quid tum inquis? Tum (inquit) demonstratum est ejusdem Corporis eandem esse semper magnitudinem. Quis crederet Corpus, quia manens in eodem præcisè loco constringi non possit & dilatari, ergo non omnino illud posse, neque locum posse novum occupare? Reverà (vir amiceffime) deferenda videtur hæc omnis, quæ mihi obtigit, provincia, ne me serò forsan panite-

at,

at, libellum hunc lepidum in manus sumpſiſſe. Si etenim illud, quicquid eſt, rectè ratiocinari, lectione eorum librorum acquiratur, ubi *ſeveris demonſtrationibus* res agitur (C. 5. in fine) vereor admodum, ne iſta legendo aut inſanire diſcam aut ſtupelcere.

ſect 19. hæc habet. *Quod quieſcit, ſemper quieſcere intelligitur* (pariter quod movetur, moveri) *nifi ſit aliud aliquod corpus, quo ſuppoſito quieſcere (aut moveri) non poſſit.* En aſſertionem! videamus argumentum. *Si quieſcit, inquit, cauſa motus* (aut, ſi movetur, cauſa quietis) *eſt extra ipſum, ſed extra ipſum ſupponitur eſſe nihil.* Nempe quia corpus non ſupponitur, ideo nihil ſupponitur; principiis ſuis admodum congruenter. Verùm dicere nos poſſumus nullo alio corpore ſuppoſito (ſic enim loqui ab ipſo didicimus) poſſe tamen Deum vel motum in corpore ciere, ejuſq; lineam determinare, vel eum omnino tollere; neque nos inania ſeriatos aliqui exiſtimabunt. Tunc autem ubi Thomas

Ait ſe imaginari poſſe punctum aliquod in molem ingentem poſſe intumeſcere, quæ rurfus in punctum ſe contrahat, hoc eſt, ex nihilo aliquid, ex aliquo nihil fieri. Quin experire, obſecro, ſi ipſe hoc idem poſſis imaginari; fateor enim me obtuſioris eſſe Phantaſiæ, quàm ut hoc poſſim: Sin tu hoc nequeas, affirmare fidenter auſim, feciſſe eum quod illi ſolenne eſt, dicendo ſe illud imaginari quod in imaginationem venire nequit; adeoque eum non rem, ſed iſtā potiùs ſententiam finxiſſe.

Ait (S. 23.) Accidens illud eſſe quod eſſentiam dat homini, idemque eſſe cujus gratia nomen illi imponimus; ſed repreſſit eum Moranus, filebo igitur.

Concludit ex antedictis *demonſtrari poſſe axiomata Euclidis; atque unum eorum (nempe ubi aſſeritur totum eſſe majus ſuâ parte) demonſtrare nititur, inſacerè.*

G

Verùm

Verum si istud axioma demonstrasset, non inde sequeretur posse eodem modo omnia & reliqua demonstrari; ni forsan unâ ex instantiâ constare posse inductionem existimemus; quin tu potius — *Crimine ab uno disce alia.*

CAP. 3.

De Causa & Effectu, de Potentia item & Actu, quæ sunt operis Hobbiani (de Corpore) Capita 9 & 10, ubi de Necessitate & Contingentia nonnulla.

Cum is sit scopus Capitulorum de *Causa & Effectu*, & de *Potentia & Actu*, ut fundamentum istius sententiæ Hobbianæ jaciatur, quâ omnia fato fieri asseritur, nescio certè an ea discutere debeam, an prorsus præterire. Nôsti omnem istam libertate & Necessitate controversiam cum Hobbio susceptam esse à doctissimo reverendissimoque Bramballo eisque à meipso initio hujus Epistolæ servatam. Imò verò nôsti me hanc unam controversiam, ut difficillimam & ut periculosissimam declinare semper solere atque effugere; adeo vel cum summa mentis intentione veritas haud attingitur, & difficile tamen est absque Sacrilegio errare. Nolo te (V. D.) vel Lectorem inutiliter detinere: Nôsti locum hunc esse ubi intervenit ignava ratio (ita nimirum Ciceroni in fragmento libelli de Fato audit) hunc esse locum ubi λόγος & δεισιζων ratio metens; nollem ego V. D. otari, nollem, quod aiunt, in messem alienam falcem immittere. Quare non est, ut à me integram loci istius de Fato & Contingentia tractationem expectes; nos hîc brevissimè videamus quæ fuerint conclusiones Hobbianæ, quænam

nam ea sunt quæ potissimum ejus cōsequitur, vel ex rei natura vel ex concessione Hobbiana, tum demum ex quibus principiis conclusiones eduxerit, atque tandem experiamur an sententiam primariam, unde illa consequuntur, evicerit.

Atque manifestum est ex primo capitulorum istorum intuitu hanc esse conclusionem Hobbianam, *Omnia ex necessitate fieri*, (non solum ex fato, uti in Ciceronis libello distinguitur) nempe hoc agit totum illud de Causa & Causato capitulum, ut illud evincat. Quinetiam futurum atq; possibile coincidere & reciprocari, adeo ut quicquid evenerit vel eventurum sit, omnino sit necessarium, quicquid è contra non evenerit, sit impossibile. Nempe omnino (neq; Deo ipsi servatâ suâ libertate) impossibile; hic scopus est capituli de Actû & Potentia. Hæ (inquam) sunt istæ conclusiones, quas omni conatu, summisque viribus evincere hic nititur & stabilire. Summa hujus doctrinæ hæc est *mutatio: nis omnis causam efficientem consistere in motu* (cap. 9. §. 9. cap. 10. §. 6.) *Causam motûs nullam esse posse, nisi in corpore Contiguo & moto*, (cap. 9. §. 7.) Quin quicquid movetur eâdem viâ atque eâdem celeritate necessario movetur, nisi ab alio Contiguo corpore impediatur, ibid. Quin (ut brevissimè res transigatur) *motum omnem ex Necessitate evenire; Ergo efficientiam omnem: proinde omnia ex necessitate absoluta fieri.*

Videamus igitur quid ex istis sequatur. Verum non est ut in istis diutius immoremur, quæ sunt ab infinito eorum numero, qui de Fato scripserunt, enumerata. Nempe si omnia ejusmodi causis fiunt, omnia naturali colligatione, consertè, contextèque fiunt: quod si ita est, nihil in nostra potestate erit; ex quo efficitur, ut neque laudationes justæ sint, neque vituperationes, nec honores, nec supplicia. Hæc autem ea

sunt, quibus omnis vita humana, tum civilis tum multò magis religiosa, continetur; nempe spe metoque ferimur omnes, atque in illa tandem omnes ferè actiones hominum resolvuntur ultimò. Nolo hoc in loco expatiari, cum manifestius sit, quàm ut oratione aliquà indigeat, absque præmiorum & pœnarum contemplatione, necesse esse ut jaceret vita omnis humana, quâ parte belluinam antecellit; neque quenquam ferè in hâc fæce Romuli, à sceleribus vel occultis vel manifestis, absque vel Magistratus vel Dei olim vindicantis consideratione abstinere; neminèque ad aliquod excelsum atque eximium perficiendum erigi, sive in Civitate juvandâ, sive in libidine cohibendâ, cui facem non accenderit spes illa gloriæ, atque felicioris olim immortalitatis. Positâ igitur hâc ejusmodi causarum omnium necessitate, velim, ut explicet Hobbius quæ sint frana effrenataz hominum libidini tandem imponenda? quæ sint calcaria ad virtutem adhibenda? quis sit locus virtuti, aut justitiæ civili, si omnia fato fiant, quâ etiam possit ratione Deus pœnâ illum æternâ affligere qui nil meruisse potuit

— *Data fata secutus?*

Existimas, forsan, ex sententia aliorum illud sequi, tolli hoc modo bona & mala omnia (illuc enim res ista tandem redit) verùm posse forsan Hobbium, pro eo quo est ingenio, consequentias istas declinare, atque hæc alibi, ubi proprius est hujus rei locus, istum effecisse. At falleris, vir egregie: nam in libello de Libertate & Necessitate (mihi p. 18.) hæc ipsa cernit ex sua sententia inferri. Non igitur negat rem eo modo se habere, quin supprimi forsan & celari debuisse hanc sententiam concedit; veram eam interim esse contendit, ibique non virtutis aut pietatis

pietatis fundamenta aliqua collocando, sed *Paulum* Apostolum divinissimum in eandem sententiam pro viribus trahendo se tandem evasisse existimat. Verbo, ex sententia sua de rerum necessitate illud sequi videt; vana esse ea omnia quæ ad virtutem spectant. Quare tollendam esse ex animo istam sententiam crederes; imò potius maneat (inquit) ista sententia, ruantque ea omnia quæ retinere possint homines à scelere & impietate; & cum eò necessitatis redactus sit, ut, vel impietatis semina manifesta spargenda ipsi viderentur, juraque omnia (divina atque humana) evertenda, vel retexenda principia Philosophiæ atque laborum & vigiliarum mercede carendum, quia (inquit.)

*Frangatur potius legum veneranda potestas,
Quam tot congestos noctesq; diesq; labores
Hauferit una dies—.*

Atque hæc quidem (inquis) præclare admodum satisque pro ingenio suo, si interim pœnarum etiam æternarum metum ab animis hominum evellere potuerit, nempe

*Felix qui potuit rerum cognoscere causas,
Quiq; metus omnes & inexorabile fatum
Subjecit pedibus, strepitumq; Acherontis Avari.*

Ecce igitur illum in Leviathane (L.C.44. p. 345.) scrupulum hunc omnem removemtem. *Durum* (inquit) illud videtur, ut Deus qui omnia in hominibus operatur (& velle nempe & perficere) delicta sine fine puniat.

Cernis itaque quo tendat ista Philosophia Hobbiana, & quo tandem ducat eos qui vestigiis

suis hæserint; nempe ut rejecta omni de bono & malo, de præmiis pænisque æternis sollicitudine, fato se, reliquorum instar sive Animalium sive Corporum inanimatorum, subjicientes, vivant.

Verùm tamen (inquis) si demonstratione legitimâ sententiam suam evicerit, cedendum erit utcumque demonstratæ veritati: quare de isto manet altius inquirendum:

Certè notius illud est, quàm ut oratione longâ indigeat, ut explicetur solere eos, sive Philosophos sive Theologos, qui omnia fato fieri non esse concedendum contendunt, de Necessitate & Contingentiâ ita statuere, duplicem nimirum esse Necessitatem, alteram absolutam, quæ ad rerum naturam potius spectat; alteram ex Suppositione, quæ est potius propositionum: Quinetiam spectari posse res existentes vel quoad naturam, vel quoad statum; istaque applicando, asserere, constare posse Contingentiam cum Necessitate hypothetica, non autem cum absoluta: quin etiam posse rem aliquam esse ex natura contingentem, etiamsi fuerit in statu (ut loquuntur) necessatio. Exempli gratiâ, supponemus saltem esse aliquid in nostrâ potestate, uti stare vel sedere, movere aliquid, aut ab eo movendo abstinere; erit igitur, absolute loquendo, contingens ut quis stare velit vel sedere, cum tamen illud necesse sit eum sedere dum sedet, & similia; imò verò si modo sedeat, verum erat ante istam sessionem, sessurum eum fuisse. Quòd si verum fuit, ergo erat etiam aliquo modo necessarium; necessarium nempe eâ necessitate quæ est propositionis, quâ necessariæ res dicuntur esse cum esse ponuntur. Unde sequitur non minùs necessariò veram esse eam propositionem quæ vera est, quàm est necessarium rem aliquam vel actionem esse, dum esse ponitur.

Hanc

Hanc igitur necessitatem negare non solent ii, qui res aliquas esse contingentes asserunt.

Quinimò si modò res aliqua (vel phenomenon) orta sit à causa quæ suæ potestatis est, etiamsi in necessitatem agendi projecta fuerit, dicetur res ista contingens quoad naturam; quia nimirum contigit ut ortum haberet, quamvis jam fuerit in statu Necessitatis etiam absolutæ. Ducatur, si velis, in exemplum *Chryssippi* Cylindrus (de quo *Cicero* in libello de Fato) vel Turbo, quæ moveri incipere nisi pulsa non possunt, id autem cum accidit (sive à causa necessaria, sive libera) suapte naturâ & causarum Physicarum concursu volvitur Cylindrus, & Turbo versatur. Erit itaq; in statu necessario, seu necessitatis ista sive Cylindri volutio sive Turbinis versatio; attamen erit totum illud motûs utriusque quiddam Contingens appellandum, si modò ex causâ contingente vel liberâ (notione horum Philosophorum) originem traxerit.

Nos igitur istis hoc modo brevissimè explicatis, (ut vires Hobbianas experiamur, etiam in illa re ubi & ego & alii mecum existimant eum non sine specie nervosæ orationis rem suam agere) ponamus hanc sententiam, quæ in rebus Necessitatem hypotheticâ (quæ res, cum sunt, necessariò esse dicuntur) supponit, absolutâ autem negat, quæ est ex causis fatali serie effectuum producentibus, ita ut nulla unquam fuerit, sive in origine rerum, sive in progressu (absolutè loquendo) contrariæ positionis possibilitas.

Et mihi quidem ut illud *προληπτικῶς*, enunciem nihil aliud inferunt argumenta Hobbiana præter Necessitatem istam rerum Hypotheticam. Attende, obsecro, an ampliùs aliquid tibi evincant.

Omnia inquit (hic sensus est totius Argumentationis suæ) *quæ unquam fiunt, fiunt ex causa integra*

(Cap. 9.) & quo instante causa est integra, eodem quæque effectus est productus §. 5. Causa enim integra §. 3. est Aggregatum omnium Accidentium, cum agentium quotquot sunt, cum etiam patientis, quibus omnibus suppositis intelligi non potest, quin effectus unà sit productus; & supposito quod unum eorum desit, intelligi non potest quin effectus non sit productus. Hæc certè omnia ea continent quibus vel hoc loco vel alibi (quantum ego scio) uspiam libertatem aut contingentiam tollere & supremam Fatalis necessitatis legem rebus omnibus (imò verò Deo ipsi) imponere conatur. Hæc est ista argumentatio, quæ fecit, ut in reverendissimum Bramhallum, imò in ipsam Religionem triumphum caneret. Vides autem scopum non omnino attingere quem sibi proposuit; concedent sive Philosophi sive Theologi totum argumentum, dicentque illum ignoratione Elenchi laborare; (& fortasse Elenchum tunc ignoravit, at prodiit nuper Elenchus quem nollem eum nescire) Evicisse se putat necessitatem omnium rerum absolutam, verum non nisi hypotheticam conclusit. Nempe quæ fiunt, ex causâ fiunt; & quando causæ rerum sunt, illæ fiunt, & quando fiunt, necesse est ut fiant. Quid aliud asserunt sententiæ à nobis explicatæ defensores? quid amplius Hobbius usquam probavit? At ego quidem causam integram ab ipso jam definitam ad effectum suum producendum non modo sufficere cogitarem, verum & illud naturam suam involvere, ut effectum in actu ponat. Quid igitur sibi volunt ista (§. 5. initio) *Causa integra ad producendum effectum suum semper sufficit, modo sit effectus omnino possibilis*? Certè ego mirari soleo hominis huius sive fatum sive infelicitatem, cui nusquam se expedire contingit absque sphalmate aliquo egregio, absque

absque manifesta sui ipsius contradictione. Scopus ejus omnis est, ut omnia esse necessaria *absolutè* concluderet, nempe ex definitione causæ integræ. Concedimus nos ex ista definitione necessitatem hypotheticam inferri; imò (inquit) nulla omnino infertur necessitas, fieri enim potest, ut causâ existente integrâ, effectus non sit omnino possibilis, & *causa integra* ad producendum effectum suum non sufficiat. Nolo stupenti ac deliquium patienti insultare.

Cernis autem disputatione istâ nihil amplius evinci hoc uno, necessarium esse, ut res omnes sint eo instante quo sunt, nempe quo productæ sint, id est, quo causam integram habent. At fortasse melius rem geret Capite sequente (C. 10.) ubi illud suscipit probandum ex definitionibus Actûs & Potentiz; quod possibile est illud necessarium esse; & impossibile illud esse quod non est necessariò futurum. Verùm hic etiam eandem in foveam eum cadentem invenies, verbisque (ut semper solet) illaqueatum, atque ex Hypothesica quadam seu propositionis Hypothesicæ necessitate aut impossibilitate, de rebus ipsis earumque natura absoluta concludentem. Nempe quis est, qui non concesserit quicquid est futurum, futurum esse; & si statuatur futurum, necessariò sequi ut sit futurum, ideoque impossibile esse ut non sit futurum, (ex ista nimirum positione) nempe impossibile esse ut res aliqua simul sit futura & non futura? Quis (inquam) hæc nescit? neque certè tam bardus est noster Philosophus, ut de istis propositionibus dubitari à sanæ mentis hominibus existimet. Non igitur hoc quæritur, an quod futurum est sit futurum? illudque si velit necessariò, ex hypothesi quod sit futurum? verùm an quicquid sit futurum oriatur ex causis

causis omnibus physicè atque absolutè eo modo determinatis, ut nulla unquam in infinita causarum serie libertas fuerit ad utrumlibet, aut sui (ut loquitur Cicero) potestas, ut pro arbitrio ageret, vel non ageret; adeoque ut tollatur omnis, non modo secundarum *αὐτοκίνητος*, sed & primæ etiam causæ *αὐτάρχητα*. Concedemus quando res sunt aut futura sunt, ex hypothesi impossibile esse, ut, aut non sint aut non futura sint, verum absolutè hoc esse impossibile (eo modo quem innuimus) negabimus: videamus quid inferant Thomæ demonstrationes.

Quemadmodum inquit (c. 10. §. 2.) quo instante causa est integra, eodem effectus productus est, sic quoq, quo instante potentia plena est, eodem quoq, Actus qui ab ea produci potuit, productus est. Nempe potentia plena idem est quod causa integra, cum utraq, consistat in Aggregato omnium simul Accidentium, qua ad effectum producendum tum in agente tum in patiente requirantur. (§. 1.)

Vim integram ista complectuntur argumenti quo demonstrare se existimat, impossibile esse quicquid non est futurum. Sensus argumentationis hæc est. Eodem instante quo potentia est plena, Actus produci-
tur: Ergo res omnis possibilis est necessaria. Cernis denuò argumentum nihil aliud habere quam eodem instanti quo res est; nempe quo potentia plena supponitur) necessario (ex hypothesi) eam esse; inferri autem in conclusione, necessitatè aut impossibilitatè absolutam quæ infinitam porro retròve causarum seriem ex æquo respiciat. Nempe quicquid est, quādo est, necessario est; Ergo non potuit Deus efficere ut non fuisset, causā planè physicā & cogente (nempe causā aliquā integrā) ad istud producendum determinatus, suæque nunquam potestatis existens. *Quis ita demonstrantem*

frantem laudet? Est quidem hæc ejus demonstratio cæterarum suarum haud absimilis. Cujusmodi fuerint illæ & alii docuerunt & ipse sum adhuc (ὅν θεῶν) ostensurus: sufficiat aliquo modo erroribus suis hoc loco (fundamentâ evertendo) obstitisse, cætera vel ab eruditissimo Bramhallo expectantes, vel in quæstione de Hominis naturâ differentes. Lubricum esse locum hunc omnem nosti me semper profiteri, illud tamen habent reliqui omnes sive Philosophi sive Theologi, ut in difficultatem aliquam conjecti unde se clarè expedire nequeant, illud tamen suscipiant, ut à Deo ipso contumeliam omnem amoveant, ut in illum delicta hominûm minimè rejiciant, ut pietatis atque virtutis fundamenta non tollant, præmia auferendo. Hæc ille minimè (ut cernis) curat, & sententiam minimè demonstratam defendere conatur, ubi nihil neque quoad rem neque quoad rationes novum invenies præter illam, sive confidentiam sive audaciam, qua fit ut mala dogmatis *ὀρθοίωτα* fronte minimè tectâ agnoscere non vereatur. Quin istis præteritis ad alia progrediamur.

CAP. 4.

De Eodem & Diverso.

Quærere identidem ex me solent aliqui (qui mihi curæ esse existimant, ut Hobbiana quæ sunt omnia possim intelligere) cujus familiæ quorûmve Philosophorum sive antiquorum sive recentium tribulis fuerit hic noster, quâ fuerit origine, quos habuerit in Philosophia parentes, quem ducem sequatur, reliquæque hujusmodi. Fuerunt inter Antiquos celeberrima
Scholarum

Scholarum nonnullarum nomina, Academiæ; Lycei, Stoa, Hortique. Extiterunt hac nostra ætate & parentum viri illustres, vel ex gente nostra vel ex vicinis aliquibus, qui Philosophiam vel veterem auxisse plurimum, vel novam condidisse, vel fundamenta saltem Philosophiæ olim perficiendæ jecisse non immeritò dicantur. Habuimus Gilbertum atque Verulamium reviviscentis Philosophiæ parentes, quorum alter Democriti principia resumendo, alter ad experimenta atque observationes revocando, tanquam ad carceres, quin veteris Philosophiæ defectus detegendo, novamque planè methodum ad naturæ rerum investigationem delineando (meliorē certè jure quàm *Thales Eclipticæ ἀβέβαιον* inveniendū,) naturæ fores aperuisse videantur. Habuimus *Harriotum & Warnerum* summos & in Naturali Philosophiæ & in Mathesi viros, (quorum tamen opera plurima nè pereant est metuendum) Habemus *Oughtredum* aliosque quorum lectione viri in Philosophiâ saniori & Mathematica profundiori excellentes infiniti prodierunt. Illud certè de quo gloriari possit, habet Angliâ nostra, (quicquid illa interea *Galilæo* tribuendum censeat) aut Philosophiam ipsam, aut fundamenta saltem atque methodum philosophandi, cæteris omnibus dedisse. Nempe Methodum à Verulamio (in fragmento de *Parmenidis* *Telestii* & *Democriti* Philosophiâ) delineatam secutus *Cartesius* in Naturalibus, eaque quæ de *Æquationibus* habet *Harriotus* intelligendo, iisque nonnulla de suis præclarissima adjiciendo, is demum evasit quem summa admiratione prosequuntur sæcula omnia (ni invalescat barbaries) futura. Quinetiam ut nomina

mina futura sint olim Illustria Gassendi, Digbzi, Albiū aliorūque etiam multorum (neque enim illud agimus ut præclaros viros memoremus,) nullus ego dubito. Nōsti autem ex illis unumquemque ferē ducem ex antiquioribus sibi præcipuum elegisse: nempe Cartesius omnia Atomorum motu situque & figura absolvens (eamque planè methodum ingrediens quam delineaverat Verulamius noster in fragmento jam laudato) Democriti in partes (quem in plurimis secutus est Epicurus) ivisse non immerito videatur. Gassendus interim, exempto prius Epicuro à præjudiciis popularibus quibus omni ævo nimium laboravit, ivit apertā ferē professione in partes Epicuri. Nobilissimus interea Digbzus suo cum Achate philosophiam eam quam ornârunt Peripateticam vocandam esse voluerant. At hi quidem viri præclarissimi atque immortalis honore digni, imò immortalitati indubie consignati, illud impensius studuerunt neminem lādere, pietatem vel promovere, vel nullo modo destruere, quin sua omnia modestè, at (quantum fieri potuit) accuratè atque demonstrativè proferre. Ab existentia Dei animique incorporeā naturā sua omnia deducit Cartesius, à Democrito in ista re discedens. In illum veluti finem & scopum sua dirigit Nobilissimus Digbzus, ut animi Spiritnalis adeoque immortalis natura innotescat legitimā demonstratione. Siquid in Philosophia Epicuri occurrat quod in religionem importunius ruere videatur, obruit illud statim rationibus Gassendus antidotumque citissimè ministrat, ne serpat venenum. His ita se habentibus volunt aliqui de Hobbio nostro rem totam accuratiùs percipere; unde ortus sit, quem sibi

sibi scopum proponat, intelligere summopere cupiunt. Verum enimverò V. D. rem difficilem requirunt, minimèque sine aliquo saltem labore peragendam. Malmesburiensis est hoc quidem credo; & Senex est, hoc ipse disertè affirmat, cætera non sunt adeò simplici oratione enuncianda. Neque etenim Academicum eum esse credendum est (qui omnes in universum Academias laceffit) neque Academiarum nostrarum statum intelligit. At neque Peripateticus est, cui insanit ubique Aristoteles, neque in Horto Epicuri versatus esse videatur, cui (inanis licet sit omnis oratio) nihil tamen inane esse decernitur. Quin igitur (inquis) Stoicus est planè ortumque habuit ex porticu (Malmesburiensi,) atque ego equidem fateor multa esse quæ penè faciunt ut huic illum familiæ adscribam. Habuerunt Stoici Aniculam quandam fatidicam (ut Ciceroni ubique audit) Pronzam, ut habeant etiam senem eumque magum, qui eam comitari possit, non est inconcinnum certè, aut incongruum mihi videtur. At verò multa sunt, quæ huic positioni obnituntur faciuntque ut *μὴ οὐ* non sit Zenonis discipulus. Certè æstuabant olim Stoici ut fatum ponentes, necessitatem eam quæ libertatem tollat, minimè tamè intulisse viderentur. Quin ipsis de virtute de bono & malo earumque legibus æternis, magnificentius sentire, & loqui, quam reliquæ solebant *ἐπιφύετες* Philosophorum, solenne fuit. At ipsi cura non est de Fato, modo necessitatem ponat, bonum malumque tollat, imò illud habet non Stoicorum sed Epicurei, — *quod arētis* — *Religionum animum nodis exolvere pergit.*

Sed abruptum esse mihi sentio sermonem hunc totum, ne prolixus fiam. Certè difficile illud est uni alicui parenti hunc Philosophum asserere; illud mihi inquirenti altiusque pervestiganti innotuit, traxisse ex

Gracia

Græcia originem (eaque antiqua) suam Philosophiam. *Habuit* (inquit) *ista*, *Phantasma* quoddam *Philosophia* aliquatenus simile, (imò non ovum ovo similis) *habuerunt Athenienses Empsam & spectrum intus fraude plenum & sordibus.* (Resolvitur interim ipsi omnis *Philosophia* in *Phantasma*, nempe spatium est *Phantasma*; & *Locus Corpus* quod cum *Phantasmate* coincidit; *Motus*, derelictio *Phantasmatis*, atque ita in universum). Quamquam autem de Eodem & Diverso caput hoc inscripserit, invenietur ipse tamen semper idem. Ac de diversitate primum loquentem audi, deinde de Identitate.

Primum igitur §. 2. illud demonstrandum suscipit, *duo Corpora non esse idem.* Profunda res est, attendamus, obsecro, ad demonstrationem. *Idem est quod est in eodem loco, at duo corpora non sunt in eodem loco;* (quippe in duobus) *Ergo.* Pulchrè admodum: At nemo dicturus (opinor) est duo Corpora esse idem, qui non illud etiam affirmaverit duo Corpora in eodem loco esse posse. Oportuit igitur minorem probasse.

At (inquis) annon verum est duo corpora ea esse quæ sunt in diversis locis & contra? imò quidem verissimum, sed frustra interim assumi ab ipso locum dicimus ut medium sit quo demonstratur Identitas Corporum vel eorum diversitas. Cum etenim coincidunt ipsi corporis locique sui conceptus, sitq; ipsi necessario idem locus ubi idem est Corpus, diversitatem Corporum, vel contra, hoc modo demonstrare est idem per idem probare velle. Mitto explicare eum (ut opinor) nullo modo posse Identitatem loci alicujus, cui *Locus omnis est intra animum*, (nempe *Phantasma*, vel gladius Delphicus) *nihilq; habeat extra animum.* Quot enim homines, tot *Phantasmata.*

Ex ista tamen demonstratione insert *omnia corpora differre*

differre numero: quoniam hoc ipsi non ut demonstratum, sed ut verum largiamur, illud tamen molestum nobis erit explicare, quomodo in corpus unum idemque coalescant Atomis diversa, & quid illud sit quod Corpus ex Atomis infinitis constans unum denominet. Sed de istis postea, ubi de principio individuationis; differunt (inquit) Res (nempe Corpora) vel magnitudine vel plusquam magnitudine, illa similia hac dissimilia dicuntur; dissimilia vel specie vel genere differunt. Benè habet quod, finem invenerunt dichotomiæ, metuebam ne omnia divisionibus impleteret. Videamus quid sit differre specie, quid item genere. Specie (inquit), differre dicuntur, si differentia eorum eodem sensu percipiatur, ut Album & Nigrum, quoniam ex eorum numero ipse sim, qui non existimant album & nigrum differre specie, sed ita se habere album & nigrum, reliquosque colores ad colorem, uti se habent Petrus, Iohannes & Thomas ad hominem. Quin tamen fieri potest ut dissentiant à me hac in re viri eruditi non luctabor. Verum illud quaero, an non differentia inter Thomam & Simonem eodem sensu percipiatur. Differet igitur Thomas specie à Simone; at verò specie non differt; nam & Simon homo fuit & magus est habitus, aliaque plura quæ nunc non est opus repetere.

At pergit, dicitque ista genere differre, quorum differentia non percipitur, nisi sensibus diversis. Instantiam pono, cujus solutionem ab ipso expecto. Illud libenter quaererem, an motus celeriter reciprocatus differat genere à motu tardiori? nempe intra pulsuum duorum intervallum corpus aliquod, exempli gratiâ, funiculus tensus vel corda utrinque constricta paucas vibrationes perficere statuatur; deinde eodem spatio mille; quaero, an motus posterior à priore toto (quod

(quod aiunt) genere differat? nullâ certè (inquies) ratione. Attamen motus ille qui priori casu visum movebat, nunc movebit auditum, & quod prius *motus* erat vocatum, nunc *sonus* appellabitur, poterit itaque eadem omnino res quoad naturam (modum solummodò mutando) varios ferire sensus, ideoque ab iis non erat Philosopho sumenda differentia vel Specifica vel Generica.

In tribus Articulis vel Sectionibus sequentibus aggredditur rationis seu relationis in quantitate definitionem ejusque explicationem. Verùm ista ad examen redegit Cl. D. Wallisius, multisque ostendit quàm fuerit ἀλογος sibi que contradictorius, quam fuerit rudis atque imperitus omnis ejus sermo qui est de proportionibus; verè illum nimirum suâ cum ratione insanire. Quare Sectiones istas hoc loco transibimus.

: Sect. 6. de Relatione differens ita statuit, *non esse eam Accidens diversum ab aliis Relati accidentibus; sed esse unum ex ipsis, nempe illud ipsum secundum quod fit comparatio. Exempli gratiâ, inquit, Aequalitas vel inaequalitas idem accidens est quod rei magnitudo sub diversis nominibus.* Est igitur hoc saltem ex ejus sententia concludendum, æqualitatem esse magnitudinem (vel quantitatem) non minùs quàm inæqualitatem. At verò Capite sequente nempe 12. S. 8. hæc habet, *ratio (id est Relatio) inæqualium quantitas est, Ratio verò æqualitatis quantitas non est.* Pugnare certè mihi hæc videntur, cupio ut ipse litem hanc dirimere velit, neque enim nostrum est tantas componere lites. Miror certè deservisse eum phantasma suum hoc loco, ubi maximè ad relationis naturam explicandam posset inservire (cum enim in comparatione

consistat omnis relatio quæ rationis opus est, quidni jure non malo dicere possit relationem esse Phantasma.) Verum hoc fatum esse aiunt eorum qui damonio (vide Epist. Ded.) ad aliquod officium utuntur, ut se licet alias importunius illis ingerat & reculas perturbet; ope tamen ejus aliquando seriò indigentibus, subducere se soleat illicò atque officium detrectare.

Sed properandum esse sentio ad illud quod omnium maximè scire cupiebam, atque ab ipso discere sperabam: nempe quid illud sit quod corpus aliquod sive quiescens & stabile (siquod sit ejusmodi) sive in motu aut fluxu perpetuo existens, unum esse faciat & denominet. Cujus quæstionis solutionem §. 7. pollicetur. Ut autem contrahatur oratio, quæramus ab ipso (cæteris omisiss) an ipse sit idem ille Thomas Hobbius qui (in æternum scilicet oppidi istius decus) Malmesburix natus est. (Neque enim mei interest in annos Hobbianos inquirere) si autem idem sit ille qui olim puerilia etiam meditatus est, quâ ratione, quâ causâ factum sit, ut sit Idem. Ad primum igitur membrum respondet, esse eundem hominem senem qui fuerat juvenis, *vel confundenda esse jura omnia humana* (poterat & divina, nisi ipsi nihili fuissent, ad junxisse) manet igitur ut nodum illum secundum explicet & solvat. Enumerat autem modos aliorum quibus individuationem determinant; nempe, alii ex unitate Materix, alii ex unitate Formæ, alii ex aggregato omnium Accidentium oriri & contineri individui unitatem asserunt; harumque omnium sententiarum enumerat incommoda. Ex prima confunduntur (inquit) jura. Ex secunda, duo corpora erunt idem corpus: Ex tertiis, nihil omnino esset quod fuerat: Quin igitur attendamus ad illius sententiam, *Idem* (inquit) *est*

est homo propter formam talem qua est principium motus (nempe cogitationum atq; actionum omnium) & fuit in generatione. Idem autem corpus infans & senex non est. Hæc (inquam) est ejus sententia, in qua multa habemus notanda & servanda in locum de homine, quorum & ipsum meminisse precor. Utpotè eundem esse hominem non idem corpus, unde sequetur naturam hominis diversam planè esse à natura corporis. Quinimo unitatem hominis petendam esse ab unitate formæ, formæ quæ sit principium motus, atque adeò sit substantia, quæ maneat per integrum vitæ tempus atque sit eadem, & proinde sit substantia permanens, quæ eadem maneat in varia & multiformi materiæ partiumque corporis universi mutatione, ideoque sit incorporea. Hæc quia largitus est hoc loco pro sua benignitate Thomas, nos iis aliquando forsan perfruemur. Interea ipsius intererat, ut explicasset qua ratione differat sententia hæc sua, à secundâ ab ipso jam relatâ, & quomodo effugere possit istud incommodum quod nobilissimi Digbæi sententiam committatur.

Quin & alias eum ut Delium natatorem desideramus: inquit (Cap. 8. §. 23.) *Forma est Accidens propter quod corpori nomen imponitur. Accidens est concipiendi corporis modus.* (c. 8. §. 2.) est itaque sententiâ suâ forma hominis corporis humani modus. Est autem hæc eadem principium motus, & (cum de actione quærat) principium & causa pro eodem sunt habenda. (c. 9. §. 6.) Causa autem motus in corpore nulla est nisi in contiguo, & moto. (c. 9. §. 9.) Est itaq; & incorporea, & corporis humani modus, & corpus aliquod ipsi contiguum & motum; accurate hæc quidem, pro more Hobbiano. Sed omisâ contradictione sui ipsius, de formâ hâc à corpore jam diversâ inquiramus,

ramus, quam si placuerit, Animam nunc appellabimus, à corpore diversam eam, & (naturâ suâ) disjunctam. Est (inquit) hæc, Corpus motum, corpori humano contiguum; motum est, & motum corpori humano communicat, ergo ab alio corpore movetur, & quia motum corpori (idem manens perpetuò) communicat, movebitur etiam ab alio corpore perpetuo continuo, que motu; eritque hoc modo progressus in infinitum, nisi tandem aliquod concedatur ἀποκοπή τῶν. Hæc aliaque hujusmodi ea sunt quæ libenter à Philosopho hoc nostro explicata cupiebam, at Cynthius aurem vellit, & admonuit modestum me esse in quaestionibus oportere, ista enim Thomæ in mentem non venisse: quinimò ad alia potius, ne in librum Epistola inconcinnum excrescat, esse transeundum.

CAP. 5.

Considerantur Capp. 12. de Quantitate; & 13 de Analogismo. Et prima ejus Philosophia finis imponitur.

QUæ restant sub titulo Philosophiæ primæ Capitula tria sequentia Libri de Corpore (de Quantitate, Analogismo, de Recto, Curvo, Angulo, & Figura,) Cum vel planè Geometrica sint plurima, vel ad Geometriam propiùs spectent Geometriæq; Hobbianæ fundamenta contineant, ad inquisitionem à se faciendam ea pertinere non immeritò judicavit tum Clarissimus Wallisius, cui uberius in hæc re & impensius laborare, tum etiam Cl. Andreas Tacquetus cui nonnisi strictim libellum istum attingere visum est. Atque isti quidem viri doctissimi fecerunt

Eru.

eruditione sua atque diligentia ut nihil ferè relictum mihi sit animadversione dignum. Caput 12 totum in expositione quantitatum (re levi) versatur. 13. magno conatu rebus clarissimis nubeculas offundit. De utroque brevissimè. Levissimum illud (imò ut liberè dicam futilissimam) est quod habet Sectione tertiâ. *Ubi ait, exponi lineas, superficies & solida per motum, ut talis motus vestigia maneat.* Nempe importunè motum hic definitionibus infert, ut perturbet omnia, factisque ambagibus inficetis, ut scientiæ & eruditionis speciem suis conciliet, perpetuò ferè in tenues & leves sententias solet definire. Quid enim est hoc loco, motuum vestigia manere nisi lineas, superficies duci &c. nullusque est Paragraphus istius (si exponatur) sensus præter istum, exponi lineas si ducantur lineæ, & ita consequenter. Quinimò longè melius veriùsque asseruisset exponi motus per lineas, quàm lineas per motus. Nugax quinetis am puerisque appositum illud videri potest (nempe juventuti paratum rudi) quod sequitur, *exponi lineas &c per appositionem, ut quando linea linea (id est) longitudo longitudini adjungitur;* (quod & de aliis dimensionibus effert) Qualis est ista (quæso) expositio quantitatum? tu mihi si tibi abundat otium hoc etiam expone. Phantasticum illud est quod habet Sectione quartâ, nihilque sapit penitioris Mathematicarum rerum cognitionis, *ubi ob hanc rationem tempus exponi posse lineis ait, quia tempus est imago motus.* Nescire videtur omnia quæcunque tandem rationem aliquam aut proportionem habeant, imò quidni dicam omnia in universum exponi lineis posse, & eodem planè jure, quo tempus hoc modo exponitur, exponi à Mathematicis solere.

Exponi dicit (§.5.) numeros vel per expositionem

punctorum, vel per expositionem nominum numeralium, unum, duo, &c. Quâ quæso ratione effugit eum literarum numeralium, Ciphrarum etiam Saracenicarum aut specierum enumeratio? quibus exponuntur numeri non minus quam verbis & nominibus, sive voce sive scripto expressis. Nempe eâ ratione effugisse hæc illum videntur, ne forsâ ulla in re etiamsi minimi momenti plenus atq; accuratus scriptor evaderet. *Pondus exponi dicit per corpus aliquod grave* §. 7. Benè habet; linea per lineas, motus per motus, numeri per numeros, pondus per pondera exponuntur. Ecce Philosophæ, Logice, Mathematicæ profunde! imò verò hæc omnia lineis exponuntur, cujus rei rationes modumq; integrum suaderem, ut proximâ editione faceret, ut existimarent homines eum non ignorâsse. Neque etenim ratio duarum magnitudinum tunc exponitur (ultima exegesi) cum quantitates ipsæ exponuntur, nisi de ratione solâ Arithmeticâ, quæ in excessu simpliciter consistit, loquatur; (contra. §. 8.) cum illud habeat ratio Geometrica, ut ductionem vel applicationem ipsâ in notione involvat, quæ non nisi numerorum, vel specierum beneficio (modo numerorum ordinatorum) explicari possunt.

Jam verò (inquis) fieri non potest, ut proportionis naturam intimè penitissimèque non cognoscat, quæ una in re ritè tractanda non solum ea quæ proxim habent, sive in numeris, sive in Triangulis solvendis (in quibus omnis Astronomia, Geographia, Architectura, cæteræque artes humanæ vitæ inservientes) consistunt, quin & omnis profundiori in Mathesi peritia, sive in Theorematis inveniendis, sive in problematis solvendis, exercetur.

Opinaris impossibile esse ut ista non cognoscat, quæ prima ferè sunt Matheseos elementa à pueris intimè

timè animis hauriri solita, atque infundi, quicunque in Mathesi, sincerâ unquam fruuntur institutione; atque ipse revera V. D. in eadem antehac versatus sum sententia. Memini à juventute meâ Mathematicum eum ingentem habitum fuisse; electus est hoc nomine ut *Carolus* Principem in Mathematicis disciplinis institueret. Charus hoc nomine fuisse fertur illustrissimæ doctissimæque D. D. de *Cavendish*. Familix quæ & Mathematicas scientias egregiè plurimi calluerunt, & Mathematicorum insignium sive Nostratum sive Alienigenarum (prout mihi sæpius narrâunt Clarissimi viri D. D. *Painus*, & *Oughtredus*, gentis Anglicanæ ornamenta) uti Harmonicorum nuncupatione *Mersennus*, Conicorû *Mydorgius* palam testati sunt) eximii semper atque generosi animi Patroni extiterunt. Egone igitur ipsum hac laude gloriaque quam diu antehac consecutus est, sententia aliqua in ipsum atque in eruditionem suam duriori spoliabo? Egone ipsum possessione hâc sua detrudam, atque ex Mathematicorum familia submovebo? Certè V. D. lubrico nunc in loco mihi que odioso versari contigit, ubi de hominis sive eruditi, sive pro erudito habiti doctrinâ atque scientiâ statuendum esse videatur: Conscius nimirum tenuitatis ipse sum meæ; satis ego novi quàm sit mihi curta supellex: Clamare soleo animo non ficto aut ad speciem composito, verùm intus dolente, quantum est quod nescimus! quin etiam si à viris eruditis exciderit aliquid, quod non sit ingenio excultum, industriâ elaboratum, parciùs ista tamen objicienda memini. Quare sit *Hobbius* eruditus, imò eruditissimus; vel si non sit, pro viro tamè eruditissimo, ubi maximè illud ipsius intererit, habeatur. Sit, licet *felix ubicunq;* malis, modò hoc juventuti nostræ fraudi non sit aut periculo, modò metus non sit, ne viri hu-

mana sapissimè patientis, autoritate vel studiorum impedimenta atque obstacula ministrantur, vel ut rapiantur in errorem. Verùm enimverò cum hic mihi videatur rerum nostrarum status, liceat mihi paucissimis prolatis locum hunc transilire.

Reverà (ut semel illud proferam) nōsti me semper ante productum atque editum hunc librum de Corpore, de Thomæ (in Mathematicis præsertim,) intimâ scientiâ dubitasse, de ista re tamen vix quicquam palam protulisse. Cur autem neque jam ille me præconceptâ hâc sententiâ dimovit, accipe paucis rationes.

Animadvertēbam jam tum hominis ferociam, & recurrebat sapius in animo quod puer olim didicerim, nempe

— didicisse fideliter artes

Emollit mores, nec finit esse feros.

Neminem ego (cui tamen cum viris eruditissimis à puero versari contigit) noveram in aliquopiam scientiæ genere profundius versatum, qui mitis non esset & humilis, de se suisque modestè sentiens. Cernebam eum legitimè minimè demonstrantem ea quæ demonstrasse se venditabat, quin ea quam plurima, quæ videram, ingenium minimè subactum atque accuratum olere. Videbam de rebus Mathematicis confusè atque inconstanter, minimèque clarâ ratione perpetuâ atque evidenti, (quasi eas per transennam aut nubibus interjectis, & è longinquo, non comminùs, familiariter, absque velamine intuitus fuisset) locutum; eaque audiveram quæ à viro Mathematico excidere posse minimè judicabam; de molimine dioptrico, de susceptis atque promissis Geometricis; quam autem suaderent nonnulla ut invalenti jam

senectus

senectuti (de qua quidem honorificè sentire soleo & loqui) ista tribuerem, metuebam tamen ne ab imis fundamentis, atque ab ipsa juventute, malè fuisset institutus; nimirum objecit se hoc loco illud Plautinum.

*Hi senes, nisi fuissent nihili jam inde ab adolescentia,
Non hodie hoc tantum flagitium facerent canis capi-
(tibus.*

Atque hæc quidem ante visum extremum hunc laborem mihi in mentem venerunt; hoc autem conspecto opere, evanuit statim ab animo dubitatio omnis, dispergente eam penitus turpi atque infelici Tetragnismo, aliisque quæ mallem sepulta. Vidi ipsum adversus Analyticæ istius lucernam sæculo hoc nostro (immo studioforum emolumento) accensam, veluti vespertilionem involantem, juvenibus incautis suadentem, ut suos sibi oculos eruerent, quod tantæ in Mathematicis luci impar ipse foret; vidi eum maxima molientem, in minimis tamen (etiam iis quæ ad proportionem spectant) fædissimè errantem; quinimò pueriles istos errores continuo in viriliores adolescere

—viresq; acquirere eundo.

Hæc autem quia fusius ostendit Cl Wallisius in Elencho Geometriæ Hobbianæ, nolo ego quod actum est agere, aut spicilegium facere; verum quoniam ipse Hobbius cum Vindice quodam Academiæ de Methodo (uti vocat, imperitè, cum methodus non sit, sed nova solummodò quantitatum designatio) Symbolica controversiam instituit, totusque in eo est, ut juvenes à Symbolica ista seu speciosa designatione (quâ freti *Vieta*, *Oughtredus*, *Harriotus*, *Carræsius* Mathematicas disciplinas immensè auxerunt) ab-

ducatur

ducat, ad verbosam istam sive veterum sive recentium Mathematicorum; re ipsa ostendam quicquid sani habuerit in capite de Analogismo facillimè Symbolicà methodo demonstrari, atque ipsa quantitatum huiusmodi designatione nudà patere, cum ipse ea interrim inconcinne & perturbatè non sine frequenti paralogismo evincere conetur. Nihil igitur aliud supponentes præter hoc unum, *Arithmetice proportionalia tum dici cum inter terminos antecedentes & consequentes aequalitas est differentiarum; Geometricè cum est aequalitas quotorum;* age: Theoremata sua de proportionibus universa nos totidem lineis apertè ostendamus.

Manifestum autem est ex præmissis proportionem Arithmeticam hoc modo in universum designari posse, ut sit

a . a + c † b . b + c. proportio Arithmetica.

a . a + b . a + 2 b . a + 3 b . &c. proportio Arithmetica Continua.

Proportio autem Geometrica hoc modo.

ba . b :: ca . c Proportio Geometrica.

b . ba . baa . baaa Proportio Geometrica Continua.
vel b . ba . ba² . ba³

Istis hoc modo præsumptis ad Theoremata Hobiana accedamus. Sint in proportionem Arithmeticam.

Art. 5.] a . a + b † a + 2 b . a + 3 b. Ergo. a : + a + 3 b
= a + b : + a + 2 b.

Item Z = a + a + 3 b in 2.

Item si a . + a + 3 b = a + b : + a + 2 b

Erunt

a . a + b † a + 2 b . a + 3 b

Item a + d . b + c † ~~a + b~~ a - b . c - d .

Item si a + b = c + d. erit

a . c † d . b .

Alias

Alias sit $a \cdot c \cdot d = b$

erit $a + e = c + d$.

ergo non $a + b = c + d$.

Sint autem in proportionem Geometricam.

Art. 6.] $ba : b :: ca : c$. Ergo

$ba, ca :: b, c$.

$b, ba :: c, ca$.

$bba, ca :: bb, c$.

$ba, cca :: b, cc$.

$ba + b, b :: ca + c, c$.

$ba, b + ba :: ca, c + ca$.

$ba - b, b :: ca - c, c$.

$ba, ba - b :: ca, ca - c$.

Sint

7. $ba, b :: ca, c$ } erunt $ba + be$ } $2b$
 & } $2c$ } $ca + ce$ } $2c$

$be, b :: ce, c$ }

Sit

8. $bae, b :: ca, c$ }

Erit

$bae, ca :: b, c$ } etc.

Et

9. $bae, b :: cae, ca$

10. $ba, ca :: ba - b, ca - c$.

11. $ba \vdash b, ca \vdash c$

12. $bae, ba :: cae, ca$

13. Sint quotcunq; b, ba, ba^2 . Erit $\frac{ba}{b} + \frac{baa}{ba} = \frac{baa}{b}$

Coroll. 1. b, ba, ba^2, ba^3 . Erit $\frac{ba^3}{b} = \frac{ba^3}{ba^2} + \frac{ba^2}{ba} + \frac{ba}{b}$.

Coroll. 2. Compositio rationis.

Coroll. 3. Sint $ba^2, ba :: ca^2, ca$ } erit $ba^2, b :: ca^2, ca$
 $ba, b :: ca^3, ca^2$ }

Theoremata quæ ipse perplexa & multipliciter errante oratione vix ac ne vix ostendit, sola hac Symbolica quantitatum designatione manifesta esse, atque ex ipsa proportionalium definitione demonstratio nem secum ferre, iis qui in Symbolica hac vel speciosa Arithmetica omnino sunt exercitati; imò cum ipse forsan, methodo (uti eam appellat) verbosâ cerebellum crebris sævisque ictibus feriendo, pauca hæc Theoremata extuderit, poteris facillimè hanc arte horæ unius aut alterius spatio mille Theoremata (imò terminorum numerum augendo artemque combinationis applicando, millia millium) ejusmodi, invenire atque inventa per ductum vel applicationem nudam demonstrare. Quod ad Vindicem attinet cujus in gratiam suscepta hæc omnis videatur comparatio, non sum ipse admodum sollicitus: De causâ Academicarum quam adversus Thomam hunc nostrum suscepit, imò & de suâ, judicabunt viri boni atque eruditi: illud solummodo mihi curæ est nequid detrimenti ab hujus hominis commixta arrogantia atque *avida* imperitiâ Respublica literaria capiat: hoc unum igitur cupio, si quis hæc leget ut alta mente illud recondat, neminem hætenus in iis autoribus qui Symbolicam hanc coluerunt (*Vietâ, Harrieto, Warnero, Oughtredo, Cartesio, Schotenio, aliisque,*) aliquem vel minimum (qui sit alicujus momenti) errorem invenisse. At in Hobbio hoc nostro qui de Analyticâ novâ, more potius Psittacorum quàm Geometrarum, sermonem ubique instituit, omnique molimine ab ipsa juventutem retrahere conatur, inventurum esse quemvis in Geometricis mediocriter exercitatum, infinitos errores, nihilque sanum quod non sit vel tritum & vulgare, vel ab aliis haustum ne dicam clanculò surreptum, Imò verò si centum mihi forent linguæ simul

simul oraque centum, illud ipse intonarem, fugiendas esse, veluti Syrenum cantilenas, illorum hominum voces, qui adolescentes à speciebus atque rerum ipsarum contemplatione ad verba deducerent; quoties hac ratione Hobbius vel scopulis adhæsit, vel horribile passus est naufragium. Imo verò (nunc ego vos alloquor Adolescentes, siqui hæc nostra estis lecturi,) nisi vobis ipsis defore velitis, nisi ventis & ipsi ludibrium debeatis, eos ipsos (statim ab haustis Geometriæ primis elementis) jam supra laudatos Autores

Nocturnâ versate manu, versate diurnâ.

Cernitis flabilem Hobbianæ methodi verbosæ illius atque loquacis catastrophem.

Frigidus, O pueri, (fugite hinc) latet Anguis in herba.
Discite tamen quorum facta imitamini eorum exitum perhorrescere.

Atque hic quidem (quia Caput 14 Clarissimo meo Collegæ curæ fuit, ut illud ferè integrum diffaret) Philosophiæ Hobbianæ primæ Finis esto.

SECTIO. III.

De Physicâ Hobbianâ.

CAP. I.

Examen Capitis 26 libri de Corpore, quod est de Universo & Syderibus.

HActenus extra Philosophiæ Hobbianæ pomaria in Suburbis hæsimus, versati scilicet in Propædeumatis; juvat nunc in urbem ipsam introire ibique ædificia tam præclaris fundamentis superstructa contemplari, nempe *Edita doctrina sapientis templa serena.*
Quam

Quamquam autem conferre huc gradum vel animi gratia aliquatenus juvet, vel instituti ratione adductus necesse habeam, nolo hic tamen usque morari, ne convulsis jam antea fundamentis, opprimat me, vel caput ladat labentis operis ruina.

Partis hujus initio, Hobbio gratulatur Thomas, quòd præterita (nempe Computationem, Primam Philosophiam, & Geometriam) ita executus fuerit, ut nihil illic affirmaverat, quod non fuerit satis demonstratum. *Morus* (inquit) & *magnitudo per se & abstractè consideravimus.* (cap. 24. ad finem) Præclarum factum! modò verba condonaverit Priscianus,

*Nempe opus exegit, quod nec Jovis ira, nec ignis,
Nec poterit ferrum, nec edax abolere vetustas.—
Nemo illum lachrymis decoret nec funera fletu
Faxit. —*

Nomen certè habiturus est olim, illudque inter Icaros aut Orontios forsan immortale. Tres nempe viros magnos natura edidit.

*Alexandrum magnū atq; Agathoclem aiunt maximas
Duos gessisse: quid sibi fiet tertio
Qui solus facit facinora immortalia?*

Ego quidem, ut cernis, agrè divellor à Thoma nostro ob Geometriam suam præcipuè laudando, qui de *quadratura Circuli* scripsit *problematicè*. Scripsit de tribus Thomis libellum Stapeltonus nostras, (& ipse hoc nomine clarus) quidni ipse adjiciam quartum? at at quonam meo fato fieri dicam ut erepta sit mihi hæc provincia (eaque à Doctissimo Collega felicissimè administrata, qui laudes Hobbianas (in Elencho) pro meritis

meritis suis immortalibus, pleno ore ebuccinat?) quoniam inquam fato, nisi eo cujus autor est Philosophus hic noster? quod quia delicta omnia tollit ab hominibus; ignoscet igitur ipse mihi absque ampliore honoris præfatione Physicam ipsius aggredienti,

Incipit ipsi Naturalis sua Philolophia, à contemplatione *Sensionis & motus Animalis*. At quoniam is scopus est atque finis omnis istius capitis, ut *operationes humanas* explicet, earumque rationem reddat, nos autem de *Homine* (ex mente Hobbiana) post absolutam Physicæ suæ considerationem separatim agere initio decrevimus; à Capite potius 26 quod est de *Universo & Syderibus* inscriptum, exordiemur. Atque hic quidem licet tibi (V. D.) de magnis rebus nobisque magnopere desideratis loquentem audire. *Quæstiones* initio istas proponit

1. *An Mundus sit finitus, vel infinitus?*
2. *An fuerit aternus, vel non fuerit aternus?*
3. *An sit plenus, vel non plenus.*

Quis esse potest (quæso) animo tam duro & stupente ut ad ista non gestiat & aures arrigat? quis ea scire non desiderat? quare de duabus simul prioribus eum dicentem primò audiamus, deinde de iis singulatim.

Quæstiones (inquit §. 1.) *de Magnitudine & Origine mundi, non à Philosophis, sed ab iis qui ordinando Dei cultui, legitimè presunt, determinandæ sunt.* ἐπεὶ οὖν ἰὺ ἰαὺ! quo me geram modo vir dignissime? quantâ de spe decidimus! sperabam ipsum de omni re quæcunque sit proposita ornatè & copiosè dicturum. Cur nos deserit caputque condit, subducitque oculis? quid est quod spem metumque iramque & gaudium tyrannica hac sententia simul excitando nos cruciat? Non sunt

sunt (inquit) ista à Philosophis determinanda; non forsitan à Stagyritis, sperabam autem à Malmesbutien-
si omnia bona fuisse expectanda. At ab iis determi-
nanda esse asserit, qui ordinando Dei cultui legitime
presunt, Nempe ab iis qui potestatem gladii quocun-
que modo adepti fuerint (hoc in Leviathan & libello
de Cive ubiq; statuit) mirum hic gladius est gladius
Delphicus, ad omnia inservit, edique oracula.) Vere-
or ut se usu hujus paragraphes plene assequantur om-
nes, hic autem is est. Si edixerit Magistratus mundum
fuisse æternum, æternus fuit; si non fuisse æternum
sed creatum, creatus fuit & non æternus; eodem mo-
do, si statuerit Magistratus immensum esse mun-
dum, immensus est; sin è contrario, non est im-
mensus.

Nempe hoc est quod supra asseruit *veritatem & falsitatem ex hominum arbitrio pendere*. Ita Senatum statuisse audiverat nunc Oxonium Cantabrigiæ, nunc Cantabrigiam Oxonio fuisse antiquiorem. Ego qui-
dem credo potuisse Thomam illud determinare; nol-
le autem donec Rex fiat vel Pontifex Romanus. Erunt
certè felicia illa tempora ubi vel Rex ipse Philoso-
phabitur vel Philosophus regnabit. Cernis quanti in-
terfit Reipublicæ (saltem literariæ) ut ipse dominetur.
Sed protelandam esse cernis rerum istarum in genere
expectationem; venemur interim (fieri si possit) ejus
sententiam primò de magnitudine mundi, deinde de
duracione.

*Nihil (inquit) absurdi sequetur, sive finitus mun-
dus sive infinitus statuat*. Statuatur igitur infinitus
& videamus quid inde consequatur. Nempe po-
natur esse corpus infinitum, cum autem corpo-
ris natura ipsi in eo consistat, ut extendatur, a-
deoque ut dividi possit, dividi statuatur; Quod si
divida-

dividatur, ex partibus constabit, quod si ex partibus constat, non erit infinitum vel indeterminabile. *Partes enim quocumq; cum singula sint finita etiam simul sumpta facient totum finitum.* (cap. 7. S. 12.) impossibile igitur est, ut Corpus sit infinitum. At verò Mundus Hobbio corpus est, nihilque habet præter Corpus; infinitus igitur Hobbio non est. Certe sequitur ex hac positione (atque illud fatente Hobbio) vel totum non esse majus sua parte, vel Solem, Sydera, variaque Systemata Planetarum mundi partes non esse (quamvis ex iis universis mundus ipse constet) quorum tamen prius esse rationi repugnans ait se a libi demonstrasse. (alii pro principio intelligentiæ illud habuerunt,) posterius jam ipso hujus capituli initio evertit, cujus Epigraphæ est de *Universo & Syderibus*, initium est illud: *contemplationem sensationis sequitur contemplatio Corporum quæ sentiendi objecta sunt, objectum autem omne universi mundi vel pars est, vel partium aggregatum.* Partes igitur habet mundus universus, idque ex mente Hobbii ideoque ipsi infinitus si statuitur, vides quid sequetur. Sequetur (inquis) ut ipse sibi manifestè contradicat; ac ipse susceperat *absurdi nihil sequi ex ista positione: sibi ipsi igitur suisque demonstrationibus contradicentia sequi, non est ipsi absurdum.* Omissa igitur quæstione de magnitudine mundi, transamus ad ejus durationem, ubi melius fortasse rem suam geret.

2. Atque hic quidem triumphantem eum invenies in aliquem qui ex rebus naturalibus mundi originem (uti videtur) demonstrasse se jactat. Odi ipse centè jactantiam omnem; quare prius videbimus quomodo se habeat ista inter Thomam istumq; ἀλάζονα controversis. Postea quid sit ex principiis Hobbianis statuendum.

Est igitur libellus quidam Anglico idiomate scriptus, cui titulus est *Tentamen Philosophicum*. Huic scopus est, ut ex principiis rationi humanæ manifestis, evincat Dei existentiam ejusque Attributa; Animi humani immortalitatem, & demum S. Scripturæ auctoritatem. In primæ partis executione illud sumit, aut mundum hunc nostrum Originem habuisse, aut dierum e. g. numerum actu infinitum, quodvis assignatum tempus præcessisse, unde sequetur totum non esse suâ parte majus. Nempe numerus præcedens natiuitatem Isaaci non erit major eo qui natiuitatem præcessit Abrahamis hoc autem judicat istius libelli autor (quæ est & mea sententia) esse absurdum. Quid interim ad hæc D. Hobbins?

Hoc modo demonstrantem (inquit) se laudare non posse. Dolendum hoc certè tibi mihi que in Autoris istius gratiam, nî forsan (quod ille de Vindice, qui huic Autori [ut nosti] admodum affinis est) laudari ab homine qui moribus est Hobbianis ipse minus honestum esse judice.

Sed quare non potest eum laudare? quid Thomam (quæso) movit, ut tam horrendo judicio adversus eum constituat? ut fulminis tam diri vim coruscant in eum evibret? *Quoniam (inquit) similis demonstratio est, ac si quis ex eo quod numerorum parium numerus sit infinitus, totidem esse concluderet numeros pares, quot sunt simpliciter numeri, id est, pares & impares simul sumpti.* Imò verò parem esse concedo ratiocinationem vel potius eandem, illud expressè dixisse libelli istius auctorem, posita mundi à parte ante (ut loquuntur) æternâ duratione, inferri exinde ea incommoda quæ positionem numeri actu infiniti consequuntur. Inter ipsa autem esse aut infinita ex finitis constare, aut totum non esse majus sua parte. Quæ utraque ipse absurda

esse judicat. Expectabam ut Hobbius pro eruditione sua ostenderet vel ista à positione æternitatis Universi non consequi, vel non esse absurda; vel si æternus sit mundus numerum dierum infinitum datum aliquod tempus non actu præcessisse, vel hoc concesso, totum esse parte suâ majus, (simpliciter numeros paribus vel imparibus plures.) Verùm satius est ista contemnere *quod* (inquit) *faciunt merito tum Eruditi, tum Idiota, illi quia intelligunt, hi quia non intelligunt.* (Delicatè admodum!) Quæres cui demum familia sit ipse ascribendus; hoc potiùs ex sequentibus innotesceat. Dicendum enim restat quid sit ex principiis Hobbianis hic & alibi dispersis statuendum.

Nolo pertrahere lentam orationem, paucis rem accipe,

1. Statuit Hobbius determinari non posse quæstionem de mundi Æternitate.

2 Cum statuatur contemnendam esse ratiocinationem ex positione numeri infiniti, ipse interim eodem utitur ratiocinio. Quæstionem eodem modo determinat, adeoque sibi ipsi semel iterumque contradicit.

Primum horum jam antea manifestum est factum, ubi Magistratui vindicandam hanc potestatem decrevit, Philosophis auferendam. Docendum est potiùs principiis à se positis in hoc loco, ipsum contradicere. Contemnendum esse argumentum illud à numero actu infinito asserit. Vel igitur contemnendum est, quia ex positione mundi æterni non sequitur numerum dierum actu infinitum esse, vel quia ex numero actu infinito nil mali sequitur: illud dicere nullo modo potest; hoc autem sibi in mente fuisse ostendit prolata ab ipso instantia. Quare ipsum alibi loquentem audiamus. Nempe (Cap. 7. Sectione 12.)

No-

Notandum (inquit) est, etsi in tempore (quod potentia infinitum est) numerari possunt plures hora quocunq; numero, qui assignari possit, numerum tamen illum finitum fore; omnis enim numerus finitus est, — partes quocunq; cum singula sint finita, simul sumptæ constituent totum finitum — duo autem tempora infinita esse intelligi non potest. Cernis principiis à se positis apertè eum contradicere & seipsum contemnendum esse laborare. Dices ista non absque ingenio aliquo aut studio in contradictionem trahi posse. Vide igitur illum in libello de Homine (p. 132.) præclare quidem meâ sententiâ ratiocinantem. Effectus quos naturaliter agnoscimus, potentiam sui productivam supponunt, eamque productionem eorum præcedentem. Potentia autem, aliquid existens supponit quod illam habeat. Aut igitur res ista existens aterna est, aut non aterna; Si non fuerit aterna, producta est ab Antecedente aliquo, illudq; ab Antecedente, donec ad aternam (id est, primam) potentiam potentiarum primamq; causam causarum perveniat. Hac autem ea est quam Dei nomine homines concipiunt. Spero Hobbiana omnia legitime demonstrata esse, quænam est vis autem hujus demonstrationis? quare necesse est ad aternam eamque primam causam pervenire, nisi ex eo, quod progressus in infinitum non datur, ne daretur numerus actu infinitus? Cernis eum, ut hominem quem Academicarum fuisse vindicem existimabat, prosterneret, cum eo una ruere & seipsum vulnerare non detrectâsse.

*Quis (quæso) indomitas tantus dolor excitat iras?
Quid furia? aut quonam vestri tibi cura recessit?*

At dices tu torlan non esse tempestivam hanc lamentationem; non patere ex doctrina Hobbiana, eundem esse Thomam hunc Senem ista edentem, qui fuit Junior (& vegetior) ille de Homine, multò sanius & doctius scribens: adeoque non ipsum sibi contradicere. Atque ego quidem sentio accuratè & strictè cum hoc homine agendum. Quid si igitur evincam ipsum eodem hoc capite, imò eadem sententia, eodem spiritus efflatu ea quæ mutuo se destruunt efferre. *Et si (inquit) ex eo quod nihil potest movere seipsum, satis rectè inferitur, primum aliquod esse movens quod fuerit æternum, non tamen illud inferetur quod inferre solent, nempe æternum immobile, sed contra æternum motum, si quidem ut verum est nihil moveri à seipso, ita etiam verum est nihil moveri nisi à moto.*

Ex eo quod nihil potest movere seipsum inferitur (inquit) primum movens, quod fuerit æternum. Mihi planè contrarium ex principiis suis sequitur, attende, quæso, annon & tibi. Sit enim movens, ergo ipsum movetur, ex Hobbii Philosophia; ergo vel à se, vel ab alio, & si ab alio non erit primum movens, contra hypothesin; si ergo sit primum aliquod movens, erit *ἀυτοκίνητος*.

At secundò, *non inferitur (inquit) primum movens immobile, sed motum.* Ego vero, siqui mihi sint oculi, siqua mens, cerno primum motorem etiam ex Hobbii doctrina *immutum non motum* esse debere. Sit enim motus, *causam* ergo motûs habuit, at *causa motus nulla esse potest nisi in Contiguo & moto* (c. 9. §. 9. & alibi sæpe) primum igitur movens non est, sed præcedentem habuit motorem, unde denuò si motor primus statuatur, sequetur esse illum *ἀυτοκίνητος*. At ipse verum esse inquit *nihil moveri à seipso*. Imò & simul statuit *nihil moveri nisi à moto*, exinde autem in-

ferri

ferrā primum motorem. Nempe primus motor est qui ab alio movetur, & quis omne movens ab alio movetur, est igitur primum movens. Sustine me, quæso, (V. D.) ne forsitan me statim corripiat vertigo? imò,

— Jam jam vertigine cecidim

Ambulas & geminis exurgis mensa Lucernis.

Video certè, annon & ipse vides? Collostantia & mutuò se destruentia, Phantasmata, bella! Horrida bellat

Tecta fremunt, resonant magnis plangeribus æther

Non aliter quam si immissis ruat hostibus omnia

Carthago.

Sed nolo homini eo in loco insultare, ubi laceffitus aliquo modo esse videar: satis est ea quæ antor iste Tentaminis Philosophici posuerat, (quem eundem & Vindicem Academiæ fuisse credit) destruere conantem manifestè cum interim aut hominem exuere, aut rationis deliquium subire. Transeo ad Quæstionem tertiam.

3. *An mundus sit plenus vel non plenus.*

Verlati sumus hæcenus in iis quæ rationis sunt mersæ, ab ejusque solius principiis petenda, ad ea nunc accedimus, ubi rationi sensus (experimenta ministrando) inservit. Ita ut in aliis quidem ingenii, hic ingenii simul & diligentiz Hobbiana specimina habeamus. Nostri quæstionem esse nobilissimam, in utramque partem acriter disputari, mihi autem cum cætera quamplurima à pleni assertoribus aliquo modo explicari posse censeam, illud interim minimè intelligibile esse, quomodo ex corporibus simplicibus & homogeneis alterum altero sit rarius vel densius. Mentem sic explicò. Si de Corpore aliquo rarefaciendo (exempli gra-

tia sumatur Aqua; quæratuꝛ affirmant pleni aſſerto-
res faciendum eſſe ingreſſum quendam partium Ab-
ris miuutiſſimæ æm in aquam, cuique cum partibus æ-
quæ conjungendas; & miſcendas hinc fieri ut nubes
ſit aquâ in palude exiſtente rarior, atque in cæteris
eandem eſſe rationem, rareſcieri, ſcilicet, ærem ingreſſu
ignis, vel ætheris, corporis. naturâ ſua ære rarioris.
Atque huiusque intelligi poſſunt. Quærimus autem
nos quæ cauſa eſt ut ſit Aer Aquâ molis eiſdem ra-
rior? Si dicatur Aer eſſe immiſtum æthera, redibit
quæſtio: ſcil. plus eſſe materiæ in aqua quàm in ære,
hoc etiam intelligimus. At quærimus quæ ratione fiat,
ut nunc plus materiæ ſeu corporis, nunc minus, aqua-
le ſpatiũ occupet? Cum autem eò res iſta ultimè redi-
gatur, ut vel dimensionum pénétratione, corporum
ſubitione, eiſdem corporis diuerſa quantitate (quæ ſi-
dem omnia mihi ſonant) hoc fiat, vel partium nunc
propius adjacentium, nunc intervallis mæjoribus diſ-
ſitarum poſitione. Fateor me ex eorum numero eſſe
qui poſteriore hunc modum intelligere ſe poſſe pu-
tent; priorem autem minimè me adhuc aſſequi potuiſ-
ſe, adeoque hac ſaltem ratione vacuũ non eſſe de-
negandum me exiſtimare. Quid interim Malmeſbu-
rienſis?

Ad tollendum vacuũ adducit experimentum ſæ-
pius tritum, attamen ut ſibi videtur validiſſimum. Deinde
de argumenta etiam tollit vacuũ Aſtruentium.

Eſto (inquit) Hydria AB, quali uti ſolent ad rigan-
dos hortos Hortulani, cujus fundus percuſus ſit pluribus
foraminibus, habeatq; oſculum A digito obſcurandum.
Aqua autem Hydria impleatur, ocluſo tunc oſculo, a-
qua non fluct per foramina, amoto autem digito, per om-
nia; rurſusq; applicito digito ſimul & ſubito omnis
ſiſteat.

En Experimentum! revera satis eritum (quin & a-
lia habet Epitheta Doctissimus Moranus.) quid inde
evincitur? Hujus (inquit) rei causa est, quod aqua
ponderis suo subiectum aerem pellere ante se non
potest.

Pellere autem non potest, propterea quod locus nullus
sit quo pulsus se recipiat, nisi vel pellendo aerem vicinum
usq; ad foramen A, ubi intret & succedat defluenti, vel
faciendo, ut per ipsam aquam (dicere debuit, prout &
mox se explicat, per fundi foramina) transiat. Signum
(inquit) hoc est vacua non dari.

Mirabere procul dubio argumento tam inani cum
niti vacuum e mundo ejicere, cui interfuit maximo-
perè illud demonstrasse. Cum sit illud fundamentum
unicum Philosophiæ suæ naturalis, quo semel convul-
so labitur ex omnis. Imò infirmum eum esse oportet,
cui istiusmodi argumenta sunt invalidissima. Expona-
mus illud ante oculos.

1. Causa (inquit) phaenomeni in hydria est, quod
aqua aerem pellere non potest.

2. Pellere non potest, nisi aer in ejus locum succedat.

3. Succedere in ejus locum non potest nisi vel per
osculam, vel per fundi foramina.

Cernis totam vim argumenti ad vacuum tollendum
in secunda ista propositione consistere. Illam autem
tum indemonstratam esse relictam, tum etiam falsissi-
mam esse contendimus.

Concedo nimirum causam phaenomeni esse quod
aqua hoc loco aerem pellere non possit, verum hujus
imbecillitatis causam eam esse, quod aer non possit
simul in ejus locum succedere, pernego. Non pellit
aerem in hydriis vulgaribus, quia pondus aqua non
superat pondus vel vim resistentis aëris.

Resistit enim aqua (occluso jam Hydria osculo)
aëris

aëris columna vel Cylindrus, cujus basis est prementis aquæ basi æqualis, atque ipse ad Atmosphæræ extimū ambitum extensus.

Equiponderat ista aëris Columna, aquæ Columnæ pedum circiter triginta duum, uti experimento jam infra tangendo constat.

Si igitur ad irrigandos hortos uterentur homines ejusmodi Hydriis quarū altitudo tot pedes excederet, deflueret aquæ illa pars quæ dictam altitudinem superaret, quantacunque ea foret atque ad æquipondium descenderet, etiam osculo occluso cæterisque omnibus eodem modo cum Hydria Hobbiana se habentibus.

Verum cum Hydriis tantæ altitudinis neque utantur hortulani neque uti possint, non defluet ipsis (occluso jam osculo foraminibusque in fundo angustioribus existentibus) aqua, non quia succedere non possit in locum ejus aer, sed quia aerem ab Atmosphæræ summitate desuper ipsi incumbentem & præponderantem loco pellere non possit.

Nempe si causa hujus phænomeni foret natura à vacuo abhorrèntia, non magis aqua deflueret in altissimo canali, occluso atque (ut aiunt) Hermetice sigillato, quàm in Hydria Hobbiana, imò ob fugam hanc vacui atrolli posset aqua in datam quamcunque altitudinem, ope nimirum machinarum hoc uno principio nitentium.

At verò aquam ob fugam vacui non ultra 32 pedes circiter ascendere sive in Antheis, sive in Siphonibus, sive machinis aliis quibusque, experti sunt antehac causam ignorantes suo magno cum dolore, quorum interfuit terminum hunc aquarum ascendui, id est, pondus hoc acri naturam minimè tribuisse.

Si vacuum ita fugiat natura, ut ejus metu atque ab-

hor-

horrentia, singulians quasi spiritumque cohibens, ac quam in hydria ne defluere possit, retineat; quæ causa est quod idem in altioribus non faciat canalibus? imò quæ causa est, quòd, si argento vivo impleatur hæc ipsa hydria modò 26 uncias altitudine excefferit, defluet illud statim omne, nimirum si aer sive ex summo, sive ex imo interveniat; sin minus, defluet tamen donec ad altitudinem non nisi 26 unciarum in Hydria quantæcunque altitudinis pervenerit? Quod autem de Aqua & de Argento vivo dictum, intelligendum est etiam secundum ponderis Analogiam de quocunque demum alio liquore. Nempe non esse eum in canali satis longo ob fugam vacui permansurum; verum prohibito aere aliove corpore, atque ab ingressu impedito, descensurum donec in tubo vel canali relictum sit, quantum 32 pedibus Aeris vel 26 unciiis Argenti vivi æquiponderet.

Hæc cum ita se habeant, norint ii omnes qui naturam ipsam contemplantur, quique in deliciis habent sensus atque experimenta consulere, omnia prius lustrare phænomena quàm de rebus naturalibus ἀξιωματικά atque νεώτερά ἐκ καθέδρας effundunt. Miraberis tam lævam fuisse philosopho huic nostro mentem, ut Philosophiæ suæ naturalis universæ molem tam lubrico fundamento atque fluenti, temeritate maximâ atque oscitantia imponeret. Sed tamen æquum erat ut sui similis ubique procederet, ut ultima primis responderent, ut diligentia ingenio palmam minimè præriperet.

Qualis ab incæpto processerit, ut sibi constet.

Videbat certè, *occluso Hydria osculo aquam non effluere, amoto autem digito ut aer supernè ingrediatur per omnia fundi foramina, rursusq; applicito digito, simul & subito fisti eam omnem.* Ecce observantis (pueri opinor olim) diligentiam.

Hinc

Hinc ita philosophatur, *Ingrediēte aëre supernè effluit aqua, & aëre non ingrediēte non effluit, Ergo impossibile est (ipsius verba sunt) ut aere non ingrediēte effluat. Ideoq; ut sit vacuum aliquod, est impossibile. Ecce ingenium Philosophantis!*

Dicimus aeris ingressum nonnisi ad modum accidentis aquæ effluxum comitari; verùm phænomenon ex aeris adversus aquam resistantiâ omnino regulari, nimirum Hydriæ osculo occluso resistit. Aquæ Aer ad extremum usque Atmosphæræ; atque ille quidem in hâc instantiâ aquæ præponderat, sive resistantiam objicit aquæ gravitate majorem; remoto autem digito, resistit aquæ non columna aeris ad Atmosphæram, verùm ad Hydriæ osculum solummodo extensi; unde aquam prægravare dicimus, ideoque effluere.

Hactenus ingenii & diligentiz specimina exhibuimus. Habebis & judicii in adversariis sternendis: Sunt isti vel veteres, vel novi, quorum illi rationibus agunt, hi experimentis. Argumenta petuntur ex Lucretio, & sunt illa quatuor.

1. Vacuum nisi detur, nihil (inquit ille) moveri incipiet, non lapis in aëre, non piscis in aqua.

*Nam quò squammigeri poterunt procedere tandem
Ni spatium dederint latices? Concedere porro
Quò poterunt unda, cum pisces ire nequibunt?
Aut igitur motu privandum st corpora quæq;
Aut esse admistum dicendum in rebus inane,
Unde initum primum capiat res quæque movendi.*

Nimirum hæc argumenti vis est; piscis in aqua nequit moveri nisi spatium det aqua; ista autem spatium dare non potest si omnia sint plena, neque enim

enim habet quo se recipiat. Nempe quo instante piscis versus plagam aliquam movetur, & aquam eò propellit, nisi vacua sint spatia quæ motam aquam admittant, erit vel corporum subingressio, seu penetratio, vel motus necessario in infinitum versus plagam eandem continuatus, quæ duo implicant: Quare nisi vacuum detur, non incipiet Piscis (exempli gratiâ) moveri. Quid ad hæc Thomas?

Nempe (inquit Sect. 3.) hoc argumento concludi potest, nisi fuisse motum mobili coeternum, vel coævum, quorum neutrum consistit cum doctrinâ Epicuri, qui & mundo & motui initium abstulit. Non autem ergo vacuum necessitas demonstratur.

Præclare omnino & Hobbianiter! Neque enim aliud occurrit vocabulum, quod hujus hominis sive ingenium sive judicium sive diligentiam & attentionem exprimat.

Disputat de initio motus rei cujusq; Lucretius. Respondet Hobbius de initio motûs in universo, conceditque motum in universo nisi simul cum corpore universi incipere nullo modo potuisse: esse nimirum motum corpori vel coeternum, si edixerit Magistratus mundum fuisse æternum; vel coævum, si statuerit mundum capisse. Nempe motum corpori necessario coævum esse ait hoc argumento evinci. Ipse verò illud neque hoc argumento neque ullo ingenio Hobbiano evinci posse existimo. Ponatur mundi corpus factum fuisse, sive initium habuisse, quod ex principiis Hobbianis jam supra intulimus; quæ causa esse potest, ut motus non fuerit corpori jam facto superinductus? Si *Deus sit causa mundi*, uti statuit ipse alicubi (C. cap. 15. Sectione 13.) idemque sit *primus motor*; quidni potuit corpus primum creare, deinde

de motum ei communicare?

—*Dic Quintiliano colorem,*

Dic aliquem.—

Verum quid hæc omnia ad argumentum Lucretii? hic certè locum habet illud quod dici solet. *Ego tibi de Allio loquor, tu respondes de Capi;* disputat Lucretius de Pisce, habet ipse interim (quod aiunt) nihil ad Rhombum; de Pisce in liquido movente, de quo Thomas est omnino mutus.

2. Quin pergamus illicò ad secundum Lucretii argumentum, quod sumptum est à pondere & continetur (ut ait) in his versibus.

Corporis officium est quoniam premere omnia deorsum;

Contra autem natura manet sine corpore inanis;

Ergo quod magnum est æquè, leviusq; videtur,

Nimirum plus esse sibi declarat inanis.

In ea sententia est Lucretius (&, ut opinor, omnes sapientiores) gravitatem atque densitatem, quin etiam levitatem & raritatem se mutuò consequi; quin & stat densi corporis affectionem vel *ov'μῆσιν* perpetuum in sphæra observationis nostræ esse descensum [(inter leviora) atque ad terram vergentiam; sic igitur argumentum Lucretii instituimus.

Sunt ex æquè magnis, corpora alia aliis leviora, (id est sensu nostro rariora) quod absque vacuis interstitiis esse non potest, quare concedendum est esse in natura vacuum. Atque hoc quidem argumentum (quod de Hydria dixit ipse ex adverso) mihi videtur validissimum & gravissimum. Attende, obsecro, ad illius responsum. Nempe tria hic reponit.

1. Deor-

1. Deorsum nihil negotii habere cum natura rerum, sed esse figmentum nostrum.

2. Si omnia (inquit) ad unum infimum tenderent, aut nihil coalesceret, aut omnia in unum locum cogerentur.

3. Quin tollitur vis argumenti; quia idem facit atomis intermixtus Aer, quantum efficere existimat ille intermixtum vacuum.

At certè illud deorsum uti nihil habet negotii in natura rerum, ita nihil habet virium in argumento Lucretiano; si vim aliquam habuisset, omisisset illud pro more suo noster Philosophus.

Nihil aliud voluit Lucretius quam corpora, (incertâ mensurâ sumpta) habere corporeitatem, densitatem, gravitatem, sibi invicem proportionalia: Cum sit autem Gravitatis in orbe hoc nostro nonnisi Symptoma densitatis, frustra ex relativa Symptomatis natura, & sophisticè eludere vult ipse argumentum ab ipsa corporis natura vim habens. Quare responsa ista petita à figmento tū deorsum & à tendentiâ ad unum infimum, levitatem potius Sophisticam olent, quàm hominis Philosophi & verum quærentis, gravitatem. Ubi autem ait facturum esse idem hoc loco, intermixtum aerem, atque intermixtum vacuum, facit ut illum fidenter asserere non verear, nullibi eum solere vel sua vel aliena intelligere. Sumantur duo corpora ejusdem (ut loqui solemus) magnitudinis, diversa autem densitatis, nempe pes cubicus Terræ qui sit A & pes cubicus vaporis al: cujus B. Est (inquit Lucretius) corpus A gravius, id est, densius, ergo plus habens corporis quàm B; vel contrâ, B levius est, id est rarius A; ergo minus habet corporis in spatio æquali, ergo plus habet vacui.

Respondet Hobbins B levius esse quàm A, non quia

quia vacuum habet immistum, sed aerem; vel igitur aer iste immistus tantum habet corporis quantum habet pars Terræ sibi mole æqualis, vel non; Si non habet, conceditur vacuum in aere; sin habet, ergo utrinque tum in Terrâ, tum in vapore (id est, tum in A, tum in B,) erunt Corporeitas, Densitas, Gravitas æqualis.

Nempe hoc est quod ipse initio monui, quamvis per corporum rariorum ingressum possit Rarefactio in infinitum fieri intelligi, non tamen esse mihi (credo certè nec alteri cuivis) intelligibilem notionem raritatis absque vacui imaginatione. Cernis interim leve esse & nullius momenti responsum Hobbianum ad argumentum illud de Pondere.

3^r Argumentum (inquit) tertium ab eo sumitur quod Fulmen, Sonus, Calor, Frigus, Corpora (exceptis ipsis Atomis) etiam solidissima penetrare visa sunt.

Argumentum nempe hoc ita potest institui:

Aut datur vacuum, aut corporum penetratio; ista non datur neque dari potest; concedendum ergo est illud; in disjunctione cum omnis dubitatio consistat, probat eam legitimam hoc argumento Lucretius; admittitur intime à corporibus solidissimis Fulmen, &c. quæ ipsa sunt corpora; aut igitur subeunt ipsa corpora, eaque penetrant, aut in spatiola vacua recipiuntur; non illud, à quo communis hominum (Philosophorum) sensus abhorret; hoc igitur statuendum. Quid ad ista Malmesburiensis? Nempe

Sed hæc (inquit) ratio, nisi quis prius demonstrâris ea omnia fieri non posse excluso vacuo, per motus perpetuam generationem, invalida est.

Est (ut nosti) V. D. vir quidam Nobilis inter nostros non immeritò celebris, qui itineris in partes Orientales à se peracti rationarium scribens, illud notavit,

tavit, differre à nobis Turcas non moribus solummodo quibusdam & institutis, verum ipsâ ratione primisque judiciis de rebus. Fieri potest ut origine Turcicâ sit Philosophus hic noster (illud sententia de fatali rerum omnium necessitate, illud sublata in rebus civilibus omnis libertas, summaque in regimine affectata ab ipso Tyrannis suaderet) hoc certè habet cum ipsis commune, differre à nostrâ, omniumque quibuscum versamur eruditorum hominum ratione, ipsius rationem; adeò omnia nostris contraria habet ratiocinia.

Probat ab ingressu fulminis in corpora solidissima, vacuum, Lucretius; respondet non valere argumentum, nisi prius demonstraverit absque vacuo fieri hoc non posse; annon satis est jam nunc hoc ipso argumento illud evinci?

At (inquit) hac ratio invalida est, nisi demonstrârit, fieri non posse Fulmen, Sonum, Calorem, Frigus, per motus perpetuam Generationem.

Multa certè habeo hoc loco, quæ possem referre. Separanda esse nimirum *Fulmen, Calorem, Frigus, à Sono*. Et cum sonus motu solo phantasma excitante creetur, aliter interim de Fulmine, Calore, Frigore (eo saltem quod congelationis causa est) esse statuendum; nempe non motu solo elementorum vulgò sic dictorum, sed motu in corpore modo sibi peculiari constituto ea fieri, Fulmen vapore sulphureo, calorem igne, frigus particulis nitrosis e. g. fieri, atq; hæc corpora solidissima subire: quare concedendum adhuc esse vel vacuum, vel penetrationem. Verum non eò necesse habet Lucretius ut fugiat; Nempe hoc illud est quod sibi concedendum optat Hobbius, motus perpetuâ generatione hæc omnia fieri; at prius ostendit Lucretius Thomâ nequicquam reclamante absque vacuo neque motum, horum phænomenon

Causam, incipere potuisse, nec esse.

4. Postremò (inquit) *Argumentum quartum ab eodem Lucretio proponitur his Versiculis.*

—Duo de concursu corpora lata

Si citò dissiliant, nempe Aer omne necesse est

Inter corpora quod fuerat, possidat inane.


Is porro quamvis circum celerantibus auris

Confluat, haud poterit tamen uno tempore totum

Compleri spatium, nam primum quemq; necesse est

Occupet ille locum, deinde omnia possideantur.

Vis argumenti patet; sint duo corpora quædam plana $a\ c$ & $a\ \gamma$ quæ juncta primum concipiantur superficiebus, deinde separentur ita ut angulum constituent $a\ c\ \gamma$ vel $a\ b\ \beta$. Facta hac corporum separatione ingreditur aer, & spatium $a\ \gamma$ implebit: supponatur aer ingredi incipere ab extremitatibus planorū c, γ , & ad a tendere; cum igitur amotus in instanti fieri nullo modo possit, prius perveniet ad puncta b & β quam ad a , ideoque aliquo temporis spatio vacuus erit locus inter a, b, β interceptus. Hic (inquam) est sensus argumenti Lucretiani; videamus nunc quomodo argumentum hoc tollere conetur Philosophus hic noster.



Responder, pugnare ista cum sententia Epicuri; imò aliquanto plus pugnare, quàm sententiam eorum qui vacuum esse negant.

Verum quid nobis est negotii hoc loco cum Epicuro? Quaritur de vacuo, an detur in natura: dari probat Lucretius, argumento jam supra explicato;

Ref:

Respondet Hobbius deferere Lucretium magistrum suum Epicurum. Clamandum denuò esse cernis — *Ast ego falces quarebam.*

Sed & illud videamus, an neglectus fuerit Epicurus, & quomodo illud evincat Hobbius. Supponit Epicurus ex Atomis omnia constare quæ sunt in rerum natura (i. e.) ex corpusculis (non ratione & intellectu hominum, verum) naturaliter insecabilibus; ex atomorum istarum conjunctione res oriri, ex earundem separatione dissolvi; quin esse in corporibus quibuscunque missis, spatiola quædam vacua, ubique ferè interspersa: hæc est quidè generalis Epicuri Hypothesis. Quomodo nunc eam labefactavit Lucretius? *Non valet* (inquit Hobbius) *argumentum Lucretii, nisi ostenderit corpora aliqua esse infinitè dura: sed si supponamus Atomos (ut Epicurus) insecabiles, habentes tamen suas superficieculas, si componerentur duo corpora secundum plures vel unam tantum utriusq; superficieculam, argumentum hoc Lucretii firmissima demonstratio erit, corpora nulla quæ ex atomis concreta sunt, ulla unquam vi diffringi posse; id quod quotidiana repugnat experientia.*

Sententia responsionis hæc est, si corpora infinitè dura superficiebus jungantur (sive majora sint corpora, sive ipsa atomorum corpuscula) nulla unquam fieri poterit eorum separatio. Cur ita? quæsumus. Nempe si fiat separatio, vel erit *motus instantaneus*, vel erit *vacuum* concedendum. Atque hoc quidem concedit, imò supponit Philosophia omnium Epicurorum Lucretii, hoc est quod in gratiam Epicuri contendit argumento jam nunc proposito Lucretius; illud autem Epicurus, Lucretius, & sana mentis omnes (imò ipse H.) rejiciunt. Et quænam est ea pugna Lucretii cum Epicuro? Mibi quidem videtur Lucretius etiam

Epicuri rem strenuè curâsse.

—alterius sic

Altera poscit opem res, & conjurat amicè.

Somniat interim hic noster nescio quas pugnas & prælia,

—bella, horrida bella

Et Tybrim multo spumantem sanguine cernit.

Certè contentiosum eum esse oportet, cui ubique, atque in locis tam serenis occurrunt rixarum & pugnarum phantasmata. Quod ad rem ipsam in qua versamur attinet, illud habent tum Epicurus tum Lucretius, quod nullo modo experientiæ aut rationi repugnat, nempe separari posse, corpora superficiebus conjuncta, sive Atomis fuerint, sive ex Atomis composita: hoc autem (cum motus in instanti fieri non possit) absque vacui concessione evenire non posse. Duobus igitur istis, *Experientiæ* & *rationi* innititur eorum ratiocinatio, qui vacuum à naturâ rerum non esse excludendum judicant, neque in contrarium attulit rationis vel umbram Hobbins, ut possit istam evertere sententiam; quinimò postquam principium petiverit, dixit.

Hactenus ingenii Hobbiani specimina dederunt responsiones ad argumenta Lucretii: transit ad experimenta quæ à vacui assertoribus solent allegari. Tria ipse adducit, nos quia primum cum tertio coincidit (utrisque ab aeris compressione & dilatatione ductis) ad duo ea reducemus, vel primum potius integrum transiliemus.

S. 4. 2. *Experimentum* (inquit) secundum est, quod si *Cylindrus concavus* (videndi experimenti causa) vitreus, satis longus, ex altera parte apertus, ex altera clausus, impleatur argento vivo, deinde parte unde aper-

tus erat, digito obturata, in vas quodlibet in quo item sit argentum vivum, unà cum digito immergatur, erectusq; statuatur, videbimus sublato digito (ut liber argento vivo fiat descensus) descendere ipsum in subiectum vas, eouq; ut pars qua in Cylindro restat, occupet circa 26 pedis uncias, quicunq; is sit Cylindrus, modo dictis uncis 26 non sit minor; spatium ergo (inquit) aiumt Cylindri reliquum, vacuum esse.

Nobilissimum est hoc quidem experimentum & admodum luciferum (ut Inclytissimi Verulamii verbo utar) quod ab ingeniosissimo Torricellio primò inventum, deinde ab aliis ex cultum, phantasmata innumera (in causis rerum enarrandis) abegit, ita ut cum hoc ipso autore certare posse non immeritò videatur. Nemo diuturnum in Scholis imperium obtinuerat axioma de *Fugâ Vacui*. Solebantque illud Sophistæ ab usque Aristotelis temporibus, quasi carmen aliquod legitimum ubique recitare. Ad machinarum ferè omnium (Hydraulicarum aliarumq; ejusmodi) phænomena explicanda, hanc unam machinam adhibebant, imò istius Philosophiæ naturalis quæ experimentis minimè dubiis nititur, principium ferè unicum est illud habitum, *Naturam sc. à vacuo abhorreere*; hinc aquam in fonte Heronis elevari, eamq; sectorem in Antliis sequi; hinc vinum ex cadis plenis supernè clausis inferiùs perforatis minimè effluere, hinc aerem in respiratione pulmones ingredi, hinc infinita peragi, quæ vel quotidiana sint necessitatis, vel usus, vel observationis. At certè displicuit ista philosophandi ratio, iis qui causas rerum *efficientes* quærebant, à *finalibus* contenti abstinere: & quidem à Clarissimi Verulamii temporibus despiciatui planè fuit illa ipsa causarum assignatio: displicuit ipsi nimirum rem ita se habere dicere, *ob fugam vacui*, & post eum aliis ferè universis qui rerum

naturam profundius speculati sunt. Et quidem de formula ista vel phrasi, aliquandiu est, ex quo inter Philosophantes convenit, delendam eam esse ex numero causarum in natura; verum de re ipsa an natura vacuum admittat, an hoc impossibile sit in natura, nondum litigare desierunt homines, cum feliciter (meo iudicio) emerfit istud experimentum, cujus occasione possint homines, velut *instantia* quadam *crucis*, in veritatis naturæ apprehensionem dirigi.

Quamquam etenim viri præclarissimi nonnulli in ea fuerint sententia *vacuum* neque esse, neque esse posse hac ratione, quia contradictionem istud involvat, & quia corpore aliquo annihilato, nihiloque in locum ejus succedenti, corpora illud prius ambientia, sunt eo ipso simul, & contigua, absque motu etiam aliquo. Credo tamen istiusmodi iudicia excidere nunquam à magnis viris potuisse, nisi phænomena quamplurima eorum, videntes, quæ ob fugam vacui contingere sunt existimata, ex præsumpta quasi vacui veluti impossibilis suppositione, in causarum meditationes se statim coniecissent, ubi nullam rei existentis causam à natura invenientes, atque rem mentis suæ (præiudicio occupatæ, à sensu primisque intelligentiæ principiis recedentis) arbitrio quasi relinquentes, in ea inciderunt quæ à ratione liberâ minimèque præoccupatâ (mihi saltem) videntur abhorreere.

Ipse certè nihil unquam incommodi ex vacui admissione cernere potui, imò neque motum neque raritatem absque vacuo concipere unquam potui paulò hebetior. Mirabar tamen quo motus principio ea omnia fierent, quæ ob fugam vacui accidere antiquiores magistri statuebant, donec ingenti Philosophiæ emolumento prodiit experimentum hoc, quod in hac re lumen accendit, fecitque ut possint ex staticis principiis &

& mechanicis omnia clarissimè explicari.

Nosti (V. Cl.) etiamnum inter eruditissimos viros disputari de vacuo ex experimenti istius occasione, atque in eo dissensum esse ingentem, an exinde vacuum sequatur. De qua re ego sic sentio. Non sequi immediatè, absolutè vacuum esse Tubi jam supra expositi partem relictam, nempe locum illic esse subtili alicui materiæ, qualis est luminis vel effluviis terrestrium. Ideoque resolvi mihi ultimò, hoc argumentum in illud quod initio innueram de Raritate. Verùm cum manifestè hoc argumento excludatur commune illud Aeris succedaneum, quod occasionem certè ministravit sententiæ de fugâ vacui, cum possint omnia melius hâc hypothese & intelligibilius explicari, cum conciliatus sit hoc experimento sensus rationi, plurimaque naturæ phænomena clarissimè possint hoc modo intelligi; invaliduram esse apud omnes impensius liberiusque Philosophiæ operam navantes sententiam quæ vacuum admittit: nullus ego dubito, quin & seculo sequente portentosum æquè fore, si quis vel *sanguinis* in animalibus *circulationem*, vel *Terræ motum*, vel *vacuum* negaverit.

Sed vereor ne ingrata sit tibi ista digressiuncula; ad Hobbium redeo, ejusque responsum ad argumentum ab experimento adducto.

Duæ res sunt in experimento, quarum rationes ab ipso expectamus.

1. Quid impleat locum Tubi à Mercurio relictum.
2. Quid faciat ut 26 unciz in Tubo maneant.

Ad primam respondet, nullam se necessitatem vacui videre. Quare autem? Quia cum descendit Argentum vivum, implet vas subjectum, & summovet tantum Aeris ambientis, quanta est moles argenti vivi quod descenderit.

Præclarè admodum! nos ita planè constituimus; sed quid tum postea?

Si queratur quo abiit ille aer summus, quid aliud dicendum est, quàm aërem illum tantundem abigere è loco proximo, & hunc alium & sic deinceps (in infinitum credo) donec redeatur unde propulsio prima incepit? Ibi autem quâ vi aer primus pulsus est, eâdem vi aer ultimo pulsus premet argentum vivum in vase, & si quidem vis quâ argentum vivum descendit deorsum satis magna sit, faciet ut aer ipsum argentum vivum, quod in vase est, penetret, adeoq; ascendat ad implendum locum illum quem illi Vacuum arbitrabantur.

Præclarum factum! Verùm annon videt adhuc vacui necessitatem? Certè luscum eum esse oportet. Ego verò ex ipsius sententia vacuum necessariò concedendum esse cerno.

Nempe post argenti vivi descensum in Tubo, priusquam repleatur spatium relictum, impletur vas, movetur aer (in infinitum vel) completur circulus, pulsatur argentum vivum in vase, descenditur, (*deorsum* ne quis sursum aliquid descendere existimet) ascenditur. Cum autem non possint agi in instanti Chorea tam præclaræ, hoc saltem concedere necesse habet, in spatio temporis medio vacuum esse partem illam Tubi ab Hydragyro relictam. Certè multa sunt quæ contra figmentum de aere in locum Tubi summum subeunte dici possunt, neque ex omni eorum numero qui vacuum negantes experimenti hujus causam reddere conati sunt, aliquis unquam tam crassè atque inconditè de eo locutus est. Descendente Hydrargyro nullo modo ostendere possit quomodo moveri queat aer, vicinumque premat, nisi ipsi recipiendò locus sit; hoc autem
abiq;

absque vel vacuo vel penetratione corporum concipi non potest. Neque necesse est, ut quâ vi aer ab Hydrargyro primò pulsus est, eâdem ipse denuò Hydrargyrum premat, diffuente nimirum pulsûs vi in aeris expansum. Imò à quo demum principio fiet reflexionis initium? Verùm quid opus est multis? Cùm ipsâ experienciâ constet, Tubi summum post argenti vivi descensum non esse aere repletum. Nempe hoc indicat vesicula piscis alicujus, quæ si expresso omni aere Tubo implendo injiciatur, post argenti vivi descensum, in loco (nobis) vacuo supereminens, sese expandet illico (vim suam sortientibus partium ejus elateribus) quod ipso in aere non faciet. Imò verò si Tubus in experimentum sumptus non sit omnino argento vivo repletus, sed deficiat aliquâ parte, ita ut antequam digito clausus immergatur vel aeris uncia in Tubo quatuor pedum superfit, deinde omnia fiant ad normam descriptionis Hobbianæ, non jam manebit argentum vivum ad 26 unciarum altitudinem, verùm magno satis intervallo ab ipsâ deficiet. Si contingat, factò aliquo (post Hydrargyri descensum) in summo tubi foraminulo, ut aer supernè ingrediatur, effluet statim argentum vivum omne quod in tubo remanserat. Hæc omnia, aliaque ejusmodi quia Tibi V. D. notissima sunt (aliisque plurimis, qui vel experimentum hoc ipsi ceperunt, vel Pecqueti libellum viderunt) brevissimè regerenda censeui: ea sunt tamen quæ commentum hoc Thomæ inconcinnum funditùs evertunt.

Miror ego quidem, cur aeri partes hæc tribuat, ut in Tubi supremas partes post multos exantlatos labores se fortim recipiant, annon præstitisset illas Mercurio delegâsse?

Callido,

*Callido, quicquid placuit, jocosò
Condere furto?*

Verum & aliud est cujus rationem pollicetur, nempe cur ad 26 uncias in Tubo maneat Mercurius?

Atque ipsi quidem neque hoc in loco deest Respon-
sio, nempe Minervam sibi æquissimam habet, sibi pa-
riter omni tempore propitiam, unde contigisse ipsi
autumo, ut de omnibus æquali ferè felicitate vel dispu-
tet, vel respondeat.

*Quoniam (inquit) vis argenti vivi, non in omni al-
titudine, satis fortis est ad cogendam hanc penetrationem
necesse est ut descendens sistat alicubi, ubi nimirum æ-
quilibrium fit, inter conatum ipsius deorsum, & resi-
stentiam ejusdem, contra aëris penetrationem; quod æqui-
librium esse in altitudine 26 unciarum (circiter) ex hoc
experimento manifestum est.*

Ego certè hominem hunc quotidie magis magisq;
admiror multis de causis, nunc autem quòd neglectâ
omnino experimentorum (quæ & satis obvia sunt &
ab aliis sæpius repetita) observatione hujusmodi com-
mentis potuerit iudicare.

Nempe fieri potest, ut in pari prorsus descensu, ar-
gentum vivum, in tubo altero, altiùs; altero, inferiùs,
subsistat. Nempe sumatur Tubus trium pedum, atq;
iste ita impleatur, ut uncia una sit aere repleta (nem-
pe tantum à plenitudine deficiat) deinde sumatur
Tubus alter, qui unciâ à longitudine prioris deficiat,
at, hic autem penitus impleatur, digitis occludantur,
simulque (secundum artem) immergantur. In poste-
riore hoc tubo erit argentum vivum ad 26 usque di-
gitorum altitudinem, in priore multo minor erit ma-
nentis argenti vivi altitudo. Quare phænomeni hujus
ratio

ratio non est, *Quod vis argenti vivi non in omni altitudine satis fortis est &c.* Nempe ceteris eodem modo ad Hobbii mentem habentibus phænomena variis se habent modis; quare causam hujus rei veram & naturalem non assignavit. Quin transeamus ad alterum experimentum.

Experimentum (inquit) tertium est, quod in vas solo aëre repletum, tantum tamen impelli potest aqua, quantum capit ejusdem vasis quasi dodrant.

Quomodo autem fieri possit experimentum, docet (p. p. 242. 243.) ope nimirum vasis illic descripti, (Cujus constructionem & alii tradiderunt.) Ut Reginus in Philosophia naturali lib. 4. c. 12. Illuc igitur remittendi sunt lectores, tu enim ejusmodi vas præparatum habens, rem integram satis intelligis, quam nos simul sapissimè experti sumus.

Argumentum ita instituit, ceteris pro descripto à se modo præparatis, datâque portâ, aqua omnis ejicitur, *cujus causa nulla assignari posse videtur præter aeris seipsum à compressione liberantis impetum, ex quo sequitur aut fuisse aliquid spatii vacui, aut plura corpora in eodem esse posse loco, quorum posterius absurdum est, prius ergo verum.*

Ad hæc ea respondet, quæ solent (uti tu satis nosti) à legentibus quos novimus omnibus admirationem conciliare, nempe ex partibus constat tribus ejus responsio, quæ singulæ faciunt, ut nihil tale quicquam à quovis eorum qui Philosophiæ nomina sua dederunt, excidisse unquam existimemus.

Nempe pro ea qua pollet eruditione, duplicem imputat argumento infirmitatem, deinde de phænomeni causis eruditissimas quasdam quæstiones movet & objectiones adversus eos qui vacuum esse statuunt. Ipse interim de phænomeni hujus explicatione profun-

fundissimè fileat atq; eruditissimè. Duplicitèr(inquit) infirmum est argumentum. 1. *Assumitur non concedendum.* 2. *Adducitur experimentum vacuo repugnans.*

Quid est autem illud non concedendum? *Assumitur* (inquit) *aerem per Fistulam, exire non posse, cum tamen aerem quotidie videamus, à fundo ad superficiem fluminis, ascendere. Quis furor O Thoma! quæ tanta licentia linguæ? quis unquam aerem per fistulam exire, aut per flumen ascendere, negavit? Non hoc ab iis qui vacuum ex hoc experimento concludunt asseritur; verum illud, exire non posse per fistulam sive Epistomio sive Siphone adæquatè clausam, neq; per aquam viam facere, nisi locum ipsi cedat; fieri enim non posse, ut simul & semel per eandem planè lineam aqua descendente, ascendat aer, ne duocorpora eundem locum occupent.*

Verum quid opus est verbis? dicimus aerem non exiisse, dum injiceretur aqua, atq; hoc manifestum esse, quoniam non aliter aqua deinceps (locum dante Epistomio) ejiceretur.

Atq; hic quidè locus est, ubi nos manent subtiles istæ & profundæ Philosophi hujus quæstiones, atq; objectiones.

Quærit primò, *posito vacuo, quo principio motus ejectio fiat?* dicimus ab aere vasi incluso; nempe hoc est quod voluit; Ecce etenim paratissimum ipsi triumphum. *Aeris* (inquit) *motus ab imo incipit, ad summum tendit; motus autem quo aqua ejicitur à summo incipit, atq; ad imum tendit, atq; quia hic dici possit, nisi quis aerem ut aquam expellat, descendere ultrò dicat, non intelligit.*

Nempe legerat ipse olim in Magiro, quatuor planè esse elementa, quorum duo sint gravia, duo leviora, inter levia aerem esse, solere autè levia ascendere, quare ut aer aquam detrusurus descendat in phiala, absurdum esse, atq; ita *pugnare vacui assertionem, cum ipso quod ad vacuum asserendum adducitur experimento.*

Cernis quam strenuè evictum sit aerem non posse in hoc experimento aquam exprimere, quid, quæso, dicam,

aut non dicam? quibus nominibus ejusmodi discursus insigniam? mihi certè nauseam ista movent, stuporem animo injiciūt, calumumq; obtundunt. Dicimus aerem (corpus tenue) interspersa spatiola vacua, corporis interim ex quo cōstat partes, elaterem ubiq; manifestū, habere; ita, ut (lanæ, spongiarum, plumarū, aliarumq; rerum visu perceptibiliū instar) restituere se compressa possint, & soleant: hinc nunc in minorem locum, trudi posse eandem aeris quantitatem, nunc majorem occupare videri; habere autem terminos quosdā, quos ultra citraq; sive dilatari sive compingi nequeant. Pressum autem atq; ultra communem raritatis gradum, constrictum, plus minusve, conari eum elatere suo, ut in communem & quasi nativum raritatis statum restitatur. Conari autem in orbem (non solum sursum) eaq; corpora repellere, quæ resistunt huic ejusdem expansioni, & si qua detur porta, ejicere: hinc nempe globulos plumbeos in sclopeto vêtaneo vi ingenti explodi, hinc aquam in experimento proposito superiora domus (jucundā admodum spectatu violentiā) petere.

Hæc certè est hujus phænomeni explicatio ex vacui suppositione facilis, aperta, naturæ atque experimentis innumeris consentiens; videamus nunc quā ratione ex principiis suis illud ipse exponat, magni enim illius intererit accuratè hanc rem curasse, cui (ut antehac notavi) *huic uni principio omnis Philosophia incumbit.*

Videamus, inquam? at videre non licet; neque enim aliquid adjecit quod lumen in loco tam obscuro accendat; certè aliquid in causa esse oportet, ut taceat oraculum hoc nostrum philosophicum, cui nunquā verba dare fuit molestum. An existimas illum qui in experimento de Hydrargyro jam supra proposito, facere potuit ut aer ascenderet, descendensque denuò argentum vivum in vase atque in inferioribus Tubi existens (ingenti quidem zelo, ne daretur vacuum)

penetraret, ut in Tubi summitatem perveniret; an inquam existimas eum nihil hoc loco invenire potuisse, quod post aëris egressum, in phialam se clanculum reciperet, aquam effunderet? absit ut ista cogitemus. Quin potius sæculum hoc nostrum indignum tanto beneficio judicans rem istam reticuit, vel forsan ad finem physicæ jam nuper inceptæ properans, adeoque politicus jam statim evasurus, prudentiam exercere voluit dicti illius memor.

—nulli tacuisse nocet, nocet esse locutum.

Verùm & multa alia afferri solere phænomena, ad vacuum probandum asserit, ut *Thermometra*, *Æolipilas*, *Sclopetum ventaneum*; quæ quidem, si aeri pervia aqua non est, sine loci inanis admissione difficillimè salvari possent.

Miraris quid aquæ penetratio, ad Sclopetum ventaneum, cui cum aqua nihil est commercii? dicam igitur, nempe hoc loco auctori nostro aqua hæsit, unde expedire se cum nullo modo potuerit, indulgentiam ipsi sentio hanc importunitatem.

Hactenus in quæstione de vacuo versati sumus paulò liberius, quàm in re si tibi aliisve satisfecerit, bene est; mihi nusquam in aliquo mortalium tale aliquid qualis est omnis ejus ratiocinatio, occurrisse visum est. Hoc certè obtinuisse me autumo, aut vacuum evictum esse argumentis à nobis suprâ vindicatis, aut non esse vacuum nullo modo demonstratum esse, quorum illud omnia ea quæ sequuntur semel tollit funditus, hoc autem quætit admodum, facitque ut de legitima phænomenon demonstratione locutus etsi non fuerit forsan *sceleratus*, in cæteris cum *vindice* conveniat. Verùm hæc hactenus; dejectis hoc modo fundamentis Philosophiæ illius generalibus, in cæteris

ris brevior & facilius erit disquisitio.

Transit ad Physicam sydeream, hujus phaenomena ad motum referenda, motus supponit corpora mobilia, eorum itaque genera praemittit.

Corpora mobilia sunt (inquit) vel fluida vel consistentia, vel ex his mista. Hæc itaque definit, fluida sunt quorum partes facile separari possunt, consistentia ad quorum diremptionem vis adhibenda major.

At hoc non est, fluiditatem aut consistentiam definire, verum symptoma quoddam ejusmodi corporum indicare. Ego quidem vehementer ab ipso (plenum asserente, omniaque adeo corpora superficiebus immediate juncta supponente) Fluiditatis causam rationemque expeterem. En igitur eam! Fluidum est semper divisibile in aequæ fluida: ego enim (inquit) fluorem intelligo à natura factum in omni simul Fluidi parte, ita ut videtur disfluere aqua in partes perpetuo fluidas.

Nempe fluor est à natura factus fluor, & fluidum in partes fluidas dividitur, ut aqua,

—sub illis

Montibus (inquit) erant, & erant sub montibus illis.

Quid est (quæso) nisi hoc fuerit *καταλογεῖν*, quis hoc modo fluoris naturam intelligere possit? imò si fluida ea sunt quorum partes levissimo conatu separantur, Fluida non minus erunt corpora siccissima quam ipsa est aqua. Certè si pulverem Alabastrum subtilissimum igni superpositum, phaenomena omnia lactis ebullientis vidisset exhibentem, non tam fuisset alienus ab ea sententia, quæ fluorem partium (in motu existentium) subtilitati attribuit.

Sed hoc (inquit) intellecto, venio ad Hypotheses.

Nempe

Nempe eas quibus Physica Sydereæ erit demonstranda.

Atque hîc quidem nonnulla habet (quæ ab aliis etiam innumeris peti possunt) in quibus ipsi penitus consentio; nempe hypothesein Copernicano-Ellipticam. Ideoque expectandum non est, ut adversus sententiam mihi in animo profundius insitam, ullo modo insurgam; imò siquid hoc in loco clarissimorum virorum Copernici, Kepleri, Galilæi, Bullialdi, laboribus adjecerit, ego eum summopere laudandum prædicarem.

Nosti tu satis, imò & alii ferè omnes quibus ista scribuntur, quænam sit ista Hypothesis Copernicana, quid ipsa præster, quomodo Sole in mundi centro, seu potius Planetarum omnium (Systematis nostri) primariorum, nodo communi, constituto, Terræque in Planetarum ordinem (loco ipsi inter Martem & Venerem assignato) vindicatâ, eique triplici motu, *Diurno, Annuo, & Directionis*, attributo, exhiberi solent phænomena cælestia; Nosti Epicyclos omnes, quos ante eum admiserant Copernicani, à Keplero ex Planetarum Theoriis amotos, inductis Ellipsis Planetarum orbitis naturalibus. Nosti ex Bullialdi principiis demonstratum à nobis esse (in inquisitione in I. B. A. P. F.) eam esse motûs Elliptici Planetarum legem, ut dum Physicum motus inæqualis principium à Sole mutuenter, in altero Ellipsis umbilico existente; super alterum interim æqualiter ferantur (id est, æqualibus temporibus æquales angulos absolvant) hanc esse primariorum Planetarum hypothesein generalem, cujus veluti naturalis, perficiendæ methodum accuratam & Geometricam, in *Astronomia nostra Geometrica*, tradidimus. Nosti quin etiam meditari me tabulas Astronomicas principiisque illic traditis extractum

tractum opus (supremo numine juvante) integrum Astronomiæ absolutæ. Licebit, si tanti fuerit, illic, Hobbiana, quæ hoc loco habet, accuratissimè excutere. Interea quantum absque diagrammatis (à quibus abstinendum esse judicavi) fieri possit in generalem ipsius ab aliis dissentienti hypothesein, generaliter inquiram.

Commune cum reliquis habet Solem circa axem suum volvi, eumque esse causam motûs Planetarum in orbitis suis, quin Terram habere motum super Axem suum, motum Centri in orbitâ Eclipticâ, motumque axis directivum; unde non solum omnia phænomena Solaria Diurna & Annua, verum & Æstûs Marini pars magna explicantur.

Verum à reliquis in eo dissentit, quod Solem non modo super axem suum moveri (in nodo Planetarum immotum quoad centrum manentem) verum & in Epicyclo quodam (uti vocat) motu circulari simplici, volvi statuit.

Nempe movere non posse illam Planetas in orbitis suis, nisi motu hoc moveatur Sol; hoc autem si concedatur, eodem modo tum Solem (& proinde Lunam) tum etiam reliquos Planetas moveri.

Hoc igitur imprimis quærendum est, an illud admittendum sit, moveri Solem in Epicyclo, circa Planetarum nodum immobilem, imaginarium; an vero *divisæ* sola circa axem suum Sol moveatur: de hac re differit capitis hujus §. 7. ibique primùm argumenta sua proponit, alienis respondet, conclusionem infert, alienis denuò respondet, mantissam adjicit, remque omnem absolvit præclare & methodicè.

1. Argumentum sic habet. *Planetarum omnium periodi circa Solem intra Zodiacum describuntur. Ergo Sol movetur in Epicyclo.* Ego verò neq; Solè omnino mo-

veri exinde consequi perspicio, possunt etenim Sole stante periodos sibi datas absolvere, vel Solem potius moveri super axem concedo (quæ est sententia rationi atque observationi macularum Solarium congruens) fieri hoc motu ut placidè in Ellipsis Planetæ periodos absolvant, non tamen in Epicyclo moveri.

2. *At nullum aliud corpus huius phaenomeni causa est. Ergo Sol movetur in Epicyclo.* Vellem ut hinc etiam cetera omnia, quibus opus habet, velit concludere.

Non est necesse, ut corpus aliquod à corpore moto diversum, sit causa motus istius, qui corpori supponitur (§. 5. 3.) coævus, quinimò absolvere eum perpetuò potest, & debet, donec irruente extraneo ab orbita deiciatur.

Verum ut omnia Hobbio largiamur, si sit corpus aliquod causa huius phaenomeni, nullumque aliud præter Solem, erit igitur Sol huius phaenomeni causa; verum ut per motum in Epicyclo hoc faciat nullo modo poterit evinci.

3. *At (inquit) in animum inducere non potui, ut motus Planetarum nullam haberent alius ab alio derivationem. Ergo Sol movetur in Epicyclo.*

Ego certè statuo Planetas à Sole moveri; Sole in nodo communi circa Axem voluto, centro immoto, (non autem alium Planetam ab alio, motum derivare) motumque hunc Solis esse causam motricem Planetarum.

Verum hoc est quod secundo loco tollere vult; nobisque quod manet defendendum, fieri posse, ut motus Planetarum ab istâ Solis conversione dependeat. En igitur eum hanc sententiam evertentem.

Non idoneus ad hanc rem (inquit) est hic motus, cum enim quod sic movetur nullum ad partes extra circulum positas

positas conatum habeat, nullo modo ad corpora extra circulum posita conatum propagabunt.

Verum enimverò falsum est non posse corpus circa axem celerrimè motum, & quoad centrum in loco suo manens, motum corporibus extraneis communicare; cernimus Turbines puerorum celeriter rotatos ea quæ ambitum tetigerint in Tangentibus (versus motus sui plagam) perpetuò movere; nempe hoc est quod ipse (cap. 21. §. 7.) supponit, hoc est quod omnis ratio suadet, omnisque experientia mille exemplis confirmat. Quare si Sol (præcipuè superficie in qua li existens) Axi circumrotetur per infinitas lineas tangentibus (hoc est undecunque) corpora quæ in ipsum impeerint movebit, id est, in orbem movebit universam Planetarum systema. Neque opus est figmento hoc motûs in Epicyclo ad illud phænomenon explicandum; quod etiam facilius erit ad intelligendum, si Sol ejusmodi corpus statuatur, quale illud supponit Nobilissimus Cartesius, qui & hypothésin hanc nostram, quatenus ab Hobbio dissentit, clarissimè demonstravit.

At progreditur, ut eos evertat, qui per vim magneticam ista fieri contendunt, eosq; causam Physicam non supponere ait; quid ita? quia vis magnetica, quando erit cognita, invenietur esse motus corporis. Est igitur vis magnetica causa Physica, sibi que ipse contradicit.

Rebus hoc modo strenuè (uti opinatur) gestis, concludit:

Restat ergo, ut Planeta primarii, si à Sole circumferantur, & Luna si à Terra; circumlationis causas habeant, Solis & Terra motus circulares simplices.

Imò quidem hoc restat, sed probandum; neque enim hæcenus vim ullam vel momentum alicujus argumenti percepimus.

Quod si conclusionem illam legitimè elicuerit, quid est quod denuo ad quaestionem redit? novamq; sententiam prius neglectam proponit? Hanc nempe, eorum qui asserunt Planetam unumquemque suum habere motum corpori coævum. Sententiam intelligit eorum, qui motum hunc à mundi Creatore Planetis inditum supponunt, eum autem Planetas retinere (per legem immutabilitatis naturæ) donec è viâ suâ deiciantur.

Quid habet ad istam sententiam evertendam?

Nempe (inquit) causam motuum horum *Physicam nullam tunc futuram.*

Verum annon ipse supponit (Sectione 5. 3.) non modo Soli, sed etiam Terræ & Planetis inesse hunc motum ipsorum naturis coævum? Imò rem ipsam ad ultima prosequamur, & videamus quomodo vel hoc in loco se expediat. *Movetur (inquit) Luna motu circulari simplici propter motum circularem simplicem Terræ.* Benè habet; causam phænomeni assignavit intelligibilem. Cur Terra movetur motu circulari simplici? Quia nimirum Sol circa alterum Ellipseos Terrestris umbilicum movetur motu circulari simplici. Quare denuò causam Physicam assignavit? Euge Thomæ! laudabiles conatus! Responde semel, unde fiat, ut Phæbus ipse motu hoc circulari moveatur, & eris mihi magis Apollo.

Dices æternum esse hunc motum; ergo causam nullam habet; vel corpori concreatum; ergo causam habet supernaturalem. Quocunque certè se verterit, nihil afferet, quod non poterit Planetis omnibus convenire.

Quin

Quin igitur (ut Analyticè rem istam prosequamur) supponamus Solem pro Sententiâ Hobbianâ, non solum super axem volvi, verum etiam in Epicyclo, motu circulari simplici moveri; vel igitur in plano semper eodem movebitur, vel plana mutabit; si mutaverit, confundentur illico Planetarum omnium motus, ipsiusq; Systematis nostri fundamenta erunt laxata; si planum idem servaverit, eritne illud planum Eclipticæ? vel alterius alicujus Planetæ? vel demum nullius?

Supponit ipse nimirum, Solem eodem modo Planetas omnes respicere, quin & illud supponit nobilior omnis Astronomia; hoc igitur libenter ab ipso peterem, ut planum ejusmodi Solis motui assignaret, unde motum possit & vigorem omnibus ex æquo Planetis impertire, quod cum ipsi impossibile esse judicem, ad alia properamus.

Certè innumera sunt ea incommoda quæ vel in natura, vel in Astronomia commentum hoc otiosum atque illepidum consequuntur. Nempe tollitur hoc modo semel, omnis Astronomia, observationum omnium usus, Calculorum fundamenta, sublata nimirum hypothesi Geometricâ atque intelligibili, ductâque in Astronomiam linearum Spiraliū contemplatione, eaque hypothesi quam prudentes Astronomi omnes hæcenus rejecerunt veluti falsam, inutilem, humano intellectui minimè expositam.

Dato scilicet motu hoc simplici circulari, simulque circa Axem revolutione, non jam sive circulos, sive Ellipses, sive simplicè aliquam figuram, in sese redeunte, describent centra Planetarū; verum spiram quandam

contortam; eamque plenam; si in orbitæ plano (promoto semper Planetæ centro) motus ille simplex peragatur; vel solidam atque annularem, si planum in quo motus simplex supponitur, orbitæ Planetariæ planum quocunque modo secuerit.

Hypothesi Copernicano. Ellipticæ brevissimè supra explicatæ suffragantur omnia Planetarum phænomena (uti si Deo visum fuerit, aliquando evincam) at fieri illud nullo modo poterit, constitutâ hâc motuum in Epicyclo hypothesi; nempe differentia ut sit insignis necesse est observationum ex centro quasi immoto factarum, corporum eodem modo se habentium; atque observationum ex variis circuli alicujus partibus, corporum etiam in circulis (modo ignoro) motorum. Priori hypothesi cum omnia phænomena respondeant, non possunt eadem hanc posteriorem admittere.

Sentio V. D. pronum me esse nimium, ut hoc loco (lectoribus molesto futuro) excurrat oratio; contraham eam igitur. Certè ultra vires Hobbianas illud esse existimo, ut generale hoc commentum ita explicet, ut omnia in motibus Planetarum non perturbentur, atque ut Planetæ non detrudantur ab orbitis. Nempe vim habebunt Planetæ singuli, in singulos, fierique nullo modo poterit, ut variis eorum Syzygiis existentibus, alii ab aliis non propellantur, nempe liquido plenoque existente omni Planetarum systemate. Certè plurima habeo argumenta, quæ sententiam evertant Hobbianam; verùm à schematis omnino in hoc opere abstinere decrevi, sine quibus ista non possunt intelligi, imò non opus est multis, ubi unum hoc omnibus obvium sufficiet.

Nempe si motus Solis (in Epicyclo) circularis simplex sit causa motûs omnium Planetarum, erunt Planetarum

netarum periodi in eadem ratione cum distantiiis eorumdem à Sole.

Nimirum hoc est quod demonstrâsse se dicit (cap. 21. §. 4. *Partes ambientis liquidi, à superficie moventis remotiores, circulos suos absolvere in temporibus, quæ sunt in ea ratione, quam habent inter se ipsarum à movente distantia.*)

Verùm hoc falsum, imò falsissimum esse in Planetis clamat omnis Astronomia, uti pueris notum.

Falsum est igitur & impossibile commentum Hobbianum de Sole in Epicyclo movente.

Atque hoc quidem motûs Solis in Epicyclo commentum, illud est in quo seipsum magnopere jactare eum audio; cætera autem quæ in hoc capite sequuntur, ejusmodi sunt, ut omnibus se statim prodant, eumq; summæ arguant supinitatis.

Promittit in capitis titulo §. 9. causas motûs non solum Annuï & Diurni, verùm & Apparētis directionis, Stationis, & Retrogradationis Planetarum. Verum de iis omnibus in articulo illic indicato, &c. &c.

—amphora capit

Institui, currente rotâ cur urceus exit?

In quæstione de orbitæ terrestris, ideoque & Planetarum reliquorum, figurâ, sibi ipsi variis modis contradicit. Nempe ex Hypothesi suâ motûs circularis simplicis cum vertigine super axem, centrique eius è pœura promotione, sequetur simplicem aliquam lineam ab iis non describi, sed spiralem. Cùm tamèn §. 9. statuat lineam Ellipticam eam esse, vel ferè Ellipticam. Imò §. 11. consentit Keplero, viam hanc Ellipticam, statuenti; quin etiam bisecandam esse Excentricitatem concedit ad mentem Kepleri, id est (ut alibi ostendi-

mus) motum inæqualem super Solem, æqualem super alterum Ellipseos umbilicum peragi. Quâ quidem in hypothefi ex determinatâ positione axis transverfi in Ellipfi, deducenda est Excentricitas methodo à nobis in *Astronomiâ Geometricâ* descriptâ.

Ipsè tamen §. 8. de Excentricitate quærenda sermonem instituens, viam Planetæ *circularem* supponit; quin *Excentricitatem* minimè *bisecandam*, sed motum Planetæ vel Terræ medium, super circuli centrum absolvi, multiplici sanè, atque in discursu præ se ferente mathematicam *ἀποδείξαι*, minimè ferendâ contradictione.

Quinimò Excentricitatis Terrestris causam red-dens principiis minimè demonstratis utitur (plenum supponens, partesque adeò Universi superficiebus junctas; quo casu ea quæ concreta sunt nulla unquam vi diffingi posse asseruit, in responsione ad quantum Lucretii argumentum.

Quæ de æstuum marinorum causis vera habet non ex afflicto motu circulari simplici, verum ex Systemate Copernicano-Elliptico consequuntur, & ab aliis, vel Galilæo, vel Cartesio, vel Varenio demonstrantur.

Quod interim de causis præcessionis Æquinoctiorum habet, fatetur ipse (in Capituli conclusionè) supponere æqualem esse motum punctorum *αὐτῶν τῶν*, atque præcessionis Æquinoctiorum, cui assertioni refragatur omnis Astronomia. Quare non est, ut ista minutius prosequamur; cum hujusmodi res digito brevissimè indicasse pro nostro saltem instituto sufficiat.

CAP. 2.

De Luce, Calore, & Coloribus.

Non sum ipse nescius V. D. quàm sit hominum, qui maximam in omnibus sectantur *desipere*, censuris expositum, absolutum hoc capitis superioris & sequentium examen; displicebit iis nimirum negligentior ista minimèque æqualis rerum tractatio, illi nimium, hîc parcum; illi ad nauseam ferè apertum & planum, hîc paulò contractionem me forsan, adeoque aliquantulum obscurum judicabunt; iis omnibus istud unum me reponere juvat, nempe odio me habere eos, qui fuerint in erroribus alienis detegendis nimium diligentes: non iis me legibus obstrinxisse unquam aut obstricturum, ut libertate meâ non utar, ut meo ipsius sive iudicio, sive inclinationi animi non obtemperem; neque tamen causas mihi aliquas defuisse earum rerum, quæ maximè illis displicuerint.

Placuit in eâ quæ de origine mundi ejusque magnitudine habet paulò altius inquirere, quia rem magni (& in suâ naturâ & respectu nostri) momenti esse judicabam, ut incommoda illa quæ mundi æternitatem consequuntur Juvenes intelligant.

In inquisitione de vacuo aliquantulum morari placuit, non solum ob animi sententiam (quam unusquisque sibi defendendam autumat) verùm eâ ratione, quod fundamentum hoc sit præcipuum totius Philosophiæ suæ, quo ruente, ea omnis collabitur. Quæ causa etiam erat, ut incommoda ex motu Solis & tamen Planetarum circulari simplici sequentia indicarem, cætera autem in quibus à veritate

tate discedit, vel sibi ipsi contradicit, vix attigerim. Nempe everso positionis alicujus integro fundamento, sufficere deinceps illud toties regere, quoties opus esse fecerit, causæ (alicujus phænomeni) istius assignatio: non igitur illud expectandum est ab eo, qui bonas horas nolit malè collocare, ut omnia eadem ubertate dicendi prosequatur, Rhetoribus illud curæ forsan esse debet, Philosophis non item; prolixiores alibi eo fine fuimus, ut cætera brevius absolvere possimus, neque vacat in omnia Autoris hujus *σφάλματα* vel minimum animadvertere, ne turgeat in volumen immensum epistola, nobisque illud statim objicias?
 — *Quis leget hac? nemo.*

Evertimus (meo judicio) jam supra sententiam de fugâ vacui, & commentum de motu Solis & Planetarum circulari simplici. Imò figmentum de motu circulari simplici, *plena omnia* supponit, uti ipse agnoscit, atque ex everfa sententia sua de Vacuo ruit penitus. Quare ubicunque vel fuga ista vacui, vel motus circularis in phænomeni alicujus causam pro hypothesis trahuntur ad rei istius naturam explicandam, hypothesis planè falsam ab Hobbio adductam esse judicandum est.

Ecce autem in hoc capite quod de Luce, Calore, & Coloribus inscribitur, omnia ferè *ad motum Solis circula-rem simplicem* relata; quod primùm indicâsse, deinde in quædam incommodè dicta inquisivisse sufficit et ad hujus capituli animadversiones explendas.

Postquam igitur de Dei potentia quædam non malè, sed tamen Rhetoricè, sibi quæ alibi contradicendo, locutus est, ad causarum dictiones se componens ad hanc machinam statim se recipit. Si quis etenim quæ causa sit *Lucis Solaris*, inquirat, respondet §. 2. *Motum Solis circula-rem simplicem*. Si quis, unde fiat ut
 inca-

incalescamus? respondet §. 3. *ob motum Solis circula-
rem simplicem.*

Numquid scire desideras quid sit ignis, cujus ope omnia ferè, sive in naturâ sive in arte, perficiuntur? non illum ambages sectantem invenies, non metaphoris sententiam involventem, non dicit, *ignis est Magister Artium.* Sed, *ignis est motus materia simplex.* §. 4.

Nihil est in naturâ universâ, sive ad usum frequentius, sive ad scientiam plenam atque perfectam difficilius, quàm est *Fermentatio*; hâc Lapides, Metalla, Plantæ, Animalia generantur, hâc nutriuntur; hâc morbos contrahit, hâc sanat; hâc vivimus, morimur; hâc varios atque insignes in operibus artis & apparatus habet, & usus, sine quibus neque victus neque medicina possit constare. Ut autem nihil ubique se magis ingerit quàm ista *Fermentatio*, quoad r^o òn, ita nihil est in universâ naturâ, cujus ratio ultima & specifica (ut loquuntur) magis est abscondita & desiderata: annon igitur placeret tibi arcanum hoc intelligere? quin igitur ad Thomam accede, & mysterium hoc accipe (§. 3. cap. 21. §. 5.) *Fermentatio est motus circularis simplex.*

Neque ad ista majora solummodo inservit hâc machina, verùm & ad officia minora, pro re nata præstanda; sive quis enim quærat cur noctu micant *Cicinælae*? sive cur *fœnum madidum*, ignem intus concipiat; sive qua ratione fiat, ut nubibus in altum erectis cernamus aliquando atque audiamus (attoniti) tonitrua mugire, fulgura præmicare. Ad omnia hâc responsum hoc unum adhibet, *Fieri ea omnia motu hoc circulari simplici.*

Felices gentes illas prædicavit olim Poeta, quibus Numina in hortis crescunt. Ego illum feliciorum existimarem, cui in promptu est adeo ad omnia responsum.

sum. Qui nactus est machinam ad omnia (æquè) sufficientem, lapidem Philosophorum, Catholicon Medicorum, vel potius Mechanicorum, Motum perpetuum, Motum circula rem simplicem.

Erunt tamen (satis ego scio) qui phænomenon ejusmodi explicationem motui *vertiginis* adscribent; meâ certè illud non interest; alia me vocant, nempe præclara ejus dicta nonnulla & Philosophemata, de quibus erit brevissimè agendum.

Quod felix faustumque sit; gratulor imprimis tibi (V. D.) piisque omnibus, hymnum potentia divinae initio hujus Capitis 27 cantatum, ubi *Condito rem Universi omnipotentem* (Sect. 1.) in quantum nos rem quamlibet divisibilem intelligimus, in tantum partes ejus actu avellere posse affirmat. Quin igitur potest Deus ea quæ non facit, neque forsan facturus est, neque idem erit Philosopho huic nostro possibile & necessarium. At illud capite de Actu & Potentia, itemque de Causa & Causato in parte hujus operis prima, affirmavit; quin igitur redeuntem in veritatis viam amplexemur.

Quod de majestate divina in parvis & magnis æquè elucente habet, nobis mirum in modum placet; utinam autem mentem explicâset, ubi in actionibus primas aggressiones, in temporibus prima mementa, non minùs credibilia asserit, quàm ea quæ nunc creduntur de distantis fixarum. Certè difficilis est mihi periodi istius sensus: num credibile esse vult, ut actiones incipiant? &c. hoc certè jejunius est, quàm ut tantum deceat Philosophum. Num ab absolute minimis initia ista fieri; adeoque ex minimis continua constare? evertit hoc certè Philosophia suæ fundamenta & Geometria, quæ continuum in infinitum esse divisi-

divisibile supponunt; hoc solum igitur cupio, ut in proximâ libelli hujus editione seipsum velit explicare.

Benè habet, quod *quantulacumq;* demùm corpora esse possint, ipse tamen minora ista non supponet, quàm eorum postulent *Phænomena*. O quàm feliciter rem peregisset, si illuc substitisset, illudque ad omnium *Phænomenon* quæstiones opposuisset unicum; Nempe *Quantitatem, Figuram, Motum, Positionem, ubiq;* suppose ejusmodi *qualia phænomenon* requireret, & *has* *bebis* *quæsitæ rei, causam* satis manifestam.

Nempe recipe Catholici hujus (nostri) q. f. & omnis ignorantia sanabitur.

At ne me forsan ipsi illudere existimes, en eum de *Luce Solis* (§. 2.) ita differentem.

Quoniam (inquit) *corpus Solare motu circulari simplici athera movet, ather corpora remotiora, necesse est ut oculi tandem prematur pars anterior, ut motus feratur ad cor, ut à cordis reagentis motu oriatur conatus desinens in conatu tunica Retinæ, qui conatus est phantasma lucidi.*

Non illud nunc regeram, sublatam esse à nobis sententiam de plenitudine Universi, & de motu Solis simplici; ego potius probabo, ex Hobbii principiis, non magis à Sole quàm à corpore quocunque opaco, lumen derivari debere, quin posse nos ad tempus quodlibet, (rem aliquam brachiis circumagendo, *veluti qui molunt, vel cribrant* (Capite 21. Coroll. ad 2.) lumen concitare. *Valete lampades & laternæ.*

Nempe quoniam corpus quodlibet, in liquido aere, *motu circulari simplici Aera movet, Aer autem corpora remotiora, necesse est ut oculi tandem prematur pars anterior, atque ita deinceps, donec*
tans

tandem perveniatur ad *conatum* in *Retina*, qui quidem *conatus* est *phantasma lucidi*, ex mente Hobbi-
ana.

Quanti interest scire Philosophiam! aiunt Thaletem, ut pretium Philosophiæ conciliaret, olivarum fructus universos vili pretio emisse, magno olim vendidisse; si noster hic Philosophus vixisset, certè oleum omne perdidisset. Quippe ipse Philosophiæ ubique paratum lumen accendit, non oleo, non sebo vescens aut vivens, verum aurâ æthereâ. Imò verò erutis ipsis oculis, manente solâ tunicâ Retinâ in fundo, habebimus proculdubio *conatum* in *Retina* desinentem, qui est (asserente Thomâ) *phantasma lucidi*.

Sed tempus est ut à lumine ad calorem me conferam. Hic autem §. 3. bellam, uti mihi videtur, & lepidam prius instituit quæstionem, deinde de causis caloris bellatulè constituit. Quærit nimirum *an omnia que calefaciunt caleant ipsa?* (id est an calorem sentiant.) Miraris tu forsan quæstionem ipsam, ridiculam eam judicans; quis etenim omnia sentire unquam opinatus est? Quis omnes res, phantasmata concipere? imò (inquit cap. 29. §. 5.) *Scio fuisse Philosophos quosdam, eosq; doctos viros, qui corpora omnia sensu prædita esse sustinuerunt.* Quinam fuerint docti illi viri etiam si mihi non occurrat, supponam impræsentiarum omnino futilem non esse quæstionem; videamus autem quânam felicitate eam solvat.

Dicit igitur non esse necessarium, ut res illæ caleant quæcunque calefaciunt: attende (obsecro) ejus ratiocinationi.

Quòd quidem (inquit) *animalia dum calefaciunt, calent, ex similitudine nostri ratiocinando inferimus, sed non necessario.* Quid ita? obsecro.

Nam (inquit) et si rectè dicatur, *Animal calefacit,*
ergo.

ergo calet, non tamen rectè dicitur, ignis calefacit, ergo calet. Rectè (inquit) dicitur, Animal calefacit, ergo calet; infertur igitur illud necessariò, quoniam (ex sententia ipsius) in propositionibus hypotheticis id est esse verum & esse necessarium, quinimò sui ipsius sensûsque omnis oblitus, quod susceperat probandum negligit, illudque concludit de quo nunquam in præmissis est locutus. Sed hæc obiter.

Dicendum est quâ ratione calor in nobis generatur, ope nimirum hoc sit fermentationis, seu motus Solis circularis simplicis. Ut igitur hujus rei

Historiam, primâ repetens ab origine, pandam?

Principio, Sol ipse movetur motu circulari simplici.

Motus iste Solis aerem movet, corpus animalis circumambientem.

Quare necesse est, ut partes animalis medio contigua, in recedentis aeris, seu diremptarum partium intervalla, contentur ingredi.

Pulchrè! quid ita? quoniam alias daretur vacuum. Partes maxime fluida primum egrediuntur, deinde alia, cætera ita moventur, ut loca omnia impleantur (ne scilicet detur vacuum.)

Aer itaq; à tota mole comprimitur, ideoq; tota corporis moles intumescit. Habes itaq; causam caloris.

Hæc certè est ista præclara Philosophia Hobbiana; cernis denuò opus non esse ut ad præmissam à nobis Fugæ Vacui, atque motûs Solis circularis simplicis sublationem confugiamus. Primum etenim Sol, inquit, æthera pulsat, æther aërem, aër corpus humanum. Ecce pulsationem perpetuam, tractionem nullam! quid est quod corporis Spiritus vel partes volatiles elicit?

Dici

t

Dicit se ostendisse quâ ratione fermentatione fieri possit istiusmodi attractio, (unde & Terræ Excentricitas ipsi orta est.) Verùm in Universo pleno, impossibile huius esse, cuivis consideranti manifestum est; nisi forsitan hoc valeat Phœbus Apollo (quod de Satyro dictum est) ut sorbere simul possit & flare, nempe Sol motus pellit, premitque, non autem trahit. Nolo ista persequi: ait ob fugam vacui hæc omnia contingere, nolo quicquam eorum repetere quibus hanc supra fugam fugavimus. Imò ut semel dicam, rationi omni atque experientiæ repugnant ista

Nempe hâc ratione omnia semper incalescerent, Sole ubiconque locorum constituto, nam pulsus aer à durissimis corporibus recedit, & cætera ob fugam vacui sequuntur, imò frigescenti cuivis remedium foret optimum inclusum in Camera aerem exfugere, exinde n. fieret ob fugam vacui, ut corpus intumesceret, atque ut evaporatis partibus aliquibus, *reliqua motu suo efficerent* (miris modis) *ut omnia locorum spatia impleantur.*

Ait (Sect. 4.) ignem non esse corpus à materia combustibili distinctum; sed ipsam materiam tunc quando splendet.

At innumera sunt argumenta, quæ evincant ignem corpus esse, nempe subtilem istam materiam, quam πνεῦμα antiquissimi Philosophi vocârunt (quam etiam præclare explicant Cl. VV. Cartesius, Gassendus, alique) neque eam à lumine (si materiam spectemus) ferè quidquam differre. Nempe corpus esse illum evincunt symptomata ea, quæ cum corporibus habet, communia, motus sc. ejus reflexio, & refraction, coitio & corroboratio radiorum, unde ignis lumine accenditur; tum ex adverso eorundem disgregatio, & dispersio, unde vis ejus attenuatur, quin ejusmodi corporis

poris applicatione variâ phænomena omnia explicari posse constat, absque eo non item. Nempe hoc est in quo deficit Hobbius, quod Cartesio, Gassendo, Digbeio, aliisque præclarissimis viris animum non satis advorterit, ut posset ea quæ ab iis benè posita sunt, & invicem consequenter, intelligere: hinc enim evenit, neglectâ hâc materiâ subtili, eâque ex hypothesi exclusâ, ut neque luminis, neque caloris, neque ignis generandi causas explicare poterit, nempe non valet ad ista motus aeris, quem tamen solum ad omnia hæc adhibet.

Concedimus in figura 1. rationem refractionis radiorum generalem non malè explicari; modo à se illic explicato (quem & alii innumeri tradiderunt.) fieri ut unitis, prope P, vel potius O, radiis iis omnibus, qui inter EA, & GC, *παράλληλῶς* inciderint, corpora illic posita ignescant.

Verùm cum ipse materiam subtilem istam in auxilium non advocet; quin *radios* nil aliud quàm *vias* motuum statuat, motus nonnisi aeris, vel medii motum; constat ipsum nihil ad ignis à Sole generandi rationem intelligendam, hoc loco attulisse.

Quod habet §. 5. & 7. de luce ex collisione Silicium, & mari remis percusso, eorum potius sententiæ favet, qui lumen, imò & ignem, concipi & accendi statuunt, ex pulsâ celeritimè materia subtili, de qua jam pauca locuti sumus, motumq; vertiginis in Sole aptum esse ad phænomenon illud producendum.

Nempe partes Silicis concepta *vertigine oculos* movēt (id est, materiam subtilem pulsan, faciuntq; ut oculos moveant) quod & idem faciunt particula salis marini in *vertiginem aëta*. Quin & hac ratione Cicendellæ, & ligni putris in Sole diu jacentis splendor, explicari potest; non autem motu aeris solius,

Verum ipse §. 8. coactus est, ut ignem esse corpus à materia combustibili diversum concedat, nempe ad flammam producendam partes æthereas evolantes supponit, quod est materiam subtilem in igne agnoscere. Hoc idem in rebus fundendis, in scæno madido accendendo, in fulgurum causis assignandis, utcumque adhibet, quorum omnium causas etiam si crassissimè maximèque negligenter tradiderit, hoc tamen nescio annon laudare debeam, quod (adigente eum ad materiæ subtilis agnitionem, Necessitate) sibi ipsi toties hoc capite contradicere non erubuerit.

Quod de generatione ignis habet ex attritu duorum corporum (§. 11.) sententiæ nostræ de ignis natura suffragatur, suæ ipsius repugnat: ait enim materiam fluidam (id. est subtilem nostram) attritu moveri, quin erumpere atque corpora dissolvere; differt igitur ista materia à combustibili, nisi forsan ignis ignem comburat.

Quod de coloribus habet in prismatico vitreo triangulari *παινομένοις*, ex Cartesio ferè haustum est integrum.

Quod Albedinem esse lucem affirmat, & Nigredinem lucis privationem (§. §. 15. 16.) nullo modo fieri potest; quin potius bullularum infinitarum congeriem, quæ lumen reflectant, illam superficiæ dispositionem efficere si dixisset, quæ facit, incidente in eam lumine indeque reflexo, ut albedinem concipiamus, eum Philosophicè dicturum fuisse existimarem. Hac autem quoniam à præclarissimis viris sapientiùs à me laudatis, ita explicata sunt, ut metus non sit, ne in errorem quenquam trahat supina Philosophi hujus eorum tractatio, ad alia nunc statim conferam.

CAP. 3.

Examen Cap. 28.

De Frigore, Vento, Duro, Glacie, Flexorum restitutione, Fulgure, & Tonitru.

Nisi perspecta mihi fuissent jam satis Autoris hujus ingenium & mores, nisi cognitus philosophandi modus, certè ingens me cepisset admiratio, Capitulum hoc 28. legentem, ubi magna suscipientem eum invenies, neque tamen hilum præstantem. Magna sunt certè ea naturæ phænomena, quorum Capituli istius titulus nomina complectitur, neque aliud aliquid occurrit usquam (opinor) cujus scientiam majore studio homines ferè omnes prosequuntur; nempe sensus ista vehementer feriunt, faciuntque ut ista volentes vel nolentes homines observent, observatio admirationem parit, admiratio facit ut in causas phænomenon curiosè inquiratur. Nempe hoc est quod apud antiquiores occurrit ἀξίωμα. *Admiratio peperit Philosophiam.*

Et sanè ut verum tibi dicam V. D. contigit mihi hoc loco sententiæ istius contrarium, nempe *Philosophia* (Hobbiana) *peperit admirationem*. An quia de congelatione hic agitur & degelatione (ut loquitur) voluit, ut rediret etiam, quod de ipsis aqua & glacie dici solet ænigmaticè — *mater me genuit?* & quæ sequuntur? Certè si quis unquam fuerit, qui res grandes & sublimes tenuiter & abjectè, qui graves leviter tractaverit, vereor ne hoc in loco illud fecisse Hobbius noster videatur.

Incipit à contemplatione Frigoris §. 1. ne te autem suspensum teneam, Frigoris causam universi in

ventum rejicit, venti causam, in motum Solis circula-
rem simplicem. Sententiæ fundamentum statuit in ex-
perimento cuius obvio. *Nemo, inquit, ferè nescit, quod*
halitus oris cum violentia efflatus, id est, ore non nimis
aperto emissus, manum objectam refrigerat; quodq, i-
dem halitus, ore hiante, id est, molliter emissus eandem ca-
lesfacit.

Habes phænomenon, oro ut attendas solutione i-
eiusdem, quia multum hoc conferet ad ea quæ sequun-
tur intelligenda; quid est quod facit ut idem halitus
nunc calesfaciat manū, nunc frige faciat? Præstat utrum-
q; hoc motus. Mirum certè motum, tum calesfacere,
tum etiam frige facere, quare subtiliter res hæc perpen-
denda; nempe halitus iste duos habet motus, alterum
directum, alterum *circularem simplicem*, quorum ille
frige facit manum, hic verò calesfacit, & prout præva-
let motus motui, sit ipse vel calorificus, vel frigorifi-
cus. In ore hiante, prævalet motus simplex; in com-
presso, directus: quare illic calorem, hîc frigus senti-
mus, motus n. directus aeris ventus est, ventus omnis
frige facit.

Atque hoc quidem fundamentum est eorum pluri-
morum quæ sequuntur (nempe quod ventus omnis
frige facit) quod quidem Hobbianum *ἀξίωμα* isti uni
experimento innititur.

Nos quid ad ista dicemus? quidni hic utar dicendi
libertate, dicamq; falsa esse hæc omnia vel futilia,
nempe falsum est illud *Ventum omnem esse frigorificum*,
multiplicique adversatur experientia; nōrunt rustici
ventos esse calidos alios, frigidos alios, quin calor
gradus atque frigoris non ventorum vim & vehemen-
tiam, sed plagam consequi.

Netadio sit prolixior oratio, in hac re sic planè sta-
tuo: calorem & frigus, si absolutè sumantur (sive cali-
dum

dum & frigidum absolutè sumpta) nonnisi corpusculorum quorundam ratione res habere, quorum corpusculorum symptomata ista sunt, ut alia ad motum partium minimarum, alia ad quietem corpora ea majora quæ ingrediuntur, disponant; quin esse aerem naturâ quasi mediâ constitutum, eumq; ad calorem aut frigus quasi indifferenter se habere. Quin eodem modo Ventum (qui est aer motus) se etiam habere, nempe non esse naturâ calidum aut frigidum, absolutè calorificum aut frigorificum, verum contingere ut calefaciat vel frigefaciat pro ratione particularû vel corpusculorum calidorum vel frigidorû quæ secum attulerit.

Nempe res in statu vel gradu Calidi vel Frigidi positas, tum calefieri ab aere vel vento, quando ambiens eos aer est ipsis calidior; frigefieri, quando frigidior. ideoque aerem vel ventum Calefactivum vel Frigefactivum absolutè dici non posse vel debere: fieri enim posse ut ventus idem vel aer idem hunc Calefaciat, illum Frigefaciat, quare ex manus Calefactione vel Frigefactione malè captam esse Frigoris eorumq; phenomenon quæ illud consequuntur, contemplationem. Quin igitur comminûs hanc rem experiamur.

Ait §. 2. *Frigefacere omnem ventum non modo magnum, sed & ventilationem quamlibet, quare ventum esse causam Frigoris.* At dicimus nos quædam frigefacere, quædam calefacere ventum, eundem nempe frigidiora calefacere, calidiora frigefacere, ideoque non magis Frigoris causam quàm Caloris statuentum esse ventum; imò corpora nonnulla frigefacere, alia statu suo relinquere status eosdem. Ita nimirum si quis calidus existens aerem adversus seipsum ventilet, frigidum sentiet, si tamen eundem flabro eodem eademque vi pellat in Thermometram nunquam efficiet, ut in ea ascendat aqua, quod

frigoris indicium esse solet: imò verò non solum experientie, sed & rationi omni contraria est ista assertio, motum nimirum aeris esse per se Frigoris causam, cum calor in motu & disgregatione partium, frigus in quiete & congregatione earundem consistat.

Verùm non (inquit) omnis motus aeris est causa frigoris, *verum cum duos motus habeat*, alterum causam Caloris, alterum Frigoris esse.

At quæ causa est, quòd motus directus sit causa Frigoris, circularis simplex Caloris, potiùs quam ut res se habeat è contrario? in illa re certè rigidus non est, aut severus; duo phænomena sunt *Caloris & Frigoris*, & duo motus, *directus & circularis*, modò duo hi motus duobus istis phænomenis inserviant, perinde est utrum utri eligeris.

At dicis, forsan, injurium me esse Philosopho huic nostro, nempe experimento initio adducto probatum esse, non esse liberè gratisque dictum, frigorificum esse motum aeris directum; Nempe exeunte ex ore compresso halitu (motu directo) manus frigesiet. Frigoris ergo causa est aer *directè* motus sive ventus.

Quinimò amotâ manu, flatu quoad omnia eodem modo se habente (carbone accenso interjecto) focus flammam concipiet, lignisque super foco largè nimis repositis, crepabit, ruetque domus integra: Quare aer directè motus, sive ventus est causa Caloris. Cernis flatu eodem, pro objectæ materiæ diversitate & statu, contraria phænomena excitari; quare causam Frigoris à vento turpissimè petitam esse constat.

Verùm quid igitur ad instantiam de flatu ex ore compresso vel hiantè? Nempe omnia ex nostra de calido & frigido hypothefi manifestissimâ ratione explicantur, ex Hobbianâ non omnino.

Nempe ore hiantè effunditur aer (ferè immediatè)

ex pulmonibus in manum, aer iste in pulmonibus calefactus, & ad manum perveniens calidior est cute, cutem igitur calefacit.

Ore compresso. efflatur aer (postquam in ore aliquantulum ad latera (pulmonibus frigidiora) propulsus, frigerit) manūque ad distantiam positā, pellitur in eam aer cuticulā frigidior, ideoque frigus hoc casu percipitur.

Dices me etiam frigoris causam gratis sumpsisse, frustrāque me asserere aeris cute frigidioris impulsu, non autem motu ejusdem directo hoc fieri. Quin igitur ad ipsum experimentum tibi placeat attendere. Scilicet si ob motum aeris vel halitus directum (addo etiam & vehementem) hoc fieret, contingeret, ut quò propius ori efflanti manus admoveatur, eò esset status frigidior; verum non illud, at contrarium prorsus accidit. Nempe si ori ipsi efflanti manus penè imponatur, nunquam (statu utcumque vehementi existente) hoc modo frigescet, imò calefiet manifestò; verum amotā ipsā ab ore paulatim, frigus magis magisque pro ratione recessūs invalebit.

Quòd autem calefactio ab ore hiantē, sit à calore etiam aeris à pulmonibus statim ad manum pertinentis, non autem à motu *circulari*, exinde constat, quòd recedente ab ore manu, dispergatur statim in aerem ambientem, Calor à pulmonibus ingestus, evanescensque faciat ut manus (etiam pedis unius distantia) hoc modo minimè incalescat.

Quid interim ad ista Eruditissimus Hobbius?

Quid dignum tanto feret hic promissor biatu?

Certè nihil habet omnino, præter hoc unum, motum aeris *directum*, *Frigoris*; *circularem simplicem*, *Ca-*

loris, causam esse; quid ita, quæso? Nempe circularis simplex removens à corporibus comprehensis aerem, facit ob fugam vacui, ut intumescant, & recipientibus se partibus ad exteriora, calefiant; *motus directus* partes introrsum premit, facitque ut frigescent.

Hoc est quod pallet? cur quis non prandeat hoc est?

Quid si probarem ex suis etiam principiis motum *circularem simplicem, Frigus; directum, Calorem* efficere debere? imò. utrumque utrinque causam esse?

Nimirum plena ut sint omnia, dum è sinistra corporis parte aer avellitur (ob fugam, inquit, vacui) tumescit hæc pars, quoniam insequitur fugientem aerem pars corporis; quin igitur in eadem lineâ necesse est, ut sit partium totius corporis motus, nempe à dextrâ ad sinistram; quare partes à centro ad sinistram ad extra tendent, à dextrâ ad centrum tendent ad intra, quorum illud est calefieri hoc frigesieri.

Quin eodem modo motus directus intus pellens partem sinistram, faciensque ut rigescat, eodem planè motu facit, ut extrorsum pellantur partes à centro ad dextram usque, atque ita ut corpus intumescat. Annon hoc est bellè admodum philosophari? quid igitur de Thomâ nostro possis judicare cernis. Interim vides nullo modo evictum esse ventum frigus per se & absolutè efficere (etiâ si nos aère calidiores existentes plerumque frigefaciat) quod unum universa ferè quæ sequuntur hujus capitis evertit.

Quoniam autem ipse in ea opinione est (ad causas frigoris reddendas) utilem sibi fore hunc ventum, ejus primum rationes suscipit explicandas. En igitur venti causam rotundè prolatam (Sectione 2.) Nimirum Sol efficit motu suo in Epicyclo, ut humida particulas suorum corporum exhaleant (nempe premendo
nimi.

nimiùm; facit rebelles, atque sibi in faciem ut involent) *partes hasce sequitur aer (nè detur Vacuum) atq; ita fit aeris motus, id est, Ventus.* Atque hæc est causa ventorum ex vaporibus.

At est & alia causa ventorum, quam tradit §. 3. nempe *utroq; Telluris motu* (tum vertiginis, tum circulari simplici in Epicyclo, prioris quadruplo) *in ærem incurritur; hæc igitur causa sentietur Ventus.*

Tu (credo) ista judicas in fumos statim abitura esse sibi relicta, facillimèque in leves ventos dissipanda, miror ipsum ad causas ventorum ferendas rationes à rebus tam longo intervallo distantibus petere; annon satis fuisset à rebus usu familiaribus petiisse? Exempli gratiâ, flabellis faminarum & ventilabris, fit aeris motus, aer motus est ventus, atque ita fit Ventus à ventilabris. Vel si à Ventre potius sit ventus ducendus, est ubi ab hac etiam causâ fit, ut aer moveatur.

Verùm ne forsan ipse labra inveniat lactucis suis non indigna, eos nimium qui ipsum satis eleganter Ventorum causas hoc loco assignâsse judicent, velim ut advertant ipsum sibi in omni ferè sententia contradicere.

Nempe illud habet hypothesis ipsius generalis (quod etiam eversum est) Solis motum simplicem facere, ut Æther atque Aer eodem motu simplici ferantur, atque ab iis ut motus hic Terræ communicetur. Quare motus Terræ universus ab aere penderet, ideòque non poterit Terra in aerem incurriere, atque ita ventum sentire. Imò certè miserum aerem esse oportet, præsertim secluso vacuo, si non habeat quo se recipiat; dum ex hæc parte Solem, ex alterâ Terram motu circulari simplici utrimque se prementem sentiat,

Verum hoc modo origine Ventorum explicatâ, transit ad Frigoris rationes pulcherrimè reddendas. Primum versus polos terræ, deinde in congelatione. Verum quid opus est multis, cum pauca sufficiant, Ventus hic (quasi spiritus esset) ipsi nunc omnia præstabit.

Scilicet motu Solis simplici in Eclipticâ movetur aer intra Tropicos, atq; ita expanditur, & ad polos truditur & fit Ventus, ideoque æter est.

At existimabam aeris motu directo Frigus fieri; atâ qui aeris motus directus, partes intra Tropicos comprehensas pellit, atque illud perpendiculariter, ceteras semper obliquè, quare oportuit ut Zona nunc torrida frigida fuisset, & ex adverso.

Sed videamus Congelationis causam: Ecce eam igitur ministrabit tibi ventus. Nempe ventus aquas summâs compellit, simulq; aliquantùm elevat, earum conatus ad centrum terræ impediens, à conatu autem ad centrum una cum venti conatu fit summa compressio, & conglobatio in grumos, unde summa aqua cutescit, durescitq;. Eodem modo paulò post durescit aqua proxima, &c donec fiat glacies crassa.

Quis illum crasso in aere natum non juraret? crassus est adeò omnis ejus Philosophia.

Imò certè manifestum est corporum quorundam ingressu, eorumque quæ ad nitri naturam accedunt, congelationem fieri; ejusmodi nempe corpus aliquod summè frigidum esse, uti ignis summè calidus est, cujus ingressu congelatio fit, motumque sistitur partium in humido.

Nempe ingressam corporum esse ostendit congelatorum omnium initio turgentia quædam, quæ facit ut vasa sæpe vitrea frangantur, atque ex vasis parvo ore plenis ut effluat liquor perpetuò sensibili satis quantitate.

titate; aliaque experimenta innunmera.

Nitrosa esse ejusmodi corpora ex multis etiam innotescit: nempe nitri frigus intensissimum, ejusdem in aquam infusi in pyramides glaciales desinentis consistentia; quinetiam congelatio artificialis ejus ope facta; plurimaeque alia, quæ referri possent, si locus postularet, hoc inferunt.

Dico igitur flantibus quibusdam ventis congelationem fieri, non quia flat ventus, verum quia ejusmodi corpora nitrosa secum fert (eo modo nimirum quo feruntur vento odores) ideoque congelari res non solum sub dio ventis expositas, verum & intus in aedibus existentes: neque aliquis opinor absque corporum ejusmodi aliquorum suppositione poterit hoc phenomenon explicare.

Ipsæ etenim, si quis unquam, à genuina hujus rei causa ferenda defecit. Nempe ait aquæ compressione hoc fieri; verum aqua dilatatur potius in congelatione, quam comprimitur: vel si compressione fiat, cur non malleo potius intra vas aliquod metallicum contusa congelescat?

In vento ex naturâ suâ nihil esse frigoris ostendi; neque frigidissimi sunt venti maximè violenti. In instantia de congelatione artificiali omnia nostris respondent; nempe motis particulis nitrosis, iisque per vasis latera in aquam trusis, motumque partium aquæ sistentibus, fit ista congelatio; ubi tamen flatus nullus sentitur.

Congelari paludes à summo incipiunt, rasâ igitur atque elevatâ exteriori superficie eaque congelatâ, quâ ratione elevari possint aquæ inferiores à ventis, atque ita cutescere & durescere, vehementer cupio, ut exponat.

Vereor ne tibi tædio sit prolixa nimis oratio, & tamen

men si modo in singulis capitulis quàm multa sint à nobis omissa memineras sphalmata, quæ non sine violentia transilimus, & quàm sit abruptus saepe sermo ne longus sit, spero ad veniam mihi largiendam proclivior fore.

Transeo quæ de duritie habet Sectionibus 8. 9. 10. 11. quanquam & alia sint plura quæ memorentur, & illud intelligere nullo modo possim (§. 8.) nempe, *quomodo duo corpora, quæ secundum superficiem communem se contingunt, possint tamen vi adhibita, etiam nullo dato vacuo, dissilire* (contra Lucretium.) *Columna* (inquit) *marmorea satis longa ab altera base pendens, suo pondere diffringetur.* Concedimus; atq; exinde vacuum arguimus. *Non* (inquit) *sequetur vacuum, quia solutio continuitatis fit successive.*

At certè nisi probaverit per indivisibilia semper fieri fractionem (quod omnem etiam ejus evertit Philosophiam) aer ingrediens partes prius exteriores fissuræ, dein interiores pervadet; adeoque pro aliquo temporis spatio *vacuum existet.*

Quæ de Flexorum restitutione habet §. 12. cæteris respondent, *nempe partes flexi, conatum habere ad restitutionem, atq; exinde remoto impedimento, fieri restitutionem.* Miraris, opinor, fugam Vacui abesse, neque in hujus phænomeni solutionem trahi, certè fugam trahere non erat adeò nunc opportunum, neque opus est, cum non defuerit ipsi instrumentum illud aliud, nempe *motus simplex.*

Siquis enim quærat de restitutione, respondet ob conatum istum contingere; si insliterit, & de conatu unde sit, quærat, respondet fieri *ob motum simplicem*, quis sit ille motus, unde fiat, quomodo conatum faciat, nisi forsan illudi velis, fuge quærere.

Quæ sit nostra de Fulmine, Fulgure, tonitru

nitru sententia, tu V. D. opinor satis intelligis; nempe materia alicujus sulphureæ inflammatione subitâ (uti in auro fulminante ferè contingit) ea omnia phenomena fieri. Nempe materiam aliquam ejusmodi in fulmine ubique reperiri, argumento est, tetrus quidam vapor qui in rebus fulmine tactis & dissipatis ubique invenitur. Hujusmodi itaque materia inflammatione quæ fit calore non magno, tum subtilis materia partes celerrimè pulsantur, unde Fulgur; tum aer subitò & violenter expanditur, unde Tonitru; cætera autem omnia non difficulter explicantur. Quid interea Malmesburiensis?

Ait hæc omnia contingere à nube glaciata, nempe à fractâ glacie fit *Fragor*. (scilicet *Fragor* dicitur à frangendo) deinde erumpente aere, fit *murmur*; sed ex *Fragore* primo & sequente *Murmure* fit *Tonitru*.

Deinde, *Aer ex nube erumpens reliquum usq; ad oculum percutit, unde Fulgur*.

Causas ergo Tonitrus & Fulguris reddidimus, inquit.

Et fortasse (ὅτι οὐ βροτὸς ἐστὶ) credidisset hæc aliquis, nisi contingerent, Tonitrua & Fulgura tempestate semper anni calidissimâ, hyeme autem (ubi glaciari nubes possunt, & forsan solent) rarissimè.

Atque hætenus quidem ipsam habuimus secreta naturæ pro more suo referantem; Nunc autem, prohi dolor! una res est quam Posteris intactam relinquet. (§. 17.) Nempe disquisitio de causa Cometarum, quam glaciem fuisse existimasset, nisi prohibuisset stella in Cassiopea.

Quin igitur lugete Posterì!

Non

*Nonsecus ac liquidâ si quando nocte Cometae
Sanguinei lugubrè rubent.*

Hoc scilicet portenti Cometa nuperus (libellum hunc sub prælo jam tum laborantem torvè intuens) præsignificabat. Solent nimirum principibus esse inimici Cometae; verùm ut in principem Philosophorum virus suum effunderet

— *Quis talia fando
Temperet à lacrymis?*—

Sed ferendum hoc, quicquid est, nec ipsi vel scientiæ vel morum vitio vertendum.

*Nempe, hanc ne posset natura accedere partem,
Frigidus obstabat circum præcordia sanguis.*

CAP. 4.

De Sono, Odore, Sapore, Tactili.

Scilicet frigescere invenies deinceps ipsi omnem ferè orationem, jejunâmq; fieri; hætenus motu circulari simplici agitatum caput, occubuit aliquantulum, figmentisque tumuit; nova certè plurima tulit hætenus, eaque satis portentosa, quæ legentium oculos ad spectandum utcunque allicerent: contentus est hoc capite ea quæ ab aliis sæpissimè dicta sunt recitare, eoque solo nomine sua facere. Noli existimare (V. D.) me ipsi hoc vitio vertere, quòd aliundè quicquam (etiamsi autores reticendo) transferat; imò utinam plura transtulisset. Philosophi non minùs esse existimo (certè viri ingenui) ea quæ ab aliis benè dicta

Et sunt candidè sumere, atque in systema accipere, quàm eorum loco, quæ malè minimèque ad humanum dicta sunt intellectum, nova invenire, iisque res motis substituere. Verùm ipsum ita rem gerentem hæcenus habuimus, ut maluisse videatur omnia falsò, confusè, contradicenter præstare, quàm iis uti, quæ ad naturæ explicationem necessaria, aliorum hominum nobilissimorum invenerat industria; neque tamen hoc ipso in capitulo mos iste eum planè deseruit: quanquam etenim ea omnia quæ de sono habet, sint à Gassendo, Merfeno aliisque tradita; in reliquis tamen, ut Odore aliisque, nihil habet præter hoc unum, ut benè positis contradicat.

Rebus hoc modo se habentibus in eis quæ de sonis habet, nullus ego inquiram, in cæteris brevissimus futurus. Nempe ex iis quæ Sectionis hujus capitulo secundo protulimus, manifestum esse arbitror, differentiam inter lumen & sonum malè ab ipso §. 1. constitui, cum utrumque phænomenon aeris motu explicare nititur: nempe ex iis quæ dicta sunt, manifestum est esse in lumine materiam quandam aere longè subtiliorem, cujus celerrimus à Sole motus efficit, ut illud oculi fundum percutiens sentiamus.

Neque alicujus est momenti quod habet de conservatione Soni per tubum facti. Placuiſſet admodum si docere voluisset qua ratione motus aeris à loquente excitatus, vel crebris in tubo replicationibus non confundatur, vel extra tubum in aere aperto, libertate nimia & expansione, minimè diffluat, & evanescat.

Quod de nubium glaciatarum fragore habet, tonitrusque causa exinde deducta (§. 59.) facit ut hominem aliquantulum admirer: neque etenim inter omnia quæ protulit magis inficetum quidquam mihi visum est: non igitur expectabam, ut ista importuniùs repeten-

repetentem invenirem. Sed non est eorum qui calibatum colunt de Parentum affectibus judicare: meministi quod de Ovidio narratur, subduxisse illum spongiæ istum verficulum quem maximè culpandum, atque à reliquorum familia submovendum existimaret Aristarchus.

Quod causam *resilitionis* in Bombardis explosis, esse dicar, *Quòd cum in explosione, à vi ignis tumefacta Bombarda, se postea restituat, nascatur conatus undequaque, versus cavitatem, & proinde etiam in partibus circa fundum; ferri posset, nisi phænomena contradicerent, nempe cuivis manifestum est resilire Bombardas etiam affabrè factas quoties sive à rubigine sive à fuligine minimè purgata impediatur pulveris accensi (ut & plumbi) motus directus, nempe ex crebris reflexionibus parvisque pulveris conatui factis resistentiis illud fieri phænomenon, non autem ex conatu restitutionis versus omnes partes, adeoque non magis resilitionis, quam exsilitionis causa futuro.*

Quod habet §. 9. de causis, *cur ventus sonum vel promoveat vel impediat, lumen non item, intelligere nisi tu forsan adjuveris, nullo modo possum: nempe lumen est ipsi aer motus, hoc idem est sonus, imò & ventus tandem est aer motus. Qua ratione motus motui vel obsistat, vel adjuvando succurrat, existimo me satis intelligere; cur autem ventus si aeri moto obstare potest, non possit aeri cuivis (sibi ex adverso) moto obstare? quin igitur attende ad ipsius subtilitatem.*

Ait ventum sono obstare, quia perceptibiliter movetur illic aer, lumini non obstare, quoniam movetur illic aer imperceptibiliter.

Nempe hoc est quod me ringit. Quoniam intelligere nequeo fieri posse, ut ventus aeri perceptibiliter moto resistat, imperceptibiliter interim moto non resistat;

resistat. Verum tu forsan ista intelligis.

Certè lumini non obstat, quia subtilior longè est luminis quàm aeris materia, eumq; liberrimè penetrat!

Verùm demissis iis quæ de Sonorum habet differentiis, earumque causis, ad ea quæ de Odoribus habet, quorum cum saporibus communia pleraque sunt symptomata, accedamus. Nôsti sententiam istam à nobis receptam esse, (uti veritati satis evidentè consentaneam) quæ statuit particularum quarundam è corporibus effluvio odorem fieri; quinetiam hoc modo fieri saporem; pro variâ autem particularum effluentium consistentiâ & motu, Odorum (addo & Saporum) differentias evenire.

Atque ista quidem rationi consona esse faciunt omnium odoratorum observationes. Effluunt manifestè è floribus particulæ substantiæ suæ, & odorem dum emittunt simul etiam deflorescunt; quin & Aromata universa odorem simul & substantiam perdunt, uti omnis ubique testatur experientia.

Quinimò si à plantis ad Animalia transire velis, norunt ii omnes qui venatu nemorum assueti sunt, solere donec ferarum suffecerint effluvia, vegetos esse atq; abundantes relictos odores, adeò ut Canes ipsos ultro ferè sollicitare videantur; tunc postquam evaporato humido membra rigere inceperint, deficere statim unâ odores, Canumque ferè sagacissimorum nares destituere.

Verùm infinitæ hujus rei instantiæ adduci possunt, quibus effluvio quodam corpusculorum, odores (pro parte eorum materiali) gigni, posset evinci. Quænam est interim, Philosophi hujus nostri de Odoribus sententia?

Nempe incredibile hoc ipsi faciunt tria argumenta, quæ sunt omnia nobis (jam satis otiosis) ordine consideranda.

1. Primò inquit, §. 13. *Unguenta quadam odorem emittunt, non modò per spatia loci, sed & temporis longissima, adeo ut partes effluxa implere debent spatium millies majus ipso corpore, quod est impossibile.*

Concedimus impossibile esse, ut corpuscula evaporata locum majorem occupent, quàm priùs in corpore odorato obtinebant. Videamus igitur quonam argumento illud in positione effluviolorum sit secuturum. *Quia (inquit) Odores in omni puncto medii odorati sentiri possunt.*

Benè habet, quòd mentem ejus saltem intelligimus. Sentimus fumo exiguo odorem concipere aerem universum camerâ satis amplâ inclusum, hoc idem guttulâ unâ aut alterâ aquæ vel Spiritus alicujus odorati, carboni vivo injectâ contingere. Cernimus quantum liquoris, quantillum corpusculorum nonnullorum colore aliquo tingat, atque in omni ferè rerum genere infinita suppetunt ejusmodi experimenta. Ubi quoad sensum parva magnis ita commista sunt, ut videantur sensui quasi iis coextendi. Verùm longè aliud est rationis (Philosophiâ instructæ) atque sensûs, de rebus istis judicium.

Cum pulveris exigui jactu vel fumo exiguo, vel aqua, sive igne evaporata, vel per dentium intervalla (ut in Hispania solet) filis tenuissimis ejecta, odorem ita concipiant spatia ampla, ut ubique sentiri possint. Quæro à Thoma quid fiat? Effluvio manifesto fiunt odores isti; quid igitur? num partes corporum in fumos vel vapores abeantes loca ipsis millies majora occupant? nihil minus. Certè neque suo judicio neq; nostro. Quinimò longè plura sunt medii spatia corpusculis odoratis vacua, quàm sunt repleta, quam hoc sensus non assequatur; atque ista cùm sint aperta cuivis & satis obvia, (cætera *κατ' ἀναλογίαν* intel-

intelligendo) sufficient ad argumentum istud de loco dixisse.

2. Secundum argumentum adversus effluvia hoc est. Si (inquit) *effluxus fiat, sive motu recto, sive curvo, si totidem effluerint ex alio quolibet odorato eodem motu, sequeretur omnia odorata similem habere odorem.*

Rediit certè Thomæ Spiritus Philosophicus; nonnulla de Sonis habuimus aliena, hæc autem genuina esse jurare possit unusquisque ratiociniis Hobbianis affuetus.

Incommodum illud quod ex effluviis suppositione infertur, illud est, sequi hac ratione *omnia odorata eundem odorem habitura.* Quomodo hoc infert?

Si (inquit) eodem numero & motu particulæ effluerent, hoc contingeret.

Quid? si in aliquibus hoc modo fieret *effluxus*, num sequeretur, *omnia* eundem odorem emissura? hoc ille vult, verum ex istâ effluviis positione nihil omnino sequitur eorum quæ habet, neque enim sequitur, unquam partes effluere eodem numero motuque in diversis odoratis, neque si illud concedatur (semper & in omnibus, eundem esse partium evaporatarum numerum & motum,) sequetur eundem *omnia* odorem emissura, cum præter Motum & Numerum ad odorum varietatem conferat plurimum Figurarum etiam diversitas. Quare manifestum est ratiocinationem istam fuisse verè Hobbianam. Quod suscepimus &c.

Quin 3. inquit, *Si istiusmodi effluviis, fieret odoratus, sequeretur eorum solo motu fieri olfactionem; sed ista non fit, nisi halitum per nares attrahamus.*

Eodem certè modo dicimus effluvia ista esse causas vel instrumentum odoris, quo aer est instrumentum Respirationis; neque solet, opinor, instrumentum

absque applicatione opus suum integrum perficere: ut igitur absque Pulmonum motu non perficit aer vel aeris motus (sive ventus) respirationem, ita neque sine haustu aliquo vel pulsu sive flatu in interiora nasi, fiet odoratus: dicimus, ut Odoratus sive perficiatur, sive intelligatur, non solum effluvio, verum & cerebro opus esse, illudque in argumento isto desiderari.

Quin igitur sententiam, quæ per effluvia fieri odoratum statuit, nondum Thomas evertit; maneat ea igitur. Nos autem ad ea quæ de *Saporibus* habet, transeamus.

Hic autem vereor admodum, ne (magno Solazii-
mo) insipidus atque jejunos videatur. Ubi nihil omnino ad Saporum naturam explicandam attulit, præter ista (neque multa neque profundissima) Sect. 17: *Nempe lingua & palati Cuticulas & nervos esse organum gustus primum.* Ne quis putaret se digitis vel auriculis gustare posse. Deinde *Sapores ventriculum movere, & cerebrum:* ne quis Ebrietatis eum symptomata nescire autumet. Et tandem *potuisse se ex diversitate figurarum in Atomis, Saporum causas verisimiles excogitasse, si voluisset à Philosophia ad Divinationem transfugere.*

Hæc ea sunt quæ de Saporibus habet, quæ nescio quid tibi sapere videantur; mihi certè hoc indicant, eum sale (quousque vixerit animamque traxerit) non esse cariturum.

Verum quæ causa est quod ad divinationem transire noluit? Certè oblectasset Lectorè, si divinare aliquantulum, voluisset. Quin igitur liceat mihi (obsecro V.D.) divinum hunc hominem aut sacrum potius paulisper alloqui.

His vatem aggrediar dictis, ac talia quæram.

Tu Thoma! interpres divinum, qui numina Phæbi,

Qui

*Qui Tripodas, Clarii lauros, & Sydera sentis,
Et volucrum linguas, & prapetis omina pennæ:
Fare, age — dic, tristes succos, tardumve saporem
Quid faciat, mali infelicis, & utilis herba,
Pocula si quando sævæ infecere noverca.*

Quid est quæso quod hoc loco profundum est a-
deò altumque silentium? *Transfugere* (inquit) *nolo à*
Philosophia ad Divinationem.

An quia odiosum est nomen *Transfuga*? at multos
unaquæque fert ætas. An quia displicet ipsi totum
divinationis opus? at placuit illud *Stoicis* omnibus,
(teste Cicerone) uno forsan excepto Panætio. An quia
præ insigni in Mathematicis scientiâ *magis* jam ante-
hac est habitus (quamvis illud iniquissimo iudicio)
nolitque ejusmodi rumores fovere? an tandem quia
Atomii istæ sint res admodum exiguæ, & non vacat ex-
iguis rebus adesse? imò satis est eam hæcenus divinasse
causasque rerum non naturales & veras sed possibiles
(quod certè est de rerum natura divinare) vel potiùs
impossibiles protulisse. Imò quia hæcenus in divina-
tione totus fuit, transfugere non potuit ad divinatione-
nem. *Qui jacet in terra, non habet, unde cadat.*

De Tactu nihil habet, quod sit consideratione dig-
num, quare ad alia properamus

Cap. 5.

De Gravitate.

Scilicet ad finem partis hujus *Physicæ* properamus,
—post tot discrimina rerum:

Quamquam etenim multæ, imò quam plurimæ

sint Universi partes, quarum considerationem omnino pratermisit hic noster Philosophus; vidisti tamen V. D. multas esse de quibus pro more suo philosophatus est. Nempe (ne multus sim) quod ipse habet (Cap. 27. §. 7.) de motu simplici, illud non solum Physicam Sydeream, sed reliquam etiam universam respicere intelligendum est. Hanc (inquit) *hypothesin visum est retinere, & quorum phenomenorum causas ab illa derivare possim, eas derivare; cetera quæ inde deducere non possum, non attingere.* Nempe, non omnia possumus omnes; ultra posse non datur esse. Innumeræ sunt sententiæ tum elegantiores antiquorum, tum barbaræ Scholasticorum quibus se possit defendere: vel forsitan potuit, sed noluit; hoc etiam nobile: ita potuit ipse *in novum orbem navigasse, & proportionales rectæ lineæ ad hyperbolem & Ellipsin, atq; inter extremas duas, medias quascunq; proportionales invenisse, nisi properasset.* Et certè ego in ea sententia planè sum potuisse eum omnia eadem mentis & rationis vi æqualiter attingere, imò quidvis ex quocunque principio, si voluisset, deducere; quæ magna certè est putanda hominis felicitas. At sentio me pronum ad garrulitatem. Ea quæ in hoc etiam capite habet, nos leviter tangamus.

Nosti difficilem esse quæstionem de Gravitate, & multâ nube obductam: videamus quid luminis hic ferat.

Incipit à consideratione densi & rari; cujus rationes nobis (tibi mihiq;e) non aliter intelligibiles sunt, nisi statuatur, densum illud esse, ubi plus corporis, rarum, ubi minus corporis in spatio æquali continetur, ita tamen ut rarum illud (si homogeneous fuerit) omnes spatii partes eodem modo (id est vacuis spatiolis similiter ubique interspersis) occupet. Videamus quid de

de hac re sentiat hic noster.

*Ait igitur (S. I.) vulgarem Densi & Rari (vocalum-
lorum) significationem veram esse. Quænam est ista?
hæc scilicet, Nomina ista esse collectiva, id est, nomina
multitudinis, Densum, quod dati spatii multas partes
occupat; Rarum, quod ejusdem vel equalis spatii partes;
ejusdem magnitudinis, continet pauciores. Nempe
Densum idem quod frequens, Rarum idem quod infre-
quens.*

Benè habet. Quin igitur gratulandum est nobis ip-
sis contigisse tandem, ut huic tanto Philosopho tam
suavis nobiscum sit concordia. Nemo certè sententis
am nostram clariùs, nemo plenius, nemo elegantius,
aut explicare potuit, aut asserere.

At eheu! quid video? hoc scilicet, breves esse & falla-
ces hominum voluptates; neque nimium esse quo-
rumvis hominum verbis credendum. Annon veram
esse dixit istam densi & rari significationem? imo. *Sed
non ut sit in loco quolibet plus materia quam in alio loco
equali, sed plus certi alicujus corporis nominati. Nempe,
in acie densa non est plus corporis, sed plus militum. Ita
solebat olim Proteus, aut ita Sphinx olim. Ast ego
sum Davus; verum est, densum esse quod dati spatii
multas partes occupat. Densum, id est, densum corpus.
Non, inquit, sed corpus tale, ut densa acies ubi plus
militum. Benè habet, densum corpus tale est, ubi est
plus corporis talis; ergo eadem ratione, densum cor-
pus, est ubi est plus corporis. Mihi certè ista sequi
videntur, nempe notionem ipsam densitatis illud ha-
bere, ut plus corporis, id est, plus materia includat,
neque ipse aliter (uti videtur) sentit, sed placuit ipsi
semperque placebit istiusmodi mysteria proferre, quæ
solent alii aut *εἰς ἀνάγκη* vocare, aut *εἰς ἀντοπαρῆν*.*

Verùm ipsius (ut videtur) non multum interest, neq;
magis

magni ad Philosophiam momenti videtur, ut Densitas, & Raritas, Condensatio, & Rarefactio intelligatur; in quibus naturæ atque Philosophiæ universæ clavem contineri, saniores arbitrantur.

Sed ad Gravitationem explicandam se accingit (§. 2.) dicitque *ex principio externo gravia moveri*; consentio, causas audire gestio.

Nullum (inquit) corpus seipsum movere potest; Corpori creato tribuere potentiam seipsum movendi, quid aliud est quàm dicere creaturas esse, quæ à Creatore non dependent?

Benè habet, quanquam ista vix quicquam conferant ad Gravitationis causas explicandas, illud obiter mihi quærere liceat, quæ nempe causa sit motûs Solis circularis simplicis? & à quonam tandem corpore moveatur? nempe Sol ipse (motûs corporum in universo fons & origo) movetur, ex mente Hobbiana, motu locali; aut igitur ab alio corpore movetur, aut à seipso, si à seipso, creatura non est, Deus est, uti magis (Persæ nimirum) ante Hobbium crediderunt. Si ab alio corpore, non erit Sol principium motûs. Velim ut ista explicare posthac dignetur, ne ruat hoc etiam argumento columna ista altera Philosophiæ suæ de motu Solis circulari simplici; verum hæc obiter.

Sed propius ad rem ipsam accedamus. Ait §. 3. *Atomos esse aeri interspersas, consistentiâ, figurâ, motu, magnitudine differentes, unde fiat ut aliæ aliis, majore impetu in terram (& Planetas alios) ferantur. Hoc autem majore impetu ferri, est esse grave. Pulchrè! ergo causa Gravitationis in consistentiam, figuram, &c. motumq; Solis simplicem, est referenda. Causa (inquam) generalis Gravitationis, atque in particulari (ut loquuntur) quærendum solummodò restat, quid conferat ad hanc rem unaquæque causarum memoratarum.*

Ita nempe ego mentem ejus intelligebam, sed eum inveni Paragraphe sequente ea omnia deserentem, novamq; planæ gravitatis hypothesin molientem, eamque figuris (ut Geometricis rationibus stabilita impetitis videatur) ornantem atque explicantem.

Scilicet in fine §. 3. duas istas quæstiones proponit in sequentibus considerandas.

1. Unde fiat ut corpora sint alia aliis graviora?
2. Quomodo corpus terra insidens à terrâ ipsâ in sublime efferrî possit?

Expectas igitur (opinor) ut ista in sequentibus ostendat. Imò licet hoc tibi expectare, neq; n. te prohibuit.

At ipse susceptæ quasi immemor provinciæ, istis planè omissis, illud in sequentibus ostendere conatur; unde fiat, ut corpus aliquod in plano *Æquatoris* in sublime evelctum, descendere incipiat: præclarum hoc quidem, sed ἀπερὸς διόλου. Neque enim hoc est ostendere vel unde fiat, &c, vel quomodo corpus &c.

Quin igitur mysterium illud explicatum videamus de corpore in plano *Æquatoris*. Nolo vel te ipsum vel Lectorem ad figuras Geometricas hâc occasione referre, neque enim est opus.

Supponatur corpus in plano *Æquatoris* sublimi quiescens. (puta saxum) Quoniam igitur Terra motu diurno (super polos *Æquatoris*) aerem excutit ultra lapidem, necesse est ut descendat aer supra lapidem (ne detur vacuum) & lapidem secum ferat. Nempe hic sensus est integer eorum omnium quæ tanto ipse figurarum explicat apparatu.

Atque ipse quidem dolere ferè incipio ereptam jam antehac atque everfam hypothesin de fugâ vacui, & de motu Solis simplici, quæ omnibus naturæ phænomenis tam feliciter inserviunt. Cernis utcunque non inane fuisse operam iis insumptam.

Atq;

Atque ut verum fatear, multa sunt à Thoma nostro hoc loco quærenda, quæ fusiùs erunt (si valeat modò) explicanda. Primum quomodo Terra motu suo diurno aerem excutere possit, si omnia sunt plena; quo quæso excutiet? vel si excutiat, quomodo fieri possit (cum sit motus excussivus perpetuus) ut decidat aliquis. Nempe, cum corporis Terrestris moles integra, super *Æquinoctialis* axem, diurno motu revolvitur, estque motus is causa excussionis eodem jure, quo in plano *Æquinoctialis* (licet non eadem vi) aer excutitur, excutietur in planis omnibus *Æquatori* parallelis nempe in planis infinitis (illudque non ad superficiem Telluris, sed ad axem *Æquinoctialis* perpendiculariter) id est, aer omnis Telluri contiguus excutietur, & consequenter etiam aer universus, intra Telluris polos ipsi quovismodo incumbens, atque illud perpetuò, quia motus Telluris est perpetuus.

Nisi detur vacuum, intelligi non potest ista excussio; si excutiat, intelligi non potest, unde sit principium reditus.

Sed 2. dicit *aerem ultra lapidem excuti*; hoc est quod nullo modo possum, aut intelligere, aut concedere. Annon quæ graviora & densiora sunt longius excutiuntur? lapides aere? provoco ad rationem atque experientiam.

Vel si excutitur aer, annon & aer cui incumbit lapis, in plano *Æquatoris* excutietur, eumque altius evehet?

An tandem cum fiat itus reditusque in planis, *Æquatoris* plano parallelis, annon oportet lapides descendere ubique, non ad *superficiem* Telluris, (quod tamen faciunt) sed ad *Axem* motus diurni, perpendiculariter? ut taceam objectiones, quas ipse fert, nempe eò tardiùs gravia descendere, quò fuerint à plano *Æquato-*

quatoris remotiora, polisque imminetia minimè descensura. Quare non est, ut invidemus ipsi hanc suam hypothesein de fugâ vacui. *Non equidem invideo, miror magis fugæ istius vim, mirorque eum de causis majoris minorisve gravitatis loqui instituentem, ad ista tam aliena deflexisse.*

Amphora capit

Institui, currente rotâ cur urceus exit?

S. 5. Contra Gravitatis causam jam supra assignatam objicit, quod Grave in fundo collocatum, alicujus tubi ferrei vel adamantini inverso fundo, non descenderet, quia fieri non possit, ut aer superior ipsum depellat. Atque ipse miror cur illud non concesserit in tubo adamantino satis longo (puta unius milliaris) atque erecto perpendiculariter, eventurum, quis etenim eum experientiâ refellere potuisset. Quidni hoc eodem jure statuerit quo prius, non esse gravia super polum terræ descensura? potuisset (inquam) hoc modo objectionis vim evasisse, sed noluit; neque ipsum adjuvare nunc possumus. Ait, inniti terra ejusmodi tubum debere, quo facto, fundus tubi aerem excutiet, facietq; ut aer summus, Grave in summo tubo positum, (modo supra explicato) expellat. Ut illud potiùs putares, excuti (juxta illius mentem) debere omnem aerem, ideoque debere illum versus tubi summum excussum, lapidem premere, magisque à descensu prohibere; utcunq; si tubi supremam basin lapis tangat, quomodo eo altius, excuti possit aer, mihi non occurrit.

Seçãoe 7. propositionem continet ab omnibus tractatum, qui de insidentibus aquæ, sermonem instituerunt, [istam nempe, si corpus quodlibet aqua innatet, pondus ejus ponderi aquale est molis aqua tanta, quan-

quantam capit locus, quem occupat natantis corporis pars, aqua immersa. Propositionem sanam & utilem, ita ut mireris unde factum sit ut locum apud ipsum invenerit: sed desine, obsecro (V. D.) mirari, neque enim sui ipsius gratiâ hoc contigit, quin potius consecrarii cujusdam admirandi, quod exhibet articulus immediate sequens, viz. §. 8.

Sequitur (inquit) hinc, fieri posse, ut corpus quantavis magnitudinis, modo ex materia constet minus gravi quam est aqua, aqua tamen innatet quantulacunque.

Ego quidem quanquam multis nominibus hominem hunc admirari soleo, nusquam tamen sobrietatis limites eousque admirando excedere & transire consuevi, ac si quando contingat, ut eum corollaria deductentem inveniam (quod quidem est, si non rationis atque iudicii saltem opus ferè integrum & adæquatum) nempe hoc est quod alicubi admiratus est magnus Cartesius, nusquam eum, sive vera sive falsa posuerit, rectè aliquid ex suppositionibus ratiocinando inferre; imò verò conclusiones suas præmissis contradictorias omnino sæpè esse, easque se mutuò evertere invenies: attende nunc, quæso.

Ex propositione (§. 7.) illud sequitur; nempe, si quod corpus aquæ innatet, occupare illud, partem aquæ cui innataverit, id est, locum in aquâ occupare.

Sequitur deinde ex eâdem propositione aquâ, quæ locum istum partis immerse implere possit, esse pondere æqualem toti corpori innatanti.

Nisi igitur statuatur minimam partem aquæ esse pondere æqualem navi onustæ vel corpori cuivis, quod mari Atlantico possit innatare, impossibile est, ut corpus *quantavis magnitudinis, modo ex materia constet &c.* aquæ tamen innatet *quantulacunque.* Illud autem

autem cuivis, cui læsa non fuerint principia, relinquo judicandum. Quare non opus est, ut ad schemata provocem te, quæ in hoc opere ferè universo nullius sunt usus nisi ad distrahendos & stupore quodam occupandos eorum animos, qui sunt speculationibus figurisque Mathematicis minimè assueti. Imò verò ex propositione assumptâ sequitur illud manifestè, non esse corpus minimum aquæ innaturum, cujus moles sit maxima, nisi tantæ sit profunditatis, ut admittere eousque corpus poterit, donec occupaverit locum aquæ sibi pondere æqualis; hoc rationi convenit, hoc experientiæ, illa verò somniis febricitantium.

Proposuerat (uti meminisse potes) supra (c. 26. §. 4.) ad probandum vacuum adduci solitum experimentum aquæ vasi inclusæ, quæ dato supernè exitu sursum ejicitur, pulla ab aere: quin & aliorum mentionem fecit §. sequente. (ut sclopeti pneumatici &c.) expectavimus ut eorum rationes suâ ex hypothese tunc redderet, ubi methodus & Logicæ rationes omnes illud postulabant; verùm eum (aliàs loquacem satis) illuc silentem penitus habuimus. Quare sopitam rem istam existimavimus, neque expectabam, ut quod locum sibi proprium deseruisset, alienum importuniùs invaderet. Quid istis experimentis cum Gravitate? At ecce eum hoc loco ista inferentem! quid dicam V.D? quid? nisi magnam esse aliquando conscientie vim, eamq; legibus dialecticis minimè subjectam. Viderat quàm esset illud turpe & indecorum, intacta ea (quæ tanti ad hypothesein suam stabiliendam momenti fuissent) reliquisse, neq; ferre potuit hoc dedecus generosum petus; quare calamum arripuit, voluitque, ut daret hic locus autoritatis suæ specimen aut certè libertatis,

*Dum variare cupit rem prodigialiter unam,
Delphinum silvis appingit, fluctibus aprum.*

Quin igitur eum ut sequamur necesse est, & in ea quæ habet inquiramus.

Nosti sententiam nostram de causâ phænomeni, in fonte artificiali, sive in aquâ vasi inclusa, illuc tandem recidere, compressum aerem in vasis parte superiore, utraque statum naturalem condensatum, elatere suo seipsum (aquæ portâ datâ) expandere atque liberare, fierique hoc aeris motu ut aqua ejiciatur. Atque hæc quidem est sententia (eaque plana & intelligibilis) eorum qui absque vacui suppositione phænomenon naturæ causas intelligere se non posse profitentur. Nunc autem quænam est Thomæ phænomeni hujus solutio?

Dicit (§. 9.) non esse aeris compressionem & dilatationem hujus phænomeni causam, verùm corpusculorum quorundam in aere: non hoc facit aer, sed aliquid in aere, ita ut aer purus hoc non faciat, sed atomi in aere volitantes, quæ cum aere egrediente aquamque injectam penetrante simul egredi non poterent.

Cernis V. D. nisi pudor ipsum prohibuisset, eum ad nostram sententiam accessurum fuisse. Quid ille sit aer purus, fateor me non nosse, cui est Atmosphæra universa ex variis multiformibusque corpusculis concreta, iisque variis (pro dato stimulo) motibus agitata.

Quomodo exire poterit aer, atomis istis, quarum motus est vegetior, quarum consistentia solidior, aquam non simul penetrantibus, nemo poterit (opinor) ostendere.

Quæ

Quæ causa sit ut aerem non esse dicamus quod est in vasis summo relictum, nullus video.

Quin aerem omnem non solum vi injectum, sed & gravitate suâ locum quemvis occupantem, elaterem habere, docet experimentum de hydrargyro in tubo ad certam altitudinis mensuram descendente: ubi si tubus ante inversionem & immersionem, non integer impleatur, sed unciâ defecerit, descendet hydrargyrum, non ad altitudinem solummodò 26 unciarum, sed longè inferiùs; docetque hoc idem Thermoscopium. Ast ego ridiculus sum adversus umbram hanc (nihil solidi habentem) pugnando: meministi falsissimè apud Ciceronem derisum Epicureum (in L. de Nat. D.) qui argumentis pressus, Deos non corpus habere dixit, sed *quasi* corpus, neque *sanguinem* sed *quasi* sanguinem; certè redeunt hic joci omnes salesque Ciceroniani, ubi dicitur, non esse *aërem* hujus phænomeni causam, sed *aliquid in aere*, vel *quasi aerem*.

Quin iisdem tricis implicatur §§. 10. & 11. ubi de pondere aeris vesicæ inflati, & de sclopeto pneumatico philosophatur. Notum est vesicæ inflato aere, pondus augeri aliquantulum. Quæ causa est? dicimus phænomeni hujus causam esse aeris inflati, supra liberum & ambientem aerem, densitatem.

Respondet ille hoc ita contingere *ob particulas instantas in aere, non fluidas sed ab aere diversas*. Verum quid ista faciunt ad rem suam? manifestum est aerem in vesicâ, aere extra vesicam, graviorem esse. In aere exteriori non minùs atomorum est non fluidarum, quàm in aere inflato; frustra igitur causa gravitationis inde petitur, ubi omnia (unâ exceptâ compressione ex inflationis vi) sunt æqualia.

Ad sclopetum pneumaticum accedens §. 11. (cujus etiam rationes ex aeris compressione & dilatatione

ne præsuppositis, apertæ sunt & obviæ) *Ait se crediturum hujus rei causam esse, quod idem aer in Canone, initio rarus, deinde incutiendo aerem externum densatus, rursus dato exitu rarefieret. Si modo cogitabile esset eundem locum semper plenum, modò plus, modò minus materia continere, id est, pleno pleniorum esse, vel si concipere posset plenitudinem ipsam causam motus efficientem esse posse, quorum utrumque est impossibile.*

Nempe adducitur hoc experimentum (capite jam suprâ laudato) ad vacuum in naturâ evincendum; neque hic quidem, ubi de gravitate agitur, locum ullum sibi propriè atque immediatè vendicat: At vim responsi videamus.

Disputant adversarii, manifestam hîc esse aëris compressionem & ex compressione condensationem, fieri illud non posse (adeoque ut idem aër nunc majorem nunc minorem locum occupet) si omnia sint plena; nisi sint vacuola aëri interspersa.

Quin istum aëris compressi ad dilatationem nixum, esse causam phænomeni in sclopeto pneumatico.

Respondet ista se crediturum, si locus pleno plenior esse posset, quod est in argumento, præmissis minimè negatis, conclusionem (pro more suo Philosophicè) negare.

At non est (inquit) plenitudo principium motus (in sclopeto explodendo) imò quis esse asseruit? dicimus aeris restituentis se elaterem (infinitis experimentis probatum) phænomeni hujus causam esse. Interea Thomam cernimus nescio quas pugnas acerrimasque luctas excitantem, inter aerem impulsam & egredientem, & se miserimè cruciantem, ut non per aerem, sed quasi aerem, vel per corpuscula (eo solo fine) in aere volitantia, hoc solvat, fecit, opinor, sclopeti mentio,

tio, ut bella ista excogitaret.

Quin pergit ad experimentum de Thermoscopio §. 12. cujus illic compositionem ostendit, à mille aliis antehac explicatam, adeoque Philosophis notissimam, neque à me hoc loco repetendam.

Nosti in Thermoscoopiis (vulgaribus, de quibus hîc loquitur) solere aerem frigidum facere, ut aqua in tubulo ascendat, calidiorē ut descendat, horumque phænomenon rationes ex nostra hypothēsi (quæ spatiola in aere vacua aerisque gravitationem supponit) facillimè reddi posse. Nempe frigore densatum in supremâ cucurbitæ parte aerem, in locum minorem contrahi, ideoq; prevalere pondus aeris vasculo incumbētis, & facere ut in tubum plus nunc aquæ ascendat, non quidem eo fine ne daretur vacuum, sed quia vacuum fuit ex condensatione factum, unde facillimus est factus aquæ ascensus: è contrâ, calore rarefactum aerem in summâ Thermoscopii parte majorem sibi locum postulare, & expansionis vi efficere, ut subjēcta sibi aqua in tubulo descendat. Hæc (inquam) clara satisq; intelligibilia. Quid interim Philosophus? Ait *Corpora liquida frigidiora fieri propter aerem sibi incumbētem, id est, propter constantem ventum, ipsa comprimentē; quare premi aquā in vase, sed quò pressa recedat, locū nullū esse, nisi in cavo tubi, & proinde aquam illic ascendere.*

Quid faciam. V.D. quid dicam? Admirationem ita excedunt hæc omnia, ita stuporem arguunt excitantq; heu! quantū est quod nescimus? heu! quot sunt in Hobbio stupenda, quæ nullā ingenii vi assequemur unquā.

Nesciebam aeris incumbētiā perpetuam, esse ventum, imò aerem incumbere, id est, ponderare, ex mente sua nesciebam, quo quālo principio motus? num aer descendet ultrò? (vide c. 26. §. 3.)

Nesciebam intima tectorū & conclavium, ventum ingredi

gredi nisi illum cujus curam gessisse Claudius dicitur, nesciebam, in cavo tubi locum esse ascendenti aquæ relictum: annon *plenus* erat tubus? an est *pleno plenior* factus? certè myſteria ſunt iſta nobis minimè penetranda.

Legerat Ariſtotelem ita ſua olim edidiſſe, ut tamen edita non forent *inpoſuisti*. Enigma hoc quidem; verum longè eum Hobbius (ut mihi videtur) antecellit, qui ſua ita compoſuit, ut aliis forſan profundiffimam ſcientiam, aliis ſtupendiſſimam certè naturæ ignorantiam tenuiſſe eum ſignificent.

Atque hic quidem opportunum fore, ut in Phyſicam Hobbianam animadverſiones finirem, credebam, ubi ingenii ſui ſpecimen non vulgare exhibuit; ſed nescio quâ vi me cogit, ut admirandam attractionis magneticæ cauſam non penitus tranſiliam: vult enim attractionis cauſam eundem eſſe motum quo pulſa lyra chordâ, moveatur uniſona. (Nempe ex vibrationû coincidentia, propter quâ eandem utraque chorda itque reditque viam) atque hanc quidem hypotheſin me ſtatim vehementer commoviſſe non diffiteor. Unde enim in mentem ipſi veniſſet, diu multumque cogitando, invenire nullo modo potui. Quis unquam chordam vibratam, uniſo nam ſibi attrahentem conſpexerat? quis chordæ tensionem & tremorem in magnete intelligere poteſt? quid aſino cum lyra? quid lyra cum lapide? cogitabam. Atque iſta ſæpius volvendo inſanire potuiſſem, intelligere nunquam potuiſſem, niſi mi ſervâſſet Apollo. Memini me talia legiſſe in codicillis Muſici cujuſdam fanatici Oxoniæ celebris, tibiſque ſatis noti, ejuſdem nempe qui folliſbus, ſive vëto, omnia ſerè naturæ phænomena, qui Luna præſens, ſartagine inter Lunam & oculum interjectâ abſolvit, docuit ille à chordis ad lapides tranſiri

transfiri non incongruè posse. Imò posse chordarum motus Musicos, lapidibus communicari aliunde didiceram. Nam

*Dictus & Amphion Thebane conditor arcis
Saxa movere sono testudinis, & prece blandâ
Ducere quò vellet.*

In istis igitur, uti par erat, acquievi, neque enim expectandum judicabam, ut ipse meliora ferret unquam sententiæ tam admirabilis argumenta. Quin sentio ingratam esse tibi prolixitatem nostram; expectas ut de omni hac parte *naturalis* (sua *Philosophia*) sententiæ am feram? imò tu potiùs ex paucis à nobis animadversis, infinitisque (ne radio forem) omissis de iis iudicato. Ego sic sentio, nihil ejusmodi à quovis sanæ mentis homine excidisse unquam, sanæ (inquam) mentis, quia æquum est ut Lucumonem suprà laudatum excipiam. Qui in una re forsan aut alia rationem exuisse videatur multos invenies, (imò nihil humanius est, quàm ut labamur aliquando & titubemus) verùm eos qui rebus ipsis librisque omnibus eruditorum hominum neglectis, qui ipsa ratione atque humanitate excusâ aut perturbatâ, pro Philosophiâ sobriâ, integrâ, demonstratâ, ægrorum somnia venditaverint, vix paucos invenies. Sed te nimium in istis V. D. detinuimus, ad alia nunc eaque majora progrediamur, methodumque initio propositam tenentes videamus, an

*Servetur ad imum,
Qualis ab incepto processerit, & sibi constet.*

SECT. IV.

CAP. I.

De Sensu & Phantasmate.

INstituēti mihi V.D. ea quæ in Philosophia Hobbiana manent, ad examen revocare, nostramq; qualem qualē de iis sententiam referre, acerbior paulo cogitatio molestiam quandam animique curam ingratam infert. Nempe lusimus hactenus (speramus innocui) in iis versati, quæ etiam si levia non fuerint, imò gravissimorum hominum studiis minimè indigna, ejusmodi fuerunt tamen, ut absque magno vitæ, sive hujus sive secuturæ dispendio, vel nesciri potuerint, vel errorem pati; Neque etenim magni (si vitæ regimen spectetur) interesse existimamus, sive *Sol ipse motu simplici circulari*, sive *diverſi* sola moveatur. Si plena sint omnia, vel *vacua* admittat rerum compages aut *interspersa* (ut loquuntur) aut coacervata; eademque est cæterarum ratio; nempe rem suam peraget natura, nobisque naturæ leges sive nescientibus sive maxima animorum anxietate quærentibus, destinatas olim ab augustissimo conditore periodos atque circulos perennes absolvet; non facient mortalium curæ, ut novâ sive tarditate sive celeritate ferantur, ut novam sive anomaliz sive regularitatis conditionem subeant opera ea, quæ naturalia sunt, ab æterno mundi rectore profecta. Quare rem hactenus ingenii solius atque studii tractavimus, ubi licet unicuique absque magno periculo, suo (quod aiunt) sensu abundare.

Verum eorum quæ discutienda manent longè alia est ratio, ea enim sunt, quæ ad vitam regendam moresq;

resque hominum effingendos ferè sola vim habent, longè etenim diversa rationes ineunda sunt homini sapienti, siquid illius morti supersit, si mentem sortitus fuerit perennem, quàm si ea (dissolutâ hâc machinâ) in auras statim evanescat, si

*Nobis cum semel occidit brevis lux
Nox sit perpetua una dormienda.*

Vel si nox fortasse non perpetua sed longa dormienda sit, illudque subeat mens hominis quod *βελήροεν* minimè deceret.

Alia certè virum sapientem habebit cura, si sint omnia *ἀδιάφορα*, bonum & malum nonnisi ficta sint ab hominibus in Tyrannòrum usum, atque si fuctint ea ab ipsa natura illis indicata, neque ex hominum libidine dependeant. Nempe de finibus sapientum erit disputandum, illudque primò omnium statuendum, an hominis intersit *benè vivere*, an *latere*.

Imò magni ad vitam civilem interest, an sint omnia in imperio, eo modo gerenda, qui civibus libertatem ingenuam relinquat, an fuerint cives ferarum instar ab imperatoribus tractandi. Quin tandem momenti maximi illud est, utrum Religionis omne negotium, sit magistratui civili penitus subiectum, an sit a D. O. M. constitutum, atque *Reges in ipsos imperium sit Jehovah*. Atque hæc quidem ea sunt, de quibus instituenda erit deinceps omnis disputatio.

Quare me sentio perturbatū aliquantulum non aliter ac solent ipsi qui familiarem aliquandiu callem terrentes, in loca tādē aut ignota aut inamœna, vel sentibus obsita incidentes, de via ipsa omnique deinceps cursu instituendo dubitare incipiūt, atque deliberare.

Vidisti quam fuerit hætenus levis & quasi jocularis

laris omnis nostra oratio, quid fuerit genio (ad tristitia & severiora non admodum proclivi) hactenus indultum, at nunc in ista quæ *sacra* sunt ingredienti pertimescere incipio, ne sit inhonesta & indecora, futura omnis hilaritas, ne sit (sale abjecto, atque aceto) ferro deinceps atque igne medicina omnis pro *agrote hoc vetere* instituenda.

Nolli V. D. quæ sit virorum optimorum de Hobbi-
anis sententia, nempe scopum eorum (quæ sequuntur)
unicum esse, ut religionem omnem & pietatem ever-
tat; ut levem corrumpat juventutem, ut *jus* fasque
omne confundat, sacra profanis commisceat; ut finem
hunc *culpam* assequatur, magistratum eum Deum fa-
cere, falsi & veri, sancti & profani, boni malique di-
ctatorem. Quare adversus ipsum non oratione ludicrâ
aut falsâ differendum, sed intonandum esse potius,
eumque cum suis omnibus in immane (unde profecta
sunt) barathrum relegandum.

Facit quidem hæc cogitatio, ut hærerem aliquantu-
lùm, metuens ne amicis atque inimicis pariter displicerem, ne forsan quod his nimium, illis parùm videatur: Et mihi quidem de Hobbio omnique ejus familia, cura omnis jam antehac evanuit: novi satis hominem, ejusque mores, quam sit ipsi solenne voce unâ aut alterâ (ut putâ *stulti, mendacis, scelerati, canis*) omnes adversus ipsum objectiones eluere. Quam sint hæc torpia, virisque Philosophiam profitentibus indecora, nescire nequeunt, & tamen volunt nonnulli, ut eum, *impium, sceleratum, stultum, Arbeam*, ubique appellem, ut furore sacro in sacrum caput insurgam. Cur non iidem monent ut bestia calcitranti velum recalcitrare?

Nempe hoc est, quod jactant magistri hujus discipuli infelices, solere ministros adversus dogmata Hob-
Hob-

Hobbiana ingenti quidem calore è pulpitis tonare, dogmata autem ipsa minimè intelligere, nedùm evertere; faciuntque illi quidem rem suam, quorum est illud curare, nequid detrimenti populus capiat, iisq; nisi malè rem velint administrare, planè analyticè à phænomenis ad causas, à fructibus ad radicem erit procedendum: concluduntque non sine maxima ratione falsam atque impiam esse eam Philosophiam, quæ dogmata pietati omni inimica se demonstrare profitetur.

Verùm nobis alio planè modo agendum est, ibiq; incipiendum, ubi desinunt Theologi; retexenda nimirum sunt dogmata Hobbiana, atque à primis eorum & simplicissimis fundamentis discutienda, philosophicis solummodo, sive naturalibus principiis innitendo; quà quidem in re non tam calori locus est, quàm firmæ stabiliq; rationi.

Atque hic quidem si ridicula sint prorsus portentosa sententiæ fundamenta, atque ipse forsan eum non *stultum*, non *impium*, non *Atheum* vocando, sed hominem levem, jocularē, in sacris ludentē, sibi quē millies contradicentē inveniēdo, pro dignitate suā excusans, nemo virorum optimorum & gravissimorum (ut spero) illud mihi vitio vertet, etiā si forsan à tristiori (ne dicam sævâ) oratione abstinuero. Vidimus certè autores adeò graves, ut non sint ferendi: imò (ut extrema possim præoccupare) in ea planè sententia sum, quòd

—*ridiculum acri*

Fortius & melius magnas plerumq; secat res.

Quare quod initio suscepimus, illud prosequemur, nempe in doctrinæ Hobbianæ de *Homine*, de *Cive*, de

religione fundamenta brevissimè inquirendo; de homine autem ista erunt sermonis capitula, Nempe de

1. *Sensu.*
2. *Imaginatione.*
3. *Discursu.*
4. *Comparatione Hominis & Bruti.*
5. *Anima naturâ & ratione.*

De istis ea quæ occurrunt in libellis ejus, primò proponam, in ea deinde inquiram brevissimè. De sensu autem agit in Corp. Cap. 25. L. Cap. 1. H. Cap. 2.

Incipit nempe Leviathanem à doctrina sensûs, unde omnis de *Homine*, de *Cive*, de *Cive Christiano*, deinceps secutura ejus oratio depender, placetque sibi adeò in iis quæ illic tradit, ut à triumpho in omnes totius orbis Christiani Academias, abstinere non poterit. Hæc (inquit) est nostra de sensu sententia; *Verrum Philosophiæ scholæ*, per omnes totius orbis Christiani Academias, aliam doctrinam docent; dicentes, visionem fieri, quoties res visa speciem undiq; emittit visibilem, cujus receptio in oculo Visio est. Quod etiam de aliis sensibus, imò de ipso intellectu docent &c.

Quis non metuat immanem hanc belluam Academias statim omnes devoraturam? Quam tamen fuerit falsa & temeraria ista assertio meministi tu *Vindicem Academiæ* alicubi ostendisse, nempe receptam fuisse inter nos doctrinam illam, quæ sensûs non solum sed & universæ naturæ phænomena, per motum, reliquaque ea principia quæ sunt intellectui cujusvis obvia, exponit; adeoque frustra eum jactasse se inventorem illius doctrinæ quam diu satis ante operum ejus editionem, noster Digbæus, Cartesius, Gassendus, Gilbertus, & in libello *ayendo to* Warnerus, forsan & alii complures, qui mihi non occurrunt,

runt, tradiderant. Sed nolo tibi (Vir Doctissime) reficere in memoriam, ea quæ passus est hac de causa & reportavit, iste Vindex nempe Thomæ huic nostro manent ea altâ mente reposita. Hinc est quod fremit adhuc furitque.

*Uritur infelix Thomas, totusq; vagatur
Urbe furens; qualis conjectâ cervæ sagittâ.
—illa fugâ, sylvas saltusq; peragrat
Dictæos, hæret lateri lethalis arundo.*

Nullum ex eo tempore libellum edidit, ubi eum (vindicem) stultum, sceleratum, mendacem, aut non appellaverit, aut *Catulo* non comparaverit; nempe faciliora sunt ista, atque ingenio Hobbiano magis accommodata, quàm ut vindicem istum ratione aliqua (cujus neque umbram hætenus adversus eum attulit) refelleret. Sed nolo importunam hæc occasione instituere digressionem; non jam quæritur, an primus ista Hobbius invenerit; verum an rectè ea proposuerit; neque illud agitur, quam citò ista docuerit, sed quàm *benè*. Ubi tamen in ejus sententiam erit paulò accuratius inquirendum.

Nec satis est dixisse, ego mira poemata pango.

Nosti V. D. eos qui nostris temporibus, Philosophiam, ita ut intelligi possit, proponere statuerunt, (nempe Mathematicè) istis versiculis principia sua comprehendete (ante Hobbium) solere. Nempe

*Mens, mensura, quies, motus, positura, figura,
Sunt cum Materia, cunctarum exordia rerum.*

Atq;

Atque ipse quidem cæteris cum ascensum minimè denegat, in eo interim est totus, ut *mentem* eripiat, adeo ut quod de Aristotele absente dicere solebat Plato, illud de omni Philosophia Hobbiana non immeritò dici possit, ὁ νῦν ἐν ἡλθε. Nempe licebit illud semel huic omni de Homine disquisitioni (præsumendo) præfari, totum eum esse, ut *mentem* humanam nihil esse faciat à corpore distinctum, atque hinc esse quod

— versat

Saxum sudans nitendo, neq̃ proficit hilum.

Quæritur hoc loco, quid sit *sensus*, quid item *phantasma*, sive illud τὸ φαντασμα & quomodo nosti illud omnes per *sensus* vocabulum intelligere, nempe perceptionem quandam intus factam, talem de qua consci nos sumus, perceptionem (inquam) cum conscientia, neq; etenim hanc rem melius verbo uno explicare possum. Quæritur quid sit istiusmodi perceptio, & unde, & quomodo fiat. Atque Hobbius quidem locis citatis hæc habet, L. c. 1. *Causa* (inquit) *Sensus* est, quod obiectum (vel mediatè vel immediatè) organum premit, qua quidem pressura, nervis medianibus, aliisq; fibris & membranis, intus ad cerebrum atq; cor continuatum, reactionem quandam efficit, seu cordis conatum ad seipsum liberandum, qui quidem conatus, quia extrorsum fit, videtur esse aliquod extrinsecum, atq; hoc quidem τὸ videri, sive phantasma, illud est quod *Sensum* homines appellant.

Lib. de corp. c. 25. §. 2. *Sensio* (inquit) in sentiente, nihil aliud esse potest, præter motum partium aliquarum, intus in sentiente existentium, quæ partes motæ, organorum quibus sentimus partes sunt.

Articulo eodem. *Sensio* (inquit) est, ab organi sensoris

seris conatu ad extra, qui generatur à conatu ab objecto versus interna, eoque aliquandiu manente, per reactionem factum phantasma.

Hæc quidem ea sunt quæ fecerunt, ut in universi orbis Christiani Academias triumpharet, quam fecerit hoc meritò, brevissimè ostendam.

Tria planè sunt (præter objectum) quæ de sensione quaruntur, organum nempe, subjectum, & modus: nos primùm de ipsa sensione, deinde de objecto sensationis dicemus.

Per Organum intelligunt omnes corporis partem, ubi sensio perficitur, ubi igitur illud ex mente hujus Philosophi? Vis igitur, ut respondeat tibi *Leviathan*, vel ut hoc faciat *corpus*? utrum horum mavis accipe. Dices perinde tibi esse, undecunque sumatur responsum, cum ab eodem utrumque profluxerit parente, *corpus immane* nimirum & *corpusculum*.

At falleris, vir eximie. Nam statuit *Leviathan* phantasma fieri (id est compleri sensationem) in *Corde* conante, ut seipsum liberare possit ab objecti prementis oppressione, adeoque statuendum videtur organum sensationis & phantasmatum unum esse, nempe cor ipsum, cujus reactione fit sensus omnis. At cavendū est, ne quid in hac re temerè pronunciemus; nam libellus de corpore organa plura sensationis ponit, ea (opinor) quæ vulgò sic appellantur, statuitque sensationem in illis fieri: cernis immodicam organorum ejus dissonantiam.

Tu forsan (pro candore tuo) dices hæc convenire posse, fieri scilicet posse, ut tum in corde tum etiam in organis cæteris perficiatur sensus. At inquit *corpusculum* sensationem nihil aliud esse posse præter motum partium *organorum* quibus sentimus. Fieri igitur non potest, ut in reactione cordis consistat sensus. *Cor-*

pus

pus planè rebelle & contumax, quod illud fieri posse negat, quod re ipsa fieri statuit suprema ipsius auctoritas *Leviathanis*.

Multa certè sunt, quæ faciunt adversus utramque hanc sententiam, atque evincunt eum nonnisi pro more suo fecisse, cum absque *cerebro* de communi sensû organo disseruerit. Nihil certè notius est iis, qui corporis fabricam contemplati sunt, quàm convenire propè Glandulam Cartesii Pinealem organorum omnium nervos, quod nusquàm in corde faciunt, quo quidem argumento cor hoc officio privatur.

Imò ex fallacia quadam sensûs, mentisve præjudicio illud sumitur, in *organis* sensationem perfici, quod multis probari facilè posset experimentis. Nôsti præclarum, ex eo ipso cui præes Collegio, virum, cui non ita pridem præ ictu Chirurgi phlebotomiam infelicitè exercentis, brachium ipsum (dolore utriusque nostrûm ingenti) est amputatum, hunc (inquam) nôsti narrare solitum, se, brachio ferè integro privatum, sensisse tamen dolores digitorum singulorum, imò singulorum articularum (tactis nimirum singulorum nervis motivis) quod unum evincit, non esse in manibus, verum in cerebro sensum eum, quem solemus delusi illuc esse judicare.

Num igitur certant se mutuò destruere (batrachomyomachiâ quâdam) sententiæ Hobbianæ, cernis utramq; aliud de facillimè everti posse. Imò ipse utramque evertit §. 4. capitis jam laudati, ubi *organa sentiendi* (ait) & *spiritus esse*, & *membranas à meninge ortas*, imò *ipsum cerebrum & arterias in cerebro*. Ubi mirandum est ipsum, ut Satyram impletet, quatuor etiam humores, imò cibum & potum fumumque Indicum non adjecisse. Sed nolumus morari.

Vehementer, nempe, scire cupio, quodnam sit illud

subj

Subiectum (ultimum) ubi fiat sensio, seu perceptio, e-
 julque *perceptionis modum*. Hunc unum si mihi nodum
 solverit, dicam eum esse hominem egregiè cordatum,
 (qualis fuit *Catus Aelius sextus*) quin igitur attende
 (inquis) profundissimi hujus Philosophi, eximiique
 Academiarum Reformatoris acroamatis.

Sensionis (inquit) *subiectum* illud est, in quo insunt
phantasmata. Miraris (opinor) hominis subtilitatem;
 quin igitur tu quærere (quæso) perge, neq; negligamus
 eam quam nacti nûc sumus discendi opportunitatem.

Ego quidem, nisi illud molestum sit, libenter quære-
 rem, quid illud sit, in quo ultimò insunt *phantasmata*.
Phantasmata (inquit) *insunt in sentiente*. Parum certè
 abest, ut clamem *ὑπνός*. Ecce etenim mysterium paucis
 revelatum, *Subiectum* (inquit) *sensionis est ipsum senti-*
ens, imò *sensio ultimò inest in sentiente*. Quid clarius?
 quid manifestius? quid denique Philosopho hoc no-
 stro dignus dici potest?

Quin dicat (obsecro) quodnam sit illud sentiens, &
 quomodo fiant sensio & *phantasmata*, plausuque de-
 bito statim eum dimittam. Atque de modo quo fit
 sensio, habemus eum abundè satis differentem: nempe
 sensio est mutatio, mutatio est motus in partibus mu-
 tati, brevissimè. *Objectum* premit organi partem extio-
 ram, illa proximam, & ita propagatur pressio, sive mo-
 tus ille per partes organi omnes usq; ad intimam. §. 2.
 Nempe illud planè statuit, ut cernis, *sensionem* nihil es-
 se aliud, præter motum localem partium quarundam
 in corpore, atque ultimum illud sentiens, de quo quæ-
 ritur, esse corpus ipsum, nullo principii alicujus à cor-
 pore diversi, adhibito adminiculo. De hac re postea:
 interea quæramus, quid sit *phantasma*.

Atq; magna certè est illa felicitas, ubi nihil opus est
 nisi quæstiones proponere, quibus paratæ sunt atque
 in

in promptu habitz responsiones.

Annon enim hoc ipsa sensationis definitio habet, ubi *sensio per phantasma* definitur. Sensio igitur omnis cum sit phantasma, ut aliquod saltem phantasma sit sensio est necesse. *Est igitur phantasma, motus partium aliquarum (localis) in sentiente.*

Ecce omnia aperta; at nubem obducunt, ea quæ habet (corp. §. 3. cap. laudati) *Nempe quod phantasma est sentiendi actus, & differt à Sensione, non aliter quàm Fieri differt à Factum esse, quæ differentia in instantaneis nulla est, fit autem phantasma in instanti.*

O cæcas hominum mentes! certè mysterio multiplici hæc mihi aciem obtundunt; & libentissimè, sive à teipso sive à Thoma, discerem, eorum quæ nunc proferam, fallaciam.

Quod fit in instanti, illud motus non est; verùm phantasma fit in instanti, ergo phantasma motus non est.

Subsumo, sed sensio motus est, (*nihilq; aliud esse potest præter motum, supra*) nullum igitur phantasma est sensio, sensio igitur non est phantasma.

Imò verò sentiendi actus, est actus sentiendi, actus sentiendi est sensio, sensio est motus. Est igitur de-nuò phantasma motus ex mente Hobbiana. *Videtur (ut cernis) quod sic.* At verò probatur quod non; nempe *differt phantasma à sensatione, ut Factum esse differt à Fieri.* At verò motus omnis in Fieri consistit, non autem in Factum esse; *phantasma in Factum esse, non autem in Fieri;* phantasma igitur non est motus.

Nos quid ad ista dicemus? vel qua ratione arietationes istas tollemus? nollem certè, ut tantus Philosophus seipsum destrueret, ut idem ipse assereret illud, quod in Fieri consistit, idem esse cum eo quod in Factum

Etum esse; videntur hominis gravitate atque ætate, hæc indigna. Quare (si ferri illud posset) dicerem ego non Hobbium Hobbio, vel Thomam Thomæ, sed Hobbium potius Thomæ contradicere. Sed nugis istis omissis, in rem ipsam sensationis seriò aliquantulum inquiramus.

Nempe illuc nostra omnis tendit oratio, ut videamus, an ulla rationis specie statui possit, ab homine res naturales seriò, & sobria mente considerante, animâ non esse opus ad hominis naturam explicandam, animâ, inquam, à corpore ipso, quæ sit naturæ planè diversæ. Ubi illud non opus est tibi V. D. in mentem revocare, quod si *sensationem* & *to p'videretur*, absque ejusmodi mente vel animâ explicare possemus, non tamen exinde sequi, opera omnia humana eodem modo explicare posse, cum operationes edat innumeras homo (tum cogitando, tum ratiocinando, tum objecta quædam minimè sensibilia percipiendo) quæ sensationis hoc opus longo satis intervallo excedunt; verùm si è contrario contingat, ut neque hoc ipsum *to p'videretur* ex nuda corporis alicujus confirmatione, aut agitatione, aut quâcunque demùm tractatione, intelligi possit, ut oriatur, tunc quidem à fortiori (quod aiunt) secuturum, non humorum, non carnis, non sanguinis, aut nervorum motu vel agitatione solâ, verùm fieri ex diviniore aliquo principio, operationes istas effluere quasi & emanare.

Quare attendamus (obsecro) ad prima atque profundissima hujus hominis principia, unde ea omnia quæ portentosa sunt adeò, in sequentibus derivantur. Incipiamus autem ab *objecto*. Objectum (inquit) movet organum. Benè habet, quid tum postea?

Organum perpetuum propagat motum ad partes internas. Benè hoc etiam; esto ad cor. Cor ipsum quid facit?

Cor

Cor ipsum (motu quodam dilatationis, ut fit in sy-
stole, vel tensione partium naturali, quæ est fibrarum
omnium) repellit nervum, qui motum objecti tulit
ad cor, atque ita fit motuum quædam circulatio. At-
que hoc totum illud est quod usquam est ab Hobbio
positum, ad sensus & rationis phænomena solvenda.

Quærimus nunc, quid est *το αἰσθητὸν*, & cui demum
subjecto (ut loquuntur) formali, illud *τὸ* videri, con-
tingat.

Num sanguini, num carni, num spiritibus, num ve-
nis, arteriis, nervis, num cerebro ipsi, num cordi?
Nempe sunt hæc omnia insensibilis planè natura, sive
ex atomis, ex sententia Hobbiana & nostra, sive ele-
mentis vulgaribus, ex aliorum sententia, constructa,
quæ quidem sive atomi sive elementa nullam omnino
sensationem habent; vel, si habuerint, ostendi nullo mo-
do poterit, quomodo corpuscula fere infinita divisim
sentiuntia, in sentiens unum coalescant.

Imò verò quid est illud *το αἰσθητὸν*? Cernis nihil il-
lum in omni sensationis circulo præter corpus (ex in-
sensibilibus compositum) & motum ad istud admira-
bilissimum phænomenon exhibuisse, nempe moven-
tur nervi, cerebrum, cor ipsum, & si velis organa, imò
& aer inde externus & omnia, verum non jam de
motu ipso, sed de motus perceptione quæritur; atque
ut nos ubique motu sensationem hanc minimè fieri,
concedemus petenti; sic motu locali solò fieri, nullo
modo possumus largiri.

Nempe moventur partes corporis, atque motus
iste *αἰσθητὸν*, cui demum *αἰσθητὸν*? nam relativum est
istud. Si corpori ipsi, motus partibus eo ipso quod
moventur; ergo phantasmata motisq; sui concipiunt
ea omnia quæ moventur.

Imò verò (inquit) phantasmata concipient omnia
quæ

quæ moventur, sed ea quæ *organa* ad hanc rem apta habent duntaxat: verùm enimverò malè eum habere necesse est, quod ab ipso *organi* vocabulo omnino in hoc negotio non abstinuerit; nempe *organum* non nisi *instrumentum* est, & instrumentum est alicujus superioris agentis instrumentum; organa sensûs sunt nervi (& secundum eum spiritus) cerebrum ipsum, & cor; nèpe disertis verbis, hæc omnia (præter oculos, aures, sensuûmq; reliquorû instrumenta) *orgâa* appellat; quæro igitur cujus demùm ea sunt organa? quinam sit ille tandem artifex? cujus ista sunt instrumenta? Dicat mihi demùm cujus tandem (ultimò) reipectu fiant ista *quædam*, nempe & *organum* esse. Num atomus atomi, humor humoris, elementum elementi, vel compages altera alterius, vel pars partis, est organum? num quotiescunque fit motus cum reactione manente fiunt eorundem motuum phantasmata? illudque verum est quod dicere eum sæpius solitum audiui. Animalia esse & Campanas cùm pulsantur, & turbines puerorum cùm rotantur, nempe phantasmata motuum suorum ea tum temporis percipere? ab istis se liberet objectionibus siquidem potuerit. *Siquid habens anima, siquid in arte valens.*

Summa hæc est, ex sententia Hobbiana, iisq; omnibus quæ ab ipso tradita invenimus, *Animal esse debere, & sentire vel phantasma concipere, corpus quodcunq; cum reactione (saltem aliquandiu manente) motum.* Nerviq; in arcu atq; in animali, eundem prorsus usum esse, idem officium. Imò verò quis ista credidisset? quis istam phantasticam non esse Philosophiam affirmet, quæ rebus omnibus phantasmata largitur ut concipiant.

Scio non defuturos ex discipulis ejus nonnullos, qui me sententiâ ipsi alienâ imposuisse atq; effinxisse existimabunt, quare ostendant ipsum ad sensationis expli-

cationem, vel meliora, vel alia tulisse, quæ non sint omnino obscura atque insensata, atque ipse eum pro dignitate suâ eveham. Quòd si hæc ea sunt, (uti sunt reverà) eaque omnia, quæ Philosophus hic novus detexit, eaque quibus omnia quæ de Homine deinceps habet, innituntur; quis non miretur eum & Academias Christiani orbis universi præ seipso omnes despicatui habere, & inter homines qui Philosophiæ nomina dederunt, discipulos eum invenire vel potius admiratores, qui eum in Philosophia, nescio quæ præclara, invenisse crepant. Quin igitur proferant ea in lucem, ostendant quidnam illud sit, quod in ullâ sive Mathematicâ, sive Philosophiæ parte invenerit. Hæc quæ à nobis jam supra sunt prolata, ea ipsa sunt, quorum intuitu in ipso Leviathanis vestibulo, in omnes Christiani orbis Academias (de Paganis reverentius forsan sentiens) triumphandum esse judicavit.

Cernis V. D. frustra nos hætenus sensum in doctrina deensione quasivisse, quod quidem magnopere dolendum est.

Communi sensu planè caret, inquit, eheu!

Nos interim videamus, an *fleBILE principium melior fortuna sequatur.*

CAP. 2.

De Imaginatione, ubi de Memoria & de Somnis.

Quin igitur ad ea quæ de Imaginatione habet accedamus illico, quid sit imaginatio discamus, quid Phantasia, quid Memoria, quid Somnus & Somnia;

nia, quales soleant volitare figura,

Aut qua sopitos deludant somnia sensus.

De his quidem agit in Libelli de Corpore capite supra laudato, in L. Cap. 2. in H. Cap. 3.

Atque utinam hæc ab ipso, absque ferulæ metu, vel virgarum, discere possemus, utinam absque insultu in Scholas atque Academias. Sed ita se rem habere noluit, non patietur pro absoluta potestate Leviathan, ut disciplinam innocuam scientiamque inermem ab ipso accipiamus, fuit ea quidem aliis nonnullis mens, illud iudicium, alliciendos esse auditores, eorumque quasi capita mulcenda, ut Philosophiæ severioris haurire velint latices.

Id quoq, enim non ab nulla ratione videtur;

Nam veluti pueris, absinthia tetra, medentes

Cum dare conantur, prius oras pocula circum

Contingunt mellis dulci flavoq, liquore:

Sic etiam quoniam hæc ratio plerumq, videtur

Tristior esse quibus non est tractata. —

Debuit ipse quidem rationem exponere mollem

Et quasi musco dulci contingere melle.

At noluit tritam istam aliorum Philosophorū semitam ingredi. Non est ille Leviathanis Genius, ut homines alliciat, verum ut cogat prorsus — *fremit aquare*

Insultans. —

(1010

Præbetque ipsi capitulum de Imaginatione (L. 2.) duplicem in Scholas triumphum, quorum alterum capitis ferè initium, alterum finem ornare voluit.

Nempe Schola statuunt gravia descendere ex quietis appetitu, appetitum & boni scientiam rebus inanimatis absurde describentes. L. pag. 4. (Quam fuerit gravis, imò quàm levis, ipsius de gravitate sententia, supra ostendimus)

ostendimus) Scholarum officium illud esse debet, superstitiosum spirituum abolere, timorem, — &c. At ipsa nescientes quid sit imaginatio, quid sensus, quod acceperunt, docent — alii dicentes cogitationes bonas à Deo, malas à Diabolo, aut inspiratas esse aut infusas &c. (p. 7, 8.)
Atque de his postea.

Tu forsan expectabas, ut Leviathan iste ab homine incipiens, desineret in piscem; imò uniformis est planè, à cōtemptu Academiarum incipit & desinit in eundem. Vides statim initio exerentem se Leviathanis istius genium, locumque cernis Apologiae pro scholis paratissimum, apud eos saltem, qui Deum esse statuunt & Diabolum. Sed non patiar, ut me nunc avocet, quippe infinitus essem, si pro datis ubiq; occasionibus eum insequerer, qui tamen pro eâ quâ est indole Academiâs se nusquam laxasse proficitur. Sed ad res ipsas transeamus, atq; ab ipso tandem accipiamus, quod docere tutò possimus, quæ ea sint de quibus initio jam supra loqui proposuimus.

Nempe	}	1. Quid sit Phantasia.	}	& quomodo hæc fiant.
		2. Quid Memoria.		
		3. Quid Somnus.		
		4. Quid Insomnium.		

Quid sit sensus, ex mente illius jam supra quæsisimus, hoc autem explicato, pro more Hobbiano, sperandum est nos posse ab ipso etiam doceri cætera.

Quin igitur attende, obsecro. Quid (putas) est Imaginatio? Imaginatio est vox Latina, quæ quidem non adequatè convenit Phantasia Græcorum, quoniam non omnia phantasmata imagines sunt, eâ tamen jam satis intellectâ, pro phantasia usus est. C. §. 7. Benè habet! dedit tibi quid nominis, ne forsan hæreas in cortice, deditque quandam phantasmatum diversitatem, quadam etenim phantasmata sunt imagines, quadam non

non sunt *imagines*; præclare & distinctè! nunc ut dicere velit, primò *quid sit imago*, deinde quænam ea sunt phantasmata quæ sint, quænam autem ea, quæ non sint, *imagines*.

At nollem te vanâ spe lactari, hoc esset res more Academicorum tractare, cernis intentum eum esse totum, ut superstitionem omnem tollere possit & profligare, frustra igitur ab ipso *imagines* expectandas.

Si vis rem penitiùs (per omnia ejus opera quærendo) considerare, hoc solum ab ipso reportabis, *imaginem esse phantasma*, *phantasma* autem esse *sensationes* (id est motum organi) in factum esse; Quid sit motus in factum esse (qui tamen omnis in fieri consistit) fateor me minimè satis assequi posse, *motum* (opinor) vult stantem & permanentem; sed ad ipsum potiùs attendamus.

Quid sit Imago quærendum relinquit, at dicet nihilominus quid sit Imaginatio, & quomodo à sensu differat. Nempe *motus organi*, præsentè objecto, *Sensio* appellatur, remòto autem sive prætervecto objecto, manente tamen phantasmate, *phantasia*, & Latinis *Imaginatio* appellatur. (Corp. c. 2. 25. §. 7.) Id est prætervectus est motus organi, manente phantasmate, objecto autem prætervecto.

Tu forsan V.D. ad ista subtilia non satis attendens, existimare possis, futilia ea esse & reciprocantia, nempe prætervectus illud esse ubi est phantasma. At cerrè profundiora sunt ista, imò ut semel illud proferam, est ipse reverà *Sphinx philosophicus*. Nempe verba jam proposita hoc sonant, *Imaginatio est motus organi*, absente seu prætervectâ causâ motus istius, manente motu organi, in factum esse, non autem in fieri. Illuc nimirum redit hæc *Imaginationis descriptio*,

cam in principia sua resolvendo.

Imò verò (inquis) aliam planè habet Imaginationis definitionem Sectione eâdem, *Nempe Imagination nihil aliud est reverà quàm (propter objecti remotionem) languescens vel debilitata sensio.*

Cujus definitionis etiam resolutæ hic sensus est, *Imaginatio nihil est aliud reverà quàm languescens vel debilitatus motus organorum; motus languescens motus est, & sensio est motus, ut est in fieri; quare Imagination est Hobbio nihil aliud reverà quàm motus organi in Fieri, non autem in Factum esse.*

Nôsti ridiculam quandam de duobus Collegii cujusdam (semper celeberrimi) scholaribus sive fabulâ sive historiâ; qui olim ad regem *Woodstockii* agentem missi, ut licentiam ab ipso impetrarent, pro portâ quâdam, in muro qui civitatem hanc nostram cingit, faciendâ, de eo coram rege litigârunt, an portam peterent in *Fieri*, an verò potius in *Factum esse*.

Audivimus etiam quendam ex mysticis concionatoribus sermonem suum ita nuper exorsum fuisse; *portas nimirum esse rerum imagines.* Utinam dicere vellet, utrum portam habere cupiat in *Fieri*, an in *Factum esse*? dices in utroque, nempe senex est, solentque ipsi aliquantulum esse avari; neque ego parcus sum admodum, illudque libenter ipsi largiri possem, nisi præclussisset ipse sibi hanc portam. Si dixisset Imaginationem esse motum organorum, tum in *Fieri*, tum in *Factum esse*, de sensu verborum quærere possem, de sententiarum conjunctione queri non possem: verum cum illud asseruerit, Imaginationem *nihil aliud esse reverà quàm motum in Fieri.* Necesse est ut ipse seipsum curet, & sibi ipsi providere velit, mihi etenim ad alia est properandum.

Quarendum est nempe secundo in loco, quid sit
Thomæ

Thomæ nostro *Memoria*, & quomodo contingat, ut *Reminiscamur*.

Neque fieri potest; ut tu paratior ad quærendum accedas, quàm ipse ad respondendum, habe igitur disertè responsum.

Memoria (inquit L. c. 2.) est *sensus languescens*, res ipsa est *Imaginatio*, ipsa autem *elanguescencia* est *memoria*; nempe *Imaginatio* & *Memoria*, sunt res una, nomina diversa.

Lib. de Corp. Cap. citato. *Non differunt* (inquit) *φαντάζεσθαι* & *memoria*, nisi quod meminisse supponit tempus præteritum, *φαντάζεσθαι* non item, ita ut *memoria* sit attrita phantasia, & distinctio sit non rerum sed considerationum.

Libello de Homine antehac edito c. 3. *memoriæ* processum integrum hoc modo describit, *Sensibus* (inquit §§. 6. 7.) *objecta* percipimus, quin & *conceptus* aliquo modo percipimus, & redeunte (post aliquod intervallum) *conceptu*, percipimus redire eum, quod est rem præteritam imaginari, hoc autem *sensui* est impossibile, est igitur *memoria* perceptio aliqua à *sensu* diversa.

Quin lib. de Corp. & de Homine, ait *memoriam* esse notationem *absentiæ partium*, quas expectamus successuras, post totius (*objecti*) *conceptum*.

Ista legenti mihi & cum aliis hujus Autoris conferti, certè subit hominis sive fortunam sive eum impensius admirari, unde nimirum contingat eum nullo in loco, nullâ in sententiâ, absque contradictione sibi ipsi factâ, unquam evadere.

Est (inquit) *memoria sensus* (nempe *languescens*) descriptione primâ, imò verò non est *memoria sensus*, verum consideratio rei præcisè, ut præteritæ, quod *sensui* est impossibile: hoc habet sententia tertia.

Non differunt φαντάζεσθαι & *recordari* inquit sententia

tia secunda; ~~per se~~ est motus organi absente ob-
 jecto motivo; imò meminisse est rem, ut prateritam
 conciperé, quod in phantasia non cadit ex sententiâ
 tertiâ.

Quo teneam, vultus mutantem Protea, nodo?

Memoriâ (inquit) percipimus, nos rem antea perce-
 pisse, (atq; illud meo judicio non malè) at ipsa phan-
 tasia elanguescentia hoc non percipit, neque facit
 ut percipiamus, non est igitur memoria elanguescētia.
 Imò est (inquit) ipsa Imaginationis elanguescentia.
 Cernis V. D. lubrico in loco nos versari in ejus sen-
 tentiam inquirentes, neque tamen opus esse, ut magno
 studio aut labore sententiam ejus evertamus, diruit,
 ædificat, diruitque denuc. Quid faciam, aut quo me
 vertam, planè nescio; si Leviathanem transfodiam
 fugiet ad libellum de Homine, unde nonnullis neg-
 lectis, alia in Leviathanem transcripsit: si homuncu-
 lum illum jugulavero, ad Leviathanem se reci-
 piet.

Fateor equidem, nonnihil esse in quo consentire vi-
 dentur libri ejus omnes de memoria loquentes, at ma-
 lo suo accidit, ut sit illud maximè omnium exceptio-
 ni expositum, ait nimirum *Memoriam esse notationem*
absentie quarundam partium, post totius conceptum ob-
jecti atque instantiam adhibet in civitate vel domo,
 aliquandiu post conspectum ad memoriam revocatâ,
 quasi memoria non esset nisi civitatum aut ejusmodi
 corporum, quorum partes è memoria solent elabi;
 imò verò & nominum, & verborum, & figurarum Ma-
 thematicarum, est memoria frequentissima, in quibus
 non solemus vel imaginationis elanguescentiam, vel
 partium absentiam aliquam notare. Existimare for-
 san (pro Candore tuo V. D.) potes, nonnisi, levem
 esse

esse contradictionem, eorum quæ de memoria ex ipsius operibus jam supra protulimus; ego verò contendō, ejusmodi eam esse ut fundamenta Philosophiæ ejus attingat, eaque quorum maximè gratiā disquisitionem in ipsius Philosophiam institui.

Nempe si sit memoria ejusmodi notatio aut perceptio, quam nullo modo possit sensus assequi, sequetur principium superius atq; divinius ad phænomena hominis explicanda adhibendum esse; illud nimirum quod mentem appellamus: sin verò possit solo organorum motu (nempe carnis corporisq; partium) phænomenon hoc admirandum exponi, si possit partis alicujus corporeæ motus efficere, ut objecti absentia, vel reditio, notari possint, (quod nemo poterit mortalium intelliegere, nemo sanus admittere) quærenda erunt alia argumenta ad principii istius necessitatem astruendam; atque ipse quidem clarissimè cernis, quid in hac quæstione statuendum sit; illud solùm hâc occasione datâ notari vellem, libellum de homine scribentem illum, *mentem* ad machinam *adhibuisse*; Leviathanem autem, ubi in Academiâs atque Scholas invehi ubique placuit, statim amentem (quod tamen molliùs intelligendum esse volo) eum esse factum.

Atque hæc de memoria (quâ quidem eum minimè pollere constat, cum tamen memores esse ejusmodi homines oporteat) dixisse sufficiet, transeo ad ea quæ de Somno habet & somniis, quæ quoniam ejusdem ferè sunt naturæ & farinæ cum iis quæ de memoria habet, breviores & fuimus & futuri sumus.

3. Primum autem de *Somno* ipso agendum, deinde de *somniis*. De somno quomodo fiat, quærit & determinat, Corp. c. laudato §. 7. *Considerandum est* (inquit) *an causa aliqua inveniri possit, quâ suppositâ objectis sensuum externis, ad interiora organi aditus necessariò præcludatur.*

Quin

Quin igitur erige (quæso) teipsum V. D. mentemq; attentam adhibe, nosti etenim solere eum problemas tum solutiones minimè vulgares exhibere. Quare ex istimas præcludi hunc aditum?

Scilicet. *Organum*; diuturna obiectorum actione lassatur.

Nolo de modo importuniùs urgere; organum non nisi corpus est, & quâ ratione corpus lassari (quod sensum indicat) possit, intelligere non possum; reddi quidem potest instrumentum ineptum ad operationes aliquas exequēdas, verùm si fuerit instrumentum, *Architecti* alicujus instrumentum erit, qui quidem hoc loco mens erit. Sed hæc obiter.

Organum lassatur, quid tum postea? tum, inquit, *laxatis nervis ad fontem se recipiunt.*

Id est, nervis laxatis, contrahunt se organa; nempe ubi de somno agitur, non est sensus quærendus, cum noveris somnum esse sensuum omnium ligationem. Solent alii ex nervorum *contractione* organorum contractionem oriri intelligere. Sed nolumus ipsi nimium esse molesti; dicat, otium aliquando nactus, quomodo laxatis nervis fiat hæc *retractio*.

Retrahunt (inquit) se organa ad *Fontem* suum; obiter, quinam est ille *fontis* organorum? ut hoc saltem ab illo discamus; Respondet ille, *vel in cordis, vel in cerebri cavitare ponitur.* Vel in Cordis? vel in Cerebri? hoccine est hominis? hoc Philosophi? hoc Thomæ? quin dicat (obsecro) utrum in Cerebro, an verò in Corde, fons ille situs sit, eamque quæ diu Scholas exercuit quæstionem atque controversiam, semel autoritate suâ tollat. Sed non est, ut vel illud requiramus; in *cavitare* aliqua later, neq; expectandum est ut in cuniculos recipientem sese naturam sectetur. Verùm à diverticulis istis ad phænomeni causam redeamus.

Organa

Organa (inquit) laxatis nervis, ad fontem se recipiunt, & ante objectum fugiunt, unde objectum primò minus agit, deinde solutis paulatim nervis, nihil; quare cessat reactio, id est sensio.

Nempe hic sensus est integer eorum quæ de causis somni habet loco citato, neque aliquid, quod notavi, alibi usquam adjecit, ut eas concinnius & melius explicaret. Num expectas ut in istiusmodi ræzias incurram? ut eum seriò excipiam? imò verò malè illud habet, quòd in fugam vertuntur nervi, quòd eo tempore cum laxantur; verum quæ causa est ut fugiant? *Objecta* sunt iis amica planè, atque magnopere familiaria, mirumque est ea minimè clamare

Quid fugis hinc præcep—

Mene fugis? per ego has lachrymas—

Si benè quid de te merui, fuit aut tibi quicquam

Dulce meum, miserere.

Imò quo fugerent? cum impossibile sit planè, ut motum pulsūque evadant, nempe objecta carnem pulsabunt, quo factò necesse est (ne detur vacuum, quod opinor magis fugiunt) ut proxima pulsentur, donec ad fontem illum ubicunque lateat, perveniantur; cùm autem fons ille perpetuò ebullire debeat, fiet reactio. Certè nisi ridiculum foret adversus umbram hanc luctari, multus quà disputando, quà Philosophiam istam ridendo esse possem, *sed fugit interea, fugit irreparabile tempus*, quare transeamus potius ad insomnia.

Atque hic quidem licet alias phænomenon negligentior ubique fuerit, adeò ut nihil unquam attento & serio mentis opere observasse videatur, videbis eum questionem quandam in Leviathane solventem, deinde

inde (in Corp. 25.) quædam phænomena prius referentem, deinde causas eorum reddentem.

In Leviathanis Cap. 2. ait, *rem esse difficilem à multisq; creditam impossibilem inter Sensum & Somnium discernere*. Nosti à Platonis usque temporibus, imò ante ipsum agitatam fuisse hanc quæstionem, neque opus est, ut causas dubitandi hoc loco referam. Videmus, quibus ipse rationibus sentire se, non autem somniare, velit evincere.

Cum (inquit) illud recolo, *somniantem me, non solere de iisdem constanter personis, objectis, locis, actionibus, cogitare de quibus soleo vigilans*. Cum somnians tam longam coherentium seriem cogitationum non recordari soleam, cum vigilans absurditatem somniorum observare soleam, neq; tamen unquam de vigilantis absurditate cogitationum somniare. Plenè in eo acquiesco, *vigilantem me, scire me non somniare, etiamsi somnians me vigilare cogitem*.

Pulchrè quidem! hæc ea sunt quæ levem juventutem, cui satis est vitrum vel lambere vel admirari, mirificè capiunt. Cum sint ea tamen nonnisi rhetorica & ab *ἀντιστοιχία* philosophiæ quàm maximè aliena.

Quæro, an libellos somnians scripserit, an vigilans? dicet, scire se minimè somniantem ista scripisse; quare applicet (quæso) rationes jam supra allatas. Somnians de aliis personis, actionibus &c. cogitare solebat; quomodo hoc erit manifestum? hoc est quod quæritur, neque sufficit ista simpliciter asserere.

Sed 2. *vigilans solet coherentium cogitationum, longam seriem recordari, quod somnians facere non solet*. Certè hoc usus criterio juraret aliquis, somniantem eum sua scripisse, ubi perturbata omnia atque incoherentia esse, ostendimus & ostendemus; neque hoc jocando dicimus, verùm (ut cernis) philosophica fide asserimus

mus & monstramus. Ut planè mirandum sit, si modo verum fuerit, eum *de vigilantis absurditate cogitationum nunquam somniare*. Vereor ne tibi levior hîc videar, at ejusmodi sunt ejus philosophemata, ut leviter tangenda sint, & leviter tacta in leves statim ventos atque fumos evanescant.

In libello de corpore prius proponit somniorû definitionem. *Sunt (inquit) Somnia dormientiû phantasmata.*

Deinde dicere instituit §.8. Cur sint somnia, 1. Incoherentia atque inordinata. 2. Ficta à phantasmatibus sensationis præteritæ. 3. Orta aliquando ab interruptione corruptorum phantasmatum, quandoq; in medio somno. 4. Vigilantium Imaginationibus fortiora, sensationibus æquè clara. 5. Absq; admiratione facta.

Definitio Somnii nihil habet, quod ejus naturam explicet, similisque est iis ubi qualitas definitur illud esse per quod res qualis appellatur; nolo illam insectari, quod ad Somniorum attinet phænomena.

At 1. respondet, *coherentiam, & ordinem, esse à consilio & respectatione ad finem, (benè & verè!) atq; in Somno amitti cogitationem finis.*

Concedo mihi videri eum causam hujus phænomeni veram tulisse, sed tamen dubia eum, sive mea, sive aliorum qui rerum causas scire desiderant, minimè sustulisse. Libenter scirem, *cur sit in somno sublata respectatio ad finem, cur deficiat consilium; & quid sit illud consilium, unde sit notio finis (rei nempe futuræ & desideratæ) quid sit illud, cogitationes & phantasmata in ordinē redigere, aliena rejicere, cōsentanea eligere locisq; debitis delegare.* Atq; hæc quidem tradidisse debuit horumq; omnium rationem atq; modos explicasse; verùm cum nihil aliud ad omnia phænomena humana at-

attulerit, præter organum motum & tremiscens, ostendere prius debuit, quâ possit ratione organum pulsatum, tremendo, ista perficere:

Prius (inquam) quam istiusmodi causas, phanomenis somniorum solvendis, attulisset. Sed transeo ad secundum.

Secundum, (inquit) ex eo nascitur, quod nova non sunt phantasmata, ideoq; finguntur somnia à præteritis; finguntur, inquit. Verum scire libentissimè vellem, quid sit *Fingens* illud, & quis sit sensus hujus propositionis, quæ mentem ejus hoc loco enunciat, *Somnium est motus in factum esse, fictus à pluribus motibus quorum unusquisq; (multis forsitan annis) antehac fuit in Factum esse.*

Ad tertii partem primam respondet his verbis; *Ad tertium (inquit) quare somnium, aliquando quasi cum sensione continuatum, corruptis fiat phantasmatibus, ut in agrotantibus, ratio manifesta est quod sensio per organa quidem alia manet, per alia deficit.*

Ego ingenuè fateor, me minimè intelligere, vel quæstionis vim vel responsionis, obtundunt me aliquantulum corrupta ista phantasmata, quoniam autem rem se claram fecisse judicat, volui periodum totam exscribere, ne quis fraudatum se esse tam profundâ sententiâ queratur.

At inquit, *difficilius est dictu, quomodo resuscitentur phantasmata in medio scmnno.* Imò ipse ex eorum me esse numero fateor, qui judicant ex suâ ipsius hypothesi non esse hoc difficile dicendum; quippe impossibile. Attende ad Hobbium.

Si (inquit) *ab interno motu Cordis, concutiat (Cerebri) meninx, excitantur phantasmata aliqua, ex iis quorum motus in cerebro adhuc durant, & qui motus cæteris prædominatur, ab eo motu oritur phantasma.* Hic sen-

sensus est eorum quæ habet.

Id est, ex motu cordis excitantur motus in cerebro, qui motus prius ibi fuerunt & manserunt (nempe motus stantes) & qui motus cæteris prædominatur, ab eo motu oritur motus in Factum esse.

Cernis quomodo seipsum hoc etiam loco expedire. Progrediamur ad quartum.

Causa (inquit) *quarti phænomeni in duobus consistit.*
 1. quia cessante sensu, motus à quo phantasma oritur, ut præsens dominatur. 2. Quod phantasmatum partes, tempore detrिता, aliis partibus fictis resarciuntur.

De phantasmatis, vel motûs dominio, quod primam hypothesi partem sustinet, nolo ipse turbas movere, secunda me cruciat & vexat admodum, adeò aut ipse insanit, aut meipsum insanire est necesse. Causa, inquit, cur somnia sensationibus, sint æquè clara, est quod phantasmatum partes, tempore detrिता &c.

Ad carceres redeamus, atque rem ipsam sobriè & gravitate debitâ pensitemus, sententia Hobbiana hæc habet.

Phantasmata partes habere.

Partes istas tempore deteri.

Partes istas resarciri posse,

Resarciri posse aliis partibus fictis.

Id est, sensationem in factum esse, vel motum in factum esse, ista omnia habere. Velim ut explicet quomodo motus in factum esse, aut partes habeat, aut *deterendas, resarciendas, fingendas*, cum sint ea corporum, non motuum aut modorum symptomata; vel si ista omnia possit explicare, quomodo hinc contingat somnia sensationibus æquè clara esse. dixit vel ipse vel aliquis è suis, *Ministros* esse genus sartorum arariorum, iste certè ipsum omnino superat Vulcanum, qui novit phantasmata detrिता tempore, *resarcire*. Fictis partibus

bus, *resarcire*. 5. ad ultimum phænomenon responder, hoc ideo contingere, quia omnia ut præsentia in somno videntur.

Verùm, annon solemus etiam præsentia admirari? imò inquiet, præsentia tunc admiramur, quando cernimus ea præteritis, & prius observatis, non respondere, quod est opus memoriæ, vel absque memoria minimè peragendum. Quare ostendere debuit, unde fiat, ut memoriæ in somno non exerceamus (si modò minimè exerceamus) hoc quia non explicuit, eundemque in reliquis tenorem observavit, nescio quid aliis videatur, mihi certè admirabilis, nullique quotquot antehac fuerunt mortalium (nisi Musico forsan nostro mihi sapiùs laudando) in omni ejus Philosophia conferendus videtur. Annon, quæso, præstitisset de somno & insomniis loqui instituentem ad ea Poëtarum potius quam factorum se recipisse.

*Ad geminas Somni portas, quarum altera fertur
Cornea.—*

Altera candenti perfectæ nitens Elephanto.

Si non prodesse attamen delectare hoc modo potuisset, verbisque sensus aliquis subfuisset. Annon præstitisset, insomnia tum contingere dixisse,

*Cum levis æthereis delapsus Somnus ab astris
Æra dimovit tenebrosam, & dispulit umbras.*

Vel forsan quod sit alicubi,

*Ulmus opaca, ingens, quam sedem Somnia vulgò
Vana tenere ferunt, foliisq, sub omnibus hærent.*

ista quidem vel alia ejusmodi, si protulisset, ferre eum libentissimè possem, non aliter quàm de *Peccati mirabilibus* olim ludentem: verùm ut eorum quæ produximus hoc loco, confidentiâ evectus, Academias & Scholas castigaret, eaque immitiùs tractaret, quis ferat? Sed nos istis hoc modo in lucem productis, in ea quæ de Discursu habet, provehamus orationem.

CAP. 3.

De Discursu.

CERNIS etenim si in periodos operum Hobbianorum inquirerem, & in ea animadverterem, quæ ubiq; se importuniùs offerunt discutienda, nullum futurum dissertationis hujus finem; ipse quidem ad ea quæ ad mores spectant Hobbianos tardissimus atque invitissimus accedo; satis habens ultima Philosophiæ ejus fundamenta intelligere, & aliis intelligenda proponere. Innumera ubique intacta prætereo, quæ inconcinna sunt & falsa, iis præcipuè inhæreo, quæ ad ea quæ majoris sunt momenti viam sternunt, hinc est quod (ad nauseam forsan) toties recurrit mentio motûs in Fieri, & motûs in Factum esse; quia nempe voluit ad omnia Hominis phænomena, ista sola (non aliter quàm antehac solebat in physicâ, fugam vacui, motumque Solis simplicem) adhibere. Certè ex operationum earum, quarum conscii nos sumus, consideratione ad humanæ naturæ cognitionem perveniendum est, aut est ea perpetuùm nescienda; atque si poterit ipse operationes humanas ex organorum motu explicare omnes, ita ut intelligi possit & clarè

Q

percipi

percipi, earundē causæ ab ipso adductæ me certè non habebit refragantem; sin verò hoc loco, qui maximè est momenti, eum, quasi furiatâ mente foret, de rebus iis unde pendet æternitas, ita loquentem inveniamus; non erit absque aliquâ saltem notâ prætereundus. Excitandus erit, ut sive stuporem, sive furorem excutiat; vocandi erunt discipuli ejus vel ad furentis spectaculum, vel ad levamen atque auxilium. cernis me initio (intempestivè forsan) permoveri. Accipe statim rationes.

Solebam me nonnihil oblectare, cogitando, hominem me existentem, in aliquâ præ reliquis corporibus dignitate constitutum fuisse, elementis, metallis, plantis, brutis animalibus, me paulò sublimiorem cogitabam.

Solebat in ærumnis & morbis, illud consolationi mihi esse, habere me saltem *animum*, qui, si forsan sibi ipsi non deesset, ferre hæc meliùs posset præsentia; qui duratione post mortem perenni & æterna me tandem (meliore mei parte non periturum) istis liberaret. Atque ipse nunc quidem eripere mihi vult istam sive dignitatem, sive consolationem, & tu miraris me commoveri? nullam esse hominis, respectu corporum aliorum excellentiam, nullum ipsis *animum* à corpore diversum & immortalem: hæc ea sunt, quæ postea eum astruere patebit.

Et tu forsan V. D. protelandum esse censes animi motum, atq; tum demùm in eum incalescendum esse, cum ad illa accessero; imo verò hoc esset hominis improvidi, & admodum imprudentis, nempe fundamenta sententiarum istarum hoc loco jaciuntur, principia hæc sunt, quibus obstandum illico, ne

—Sero medicina paretur,

Cum mala per longas invaluerint moras.

Quare

Quare obsecro te V. D. ut ad ista velis attendere, quia si *discursus* ipse modum benè & philosophicè (id est, clarè & intelligibiliter) usquam explicaverit, non est ut aliquis de sententiis, sive moralibus, sive politicis, sive ad religionem spectantibus, litem ipsi moveat. Quin igitur attende (inquam) obsecro:

Sensibus hac imis, res est non parva, reponas.

Post ista de Sensu & de Imaginatione transit ad Discursus explicationem: cum autem Discursus duplex possit intelligi, nempe Mentalis & Verbalis pro duplici τῷ λόγῳ acceptione, de discursu mentali eum loquentem audiemus. De hoc agit L.c. 3. H. c. 4. Corp. c. 25. §. 9.

Ut autem quam maximè fieri potest, distinctè agamus, in quaestione hac de Discursus humani explicatione, sint ista inquisitionis futura capitula.

1. Quid sit Discursus in generali.
2. Quotuplex sit, & quid species singulæ.
3. Quæ sint discursus symptomata vel affectiones, & quomodo hæc omnia Thomas explicet. In singulis quid præstiterit, videbimus.

1. Quod ad primum attinet, Discursum (universim sumptum) hoc modo definit. Corp. 25. 9. *Ortus perpetuus phantasmatum, illud est quod appellari solet animi discursus*

L. Cap. 3. Ait *Discursum esse seriem vel consecutionem phantasmatum.* (Nempe eum qui vocatur discursus mentalis.)

Vis uberio rem rei totius explicationem? accipe eam ex Corp. loco citato. *Is (inquit) qui cogitat, comparat transeuntia phantasmata (i. e.) similitudinem & dissimilitudinem animadvertit, quorum illud phantasia, hoc*

verò *Judicii* (*vulgo*) *existimatur*.

Vis integrum *discursus* opus? (L. c. 3. p. 11.) præter *Sensum*, *Imaginationem*, & *Seriem* *Imaginationum*, *mens* *hominis* *nullum* *omnino* *aliud* *motum* *habet*.

Nolo de eo disputare, nempe *discursum* non appellari solere *ortum* *perpetuum* *phantasmatum*, nimirū, si nudum hunc *ortum* spectemus; nosti *discursum* *mentis* solere aliud præter hunc *ortum* includere, nempe *conclusionum* ex præmissis *illationem*, adeoque; tum *objectorum* *apprehensionem* *simplicem* (qui fit *ortu* *phantasmatum* *perpetuo*) tum etiam *judicio* *contradistingui*. Illud solummodò ab ipso requiro, ut seipsum sibi & sensui *hominum* *communi* velit *reconciliare*. Ab ultimis incipiemus.

Mens (inquit) *hominis* *nullum* *omnino* *motum* *aliud* *habet*, præter *Sensum*, *Imaginationem*, & *seriem* *Imaginationum* (qui tamen [obiter] *motus* non est.) Totum igitur quod in *homine* fit, est *motus* *localis* cum *reactione*, *motus* (inquam) *iste* in *Fieri*, idemq; *motus* in *Factum* *esse*, & *motuum* *factorum* *quædam* *relatio* (neque n. aliud aliquid est *series* *ista* seu *consecutio* *phantasmatum*) *benè* *habet*! *fabrè* *factum*. Hæc quidem *omnia* *hactenus* *contingunt*, vel in *arcu* dum *tenditur*, vel in *Citharâ* *imbelli* *quoties* *ipsa* *pulsatur*, fit *motus*, fit *motus* cum *reactione*, fit *ortus* *motuum* *perpetuus*, eorum *motuum* *series* & *consecutio*; dictum est *Paracellum* *jactâsse*, se *potuisse* *homunculum* *facere*; verum hoc *ignis* *vi*, qui quidem *ignis* est *Magister* *artium*; dicitur *Amphionem* *citharâ* *canentem*, *saxa* *movisse*, & *fecisse*, ut ad *civitatem* *ædificandam* *ultrò* *accederent*; mira hæc quidem; verum nemo horum *Thoma* *nostro* *comparandus* est, ipse absq; *igne* *athereâ* *domo* *subducto*, absq; aliquo ἀναλόγῳ τῷ τῶν ἀσφρών

solus hominem finxit; imò fecit, ut ipsa vel Cithara vel Lyra, vel homo sit, vel homine nullo modo quoad supremas ejus operationes inferior.

Sed vereor ne tibi immatura & temerè prolata ista videantur, nempe non sequi eodem jure ex mente Hobbiana ut *Animalia* hæc sint, ut *Intelligentia*; quin igitur rem istam aliquantulum discutiamus.

Cùm corpora sint & ea à nobis in exemplum prolata, & homines, quæro quâ ratione ex principiis Hobbianis dici possit hominem intelligere & judicare motuumque conscium esse, atque ut hæc interim de aliis negentur.

Videamus quid dici possit, videamus quid ipse dixerit. Certè nil aliud dici posse cum ratione aliquâ mihi videtur, quàm corpus hominis *alienum* esse à ratione corporum istorum. Corpus (inquis) alienum est: at quomodo? an non constat vel ex atomis, vel ex elementis vulgaribus? annon insensilia sunt ista, consilio & ratione vacua? an quicquam habent, cujus sunt capacia præter motum, quietem, situm, conjunctionem, disgregationem, aliaque ejusmodi? atque hæc quidem omnia de Cithara vel Arcu non minùs vera sunt.

At, inquires, partes istæ in homine aliter dispositæ sunt, aliter in Cithara; Quin dicat igitur quomodo partium insensilium, minimèque intelligentium situs solus & dispositio faciat ut intelligant. Certè nihil aliud dici posse cum rationis specie videtur, præter hoc unum, corpus hominis intelligere, quia *organicum* est, cætera non intelligere, quia sunt *inorganica*, verùm ad ista quàm est proclivè hæc reponere? Illud *organicum* esse, vel *inorganicum*, duas res posse notare, vel relationem & aptitudinem

tudinem ad motus certos exequendos, ideoque *rem* aliquam supponere cujus respectu organica dicantur, vel statum corporis absolutum, absque relatione ad causam aliquam moventem; & erit sensus vocum (*corpus organicum*) iste, ut significet corpus ita fabricatum, ut est fabricatum corpus humanum. Si velit Hobbius, corpus organicum priore modo explicare, concedenda erit mens à corpore distincta, cui corpus ipsum sit instrumentum. Si secundò modo redibit argumentum de Cithara, dicendumq; erit, quomodo motus harum atomorum sit discursus; istarum autem minimè.

Imò verò quomodo ipse inter intelligens corpus & corpus non intelligens discernit? Nempe praviidet hanc objectionem (de Corp. 25. §. 5.) videamus quomodo istam evadit. Si (inquit) sensus in reactione consistat, unde fit, ut quicquid reagat non tamen sentiat?

Respondet, aliquos Philosophos, viros doctos, omnia sensum habere sensisse, neque refutari eos posse, si sensus in reactione sola consistat. Atque ipse quidem sensum in *reactione* consistere jam tum supra statuerat: videamus quid ultra reactionem hoc loco adjiciat. Nempe inquit, *Sensus de quo loquor (sensus ab homine factus, cum judicio, comparatione, distinctione) non fit, nisi motus in organo aliquandiu maneat, ipsumq; phantasma quandoq; redeat.*

Nempe motus non faciet sensum qualis est hominis, sed motus manens & motus rediens.

Verum, ut dicat, velim, quid sit *motus manens*; quid *motus rediens*. Annon omnis motus transit? annon fieri potest, ut idem præcisè motus maneat, aut redeat? annon ista sunt verba se mutuò destruentia? nempe in fluxu continuo motus ipsa natura & ratio consistit, non manet, non redit.

—at ille

Labitur & labetur in omne volubilis avum.

Imò si aliquo modo, qui ab homine Philosopho ferri possit, ostendere unquam valuerit, quomodo motus idem, cessans aliquando, possit redire, ego illum magnum virum existimabo; si hoc non valuerit, quid dicam, nescio, cum nihil aliud afferat (ut jam postea erit manifestum) ad discursum humanum explicandum. Verbo: quocunque sensu dici possit, motum organi, seu partis corporis humani, sive manere, sive redire, eodem sive manebit sive redibit motus organorum in templo; adeò ut nulla sit in hac re inter hominem & lyram vel citharam diversitas, quanquam & illud inexplicabile videatur quomodo reactio manens vel rediens (quæ non nisi motus est) faciat ut atomi junctæ insensiles intelligant; atque ut motus replicatio phænomenon toto genere diversum exciter, ab eo, quod motu simplici excitatur; quasi mille crines vel cuniculi constituere possent equum, vel mille ejusmodi sententiæ, quæ sensum non habent, constituere possent Philosophiam sanam atque intelligibilem.

Cernis hætenus, non eum posse discrimen aliquod inter hominem aliudque corpus quodcunque, quoad intellectionis opus, constituere, ejusque *discursus* definitionem initio traditam non magis homini, quam ligno vel lapidi, ne dicam brutis animalibus competere; & tamen nondum est ipse mihi dimittendus. Non eum solum absque omni rationis specie hominem deprimere contendo, verum ista nitentem miserrimè se ipsum implicare; quin igitur verba initio prolata, de quo inter oculos revocemus.

Mens (inquit) hominis, nullum habet motum, præter Sensum, Imaginationem, & Seriem Imaginationum.

Nolo ut tibi fraudi sint ista vocabula, *mens hominis*, quasi mentem corporis partem minimè existentem agnosceret. Certè nihil minus eum intelligere postea erit manifestum. Interea hunc esse sensum verborum ipse non diffitebitur, *hominem præter motus istos nihil habere, quod mentis operationem, homines appellare solent.* Quin igitur quid sibi volunt cætera? Quid est (quæso) transeuntia phantasmata comparare, quid similitudinem & dissimilitudinem animadvertere. Quid de iis redeuntibus iudicium ferre? Nempe comparatio, animadversio, iudicium, neque reactio sunt oculi, vel auris, vel digitorum? neque motus hic idem manens sive phantasma, non ortus motuum (localium) organorum; si quis etenim diceret, duo motus excitari & percipi, longè tamen hoc aliud est & diversum à perceptione similitudinis vel dissimilitudinis istorum motuum. Quare sibi ipsi manifestissimè contradicet, dum eodem quasi spiritu, hominem nihil habere præter phantasmatum ortum asserit, & tamen concedit eum etiam phantasmata comparare, discernere, in perceptiones suas reflecti. Sed sentio excrescere orationem; ad secundum articulum progrediamur, qui est de *Discursus speciebus*. Ubi si mentem in auxilium non adhibens minimè vulneratus & saucius evaserit, erit certè admiranda amentis hominis fortuna.

Est (inquit) discursus mentalis duplex. 1. Cum designatâ operâ, & instituto. 2. Absque instituto (aut designatione) L. c. 3.

De priore erit agendum. Ubi tria erunt nobis inquirenda.

I. Quid

1. Quid sit mentis discursus designatione gubernatus, & quinam actus hoc modo gubernentur.

2. Quot modis fiat huiusmodi discursus.

3. Quanam sit huius Philosophi horum omnium phenomenon physica explicatio.

Atque hæc quidem omnia ex cap. 3. L. præcipuè hauriemus, quod est de discursu (mentali.)

1. Quantum ad I. *Mentis* (inquit) *Discursus designatione* (vel *instituto*) *gubernatus*, nihil aliud est nisi *Inquisitio*, vel *facultas inveniendi*, *Latinis solertia & sagacitas*, & est *venatio consequentiarum*; cui subsunt inter alia, *Reminiscentia*, *prudentia* vel *providentia*, *signorum intellectio*, & *conjectatio*.

2. Atq; hæc quidem *venatio* (respectu objecti) duplex est; est etenim 1. vel *venatio causarum ex effectu aliquo*, siue *præsente*, siue *præterito*. 2. Vel est *venatio effectuum ex causa aliqua*, vel *præsente* vel *præterita*.

Hæc scilicet ea sunt, quorum explicationem philosophicam ab ipso Thoma expectamus, iussit enim ut expectemus. Primum autem quæ causa *venationis* istius in genere ab ipso statuatur dicendum; deinde facienda erit hypotheseos istius generalis ad singularia (vel particularia) applicatio.

Fit (inquit) in discursu, designatione gubernato, quædam *venatio*. Primò canem ipsum venemur, quærendo quid sit illud in homine quod seriem imaginationum gubernet; quod discurrat, rerumque affectiones supra nominatas inquirat, & investiget. Attende igitur V. D. obsecro, iterumque attende, mirabilia etenim tibi pollicemur.

Illud (inquit L. c. 3. p. 9.) *quo regulatur series imaginationum*, est *desiderium*. Benè habet, quod rem absque ambage ulla enunciet; quærendum nunc manet

net quid sit *Desiderium*. Verùm non opus est ut illud anxie diuque quæramus, est etenim necessariò (ex mente Hobbii) vel *sensio* vel *phantasma*, vel phantasmatum *series*. Sensio non est, series non est, est igitur phantasma; phantasma? id est, motus organi à sensu one factus vel motus manens (alicubi.) Imò (inquis) *Desiderium* est motus, sed talis quales dici solent animorum motus ab aliis Philosophis, qui quidem locales non sunt, neque absque metaphora hoc nomine solent indigitari, sed tu potiùs cave V. D. ne motum *metaphoricum* existimes, est etenim *ista absurda locutio*, quanquam etenim verba dici possint *metaphorica*; corpora tamen & motus non possunt [L. c. 6. p. 23.] Quare *Desiderium* est motus, motus verè & propriè dictus, *motus localis*.

Annon præclarè futura est venatio, annon celerissima, ubi canis venaticus est motus ipse localis? imò ubi motus motum

*Insequitur, trepidiq; pedem pede fervidus urget,
Inclusum veluti si quando flumine, nactus
Cervum, aut puniceæ septum formidine penna,
Venator, cursu, Canis, & latratibus instat,
Ille autem insidiis, & ripa, territus, alta,
Mille fugit refugitq; viis.*

Quin igitur accede propiùs & venationem hanc intrare, vide Thomam hunc Malmesburiensem, motum cum ipso venatum instituentem, nolo ego à spectaculo te detinere.

*Stat sonipes ac frena ferox spumantia mandit,
Tandem progreditur—*

Desiderium

Desiderium (inquit) est motus validus & permanens. Quod sit motus validus, benè habet, quo fuerit valensior, eò citius proculdubio fugiens phantasma assequetur. At est (inquit) motus permanens. Si fuerit motus permanens, ut possit phantasmata capere (quæ sunt feræ naturæ) ego certè non assequar, atque ipse quidem (ut verū fatear) de venatu hoc omni, ne sit infelix futurus metuere incipio: sunt mihi V. D. quædam negotia, utinam ipse velles Thomam (me prorsus dimisso) comitari. Imò verò (inquis) patientia in venatore non infima laus est, quare quæ sit spes leporis (phantastici) capiendi denuò attendamus: fieri potest, ut non sit desiderium motus permanens, atque ut eripiat^rur metus iste.

Imò fieri potest ut non sit permanens (L. c. 3.) benè habet! Sed ut pro tempore aliquo cesset, tunc autem citò rediturus est; Itane verò? hæccine spes illa est? num expectanda motus cessantis *παλγρεvesία*, ut phantasma quæsitum capiamus. Quin fugiant per me licet ista phantasmata; liceatque mihi me (quæso) huic lusui subducere; nonnisi cibus aridus sunt ista phantasmata, abeant, excedant, evadant, erumpant, me non habebunt insequentem.

Sed cohibendum mihi splenem esse sentio; totusque est hujus rei processus, eo ipso cum sobrietate referendus.

Accipe igitur eum totum. Ex desiderio (inquit L. loco citato) oritur cogitatio mediorum aliquorum, quæ simile aliquid produxisse vidimus, rei illius ad quam scopum dirigimus; atq; ex mediis istius cogitatione oritur cogitatio medii alterius, atq; hoc fit continuò, donec ad principium perveniatur, quod est in nostra potestate. Et quia finis, cogitatio frequenter recurrit, facile reducuntur cogitationes vagæ in viam.

Nullus

Nullus ego dubito nonnullos futuros esse, qui eum rem suam bellè nunc explicasse sint judicaturi, quare ad carceres reducendi sunt, ut statum rei quasitæ intellegant. Ait gubernari designatione cogitationes aliquas: quæritur quid illud sit quod imaginationes gubernet, imaginationes sunt motus, imaginationes gubernare est motus ordinare; ait motum unum alios ordinare, unum ex alio oriri, dissimillimū ex dissimillimo; quinetiam absente objecto, adeoque motore; oriri denuo motum, & reviviscere sepultum, deinde mira perpetrare: si quæras etenim quid illud sit, quod similia à dissimilibus discernit. Est hoc (inquit) desiderium vel motus; quid finis (rei futuræ) notionem habet? hoc (inquit) est, motus: quid media ad finem eligit apta, quid inepta rejicit? omnia hoc facit motus, (nempe opinor Aristotelis ἐντελέχεια quæ est motus intelligens) Scio plures esse futuros, qui minimè sint credituri me eum rectè intellexisse, verum sententiam non suam ipsi affingere, neque enim ipsum tam crassum esse & bardum, ut hæc omnia motui locali assignet, imò illud potius sensisse, peragi quidem ab agente substantiali & permanente mediante motu operationes istas, ita nimirum ut illud quod gubernet sit animus, illud quo fiat gubernatio cogitationum sit motus vel phantasma.

Ast ipse (ne fallantur qui ista obijciunt) animum ejusmodi nullum agnoscit, uti postea erit manifestum, ubi de animi naturâ agetur; neque aliquod aliud gubernans agnoscit præter motum ipsum, non Cor, non Cerebrum, non Carnem, non Ossa, non Arterias, Venas, Nervos, Spiritus; ultimò non *Organum* (quæ tamen est vox ignotæ significationis apud ipsum) phantasma gubernare asserit, sed desiderium ipsum
sum

sum nempe motum localem hæc omnia peragere. Ex motu qui vocatur Finis, oriri motum qui vocatur medium; vel ex motu locali, qui est tendentia ad finem, oriri motum localem, qui est tendentia ad medium; nempe hoc fieri perpetuò, atque ita operationes humanas ex designatione explicari.

Verùm enimverò quis ista patienter vel legere possit, vel audire? quem ad furorem usque iracundum hujusmodi naniæ non facerent? quis mare terris non confunderet, intuens istiusmodi ἀρροῦματα aures sibi ipsis aptas invenire? aiunt etenim nonnulli (quasi profundi foret opus iudicii) philosophiam ejus ab aliquibus qui literas didicerunt Latinas & Græcas, laudari: imò verò in eâ se esse opinione, quod

—dedit hanc contagio labem

Et dabit in plures: sicut grex totus in agris
Unius scabie cadit & porrigine porci,
Uvæq; conspecta livorem ducit ab uva.

Quare omissis istis generalibus ad particularia brevissimè accedamus, & quomodo cum hâc ejus hypothesis seipsum, in iis quæ ex designatione fieri asseruit, expediat, paucissimis videamus.

Dicat, si modo valeat (nil nisi corpus motumque adhibens) quid sit illa ipsa inquisitio, quâ unâ in re Discursum designatione factum consistere initio voluit, quid sit ista solertia, de qua loquitur, quid sagacitas, quid reminiscencia, quid prudentia, conjectatio, & siqua sint similia.

Atque imprimis, ut dicat, velim, unde & quomodo fiat

fiat *inquisitio*, nempe ne multus sim, velim ut ex principiis ejus deducat operationum seriem, ubi ex causa aliqua supposita effectum venamur, vel ex effectu causam.

Principio (inquit) objectum pulsat organum, & fit motus organi: benè habet, progrediatur; remoto objecto motus manet, & est phantasma; nempe pulsatur cerebrum & pulsus hic manet (quanquam mihi molestum est illud admittere, nam corpus motum, aliis motum communicare solet, totoque motu communicato quiescere: nolo tamen huic inhærere.)

Benè! hoc modo concipitur objectum, nempe cerebri motus est ipse conceptus objecti (hæc nempe est ejus sententia) esto! Quid postea?

Postea in animo habemus objecti istius causam, aut effectum investigare. Quæritur unde hæc notio *causa* vel effectus. Quisnam est motus ille, unde istiusmodi notio exoritur, nempe notio causalitatis vel relationis cujuscunque, cum objecta sint *res*, eorumque motus motus absoluti, potest quidem Hobbius existimare ipsam rerum consecutionem vel motuum seriem in homine notionem hanc excitare; at verò *series* nihil est ejusmodi ut phantasma excitet, ejus tamen notionem habemus: quare aut retractanda est ista sententia, quâ dicitur præter Sensationem & Imaginationem (quæ motus sunt locales) nihil habere hominem, aut docendum illud est quomodo ex corporum motibus localibus exoriri possit notio causalitatis & dependentiæ.

Non licet mihi ista uberius prosequi, neque reverà opus est; ad alia transeamus.

Illa ipsa *solertia* vel *sagacitas*, de qua loquitur, quid est? unde exoritur? quomodo se exercet? instantiam ponemus de quâ quæretur. Quæro quâ ratione fieri possit,

possit, ut infans (corpus merum) loqui incipiat, nimirum ut voces rerum esse signa notasque discat. Et ne multus sim; rem videt, vocem audit, motus ex objectis concipit, vel fiunt motus isti in cerebro, unde est quod judicet vocem istam rem significare? quid (quæso) est hoc *judicium*, num motus corporis? at corpus non movetur nisi à moto corpore & contiguo, quodnam igitur corpus motum illum excitat? quod hoc habet, ut judicetur, *sonum* vel *lineas ductas*, vel aliud quodlibet *rem*, vel *corpus*, vel motum, vel animi affectum significare? Nempe (opinor) manifestum est aliud esse hoc *judicium* à motibus in cerebro excitatis, atque sagacitatis istius subjectum neque *motum* ipsum (quod tamen Hobbius sentire videtur) neque carnem esse debere.

Ipsa certè *Reminiscencia* hoc habet, *redire* objectum in *hominis* (neque etenim *mentem* suppono, sed evinco) intuitum & est illud *redire*, neque sensio, neque motus ex sensione manens; dicat unde fiat redictionis istius perceptio, & quis cerebri motus vel cordis, unde exortus *judicium* de reditu exerceat.

Certè infinitus essem, si magis arcana & sublimia mentis opera prosequerer, si opera vel *scientiarum* vel *prudentia humane*. Sed ista cum minimè intelligere videantur ipsi, qui Philosophiam Hobbianam impendio mirantur ut profundam, à re potiùs familiari exemplum petam, & eum dimittam.

Fuit quidem tempus illud quum florens juventû Thomas atque patroni (nobilissimi viri) favore excitatus in animum induxit ipsi ut placeret; ecce *finem* sibi propositum: unde orta est illi finis hujus apprehensio? unde accidit ut finem hunc sibi proponeret? (Contigit (nempe) ut ejus beneficio vitam sibi minimè displicentem traheret; quare ingratus esse noluit. Imò verò

verò pedetentim eundem est, neque statim ad ejusmodi complicatissimas res transeundum; (neque etenim tam rigidus exactor sum, ut *gratitudinis* notionem ex motibus corporum localibus deducere eum & componere cogam) Licuit (inquit) ejus beneficio cibo frui & potu, vestimentis, Musica, forsan & spectaculis; verum ista non nisi motus corporeos in organis excitarent. Unde istud desiderium *velle placere*? de physicâ causâ nunc loquor & Philosophicâ, non de moralibus.

At (inquiet) ex motibus aliquibus enatum esse sibi hoc desiderium, atque hoc desiderio gubernatum, de modis placendi ipsum cogitâsse; tandemque in illud incidisse, quod erat in ejus potestate, ut *de Mirabilibus Pecci* (quod à diaboli posterioribus [parte nempe obscenâ] nomen apud nostrates traxit) poëma scriberet. Verum quis motus, quis pulsus, cibi potui-ve efficere potuit, ut placeret sibi hæc via placendi? ut de re cujus ipsum nomen modestiores nonnulli solent refugere, carmen ipse pangeret, ut in ipso poëmate τὸ εὖ ποιεῖν servaret, ut *vitam* sibi *probam* esse profiteri, cum poeta necesse habeat?

Vereor ne tibi ludicra hæc prorsus videantur, ego verò ea non nisi philosophicè prolata esse profiteor; nempe dicere neque eum, neque quenquam alium ex principiis ejus posse judico, quâ ratione *corpus motum* vel *motus corporis*, vel de *medio* eligendo *judicium* ferat, vel medium electum quod infinitum habet phantasmatum & judiciorum varietatem, (quale est poema aliquod) donec perficiatur, gubernet. Atque hoc quidem de mentis discursu (designatione gubernato ut loquitur) dixisse sufficiat. Neque verò de discursu absque designatione, opus est ut loquamur.

Restat autem ut de quodam discursûs mentalis symptomate,

tomate dicamus, de quo quidem initio constitueram plura proferre; quippe mihi est admodum admirabile: verum quia jam proluxiores fuimus, rem paucis accipe.

Ait (L. c. 3. initio) ut libertatem (opinor) tollat, (quanquam illud absq; judicio) non esse casualem adeo, uti videtur, Imaginationum humanarum seriem; hoc (inquis) cautè admodum, illud *uti videtur* ab omni exceptione eum defendet; at plus infert, atque illud admirabile: sicut enim nullam habemus imaginationem, cujus antea sensationem non habuimus, ita nullam omnino transitionem habemus ab imaginatione ad imaginationem, cujus non antea similem in sensibus habuimus.

Statueram hæc pluribus refellere, sufficit nunc illud notare; Impossibile esse, hoc posito, ut studio atq; meditatione aliquis quicquam de novo discat, ut omnino ratiocinetur, ut Imaginationes ordinet, hæc etenim omnia illud habere debent, etiam ex sententia hujus Autoris, phantasmata aliter disponere quam fuerint à sensu enata, quod fieri nullo modo posset, si phantasmata eundem ordinem necessariò servarent, quem in sensatione, aut potius à sensatione obtinuerunt; verum hanc sententiam ejusque rationem verè Hobbianam in sequenti forsan opportuniùs ad examen redigemus.

CAP. 4.

*De comparatione Hominis & Bruti ex sententiâ
Hobbianâ.*

Cum sit ille mihi, in omni exercitatione hæc, scopus propositus, ut philosophiæ Hobbianæ fundamenta

R

menta

menta excutiam, non verò, ut in omnia quæ ab ipso malè & absurdè dicta fuerint, inuolem; spero te nolle illud requirere, ut Leviathanem integrum ^{exatè notas} insequar, neque mihi vitio versurum, si naturalem Philosophiam minimè prætergressus in hâc exercitationis Sectione de Homine, in ea quæ ab aliis infinitis tradita sunt nullus inquiram: si ea quæ semel alibi attigerim, de novo quoties occurrant, non discutiam: imò si levioribus & particularibus, quæ ad sensum popularem, non autem philosophicum dicta fuerint prorsus omiſſis, in ea quæ sunt majoris momenti, incumbam.

Scilicet facienda mihi visa est hæc excusatio, multa imò plurima eorum quæ in Leviathane Hobbiano occurrunt absurdissima, intacta atque illibata omnino transiture; si tamen facienda foret ulla excusatio, si defensio esset aliqua mihi necessaria, qui ab initio primoque opusculi hujus exordio, quantum in me fuit, providere institui ut nihil aliud sive ipse V. D. sive lectores à meipso expectaretis, præter *Fundamentorum* Hobbianorum considerationem philosophicam; non tu igitur vadimonium me deseruisse existimabis, quòd factâ inquisitione in capitula de *Sensu*, *Imaginatione* & *Discursu*, ea quæ sequuntur ferè omnia quæ ad hominis naturam in Leviathane spectant, & in libellis de Homine continenter præteream; quæ sunt capitula de *Oratione* vel *Sermone*, L. cap. 4. De *Ratione* & *Scientia*, Cap. 5. de *Passionibus animæ*. Cap. 6. De *finibus Discursus*. c. 7. De *virtutibus intellectualibus*. c. 8. Atq; (ut semel illud proferā) omnia quæ in operis Hobbiani tractatu de Homine (quæ prima pars est Leviathanis) sequuntur.

Nempe si fuerint ea absurdissima, quæ de *Sensu*, *Imaginatione*, & *Discursu*, habet (quæ quidem tria, omnia

omnia illa quæ ab homine peraguntur, ambitu suo comprehendunt.) Si nihil habeat homo præter *Sensum, Imaginationem, & seriem Imaginationum* (i. e. Discursum.) uti jam supra dicentem ipsum introduximus; atque fuerint hæc ipsa eo modo ab Hobbio explicata, quo solent (non ii qui Philosophiam profitentur,) verum illi (potius) quos furor aliquis habet, aut fanaticus error, de rerum natura *disserere* (si modò illud sine solacismo dici possit) Illud mihi spero largieris ultrò, præcisam esse prolixioris orationis necessitatem; *Scientiæ omnes & ipsa Ratio, animorum humanorum affectus, virtutes* quas vocant *intellectuales*; omnia quæcunque de homine aut dixit unquam, aut dicere potest præterire, cum ad tria ista capita reducantur; cum sint, vel motus in fieri, vel motus in factum esse, vel series motuum in factum esse; atq; hæc ipsa sunt à nobis exagitata: quid ampliùs (quæso) requiras? non si mille me sententiæ absurditate maximâ turgentibus laceffiverint. Valebunt tamen animum à nugis nunc abhorrentem, ineptiisque crebris fessum & nauseantem, meque ad intermissa studia denuò retrahentem, à proposito atque instituto avocare. Fuit quidem (fatebor enim) tempus illud ubi aliquantulum juvabat Pyrgopolynicem hunc in omnes primum orbis Christiani Academias insultantem audire (*quorum legiones uno disflavit Spiritu,*

quasi ventus folia, aut peniculum rectorum.) Deinde eò adductum spectare vel jurare posset.

—per Dianam & Martem, se nociturum nemini
Si forsan vapulârit.

Juvabat aliquando parturientem hunc montem, deinde murem nascentem contemplari. Occurrere mihi

non sine aliquâ voluptate, rerum vices solebant, ubi magnus ille Academicarum subactor, Scholarum profligator, visus est initio *κατὰ βίβας*, cum postea statim illud secutum est *δέησιν ἃ πρὸν*. Sed, ut verum tibi fatear, sentio omnium rerum satietatem esse, neque voluptati semper fore, si vel Academicarum inimico, ridicula contingent, atque ipse ludibrio perpetuo exponatur.

Vides (opinor) nihil illum ad humanas quasque operationes attulisse, quod cæteris corporibus, sive animatis, sive inanimatis, non conveniat, nempe hoc erit Scholis atque Academiis in solatium, contigisse illud adversario suo, ut in locis iis ipsis ubi importunius in illas invehctus fuerit, seipsum brutis animantibus vel inferiorem redderet, vel æquipararet; dura quidem hæc verba esse iudicas, (vir summâ modestiâ) eaque quæ velitationes Scholasticorum ingenuas minimè deceant; imò forsan existimas me, istas conclusiones ex Hobbio deducentem, vel summâ vi extorsisse, vel sententiam à mente suâ (quâ tu forsan eum minimè carere existimas) alienam, ipsi affinxisse, ut in *μορμολύκειον* à nobis fictum aut excitatum militemus. Quare, hoc ipso fine, Capitula ea quæ de homine restant, instituimus, ut manifestum fiat, ista quæ jam ante deduximus ipsum reverà sentire, nempe *Hominem mentem non habere à corpore diversam, nihilq; esse prorsus in quo humana natura, corporum aliorum naturam excellat*, simulque ut sententiarum istarum turpitudinem, brevissimo aliquo ratiocinio evincam.

Statutum est hoc loco ex Hobbio evincere, non esse naturam humanâ naturâ brutorum aliquo modo sublimiorem statuendam; Verùm è contrario multa habere bruta animantia, quibus hominibus præsent. Quare de iis omnibus brevissimè dicendum est, quibus

bus fieri possit ut (animi ratione) homo iis excellat,
illudque distinctè & methodicè.

Cùm igitur animi humani facultates (de quâ voce no-
lo ut lites mihi moveat, cùm & ipse eâ utatur, & mihi
non sit necessaria, ut aliquid in quo dissentimus, adver-
sus eam stabiliam) cùm, inquam, animi facultates sint

Apprehensivæ.

Sensitivæ.

Externæ.

(Vis. Aud. Gust. Od. Tact.)

Internæ.

Phantasia.

Memoria.

Intellectivæ, ubi

Vel

Ingenium.

Curiositas.

Iudicium.

Discursus.

Ratio.

Horum expressio.

Intellectio vocum.

Loquela.

Appetitivæ.

Inferiores.

Concupiscibilis.

Iracibilis.

Superior, Voluntas; ubi

Deliberatio.

Libertas.

Virtutes.

Atque hæc omnia cùm soleant alii (qui nihil conce-
dere volunt, nisi quod ratio suadeat) brutis eripere;
ea interim omnia, humanis aut æqualia largitur
Thomas, aut superiora.

Nosti V. D. inter celeberrimos nostræ ætatis Philosophos disputari, an sensus ipse, qualis est ille de quo nunc loquimur; *nempe cum conscientia*, sit brutis concedendus, neque ipse Thomam, alicujus (etiam optimè differentis) aut rationibus obruam, aut auctoritate; non ille solet aut aliena expendere aut sua non dictorum rationes afferre; satis habet sua (pro imperio) effundere, de eo minimè sollicitus, an vera, an consentanea fuerint, an falsa & se mutuò destruentia, illudque eorum nomine suscipere, *omnia esse legitime demonstrata*. Quòd si hoc unum aliquo ratiocinio legitimo, ex principiis ejus illud deducendo ostenderit vel rerum, vel operationum suarum conscientiam bruta habere, nempe Actum quem vocant Scholastici (ipso certè longè magis intelligibiles) *Reflexivum*, ego omnia alia, quæ infinita sunt, sphalmata ipsi condonabo.

Ne existimes hoc loco V. D. me sensum omnem brutis animantibus denegare, verùm talem qualis in hominibus exercetur (quem judicium, ratio, conscientia comitantur) nullo modo iis (ab homine Philosopho, demonstrationes sententiarum præ se ferente) concedendum esse arbitror, non me cogit hic locus, ut de Sensu humani atque belluini differentiis agam; sufficit animi sententiam brevissimè adumbrare. Manifestum est, esse in hominibus diversis, magnum sensum seu potius sensationum discrimen, etiamsi non fuerint organa diverso modo à naturâ fabricatâ & institutâ; quod quidem ex judicio, organorum motum vel consequente vel comitante, contingit; judicium interim vel exercitatione vel arte, vel ex causâ forsan aliâ, judicium excellit. Quàm multa vident, e. g. pictores in umbris & in eminentia quæ nos non videmus? quàm multa quæ nos fugiunt in cantu, exaudiunt

audiant in eo genere exercitati? qui primo in statu tibicinis in Antiopam esse aiunt vel Andromachen, cum nos id ne suspicemur quidem. Est in his quædam intelligentia, quâ alii alios superant, quod igitur in gradibus (ut loquantur) hic contingit, Idem in toto genere intelligendum esse volo, si de sensu Hominis & brutorum loqui instituamus. Et tu quidem sensum brutis concedendum existimas, nempe sensum Hobbianum, id est, motum ab objectis, sed sublimiorem illum qui cum iudicio & cognitione est, auferendum, neque enim

*Esse illis partem divinæ mentis & haustus
Æthereos.*

At alia est Thomæ sententia quam referre nunc juvat; sensus habent externos, internos. *Sensio & memoria, etsi cognitiones sint, communes homini sunt cum omnibus animalibus.* Corp. c. 1. §. 2. Eodem modo sensum habent, eodem modo memoriam, atque Imaginationem (est enim memoria nihil aliud nisi imaginatio) quo homines &c.

Hoc quidem generaliter enunciatum esse cernis; at forsan ab ipso vel temerè elapsum, vel alibi melius explicatum existimas; dic igitur quid illud sit in quo hominem istis animalibus excellere iudicas. Dices *ingenium naturale.*

Quin igitur attende ad initium Cap. 8. Leviathanis, quod est de virtutibus intellectualibus, illic invenies *ingenium hoc naturale hominis à bruti ingenio tantillò differre, ut planè nullius sit momenti ista differentia, ut inter virtutes intellectuales non sit numeranda.*

Atque hæc quidem hætenus ingenium Hobbianum

aliquantulum olere cernis; attamen existimas aliquid esse saltem, etiam ex ejus sententia, quo animal hoc (providum, sagax, multiplex, acutum, memor, plenum rationis & consilii) quod appellamus hominem, cætera vincat: nempe tres sunt vulgò dicti mentis humanæ actus (præter ingenium, quod facultatem potius vel vim nativam indicat) objectorum apprehensio; mentis judicia seu sententiæ, & discursus. De ingenio & apprehensione dictum est; vis animi Hobbi-ani de judicio sententiam?

Verum est (inquit) animalia quædam (veluti apes & formicæ) in Societate vivere, & tamen nullam directionem habere, præter judicia eorum particularia, & appetitus. L. cap. 17. p. 86. Ecce hæc ipsa non tam animalia quàm animalcula judicio pollent, & civitates non fictas atq; metaphoricæ, sed genuinas instituunt, Apes nimirum.

*—ipsæ Regem parvosq; Quirites
Sufficiunt, aulasq; & Cereæ regna refingunt.*

At nondum (inquis) ad summum actionum humanarum apicem pervenimus; fieri potest ut sensum aliquem habeant, ut judicio aliquantillo valeant, neque tamen discurrant; atque ita hoc saltem servatum esse homini à natura privilegium.

Imò cavendum est illud, ne tibi placeas, quasi hoc modo bruta superares.

Nempe ortus perpetuus tum sentientibus, tum cogitantibus, phantasmatum, id ipsum est quod appellari solet animi discursus, & communis est hominibus cum brutis. Corp. c. 25. p. 229. Quare dejectum de ponte iterum cernis hominem, à Depontano hoc sene, nonnisi eodem modo cum brutis animantibus discurrente,

Attas

Attamen (inquis) fieri non potest, ut nullâ in re superemus, imò verò concedet ipse Thomas, ut in aliquibus prætemus; est quædam innata homini *Curiositas*, sive desiderium sciendi, atque hæc quidem (inquis) est homini propria, etiam ex sententia hujus Philosophi. L. c. 6. p. 26. disertè illud affirmat, *Curiositatem, nulli viventi præter hominem competere*: Certè gaudendum est aliquid inventum esse, nobisque magni æstimanda est ista saltem *Curiositas*, quin igitur in ejus naturam & definitionem aliquantulum inquiremus, ut gemmam hanc pro dignitate æstimare valeamus. Nempe *Curiositas est, quâ fit ut effectû aliquo conspecto, in causam inquiremus, vel causâ propositâ, queramus effectum*. Hæc quidem integram Curiositatis naturam complectuntur. Benè habet quod propriam habemus vel hanc Curiositatem.

At non est huic homini nimiùm credendum, nempe effectû proposito causas querere, est Homini cum Bestia commune. L. cap. 3. pag. 9. Quare semissem saltem *Curiositatis* hujus subductum esse cernis, ejusque non esse hominem, ex asse hæredem. Imò verò nil desperandum esse dices, satis enim amplum homini relictum adhuc à natura patrimonium, nempe *Rationem ipsam* quæ præstat omnibus; omnia etenim quæ rationem habent, præstant iis quæ sunt rationis expertia: Est enim Ratio quasi quædam lux lumenque vitæ, domina rerum omnium & Regina; (hæc & hujusmodi innumera rationis encomia apud Ciceronem & Oratores alios, quâ Græcos, quâ Latinos occurrunt) atque ipse Hobbius hanc nobis reliquit intactam (neque sibi ipsi servando, neque brutis animantibus eam communicando) quare non esse ullo modo querendum. Nempe hoc ipsum apertis verbis profi-

proficitur L. c. 6. p. 26. loco suprà laudato, non solum Curiositatem, sed & Rationem homini peculiarem esse, nulliusq; viventis præter hominem solum, communem. Quin igitur vicimus, clamare licet, Victorial! Neque est ut nos terreant cætera animalia, ut metuemus Leones vel Leviathanes.

Attamen moderatio animi nos potiùs decebit, nec erit illico clamandum, Io triumphel Videamus quid nacti sumus, quid sit hæc Ratio, & quanti sit ea ipsa etiam æstimanda. Tu forsan existimas munere ingenti donâsse nos naturam, cum fuerit Rationem nobis largita, illamque brutis denegaverit.

At falleris, neque enim *rationem* nobis *Natura* tribuit, non est ea Naturalis, sed Acquisita prorsus. Eam non ex natura hausimus ipsâque formatione, sed penitus didicimus.

Nempe non est Ratio nobiscum nata (veluti Sensus & Memoria) neq; experienciâ solâ acquisita, verum industriâ. L. c. 5. p. 21. Imò pueri eam non habent, non sunt (inquit) omnino ratione imbuti, priusquam sermonis usum assecuti fuerint. Quare non est, ut naturæ munus hoc acceptum referamus, neque est in quo naturaliter cætera animantia superemus.

Veruntamen cum velit nos ratione (utcumque acquisitâ) ea vincere, videamus quid ipsi sit ratio & an non illud quod hoc loco largitus sit, alicubi uti solet, detraxerit. Est illi certè Ratio sermonis usus, vel loquela, nihilque habet (ex mente illius) præter vocum usum & verborum. Videamus annon & ipsa animalia bruta vocis eundem cum hominibus usum habeant. An illud pro rato habet Malmesburienfis & fixo, loquelam esse hominibus peculiarem? Imò si Leviathanem evolvas, inuenies eum hoc loco pendulum aliquantulum & dubium, in negotio hoc rationis & intelles

tellectus: hoc certè disertè affirmat, rationem & intellectionem nonnisi verborum esse L. c. 4. p. 17. *Quare (inquit) si loquela sit homini peculiaris, (uti est quantum ego scio) tum est etiam intellectio homini peculiaris. Habet igitur, quantum ipse novit, aliquam saltem, præ brutis animantibus, dignitatem homo, & præcellentiam.*

Habet, inquis! at quid si bruta etiam vocis eundem habeant usum cum hominibus? atque ipse sibi hoc in loco contradicat, ne forsan ipsis sit iniquior. Ille certè mihi videtur verborum usus & vocis humanæ, ut affectus animi possit exprimere, hunc usum bruta habent, scilicet *vocis usum habent, quâ faciunt ut desideria, atq; affectus eorum invicem innotescant.* L. c. 17. p. 87.

At (inquier) licet suam ista loquelam intelligant, cum tamen hominum voces minimè capiant, erunt ista animalia hominibus eo ipso deteriora. Quanquam non satis intelligam cur illa loquelam nostram minimè intelligentia sint nobis ideò inferiora, magis quàm illis nos sumus inferiores, sermonis eorum ignari, (nemo enim mihi, præter unum forsan Pythagoram aut Apollonium Tyanæum occurrit, qui voces brutorum intellexisse fertur) non est tamen ut hoc argumento succumbant ea hominibus. Ecce enim! *Imaginatio ista quæ in hominibus excitatur, vel verbis, vel signis aliis sensibilibus (ex instituto) ista est quæ generaliter vocatur Intellectio, & communis est homini cum bruto.* L. c. 2. p. 8. Cum igitur bruta, & sua intelligant & nostra, nos nostra vix intelligentes, loquelæ interim brutorum rudes omnino sumus. — Vides quid sequatur, nempe præcellere hæc ratione bruta animantia, Hobbioque ipsi sive philosophanti, sive de mirabilibus Pecci carmina mirabiliter fundenti, præstare posse

*Corvus poëtas & poëtrias picas;
Quas nempe docuit verba nostra conari
Magister artis ingeniq; largitor
Venter. —*

Hucusque in parte hominis Apprehensiva versati sumus, ubi vides bruta hominibus aut nullo modo cedere, aut eos planè superare ex hujus philosophi sententiâ. Restat, ut de parte etiam (ut loquuntur) Appetitivâ, dicamus; ubi non est ut de Appetitu sensitivo, ejusque parte sive Irascibili, sive Concupiscibili, verba faciamus, quia res est manifestior, quàm ut verbis indigeat.

Verùm est in homine appetitus non solum Sensitivus, sed & Rationalis, atque uti objecta quædam apprehendendo percipit homo, quæ nulla Imaginationis (proprie dictæ) vi percipit (uti antehac innuimus, & postea ostensuri sumus) ita in bona etiam nonnulla fertur, malaq; quædam aversatur, quæ non sunt sensuum objecta, sed sublimioris alicujus facultatis, istius nimirum quæ solet in homine Voluntas appellari; atque istam fortasse existimas homini servatam veluti propriam illius & peculiarem.

At neque voluntatem homini soli reliquit Thomas, imò inquit, *Bruta voluntatem habent. L. c. 6. p. 28.*

Judicas aliquam forsan fallaciam verbis subesse, nempe lato quodam (ut aiunt) verborum sensu, illud dici posse, atq; ita Philosophum hunc intelligendum: verùm Voluntatem proprie dictam, eam nimirum quæ consilium præsupponit & *deliberationem* in agendo, in brutis illum non agnoscere. At falleris V.D. nam *deliberationem* iis prius attribuit, deinde consequenter istam, de qua locuti sumus, Voluntatem.

Alternâ (inquit) successio Appetitus & fuga, spei &

& timoris, in ceteris creaturis viventibus, non minus est quàm in homine: quare bestia etiam deliberant. L. 6. p. 28. Atque ex hoc præsupposito fundamento, fuit illud ut præterea, habere ea voluntatem, nempe Bestia cùm deliberationem habeant, necessario habent voluntatem. ibid.

At (inquies) si voluntatem habeant & deliberationem, unde profluant actiones brutorum, erunt ipsa etiam actionum suarum domini, erunt fato erepta & libera eodem modo quo homines.

Benè habet quod eodem modo quò homines dixisti; si etenim bruta libertatem habitura solummodò dixisses, non ferrent istud principia Hobbiana; postquam autem eadem hominibus & brutis contingere asserueris, habebis eum suaviter consentientem.

Nimirum non illud agit Thomas Hobbius, ut bruta extollat, ut quid divinum istis attribuat, ut in classem humanam promoveat; verùm ut in gregem potius ceterorum animantium homines deprimat; eandem igitur utrisque tum brutis tum etiam hominibus concedit libertatem, (imò eandem rebus inanimatis tribuere necesse habet, id est, nullam) varietatis actionum causas easdem existimat in utrisque

*Haud equidem credit quòd sit divinius illis
Ingenium, aut rerum fato prudentia major:
Verùm ubi tempestas, & cali mobilis humor
Mutavere vias, & Juppiter humidus anstris
Denset, erant quæ rara modo, & quæ densa relaxat;
Vertuntur species animorum, & pectora motus
Nunc alios, alios dum nubila ventus agebat,
Concipiunt.—*

Neque enim id quod intus in homine fit, dum vult aliquid, dissimile est ei quod fit in aliis animalibus, dum habitâ

habita prius deliberatione appetunt, neq. libertas volendi vel nolendi, major est in homine, quàm in aliis animalibus. Corp. c. 25. p. 235.

Miraris proculdubio nova hæc audiens, atque ad objectiones te forsan accingis: si ejusdem planè nobiscum gregis fuerint ista animantia, miraris cur fœdera cum illis non ineamus, cur virtutes (morales) in istis non perspiciamus; quin accipe harum rerum rationes, nempe prius illud causam habet manifestam, posterius non est tibi concedendum.

Impossibile inquit est (L. c. 14. p. 68.) *ut fœdera cum brutis faciamus, quia sermonem nostrum non intelligunt &c.* atque ipse quidem Hobbium minimè intelligo (dixit non ita pridem bruta nos intelligere) ve-reor ne mihi sit præcisa spes omnis fœderis cum ipso ineundi.

At ais virtutes ea non habere morales, vellem ut istud non ita confidenter objecisses, probabo etenim ex Hobbio nullâ virtute, imò nullo omnino numine carere bestias. Primum de virtutibus, nosti constitui illud à plurimis solere, veluti ratum aliquid, & planè definitum; non solere virtutes morales solas vagari, verùm (cùm in medio, unaquæque earum consistat) circulum quendam vel corollam complere, pulchrè variegatam, nempe (quod dici solet) nosti catenâ quâdam omnes vinciri, (verbo concatenari.)

Quinetiam illud non ignorans, catenæ hujus vinculum, illud esse quod *prudentiam* appellamus, medi-umque illud ipsum virtutum à prudentia decerni (ita nimirum se habere *ὡς περ ἀνὸ ἐρόνιμ. & δεινότης*) unde illud certè sequelâ minimè dubiâ deducetur, neque virtutes absque *prudentiâ*, neque prudentiam absque virtutibus extare, imò verò (ne multis te detineam,) nihil vulgatus isto

Nullum

Nullum numen abest si sit Prudentia.—

Quare si prudentiâ non caruerint ista animantia, peracta res erit, mihiq; non temerè concludendum;
ὅπερ ἔστι.

Attende igitur ad Hobbium L. c. 3. pp. 10, 11. Certè (inquit) *Prudentia non est, quæ hominem à bestia distinguit, sunt enim bestia quadam annotina, quæ plus observant, eaq; quæ bona sibi fuerint, prudentiùs insequuntur, quàm pueri decennes. Adicere potuit, quàm senes cùm repuerascunt. Quare conclamatum esse cernis de omni humana dignitate; nihil est in quo brutis excellimus animantibus, cùm tamen innumera sint in quibus ipsis inferiores sumus, sive sensuum acumen, sive corporis agilitatem spectemus, atque robur, sive etiam longævitatem;*

*Φύσις χάριτα τὰν ἄνθρωπος,
 Ὅπλα δ' ἔδωκεν ἱπποῖς,
 Τοῖς ἰχθύσι τὸ πνεῦμα,
 Τοῖς ὀφθαλμοῖς πῖτα δαί &c. Anacr.*

Non tu expectas (puto) ut ex Rhetoribus, Poëtis, Philosophis eorum excellentiam evincam. *Nempe animus meminisse horret.*— Satis est ea nos vincere, neque expectandum est ut vincentibus acclamemus, satis est viribus corporis ejusque pernicitate, nos ab illis superari; interea tamen

*Quid juvat in semet sua per convivia ferri
 Et fraudare bonis, quæ nec Deus invidet ipse?*

Certè cæcum eum & invidum esse oportere credas;
 qui

qui illud nobis saltem non concedat, in vita civili nos illis multis parafangis prastare. Et tamen ipse (L. c. 17. pp. 86, 87.) sex argumentis probare nititur, hæc etiam in re nos superari. Nempe *quod ambitione careant; quod bonum eorum privatum à publico non differat. Quòd malam administrationem se cernere non arbitrentur. Quòd colores boni & mali quibus se mutuo fallant, non meditentur. Quòd inter damnum & injuriam minimè discernant. Tandem, quòd inter ipsa consensus sit naturalis non artificialis ex pactis exorients. Quibus & illud adjicere licet (L. c. 12. p. 52.) carere illa religionis anxietate, quæ quidem secundum principia Hobbiana nullius est usus, nisi homines cruciet, eosque inutilibus ærumnis implicet, vitæque humanæ miseras ministret.*

Nunc autem quid à me expectas (vir ornatissime) num ut adversus profana ista prolatis seriò argumentis differerem, adeoque me sanæ mentis hominibus deridendum propinarem, vel potiùs ut eum impium, sceleratum, brutum appellarem? vidi certè intra tri-duum literas ab eruditissimo quodam viro & de Mathematicis disciplinis optimè merito, (Christiano Hugenio) quibus mirari se professus est, voluisse collegam meum doctissimum, Geometriam Hobbianam (utpote ab ingenio minimè defæcato profectam) Elencho serio atque erudito castigare; quid (quæso) censeret quicquid est uspiam eruditorum hominum, si me discursu sobrio nitentem cernerent, ut ex brutorum familia meipsam eriperem, iisque me aliquo modo præstantiorem evincerem? vides certè profana ista nullâ ratione à brutefcente hoc homine stabiliri; eodem planè jure, quo ista divinæ mentis privilegia brutis concessit, potuit Divinitatem istis ascribere, ritusque paganorum laudando evehere, illudque Trismegisti

gisti (sive γνῶσις sive ficti) comprobare; *Audi, ô Asclepi, rem magnam; posse nempe homines* (per divinæ mentis ἐπιστημῆς quas ipsis arte quâdam pro arbitrio obtinere licet) *Deos facere.*

Atque hæc quidem omnia, aliaque ejusmodi infinita, cum gratis ab ipso dicta fuerint, adeoque eadem facilitate rejici possint, quâ afferuntur, nolo in istis refutandis moram trahere; verum cum unum ex iis fuerit quod se demonstrasse judicat, de eo (tribus, quod aiunt, verbis) dicetur; hoc autem illud est. *Nul- lam habere hominem agendi vel non agendi libertatem. Libertas* (inquit) *talis ut à necessitate libera sit, neq; hominum, neq; brutorum voluntati convenit.* Corp. c. 25. p. 235.

Castigavit eum hoc nomine Cl. Moranus (in Anis madversionibus) indeque profluentia incommoda ostendit; nolo actum agere, nolo rem ipsam libertatis humanæ tractare; servavimus initio argumentum hoc integrum Rdo: Bramhallo: Experiemur quâ specie rationis libertatem hanc Thomas sustulerit.

In Appetente (inquit) *appetendi causa præcesserat inter- gra, & proinde ipsa Appetitio* (ut Cap. 9. Art. 9. esten- sum est) *non sequi non poterat, id est, secuta est necessariò.*

Argumentum (ut ipse non diffitebitur) de omni causâ cujuscunque actione, eodem modo concluder, neque de bruto & homine magis, quàm de Deo ipso erit intelligendum; eritque hoc modo sublatum omne motus initium, atque illud astruendum ex hoc princi- pio, Non esse primum Motorem. Cum igitur ex aliqui- bus ipsius principiis, primum Motorem agnoscendum esse (in quæstione de mundi origine) antehac evices- rim, eumque αὐτοκίνητον, manifestum est eum hoc lo- co sibi ipsi contradicere.

Imò verò cum Sect. 2. Cap. 3. Exercitationis

hujus, (ubi in doctrinam Hobbianam de Causa & Causato, & de Potentia & Actu inquisivimus) illud ostenderim, nullam eum necessitatem in rebus evicisse præter hypotheticam (illam quam solent libertatis assertores ultrò concedere) ibique eam quam vocat hujus rei ostensionem vel demonstrationem everterim, non opus est ut multis illum hoc loco refutare contendam.

Summa est; aut Deus est $\alpha\upsilon\tau\alpha\rho\iota\tau\eta\varsigma$, aut non est ipse mundi causa, & primus motor, verum motorem seipso priorem habuit: at mundi causa est (aliquando ipsi Hobbio) primusque motor; $\alpha\upsilon\tau\alpha\rho\iota\tau\eta\varsigma$ est igitur. Quare eversum est argumentum, quo omnia esse necessaria concludit, eruntque alia ipsi argumenta ad Fatum astruendum quærenda.

Deinde & illud recolendum est, ipsius causæ integræ definitionem quam habet Cap. 9. (ab ipso jam laudato) illud supponere; eodem instanti quo *causa est integra*, *effectum* poni, ideoque nihil aliud esse conclusum ab eo, præter hoc unum, *eo instanti quo res esse supponitur, necessario eam esse*, quod nihil aliud sonat quàm illud metaphysicorū axioma, *impossibile est, idem simul esse, & non esse*; verum ut isto ratiocinio tollatur libertas, sive à prima causa sive à secunda aliqua, quæ condita sit ad primæ illius imaginem, nemo sanus (opinor) judicabit.

Imò si sit ex principiis Hobbianis accuratè loquendum, non erit dicendum, effectum ex causa integra omnino *sequi*, cum illam ubique *comitetur*.

Nolo dissimulare præter hæc tradita, esse alium in Leviathane locum, ubi hoc ipsum videtur sibi velle, ut tollat libertatem, neque enim finem alium habere ista posse judico: locus est L. c. 3. p. 8. in capituli superioris parte extremâ à nobis indicatus.

Ubi ait *Imaginationum seriem non prorsus esse ita casu factam, uti nobis videtur.* Atque pro argumento vel lemmate illud demonstrandum suscipit, non transire nos ab imaginatione aliqua ad imaginationem, nisi similem prius in sensu transiitionem fecerimus.

Verum dum tu responsionem ad ista expectas, fateor me stupore quodam (neque etenim sufficit admiratio) detineri; miror hominis levitatem & inconstantiam, miror turbidum ipsius & faculentum ingenium, miror gentis nostræ contemptum, cui quidem non erubuit ista exponere.

Phantasmatum in homine series (inquit) est vel casualis, vel ordinata. (de Homine c. 4. initio) At non prorsus ita casualis est uti videtur, hoc loco jam laudato habet, atque hæc quidem hætenus consistunt; at nullo modo casualis est, neque enim transimus ab imaginatione &c. nusquam absque contradictione evadit. Nisi molestum tibi foret, paucis ostenderem hominis ingenium & iudicium; nolo te detinere: is scopus est, si modò ullum habuerit, ut tollat libertatem, negando casualem imaginationum seriem; argumentum adhibet ejusmodi, ut nihil simile usquam me reperisse meminerim, nisi forsan illud quo velit illud ipsum stabilire.

Transitio omnis in imaginatione facta, facta prius est aliquando in sensu. Vides sublatam esse semel spem omnem inventionis sive Dialecticæ sive Rhetoricæ, quæ illud habent, phantasmata aliter ordinare quam fuerint animo objecta. Si quis sit oculis captus (saltem à nativitate) neque concionem poterit ordinare, neque poemata dictare; neque aliam unquam transiitionem facere quam audiendo fecerit vel tangendo &c. quàm vellem ut ostenderet Homeri integrum poema eodem ordine quo illud composuit in sensu incurrisse.

At licet Inventionem sustulerit, *judicium* ejus miraberis, ecce etenim sententiam qualem qualem argumento non indigno confirmatam.

Quare (quæso) necesse est ut *Transitio* omnis &c facta sit prius in sensu? Attende obsecro.

Quia, phantasmata sunt motus intra nos (reliquia motuum in sensu) ideoque motus in sensu succedentes simul manent, ita ut redeunte priore sequatur posterior. Nempe phantasmata sunt naturæ prorsus admirabilis, Motus manentes vel stantes, (per aliquot sæcula, nam gesta puerilis ætatis senes recordantur) motus post cessationem redeuntes, & quid est tandem quod ex ista hypothese non sequatur? Ait L. p. 19. *liberam voluntatem* esse locutionem absurdam. Qualia sunt ista? Venit mihi, nescio quomodo, nunc in mentem sententia futilis & ludicra; Nempe *Brutum eum existentem, non debuisse nobis eripere libertatem*. Unde hæc mihi phantasmatum connexio, unde factum ut Thomæ imaginationem, illud bruti consequeretur? ubi facta mihi ista in sententia consecutio? Inquires hoc ideo contigisse, quia de brutorum se esse grege tam strenuè evicit, quanquam difficultatem hoc minimè solvat. Quid hoc, quæso, ad ultimum Romanorum? at vereor ne tibi forsitan insanire videar, ad alia transeamus.

CAP. 5.

De Animi humani naturâ ejusque duratione.

Nempe duæ (uti vides) res sūt, de quibus erit mihi sermo deinceps instituendus, quarū 1. Altera est de *Animi humani natura*, 2. Altera de *eiusdem animi duratione*. De his erit mihi quàm potero dilucidè agendum, lucem hîc fugit, scilicet Thomas, oditque, & totus ferè in eo est ut sententiam abscondat, quare nulli invenies eum de *Animi natura*, institutâ quod aiunt operâ agentem, verum omni molimine conantem,

ut absque mentis ope humanæ naturæ phænomena exponat, ut hominem in ordinem brutorum deprimendo redigat, ut obiter aliudque quasi agendo, animum ipsum ejusque immortalitatem tollat; imò hoc quidem aperta facie, illud tectius, sibi quæ mille locis contradicendo, tenebrasque Stygias suæ ipsius sententiæ, ne à lectoribus percipiatur, offundendo.

— *Ingentem fumum (mirabile dictu)*

Evomit, involvitq; domum caligine caca,

Prospectum eripiens oculis, glomeratq; sub antro

Fumiferam noctem.—

Meministi (opinor) me illud dixisse, irrita hæc ratione esse Hobbiana omnia quæ hominis naturam respiciunt, quia mentem ad hanc machinam movendam (mentem nimirum à corpore diversam) non adhibuerit, quòd motibus corporeis omnes humanas operationes explicet, nihilque aliud adjecerit. Atque ipse jam tum intellexi locum, ubi versarer, atque hanc sententiam (absque omni verborum ambitu prolatam) discipulorum Hobbianorum calumniæ, apertissimè patere. Quare utriusque hujus sententiæ & illorum & mei ipsius rationes, asferentur.

Norunt ii qui in operibus Hobbianis versati sunt, nihil esse Thomæ huic nostro frequentius, quam ut de *Mente humanâ* loquatur; atque ita loquatur ut mentem esse aliquid à corpore *diversum* statuere aliquibus videatur; ita quædam ipsi officia peculiariora, atque à corporis partiumve ejus officiis diversa assignat, si ve officia generalia spectemus, si ve animorum (quos vocant) *Actus, Passiones, Habitus* atque *Facultates*.

Animam illud esse, quod vitam morumq; corpori largitur, ipse statim *Leviathanis* initio innuit (nempe in proximo p. 1.) *Mortem* (L. p. 188.) ita explicat, ut sit *separatio animæ à corpore*.

Quod ipsum naturarum (ut aiunt) atque essentiarum diversitatem arguit.

Imò multa habet *animi* peculiaris, non solum nostro iudicio verum & ipsius, ut videtur: de *animi figmentis* loquitur L. p. 5. de *Venatione animi*. L. p. 9. de *Discursu Mentali* longas orationes instituit L. c. 3. & 7. nempe de his agere videtur tanquam propriis animorum; animorum inquam, non corporum humanorum, sive integrorum, sive partium eorundem.

Quinetiam de motibus animorum agens (quosdam imò plurimos, licet, corpori communicet) nonnullos tamen animo servat. Ita de *Voluptatibus animi*, loquentem eum habemus L. p. 25. de *Animi delectatione* H. p. 76. de *Voluptatibus* quibusdam quæ non sint organica H. p. 78. 79. in *Libidine* (inquit) *voluptas est, non Sensus solius, sed & Animi*. H. p. 106. ita ut animum à corpore sejunctum agnoscere eum videatur esse manifestum.

Porro sunt Animorum etiam habitus quidam, vitia nimirum & virtutes, de *Vitiis animi* loquentem eum invenies H. 124. & alibi de *Generositate* virtute quorundam animorum peculiari L. p. 74.

Imò non opus est ut verba fundam, Ecce manifestior est hæc res, quam ut ullâ possit ratione regi, ut ullâ fronte negari, nempe de viribus humanis agens quam accuratissimè (pro more suo) eas in duas classes discernit (tum H. p. 84. tum in *Leviathane* p. 41.) facultates inquit humanæ duplices sunt, viz: vel Corporis vel Animi facultates.

Mirari proculdubio capisti V. D. quid mihi fuerit in animo, ut Thomæ sententiam ascriberem, ab ejus mente alienam adeo: vides eum planè *ὑποδιδόσκον*, nihilque esse quod in istis culpæ aliquis possit. Quia audi igitur quid velim.

Non

Non unquam ea mihi mens fuit, ut illud intelligi vellem, Thomam non habuisse ea quæ sententiam ipsius everterent, cernis potius evicisse me omni ferè in re sententiâ eum proferre sibi invicem obviantes & arietatione crebrâ se impetentes. At inquis si modò sententias habeat contrarias, cur hanc ipsi potius quam illam attribuis? accipe paucissimis hujus rei rationes; nihil certè mihi apertius est quàm Thomam libellum de Homine scribentem in alia sententia fuisse ab ea qua fuit, sive Leviathanem scribens, sive libellum de Corpore, quàm credidisse eum antehac, mentem esse à corpore diversam; nunc autem in aliam sententiam transisse: illud ex quibusdam citatis, de voluptatibus *inorganicis*; de animi perenni duratione, postea citandis, manifestum esse; quare repudiatum istum libellum ab ipso credo, quod in ipsum jam senem sapius insurgat rebellis: ejusque in postremis (quos magis diligit) mentionem factam esse nullam; imò locum istum bis jam tractatum (in libello de Homine, & in Leviathane) sibi quasi adhuc integrum servatum, in Libri de Corpore conclusione.

Verùm quid clarius, quid evidentius (inquis) esse potest, quàm eum in postremis operibus (Leviathane & de Corp.) ita de mente locutum, quasi esset *substantia* quædam, etsi non incorporea forsan, à corpore tamen humano diversa? Dicam; neque ambages sectabor. Mihi certè manifestum est, ea quæ his libris de Animo habet (sensu jam explicato) non nisi populariter dicta fuisse, nempe formulas istas loquendi non sine quadam excusatione & præfatione adhibere solet, ita de animi discursu loquens, Corp. p. 229. illud inquit, *quod appellari solet Animi discursus*. Ita de Imaginationum serie locutus, L. c. 3. initio, & de *discursu Mentali*, cautionem hanc tempestivè adhibet *Mental*:

talem dici solummodo, ut distinguatur à verboso, ceteraque omnia eodem modo sunt intelligenda.

Verùm—*ad populum phaleras*. Non jam quærimus quidnam ipsi visum est stylo vel Oratorio, vel Poetico proferre atque ad vulgi mentem; verùm quam sit ipsius sententia, vel quid libri ejus postremi in fundo habent; protrahendus est igitur in lucem philosophicam. Quærenda est animi ejus sententia eaque verbis apertis coram te iudice exponenda in lucem, fugatis tenebris & larvâ omni detracta non aliter ac cùm,

Panditur extemplò foribus domus atra revulsis,

—abjurataq; rapina

Cælo ostenduntur.—

(Quod de Caco habet Virgilius.)

Neque verò ego te V. C. diu detinebo sive in sententia ejus eruenda, sive refellenda. Accipe eam paucis.

Scilicet, cùm sit, quicquid est uspiam in universo, vel Substantia vel Accidens, sit autem Substantia, aliis vel Incorporea vel Corporea, Substantiam incorpoream nonnisi destruentium se mutuò vocabulorum connexionem ipse ubique affirmet, necessariò illud sequitur, ut ex sententia ejus, anima sit vel Corpus vel Accidens, Corpus autem non est, neque enim usquam hoc (in postremis ejus operibus) innuitur. Quare *Accidens* est, illudque pro sententia Hobbiana est sumendum. At (inquies) non esse hominis cujusvis sententiam, hujus præsertim qui contrariis abundat, ex ratio cinio solo colligendam, quinimò ex verbis ejus apertis inferendam atque palam ostendendam.

Quan-

Quamquam rigoris hoc sit alicujus, nolle in auctore qui demonstrationes severas, & accuratissimas rerum tractationes ubique pollicetur, illud admittere, ut methodo Analyticâ (sententiam quamcunque ut veram supponendo, eamque in principia resolvendo) sensus Autoris ejusque tandem principia eruantur, experiar tamen quid possim hoc modo ostendere.

Dixi Animam ex mente Hobbiana Accidens esse debere, per animam intelligunt omnes Formam humanam quæ dat homini Essentiam. En igitur (Corp. c. 8. §. 23.) hæc habet. *Accidens quod subiectum suum denominat, Essentia dici solet, ut Rationalitas hominis dicitur Essentia, eademq; Essentia quatenus Generata, Forma dicitur — Corpus autem respectu formæ, Materia nominatur.*

En igitur forma hominis, unde Homo nominatur, *Accidens est.* Quare inquirendum ulterius est, quid sit Accidens, & quodnam illud sit Accidens, quod hoc nomine tam præclaro dignum ipse censeat. *Accidens* (inquit Corp. Cap. 8. §. 2.) *est concipiendi corporis modus;* quare hoc saltem evicimus, Animam esse Corporis humani *modum* aliquem. Et cum modi omnes Corporis vel in extensione (quam figura, situs & siqua sunt ejusmodi comitantur) vel in motu consistant, aliquis horum modorum erit ipsi necessario anima humana. Nempe vel partium omnium Harmonia & Crasis, vel partium motus, vel ut sit habitus quidam (aut habitudo, si eo modo loqui concedatur)

(Nempe habitum quendam vitalem Corporis esse Harmoniam Graii quam dicunt; quod faciat nos Vivere cum sensu, nulla cum in parte fiet mens.

*Ut bona saepe valetudo cum dicitur esse
Corporis, & non est tamen hac pars ulla valentis).*

Vel ut sit Actus aliquis, quem ab Aristotele *ἐντελεχίαν* *av* vocare consuevimus, atque ille actus nihil aliud in se habere præter motum localem. Quærendum igitur est utrum sit anima Thomæ nostro Harmonia, vel Motus, quorum altera nil nisi relationem quandam dicit, alter habet quid positivum ut loquuntur.

Atque imprimis manifestum illud est, *Animam & Vitam* idem Thomæ significare. Nempe L. c. 46. p. 373. illos vehementer ridens, qui animam corpori superstitem esse judicant, hanc ratione illud facit quod *Anima sit Vita*. Hoc (inquit) *μορμολυχείω* *homines terrent, dicentes Animam, id est, Vitam separatam &c.*

At manet adhuc illud quærendum, an vita ipsa sit Harmonia, an Motus partium localis: Habebis igitur eum disertè sententiam suam explicantem, in Objectionibus in meditatioes *Cartesii* de prima Philosophia. Notum illud est, neque ipse diffitebitur Objectiones Tertias ab Hobbio factas esse, nempe ingenium Hobbianum admirabile perfectè redolent (pingue nimirum & minimè defæcatum) miratur *Cartesius*, ad objectionum finem accedens, nullam eum hætenus rectam illationem in istis objectionibus invenisse (Resp. ad obi. I 2.) quod nemini præter Hobbium convenire potest. Verum quid opus est argumentis? habebis V. D. proculdubio consistentem reum.

Ipsæ igitur in Obiectione quarta hæc habet. *Quid jam dicimus, si fortè Ratiocinatio nihil aliud sit quàm computatio nominum, — si hoc sit, sicut esse potest, ratiocinatio dependebit à nominibus, nomina ab imaginatione, & imaginatio fortè sicut sentio, ab organorum corporeorum motu, & sic Mens nihil aliud erit, præterquam motus*
in

in partibus quibusdam corporis organici?

Enl habes apertè animi sententiam Hobbiani, nempe mentem nihil esse aliud, præter motum in partibus quibusdam corporis organici; Imò (inquis) nondum est aperta, ita senilem illam vocem, fortasse, perpetuò suis immiscet, *Quid dicimus* (inquit) *si fortè &c.* & *Imaginatio fortè, sicut sentio.* Verùm enim verò iniquus es V. D. ista si objicias; illud *si fortè* enim non ad sententiam ejus, sed ad rem ipsam est planè referendum. *Fortè ego sentio &c.* nihili esset & puerilis locutio; imò, *esse hoc potest; fortè verum est, certè sic sentio;* hic certè sensus est verborum. Apertum igitur & manifestum est, mentem nihil aliud esse præter motum &c. ex sententia Hobbiana.

Quare sensum ejus eruimus, videsque illum ex eorum numero esse adversariorum quos longè difficilior est invenire, quàm vincere & prostrernere. Quid enim ad ista dicemus? Cùm sit illud manifestum, quod habet *Cartesius*, nempe eodem jure, quo conclusit mentem esse motum, potuisse eum concludere terram esse calum (seiplum esse avem *Minervæ* sacram) vel quicquid demùm ipsi placuerit. Quis nisi mente furiatâ foret, hoc modo concluderet? quis nisi furore percitus ejusmodi sententiam (à quâ omnis humana ratio abhorret) effutiret? Imò verò furore correptus est planè, non Musarum aut Apollinis sed Dionysi, hinc est quod magna meditatus & grandia pollicitus, ebrii alicujus instar, dithyrambicam quandam effundit Philosophiam. Ita mihi Horatianum illud in mentem revocat, Ubi grandia exosus,

Dicam insigne, recens adhuc

Indictus ore alio—

Nil parvum aut humili modo

Nil

Nil mortale loquar.

Tandem evaporato hoc spiritu, quasi somnolentus exit

—*sequens Deum*
Cingentem viridi tempora Pampino.

Non alio certè modo Thomas hic noster Philosophiam exorditur (Nobilem sc. illam Philosophiam) ab Academiæ totius orbis, Philosophorumq; quotquot fuerunt unquam contemptu incipit; *Vult ipse Empusam exterrere atq; abigere. Confidit omnia* (non aliter quàm Euclidis elementa) *esse legitimè demonstrata; Invidiam augendo ulciscetur.* Ecce ut

—*professus grandia turgēt.*

Verùm ad conclusiones accedens (ubi de rebus maximi momenti agitur) & ad Fabulæ Catastrophen, huiusmodi Colophone rem omnem, aut ipse claudit aut saltem claudere eam debet, *Quid jam dicimus, si forte sit, sicut esse potest, si forte sicut ego sentio &c.* ubi nervi eum deficiunt animique, & serpit humi timidus procellæ; ubi postquam à rebus excelsis atque sublimibus Jove & Musis exorsus est & mirabilia pollicitus (utpote diem inferendo, ut abigatur Empusa) nos tandem in specus tenebrosos atque obscuros ducit, &

Dum, Ventum est (pudet effari) Plutonis ad Anum
Ut vocitant pleriq; loci vocat incola Peaks—A
 (Hob. Mirab. Pect.)

At vereor V. D. ne contagiosa sit ista Hobbii insania, ita me penè coëgit ut insaniam. Quin igitur ad ejus sententiam redeamus. Ait *Mentem humanam nihil aliud esse præter motum in partibus quibusdam*

busdam Corporis organici. Videamus quid inde sequatur. Sequitur nimirum, ut corpus insensibile vel ex insensibilibus compositum motu locali agitaturn, ea omnia perficiat, quæ menti ab ipso ascribuntur. Qualia sunt ista.

non pateretur. C.c. 25.

Notiones fingere. L. p. 5.

Verba intelligere. L. p. 8.

Artes & Scientias invenire. L. p. 22.

Voluptates etiam inorganicas percipere. L. p. 25. H. 78.

Res per phantasiam transe-

untur observare. L. p. 33.

Ingeniū acquirere. L. p. 35.

Conari ut Libidines subjungentur. L. p. 39.

Venationem vel scrutinium Phantasmatum instituire. L. p. 9.

Studere atq; consequentias intelligere. L. p. 12.

Certè infinitus essem, si omnia ea loca notare vellem, ubi de Mentis operationibus ipse loquitur: appello communem hominum rationem, me nihil ipsi affinxisse judicabunt, illudque me non temerè enunciâsse, non solum bruta animantia verum & ligna & lapides (quorum nihil absque partium motu, aut est certè, aut esse potest) hoc modo fieri intelligentia, hominique nulla in re cedere debere; quinimò ex quovis ligno fieri Mercurium, eumque intelligentem. Neque ipse valebit unquam adversus hanc sententiam adferre aliquid, quod ipsi sibi non repugnet, Nempe si vis omnis sententiæ sit in voce ista *Organica*, assignabit organici intellectionem, nonnisi ut instrumenta sunt; illud autem cujus instrumenta fuerint, Animus dicetur.

Verum istis omisiss, ego paucis ostendam, etiam si millies ringatur Thomas (vocesque istas ex hominum consuetudine abolere vehemētissimè contendat) mentem humanam *Substantiam* esse, eamque *incorpoream* dicendam, imò illud ex Thomæ ipsius supremis operibus

operibus necessario consequi & fluere.

Meministi V.D. me Thomæ discursum omnem quo substantias incorporeas veluti Empulam abigere contendit, in superioribus (nempe p. 35.) ad examen rede-
degisse. Quinetiam ex sui ipsius principiis & dogma-
tis evicisse, aut Deum esse debere substantiam incor-
poream, aut esse omnino (quod Deus ipse prohibeat)
tollendum. Imò verò ex positione motoris primi, &
ex axiomatis Hobbianis, de motuum corporeorum
causis, esse eum necessario & incorporeum & *αὐτοκίνη-
τον*. Ostendendum nunc est (quod & antehac suscepis-
se me memini) ex ipsius Thomæ dogmatis mentem
humanam non esse motum, sed esse substantiam de-
bere, eamq; incorpoream. Nempe ex Thomæ sen-
tentia Corp. cap. 11. constat, illud necessario statu-
endum esse, *hominem eundem esse, Senem, qui fuerit ju-
venis* (hoc inquam statuendum esse) *ne confundantur
omnia jura humana*. Et cum quaesitum est unde fieret
ut sit idem; in ea sententia se esse professus est, *eundem
esse hominem, propter formam talem, quæ est principium
motus, & fuit in generatione*. Quinetiam illud planè
statuit, *infantis & senis non esse idem corpus*.

Ex istis igitur ita disputare licet; homo est idem ju-
venis & senex; atque à forma sua habet, ut sit idem;
forma hominis illud est quod mentem Hobbius & ego
appellamus: Deinde idem est homo, propter aliquid
quod idem manet per totum vitæ spatium (Nempe
manente identitatis (ut loquuntur) principio, idem ma-
net individuum Corp. p. 83.) Quare mens hominis
eadem manet per totum saltem vitæ hujus spatium: At
corpus hominis non est idem infantis atque senis; Mul-
tò minus idem est motus permanens, partium quarum-
cunque corporis humani. Quare *neq; corpus, neq; mo-
tus corporis esse potest mens humana*. Incorporea est igitur

tur, illudque ex principiis Hobbianis, ultimisque eius laboribus necessario evincitur. At verò *substantiam* eam esse manifestum est, ex ipsa substantiæ notione. Nempe principium est & causa motuum, ex sententia hujus Philosophi, subjectum est ultimum modorum quorundam (qualia sunt ea omnia jam supra recensita, aliaque innumera de quibus nunc non est dicendum) nempe cogitationum omnium. *Substantia est igitur incorporea mens hominis*, illudque ex ipso Thoma legitimè atque accuratè conclusum esse existimamus.

Vellem, ut argumenti elenchum ostendant ii, qui Thomam admirantur; eumque à fæda sui ipsius contradictione vindicent; at magistri curam non habent plurimi, modo Tanti (quantum esse cernis) Philosophi nomine, Deum ipsum, Mentemq; humanam immortalem negantes, se possint defendere.

Ultrò nimirum concedentes audiui, Thomam esse hominem in sententiis inconstantem, sibi que millies contradicentem, neque in libellis solummodo diversis ejus, hoc contingere, verùm in iisdem libellis in eâdem sæpe periodo, (adeoque nihili eum esse) attamen dignum eum esse quem admirentur; ideò quia ausus est sententiam ipsis gratissimam palàm efferre: se verò scire quænam (ex diversis effusis) sit animi ejus sententia, eam nimirum ubiq; quam nos turpissimam opinamur. Quare non satis esse Thomam suis ipsius viribus evertere, ejusque contradictiones ostendere, nisi & istas sententias, quas hîc illîc insanus evomit, evertam.

Verùm iniqui sunt isti rerum nostrarum assimatores, voluisti V.D. ut de Thomæ operibus (qui antiquos recentes, homines privatos, Academias publicas, universim omnes, fastu minimè ferendo spreuit & lacessivit)

vit) quid sentirem efferrem, hic mihi scopus præcipuus, ut sciret nostra præcipuè juventus qualis esset, ut sentiat qui vir fiet. Quanquam illud neque negligendum esse judicarem quod ipsi postulant, neque omnino neglexerim. Quod ad rem præsentem attinet, erit certè aut motu corporis peragendum omne mentis humanæ officium, aut erit mens incorporea statuenda, substantia (inquam) incorporea, illud & omnis ratio fugit atque averfatur, hoc igitur concedendum: Vel si Hobbianorum ratio illud non refugiat, mentem ita explicent, ut in absurditates minimè ferendas non incidunt, eorumque ingenium laudabo.

Cernis interim quid Antesignano eorum acciderit. Et nosti me alicubi mentis humanæ naturam incorpoream pluribus ostendisse; Summa est, nullo modo intelligi potest, quomodo corpus hoc vel illo modo agitatum, actu reflexivo rem aliquam percipiat. At verò in homine innumera sunt, quæ non hoc solum habent, sed & vim omnem Imaginationis excedunt, tum in simplici objectorum apprehensione, tum in judicio, tum in discursu, tum in lucta cum carne, aliisque infinitis. Notionem universalem quamcunque, vim omnem Imaginationis, qualem *Thomas* describit, excedere, in hoc opusculo supra ostendimus; ipsa apprehensio substantiæ incorporeæ, nulla vi corporis, siue quiescentis, siue moti perficitur, quod tamen de Deo vel concedere (fremat licèt & maximopere reclamet) necesse habet *Thomas* ipse, vel suo ipsius judicio, erit Atheismi manifestus. Neque ullius momenti est illud quod hoc loco objiciunt, non nos habere de Deo Ideam aliquam perfectam, verùm in omni inquisitione de Deo nonnisi negando nos procedere: Nam & illud, negare attributum aliquod de Subjecto, quandam subjecti ipsius apprehensionem, ut
etiam

etiam Attributi præsupponit. Ego mentem meam ne prolixus sim, uno (quod aiunt) verbo, explicabo.

In quaestione de primo motore, illud evincunt ultima Matheseos principia, & communes notiones, primum esse motorem statuendum; qui Accidens esse non possit: quare substantiæ alicujus notionem habemus, qui sit primus motor. Deinde, ex corporum moventium & motorum affectionibus consideratis eum Incorporeum esse concludimus, id est negandam esse de Deo corporeitatem; quare notionem aliquam substantiæ habemus, de qua sit neganda Corporeitas, id est, notionem aliquam substantiæ incorporeæ, atque hoc quicquid est notionis, quamcunque fuerit imperfectum, assequi nullo modo potest Atomus aut Elementum, eorumve combinationes localiter movendo. At verò quamvis de *Apprehensione* simplici res non foret (prout tu esse cernis) manifesta, tamen ut *judicium*, id est, *affirmatio* vel *negatio* fiat, carnis, vel sanguinis, vel vaporis motu, intelligi nullo modo possit. Movet (inquit Thomas) objectum aliquod organum suum, & fit phantasma objecti, & illud fit denuò, & excitatur novum phantasma, id est novus motus: verum præter motus istos, est quoddam *Judicium*, de ipsa phantasmatum similitudine, vel dissimilitudine, de convenientia respectu tertii alicujus, aut inconvenientia, neque dicere nullo modo potest, nisi mentem à corpore diversam adhibendo, vel unde, vel ubi sit excitatum hoc *judicium*.

Quod autem de *Judicio* dictum est, illud *Discussus* multò magis convenit, qui tria semper habet *judicia*, atque ex duobus tertium elicit; nempe intelligi nullo modo potest, quomodo Caro motu lo-

cali efficiat, ut admiranda ista & præclara phænomena, in Artibus & Scientiis (vel speculativis, ut loquuntur, vel iis quæ vitæ hominum communi inserviunt) explicentur.

Multo minus (si nihil aliud in homine sit præter motus corporeos) explicare unquam valebunt, aliquid eorum quæ sentiunt ii qui ventri minimè inservientes & libidini, sed cupiditates reprimentes vitamque colentes severiorem, gratissimam olim expectant & felicissimam immortalitatem.

Scio risurum eum esse ad ipsum Immortalitatis nomen, quare vellendus est atque cogendus ut mentem meam capiat, nempe non hîc assumo nondum evictam animi humani Immortalitatem; verùm ipsum nullo modo ex phantasmatis ab ipso descriptis, eorundem ortu vel progressu, explicare posse contendo (vel alium quemque qui mentem à corpore diversam non agnoverit) phænomena ista quæ sententiam de Animorum immortalitate in hominibus consequuntur. Verùm expedire potius existimamus, ut de *Quæstione* secunda verba faciemus, quæ est de ipsa *Animorum* *Duratione*.

II. Quæritur hoc loco *an mens humana sit Immortalis*. Ubi duplex etiam est inquisitio instituenda, nempe quæ sit Thomæ sententia, quid sit in rei veritate statuum; neque tamen horum utrumvis longam aliquam desiderabit orationem post illa priora satis aperte tradita, nempe si *Spiritus* sit mens hominis à corpore diversus, erit *Immortalis*; Si sit substantia incorporea (quod evicisse me autumo) erit naturâ suâ Immortalis. Contrâ si corpus sit (ut *Atomus*) fieri potest, ut sit incorruptibilis & immortalis; si verò motus sit vel modus corporis Organici (complexim sumpti) non solum immortalis non erit sua natura, Verùm

verum nullâ vi (non ipsâ vi divinâ quantum humana mens capit) fieri potest ut morti supersit, vel ut eadem sopita resusciteretur. Cum igitur Mentem esse motum statuatur, nihilque aliud præter motum partium quarundam organicarum localem, vides quid sit ipsi necessario statuendum.

At dices immitiùs me illum tractare, dum sententiam ejus ratione atque argumentis eruo; imò ficta hæc omnia esse, quæ in quaestione sive de Animi natura, sive ejusdem duratione, hæcenus ipsi tribuimus; nempe Thomam & Christianum esse, & agnoscere Animam Hominis Spiritum esse, & immortalem. Hoc ipsum nempe disertis verbis affirmat (de Hom. p. 136.) *Nos (inquit) qui sumus Christiani, agnoscimus Angelos esse, & bonos & malos, quin etiam Spiritus esse, & Animam humanâ esse Spiritum, & illos Spiritus esse immortales.* Imò ipso in Leviathane (c. 8. p. 38.) *non credere Spiritus esse, proximum est (inquit) Atheismo aperto.*

Et erat ea mens (ut videtur) aliquando Thomæ huic nostro. Nempe animo vegetior aliquantò, Christianus erat, Spiritus agnovit, animam humanam esse Spiritum & immortalem, atque statuisse videtur, Christianum eum non esse qui ista non agnosceret. Verum enimverò hæret adhuc mihi scrupulus minimè avulsus, non esse eundem hunc Thomam subdubito, qui libellum istum de Homine composuit: Certè mentem mutavit, quare non est idem, vegetior aliquantùm & valentior animus ipsius, se nunquam moriturum iudicabat;

(Nempe ubi robustis adolevit viribus atas
Consilium quoq; majus & auctior est animivis.)

Verum nunc frigescens aliquantulum senectute &

annis succumbens se statim animumque ipsum existimat moriturum. At mihi quidem placet vegetioris atque junioris sententia; illamque præferendam senili huic, ipsius (in hac re) Symmista (Lucretius) docebit.

*Namq; ubi jam validis quassatum est viribus avi
Corpus, & obtusis ceciderunt viribus Artus,
Claudicat ingenium, delirat linguaq; mensq;
Omnia deficiunt, atq; uno tempore desunt.*

Quare non est, ut succenseat, si juniorem illum Thomam, senescenti huic nostro præferamus.

At non, inquis, jam illud quæritur, quænam sit præferenda, sed quænam sit ipsa Thomæ de Duratione animorum sententia, dicam.

Animam (inquit) Hominis, esse naturâ immortalem, Error est planè. (L. c. 44. p. 339.) At inquires hunc esse sensum, errare illos qui existimant animi immortalitatem naturaliter posse ostendi, quæ in re nonnullos pios & fideles sibi consentientes habet, tollentes à ratione quod fidei tribuant: Ratione, inquit, hoc non innotescit, quare ad Scripturas fugiendum. Imò verò inquis animam naturaliter Immortalem esse, ex Scriptura non est manifestum. (L. p. 240 241.) Dices ferri hoc etiam posse, nempe voces istas *naturaliter immortale*, in Scriptura non occurrere. Verùm quid sequitur ambages? dicat velim non de mortalitate, verùm de morte ipsa, an moriatur animus ex ejus sententia, vel non moriatur. Imò moritur (inquit) totus, & mortuus manet usq; ad Resurrectionem generalem. — Et vita hominis immortalis (anima autem & vita in Scriptura idem plerumq; significant) in homine, ante Resurrectionem, & diem Judicii, non incipit; causamq; habet non naturam (hominis) specificam, sed

sed promissionem. (L. c. 38. p. 240. 241.)

Habes nunc integram ejus sententiam de Animi duratione tum Philosophicam, tum etiam Theologicam; extingui eam scilicet in corporis occubitu, & ante Resurrectionem non reviviscere, nempe ampliationem istam, diem (uti credit) longissimam assecutus, de reliquo non est admodum sollicitus.

Quznam sit illius de Scriptura ejusque autoritate sententia, erit alibi dicendi locus, sufficiet hoc loco ostendere, repugnare ejus sententiam, tum Scripturæ sacrae, tum etiam rationi. Quod ad primum, Scriptura sacra statuit mentem humanam, tum durare post mortem, tum etiam Corpori in Resurrectione reuniendam; quorum neutrum, sententiam ejus de animi natura ferre potest. Quid opus est verbis?

Motus, suo dissoluto mobili, durare nullo modo potest, quare neque mens poterit Hobbiana, morti corporis superesse.

Motus (nempe idem numero motus, de quo ubique loquimur) non potest cessare, & deinde post aliquod tempus resuscitari, cum igitur homo dicatur *idem à forma*, *forma* autem ex mente Hobbii sit *motus localis*, restitui nullo modo post *Psychopannychiam*, & resuscitari potest idem homo; Cum igitur illud datâ operâ contendat asserere, Scripturam, hominum resurrectionem; (eorundem nimirum qui moriantur) nullo modo ostendere valebit unquam, sententiam ejus Scripturæ sensui è diametro non obversari. Ista inquam concedere, ipse necesse habet, absque ullo Scripturæ S. scrutinio: At malè eum habebit (opinor) hoc loco, quod Scripturam in partes (fronte verè Hobbiana) vocare non erubuerit; quæ mille testimoniis, ipsiq; spiritu earum & genio, cras-

fos hujusmodi homunciones obruunt; quidni etenim homuncionem istum appellem, ubi cum Prophetis, Apostolis, imò Christo ipso instituenda est comparatio? Ait hic Senex (sibiipso olim saniori contradicens) Mentem, ejusmodi aliquid esse ut non sit à corpore diversum, ut non sit substantia à corpore quod incolimus aliena, ut non sit corpori superstes, audetque ad Scripturas provocare. Verùm ipsæ sacra S. de corpore atque animo sive mente, velut oppositis & diversissimæ naturæ Substantiis, ubique loquuntur. Nempe si originem spectemus, Corpus humo, Anima (vel mens vel spiritus) Deo ipsi originem peculiari modo ex sensu S. debet. *Finxit Jehovah Deus, hominem de pulvere terra; Ecce Corporis originem: Sufflavitq; in naves ipsius Spiritum vitæ; En principium vitæ humanæ à Corpore diversum!* Gen. 2. 12. *Redeunte ipso pulvere in terram; redibit Spiritus ad Deum qui dederat eum.* Eccl. 12. 9. Ecce manifestam antithesin! Eodem modo Author ad Heb. parentes Carnis à patre Spirituum contradistinguit. Imò Christus ipse nolite (inquit) illos timere qui Corpus occidunt, animam autem occidere non possunt, sed eum potius qui cum occiderit Corpus, Animam potest mittere in Gehennam, Luc. 12. Quid quæso, num modum, num motum corporis (corpore ipso, vel dissoluto, vel quiescente) mittet in Gehennam?

Imò verò scriptum est inquit Christus, *Ego sum Deus Abraham, Isaac, & Jacob: Deus est autem viventium non mortuorum*, utrumque Saduczorū errorem istu uno configens, qui & resurrectionem simul & spiritus negabant (in eo certè Hobbio sapientiores quod sententiarum dependentias atque sequelas intelligebant.)

Nolo prolixus esse in re apertissima, Christus mo-
ritu-

riturus Spiritum Deo commendat, Stephanus Christo, Paulus cupit dissolvi & esse cum Christo, annon hæc mentem seu Spiritum corpori superstitem evincunt? Christus Spiritibus qui sunt in carcere prædicavit. I Pet. 3. 19. Quid sibi vult Historia de Divite & Lazaro? Parabola (inquit) est; nunquam evincet: vidi sub Altari animas eorum qui mactati fuerunt, vidi, inquit, clamantes. Apoc. 6. 9. Annon hæc omnia, animarum etiam à morte separatarum durationem aut evincunt aut præsupponunt? certè infinita hujusmodi adferri possent. Promisit Christus latroni fore eum eo ipso die, cum ipso in paradiso, ne quis ad resurrectionem olim futuram ampliacionem meditetur. Imò Diabolus Sauli, cras, inquit, tecum eris, quod plus habet quàm morieris, vel *ut a dñs* descendes. Novi quæ regerant, futilia ea omnia. Quare ad argumentum redeamus.

Manifestum est S. Scripturas Animum sive mentem hominis à corpore ejusdem diversum (ita diversum ut ab eo separatim existere possit) statuere, inquam manifestum est Scripturam, hanc mentem Spiritualem, semper esse prædicare; substantiam autem esse à corpore minimè dependentem, supponere. Quare Thomas Scripturæ sacræ manifestò contradicit, asserendo Animum esse corporis motum, eiq; minimè superesse posse.

Scio hæc omnia ex Scripturis hausta à Discipulis ejus rideri, qui Scripturas ipsas contemnunt, verùm meminerint non jam quæri de Scripturarum Autoritate, sed earundem sententia, eosque stupidos esse & impudentes, si magistro ad Scripturas provocante, Scripturam loquentem audire noluerint.

Ego interim toto quod aiunt calo ab hoc homine dissentio, aio nempe animas hominum *naturaliter im-*

mortales esse, illudque non ex Scriptura sola, verum ex ratione severiore, clarum esse, omnique viro Philosopho concedendum; illudque brevissimâ hâc ratiocinatione concludo. Substantia incorporea est indivisibilis, adeoque indissolubilis, adeoque corruptioni non obnoxia, & consequenter immortalis. Mens autem hominis ejusmodi est Substantia, Substantia quia permanens, incorporea qui istiusmodi operationes exercet innumeras, quas motus localis vel Atomorum vel Corporum ex Atomis aut elementis compositorum, nullo modo perficere potest; Est igitur anima humana naturaliter immortalis; illudque ab hominibus naturali utentibus ratione, concedendum.

Quid interim ex adverso Hobbiani? Anima (inquiunt) quæ sit immortalis & separabilis nulla est; quare? quia motus localis est inseparabilis à corpore, neque potest per se subsistere, Anima autem humana motus est, motus localis. Quid? quæ sol motusne est partium localis? ergo non manet, vel ad duo momenta, Idem homo (neq; enim forma est eadem) & jura omnia humana tolluntur; Suis & ipse viribus ruit Leviathan. At, inquit, licet motus idem non maneat, similis manet tamen, quare homo priori similis evadet. (imò neq; similis per omnia, sed nolo importunus esse) quid tum? tum, moto corpore, omnes operationes humanæ consequuntur, satis est! Cernis quâ ratione omnia possint fieri intelligentia non ego Philosophum hunc, Truncum appellabo, Verum illud sentio, fieri hoc modo posse, ut Truncus evadat Philosophus, imò Deus.

*Olim truncus erat ficulus, inutile lignum
Maluit esse Deum Thomas, Deus indeq; factus.*

Sed de his satis, alia nos manent, quare transeundum est illicò ad doctrinæ Civilis Hobbianæ fundamenta.

SECTIO. V.

De Cive Hobbiano.

CAP. I.

De Homine, ut est in statu Natura, ex Hobbi sententia. De Præ-Adamitis nonnulla. De Lege item Natura, seu regulis Boni & Mali.

PRæclarè Thomas Hobbius (V. D.) Philosophus Malmesburiensis, atque sapienter, illud sapientis, alicujus ex septem Græcis, præceptum, laudando evehit (L. p. 9.) sc. *Respice Finem*: Quoniam in omni negotio suscepto, nisi scopus animo, sapiùs agentis, obversetur, aut impossibile erit, aut omnino difficile ab erroribus cavere. Quare patiaris (obsecro) frui me sententiæ tam sapientis beneficio, respice (quæso) V. D. scopum ipsum & Titulum hujus Epistolæ, neque illud requiras, ut in Leviathanis aut libelli de Cive Corpus integrum eorumque sphalmata universa inquiram. Nempe est ipse Leviathan grandis (ut nôsti) satis, neque pellibus exiguis continetur, neq; verò ortium mihi est, aut animus minutiora prosequi, satis erit in fundamenta ipsius inquirere, quæ si luxata fuerint & fluentia, non est ut ædificia magnopere curemus: hoc nempe jam pridem initio suscepimus, ut de Civilis disciplinæ fundamentis (Hobbianis) diceremus; contraham autem orationem, spatiisq; modicis concludam

cludam eam, non solum eâ ratione, ne tadio tibi sit aliisque, verum etiam quia in ejusmodi res incidimus, ubi neque experimentum, neque demonstratio locus habet, quod mihi (in rebus aut Mathematicis [uti nosti] aut naturalibus plurimum versanti) ingratum esse non diffiteor, nempe in istis siqua contingat dissensio (quod ex ingenii alicujus perturbati inadvertentia aut temeritate solummodo evenit) sopitur ex statim ratione eousque valente, ut communi saniorum hominum suffragio, pertinax licet error explodatur; hoc nempe modo explosus nunc est Autoris hujus Tetragonismus aliaque ἀνωμαλία, neque metus est, ut aliquando molestias eruditis hominibus exhibeant; verum in iis quæ ex arbitrio pendent, sive Humano sive Divino, qualia sunt plerumque Politicæ atque Religionis negotia, oriuntur sæpenumero quæstiones nullis rationis aut judicii humani viribus solubiles, verum ejusmodi ut æternas sustinere possint disputationes atque lites, cum nullum habeant (vel sensus vel κοινῶν ἐννοιῶν) criterion quo possit veritas quasi evidenter innotescere.

Quare miratus sum antehac Thomam hunc nostrum in Præfatione ad Lectores libello de Cive præmissa, ista olim scribentem, dabam (inquit) operam Philosophiæ, animi causâ, ejusque in omni genere elementa prima congerebam, & in tres Sectiones digesta conscribebam, ita ut in prima de Corpore, in secunda de Homine, in tertia de Civitate Civiumque officiis ageretur. Ubi post aliqua præmissa illud suscipit, rem unicam in libello de Cive (ubi de Politia agitur, & de Religione Christiana) non demonstratam, sed probabiliter positam esse.

Mirabar (inquam) hominis sive ingenium sive felicitatem, cui datum est rem difficillimam præstare, nempe disciplinæ civilis atque Religionis Christianæ elemen-

ta (quasi Geometricè) demonstrare. Verùm conspectis Sectione primâ & secundâ, ipsoque demum Leviathane qui omnes aliorum absurditates comprehendit, mirari prorsus desii; sensi nimirum me voce Demonstrationis ludificatum fuisse, eumque (quod minimè sperabam) paralogismos minimè ferendos & petitiones principiorum absurdissimas demonstrationum nomine præclaro, insignire solere; illudque tandem compertum habui, non alio modo elementa civilia quam fuerant ea de Corpore atque de Homine (in quibus hætenus versati sumus) demonstrata.

Atque hoc quidem mihi nunc manet ut ostendam. Quare nolo te præfatione aliquâ ampliore detinere.

Duo sunt planè fundamenta quibus omnis ejus disciplina civilis innititur,

Quorum	{ Alterum est, esse vel fuisse quendam hominum <i>statum</i> , quem vocat <i>Naturalem</i> , ubi sine lege aliqua soluti omnino vagabantur.

Hæc (inquam) ea sunt principia iique Cardines quibus vertuntur omnia quæ de rebus Civilibus habet hic Autor. Ista nimirum libello de Cive, atque Leviathanis (quâ parte Politicas res tractat) velut ultima fundamenta substernuntur; atque hæc si forsan paucissimis evertero, non est ut hac in re fidem me fefelisse (etiamsi ab aliis abstinuero) existimes.

Ponendus est tibi ante oculos hoc Capite status naturæ (quem vocat) ejusque symptomata ad examen Philosophicum redigenda. Nempe summa doctrinæ ejus Civilis hæc est, omnia naturaliter esse licita, deinde

de post societatem initam, ea eaque sola esse licita aut bona, quæ Magistratus jusserit.

Sententia prima hæc habet, Homines naturâ liberissimos esse, omnia esse naturâ suâ ἀδύποπα, Boni Malique regulas, naturales atque æternas nullas esse, verum eorum rationes ex Magistratûs instituto, primò atque originaliter profluere; atque mihi primo omnium illud incumbit ostendere, hanc esse hujus hominis sententiam, deinde ea quæ in contrarium dicenda habeo nonnulla proferre.

Neque verò diu morandum est in sententiæ Hobbianæ explicatione, illud ipsum libelli de Cive initium in fronte gerit, illud Leviathan integer ubique proficitur, *Homines naturâ aequales esse* (& fuisse) *Quin jure naturali, omnia esse omnium, omnia naturaliter licere*; atque demùm *societatis Civilis initium esse à mutuo metu*. Quoniam autem existimare potes eum hæc ita aut explicasse alicubi aut explicare potuisse, ut sententiam à nobis ipsi adscriptam non inferant, erit ad Leviathanem ipsum, ubi ista uberius tractantur, provocandum.

Ubi vel de re ipsâ in universali (ut loquuntur) loquentem audire potes, vel de speciebus boni & mali speciatim. Nos ex infinitis quibus scatet Leviathan, pauca in exemplum trahemus. L. Cap. 13. Quod est de Naturali hominum conditione; *statuit conditionem hominis naturalem esse statum Belli, singulorum in singulos.* (p. 62.) *Atq, homines in hac conditione à natura Actualiter positos esse,* (p. 63.) *cujus positionis consecutarium est* (inquit) *Nihil esse posse injustum, Notiones recti & obliqui, Justi & Injusti locum ibi non habere.*

Assertionemque istam hoc modo demonstrare nititur.

Ubi

Ubi nulla potestas communis, ibi lex nulla, ubi lex nulla, nihil injustum. Vis (inquit) & dolus, sunt in Bello virtutes duæ Cardinales. Hinc etiam sequitur (inquit) nihil esse Meum aut Tuum.

Cernis ex sententia Hobbiana, hominem à natura actualiter positum in ea conditione esse, ut legem nullam habeat, (nempe legem naturalem) ut regulas boni & mali nullas habeat ante constitutam Rem-publicam. Hoc nempe illud est quod sæpissimè in Lev. occurrit, *ubi nulla Res-publica, nihil injustum* (ut p. 72.) Ubi verò justum nihil, aut injustum, ibi bonum nihil esse, aut malum, sumere cuivis licet, manente versiculo isto ἐν τῇ διαίονοι συλλήβδων παρ' ἀρχῆς δέ. Sed cavendum est, ne quid temerè in hac re concludamus: Solebant hæctenus omnes (quatenus ego scio) mortales, justum & bonum veluti terminos reciprocos intelligere, verùm ipsi aliter visum esse; comperies, nempe sejungendum esse justum à bono, injustum à malo, nempe p. Leviathanis 152. Ast ego introductam ab ipso distinctionem istam video, ut nebulam sententiæ infami offundat, atque ut contradictiones impleat, sine quibus vivere non posse videtur. Interim ne forsan istum in cuniculum se recipiat, verbisque nos eludat, uti facit, ubi *legem nullam posse esse injustam asserit, malam posse.* (uti L. p. 182. 185. contra communem hominum sensum vocumque usum receptissimum) de bono ipso & malo dicentem audiamus.

Nihil (inquit) absolutè bonum est aut malum, neque est regula ulla communis, Boni aut Mali, à natura objectorum petenda, verùm à persona ubi Res-publica non est; vel in Re-publica à Magistratu. L. Cap. 6. pag. 24.

Cui etiam concinit quod habet (p. 80. Leviathan.)

In

In statu natura, Appetitus (inquit) est mensura Boni & Mali.

Tu forsan existimas me vi quâdam ista extorquere, neque eum (inter Christianos enutritum) tam crassum aut absurdum esse posse. Quis honestâ familiâ institutus & educatus ingenuè, non ipsâ turpitudine, etiâ amicum læsura non sit, offenditur? quis animo æquo videt eum quem impurè & flagitiosè putet vivere? inquit Cicero Ethnicus ex facie Romuli. Quid Thomas qui aliquando fuit (uti videtur) Christianus? Nempe duo sunt capita quasi generalia, ad quæ virtutes omnes (non ipsa exclusa religione) referuntur *Iustitia* sc. & *Temperantia*, quarum illius in fœderibus & promissis servandis magna pars constat, hæc in sensuualitate, ut loquuntur, domanda, ut plurimùm versatur. Quin igitur accipe de rebus istis Thomæ iudicium, *vox hæc, sensualis* (inquit) *uri condemnatur, locum non habet antequam leges fuerint.* L. p. 25.

Fœdera autem irrita esse, in statu natura, statuit. L. p. 68. imò stultum eum esse, & adversus legem naturæ peccare, qui promissis staret ceteris fidem fallentibus. L. 79.

Habes itaq, satis (heu nimiùm) explicatam Thomæ sententiâ de statu naturæ. Neq; confundere iudicium illa debent quæ de lege naturæ, de foro interno, & externo habet alicubi, de *Conscientia* item, reliquisque ejusmodi *vocabulis*. Nempe facillimum mihi foret (illudque fide loquor bonâ) ingentem contradictionum numerum hoc modo in Leviathane ostendere, verùm non tam ad phrasas quasdam, atque sententias attendendum esse iudico, quam ad operis fundamenta & compagem; illud ut cernis disertissimè asserit, homines eo in statu positos (*actualiter*) fuisse, ut legem vel regulam boni aut mali (ante constitutam

Rem-

Rem-publicam) nullam haberent; postea, de lege natura loquēs, nihil aliud ut plurimum intelligit, præter dictamen rationis quo unusquisque ut seipsum ab injuria defendat movetur: aliquando autem legem naturalem & civilem eandem esse statuit, nempe se mutuo eas continere & coextendi. (ut L. p. 138.)

Hoc (inquam) fundamentum est primum Philosophiæ Civilis Hobbianæ. Quare si nulla fuerit ejusmodi hominis natura, si nusquam fuerit eo in statu constitutus, quem sibi fingit hic autor, cætera vides sponte suâ ruitura. Quare duz res manent ostendendæ, quarum 1a. est non fuisse eum statum hominum naturalem. 2a. homines absque legibus boni & mali fuisse nunquam, quin esse quasdam *boni & mali* regulas, quæ *naturales*, jure merito, dici possint.

Neq; verò opus est ut in priore sententia tempus inferam, Ecce habemus Thomam ipsum fatentem L. p. 63. *Se credere nusquam ita se rem generaliter habuisse, ut homines absque imperio in statu belli, ut bruta solent animantia, vagarentur.* Quare manifestâ contradictione tenetur, dum homines statu in illo à natura (*actualiter*) positos affirmat, certè quod nunquam *generale* fuit, neque *naturale* (quoad speciem rerum aliquam) est dicendum.

Verùm quid moror? contrariam planè Hobbianæ sententiam veram esse, non solum unicuique nostrum (non solum cuivis Christiano) verùm & Hobbio ipsi est concedendum. Nempe si ab uno homine originem traxerit universa Gens humana, ab uno inquam parente (Adamo) qui imperium (fatente Hobbio L. 178.) in suos omnes, qui boni malique legem, habuit; nullus erit certè locus ejusmodi conditioni (naturali) ubi singulorum in singula jus esset, & omnia omnibus licerent.

Hanc

Hanc autem hominum originem agnoscere, & pro fundamento sumere, debuit ipse Thomas, doctrinam non solummodò Civilem, verùm eam ad normam Religionis Christianæ componere aut instituens, aut præ se ferens.

Summa argumenti hæc est, nemo doctrinam instituens, Christiano dogmati consentientem, statuere debet conditionem hominum naturalem, qualem Scriptura sacra non agnoscit, vel potius conditioni isti contrariam, quam describit Scriptura & pro fundamento suo supponit. Talis autem est conditio ista naturalis, quam pro fundamento Politicæ sumit Hobbius, quare &c.

Novi parvi eum habiturum esse disputationem omnem authoritati Scripturæ S. innitantem, at illud immodestè, annon hic ipse est *Contentus eâ doctrinâ circa mundi originem, quam suaserint Scriptura sacra, & quæ illas confirmat, miraculorum fama & mos patris, & legum reverentia debita;* (Corp. p. 238.) Quare de hac re brevissimè dicetur, & ratione Philosophicâ brevissimè evincam, esse credendum.

Aio 1. Scripturas asserere, ab uno Parente totum genus hominum originem traxisse; atque hoc ex serie ipsarum universa, ita apertum est, ut nemo me sanum existimaret, de istis verba facientem, nisi prodisset nuper (sub P R Æ A D A M I T Æ titulo) Liber, cui scopus est omnis ut istam sententiam evertat; imò ab argumentis abstinebo brevitati studens, libelli istius principium & fundamentum, Hobbii bonâ cum veniâ, examinabo, ad ipsum sat citò rediturns.

Scopus libri istius est ut evincat ex sententia Scripturæ non omnes Homines ab Adamo originem traxisse, quin fuisse homines (forsan infinitos) Adamo priores: Fundamentum *παράδεισος* hoc sumitur (unicum quod

quod alicujus vel minimi sit momenti) peccatum nempe in mundo fuisse ante Adamum, Vin tu V. D. integrum argumentum? En accipe.

Lex (inquit) data est Adamo.

Verum peccatum legem antecessit,

Peccatum itaque Adamum antecessit.

Quare Homines Adamum antecesserunt.

Nôsti locum Apostoli, unde argumentum sumitur; nempe ad Rom. 5. 12. 13. 14. præcipuè ex vers. 13. Nôsti (me certè melius) Theologos ut plurimum in eo esse, ut legem illam, de quâ loquitur Apostolus, fuisse legem Mosi datam asserant ac eoque propositionem primam eos negare. Verum ego legem Adamo datam fuisse libentissimè agnosco, legem naturæ nempe cordi ejus (ut cum Apostolo loquamur) insculptam.

At nunquam eum evicturum existimo, peccatum aliquando, legem Adamo datam, præcessisse: videamus quomodo argumentum ad hanc rem instituat.

Quod (inquit) in mundo fuit *usq; ad legem*, illud legem antecessit.

Sed peccatum fuit in mundo *usq; ad legem*. Antecessit eam igitur.

Scilicet omnis iste liber in hoc tandem resolvitur argumentum. Quanta quantillis innituntur? quis crederet pusillum illud *usq; ad monstrum* tam immane in se gessisse?

Quare ad fontem potiùs recurramus illicò, dulcius ex ipso fonte — *ἀρχὴ τοῦ* (inquit Apostolus ad Rom. v. 13.) *ἀνομιᾶς ἢν ἐν τοῖς νότοις*. Dicimus Apostoli scopum ad Rom. esse, ut ostendat neminem lege justificari, quin imò peccatum legem semper esse comi-

tatum; (ita ut sensus verborum hic sit, *quamdiu Lex fuit, erat etiam peccatum*; nempe statim à data lege lapsus est Adamus.) Ideoque non benè verti, *usq; ad legem*, quin potius vertendum fuisse, *durante lege*, vel *quamdiu lex fuit, vel ab usq; lege*, isto τῷ ἀρχῇ, concomitantiam quandam, non autem præcessionem indicante.

Cernis in unius vocabuli (τῷ ἀρχῇ) interpretatione controversiam esse sitam; & si illud ἀρχῇ, *quamdiu* significet, atque ita hoc loco reddatur, evanescere statim in auras libri etiam istius fundamentum. Quare ad Lexica statim recurrendum, ibique invenies illud τῷ ἀρχῇ, non solum *usq; ad*, verum etiam *Tantisper, Dum, Quamdiu* significare, eandemque planè vim habere cum μέχρῃ, quæ vox sæpius hoc sensu redditur, ut μέχρῃ ζωῆς *quoad quis vivet*, multa, inquam, ejusmodi exempla ex antiquis autoribus proferri, à Stephano, Budæo, aliisque plurimis, si tibi sit otium, invenies.

Sensus itaque loci istius apertus hic erit, *durante lege, vel ex quo lex fuit, peccatum fuisse in mundo*; neq; ex verbis istis Apostoli, locus erit PRÆADAMITIS: Hoc (inquam) verum erit, etiamsi Autori huic largiamur, quod omni vi contendit, rempe locutum Apostolum de lege Adamo datâ, quod tamen non esse necessarium, alii ostendunt: quare lubrico omnino & falso fundamento nititur iste liber integer: quod hîc obiter ostendere visum est.

Cùm autem verba ista Apostoli pro fundamento sumpserit *Præ-Adamitarum* Autor, cui alia ejusdem argumenta omnia, nonnisi levissimâ rationis specie suffragentur, possintque illa omnia eâ facilitate tolli, ut institutâ aliquâ oratione (meâ quidem sententiâ) indigere minimè videantur. Ad Thomam redeo,

deo, existimans apertum esse, statum hominum naturalem ab ipso fictum, (quem etiam fictum Naturæ statum Cicero appellat) Scripturæ sacræ (nempe Geneseos historię) contradicere.

Atque hæc quidem cum Thomæ ipsi satis esse possint, erunt fortasse ex Discipulis ejus aliqui, qui talem mundi originem, omniumque hominum ab uno Parente ortum, ratione manifestâ demonstrari à nobis efflagitent, importuni nimirum homunciones, atque insulsi, nescientes plerumque quid sit ipsa demonstratio, aut qualia sint ea quæ ejusmodi probationes admittant (nempe necessaria solummodo atque universalialia, non autem ea quæ ex arbitrio dependent, siue humano siue divino.) Et tamen licet demonstrari hoc minimè posse judicem, ejusmodi tamen sententiam eam esse existimo, quæ contrariâ vel diversâ quâcunque sit longè probabilior.

Nempe aut ab uno Parente orti sunt homines, aut à pluribus, aut ortum nullum habuerunt; si ortum nullum homines habuerint, verum æternæ generationes atque infinitæ, unumquemque nostrum præcesserint, concedendum erit actu infinitum numerum fuisse: id quod principia mathematica, nempe axiomata evertit, uti & ipse alicubi ostendit atque Hobbium ipsum consententem, non ita pridem introduxi. Quare relinquitur Homines ortum habuisse aliquando, ideoque vel ab uno aliquo, vel à pluribus ortum habuisse.

Et si à pluribus ortum habuerint, fuerunt isti familiarum primi parentes, vel à Terrâ ipsâ sponte producti (αὐτόχθονες) vel à mundi ipsius conditore facti (vel eo modo quem S. literæ describunt, vel alio aliquo quem possit aliquis referre & explicare) ut Terra corpus iners, atque insensibile, vi suâ, absque mentis ope,

hominem produceret, ratione utentem, mente præditi, (Thomâ licet reclamante) nemo (opinor) sanus dixerit. (Memini de Arcadibus me legisse, qui se ἀνθρώπων *ἀνθρώπων* jaçtabant, verùm & idem Arcadicum pecus, se Lunam ipsam præcessisse prædicabant.)

Quare eò deducta res est, ut à mundi conditore factum esse hominem, ratio ipsa agnoscat; eritque illud ab adversariis ostendendum, Deum plures diversarum familiarum parentes aut condidisse, aut condere debuisse, cùm tamen unum sufficere ad finem & scopum ejus assequendum, sit manifestum. Atque hic quidem fatendum mihi est, potuisse Deum plures condidisse, adeoque ratione non posse demonstrari, hoc eum non fecisse, & tamen si rationi nudæ (seclusâ Scripturarum autoritate) res ista relinquatur, multa esse quæ suadeant, ab uno potiùs reliquos omnes profluxisse, (veluti frustra per plura fieri quod paucioribus fieri potuisset, atque ejusmodi alia) adeoque hanc ipsam hominum originem & propagationem nullâ ratione saltem quæ valida sit aut consentanea, oppugnari posse.

Imò verò, sive mundus æternus fuerit, sive non æternus, sive parentem unum homines habuerint, sive plures, ejusmodi conditioni qualem fingit Hobbius (ubi omnia fuerint omnium, ubi bellum illud plusquam Civile exarserit, *jusq;* datum sceleri fuerit, ubi regulæ Boni Malive nullæ fuerint) nullus locus reperietur unquam.

Dicimus ab uno parente, ut fonte profluentes homines, nunquam in tali naturæ statu collocatos fuisse; neque boni malique regulas & judicia omnia, à constitutionibus humanis petita, verùm axiomata quædam (quæ *ἀρχαὶ* principia vocant) habere eos quæ ab ipsa natura hausisse non immerito dici

dici possit. De qua re mihi est deinceps brevissimè agendum.

Atque est ea res quidem difficilis ut explicetur, nempe quâ ratione lex aliqua naturalis dici possit; quanquam nihil frequentius istis vocabulis occurrat. Apostolus hanc legem cordibus inscribi ait, neque ab eo dicendi genere abstinuit Hobbius. *Lex natura* (inquit) *id est, præcepta rationis naturalis, cordibus inscripta.* L. 282. Verum ipsi non sine multiplici contradictione solenne est ejusmodi sententias sæpenumerò proferre, quæ nullum admittere queant sensum accuratum, atque philosophicum. Quænam erunt præcepta *rationis naturalis*, ubi *ratio ipsa non naturalis*, sed *acquisita* supponitur? quodnam est illud cordi inscribi? num cordis parenchymati? non inquiet; cordi, id est, menti; sunt igitur præcepta quædam inscripta motui Organorum. Certè innumera hujusmodi occurrunt apud ipsum de lege naturæ loquentem; quare non illud mihi vitio vertes, si sensum positionis nostræ philosophicum (non multis) tibi ante oculos posuero, eumque paulò altius diduxero.

Sententia nimirum hæc est, esse quasdam sententias seu quædam judicia de Bono & Malo, honesto & inhonesto, ipsi rationi humanæ, ejusque naturæ, adeò conformes, ut nemo sanus existens & ratione utens, in ea non incidisse potest, vel ut ea possit rejicere.

Nôsti rem esse profundæ speculationis, quæ universam ferè naturæ humanæ explicationem veluti præstratam requireret, ut pro dignitate tractetur, verum illud *ex magis* non expectas V. D. sufficiat ex elementis rem quovis modo deducere, mentemque ita exponere, ut ab omnibus intelligatur, quod istis veluti Aphorismis facturi sumus. Ab intellectualibus incipientes

pientes ad Moralia progrediemur :

1. Dicimus igitur Primò, esse quasdam veritates naturâ manifestas, quæ sunt intellectûs humani objectum. Nempe facultatem habemus omnes discernendi Verum à Falso: atque sunt quædam sententiæ (quædam Affirmationes & Negationes) in quibus Ratio atque mens humana penitus absque dubitatione acquiescit. Ejusmodi Veritates sunt quæ appellantur *κοινὰς ἀπορίας* (principia Mathematicorum & Metaphysicorum) veluti Totum est majus suâ parte. Impossibile est idem simul esse & non esse, neque verò Pyrrhonii sive Sceptici in istis principiis diversam ab aliis sententiam habuerunt, etiamsi ex præpostero mentis judicio existimaverint se ex majore probabilitatis specie, non autem ex aliqua necessitate naturæ in istas sententias incidisse. Esto igitur hæc prima suppositio.

2. Dico secundò quod ex virtutibus iis, quæ sunt in se & naturâ suâ (*τη φύσει*) certæ & manifestæ, sunt tamen *καθ' ἑμᾶς* aliæ aliis evidentiores, adeò ut illæ respectu cognitionis humanæ priores, hæc posteriores, non immeritò dici possint. Nempe sunt præmissæ conclusionibus priores & facilius cognitæ. Ita nimirum Petitiones atque Axiomata Euclidis unusquisque & intelligit statim proposita, & concedit, qui tamen Theoremata posteriora, ipsaque ultima ejus elementa, aut non omninò unquam, aut non absque difficultate aliqua intellexerit. Quia nimirum termini istorum Axiomatum sunt sibi immediati atque reciproci; & sunt Axiomata ipsa sententiæ quædam simplices. At Theoremata ista multo discursu, longâ consequentiarum serie & plurium Axiomatum permixtâ applicatione deducuntur, & Problematum constructio ex Axiomatibus, Petitionibus, Theorematibus variâ tractatione

tione innotescit. Et quamvis ex istis sive Theorematibus sive Problematis ad ipsa principia fiat discursus Analyticè, non minùs quam ex principiis incipiendo ad ipsa Syntheticè provehimur, tamen simpliciora illa quia sunt & magis obvia, rationi omnium hominum consentaneum invenitur, ut ista *Priora*, hæc *Posteriora* judicentur, ut ista sint horum principia habenda.

3. Tertiò dicimus, esse quarundam propositionum scientiam *Naturalem* dicendam. Quæ quidem propositio, quia lumen maximum est nostræ sententiæ allatura, de illâ igitur paulò distinctiùs erit agendum. Nempè cum plures sint modi quibus sententiæ alicujus cognitio, *naturalis* & dici possit & consuevit, ex istis tres istos præcipuos seligemus ut de iis dicatur.

1. Dici potest cognitio naturalis quasi fuerit à naturâ imprimente menti humanæ congenita & connaturalis, atque hoc modo principia tum *Intelligentia*, tum Synterefeos naturaliter esse cognita plurimi tum Scholasticorum tum etiam Philosophorum asseruerunt. Verùm ingenuè fateor me *συνγεννησθαι* istam nondum intelligendo assequi potuisse, atque argumentum Platonis in Menone pro reminiscencia inferenda minimè valere statim ostendemus.

Secundò dici possit Cognitio naturalis quoniam ad illam consequendam valet ipsa ratio naturalis, si sibi ipsi non defuerit. Atque hæc ratione omnis scientia quæ propriè sic dicitur (utpote ex demonstratione orta) omnesque artes, Verbo, omnium eorum Cognitio quorum habemus aliquando claram, evidentem, à principiis ortam manifestis, intellectionem, *Naturalis* est.

Tertiò dici possit Cognitio *Naturalis*, à natura, sive causarum omnium complexione quasi suggerente, & quodammodo (quasi stimulando) adigente, ad

rei alicujus perceptionem, atque ad iudicium aliquod faciendum. Verba sunt forsan duriora, mentem meam aperiā. Est ista hominis à natura facta constitutio (nempe post tot præmissa quibus Hobbii contrariam evertimus sententiam, illud sumere me nunc posse spero) ut Animam habeat Corpori conjunctam, inter corpora, motus atque affectiones corporeas, perpetuò versantem, adeò ut ab ipsa existentia suæ origine, & aliquandiu forsan ante Nativitatem, multò magis ante tempus loquelæ atque discursus Artificialis, necessarium planè sit ut extensi alicujus notionem atque perceptionem habeat, atque adeò etiam Majoris & Minoris extensionis, quin etiam ut perceptionem habeat motus grati & molesti, seu *Boni atq. Mali naturalis*.

Atque harum rerum notiones non magis anima potest effugere, quam possit causarum illam actionem eludere, quarum operatione in hanc naturæ conditionem productus est. Atque horum quidem perceptio prima est (quantitatis & motus cum eorundem affectionibus) suntque ut diximus, nobis statim ab ipsa origine, formata quædam judicia, quæ verbis enunciata, principia Mathematicorum exprimunt. Adeò ut mirum non sit, puerum in Menone, Socrati ritè interroganti, atque terminos sententiarum explicanti verum respondisse, neque valet (ut cernis V.D.) istud argumentum ut præexistentiam Animorum aut Reminiscentiam inserat Platoniam.

Dici igitur jure optimo potest ejusmodi cognitio *Naturalis*. Quoniam in hac Naturæ constitutione, fieri non potest ut non eveniat; corporibus quibusdam cutem moventibus, cute cerebrum, cerebro a
nimi

nimi perceptionem excitante, & sensum modo suo faciente, atque adeò tandem judicia de extenso & motu, de grato atque ingrato eliciente.

4. His ita præmissis atque explicatis. Dicimus Quarto esse non solum propositionum quarundam, quas speculativas appellamus, cognitionem naturalem, verum & principia quædam practica dicenda esse naturalia; nempe naturalia planè, modo jam suprà explicato, sunt judicia jucundi & molesti: Naturalis est ortus passionum animi, quæ omnes resolvuntur, in Mali fugam, & Boni prosecutionem vel desiderium. Sunt hi fines à natura ipsa nobis præscripti, quorum in finium accuratâ disquisitione & dijudicatione, & in mediorum aptorum designatione, omnis humana ratio occupatur. Sentis V. D. quid velim per stimulum impetum naturæ, nimirum illum, quo in cognitionem usûs Organorum provehimur, & facultatum. Scilicet ab infantia manuum pedumque usum paulatim discimus, ut ipsi (quantum fieri potest) nobis ipsis ad finem propositum aliquem assequendum, inserviamus. Eodem modo stimulante natura linguæ musculos & Thoracis pro arbitrio movere discimus, unde balbutire primum & post crebra incassum facta tentamina, loqui incipimus, ut ubi nos ipsi deficimus, aliorum saltem ope atque adjumento, finem (itidem) desideratum assequamur. Naturalia itaque dicenda erunt ista judicia, *Bonum esse appetendum*, *Malum esse fugiendum* (nempe naturale) atque ad istos fines media ubique aptissima atque paratissima esse amplectenda.

5. Istis ita explicatis atque intellectis eodem jure

ure sequetur naturale esse iudicium de Beneficio accepto, adeoque de ipsa obligatione morali quam dicimus, quoniam est inevitabile cuivis iudicium de officio quod beneficii notionem ipsam comitatur; (quod est etiam de subjectione despoticâ intelligendum) Nimirum cum maximo conservationis atque voluptatis desiderio flagrâtes, attamen omnibus ferè destituti ad hanc rem necessariis, à natura in lucem tradamur, cum ope atque auxilio aliorum, diutius sustentemur, cum in aliorum potestate eoque simus, ut possint nos sine ullo periculo destituere, & negligere, in tali, inquam, circumstantiarum omnium (quas omnes non est referendi locus) Syzygia; ab ipsa natura ejusve conditore constituti, effugere nullo modo possumus beneficii atque officii meriti & demeriti, i. e. boni & mali apprehensionem atque iudicia de iisdem, quæ quidem iudicia eâ ratione quod inevitabilia sunt, in ea conditione quâ sumus à natura constituti, *Naturalia* esse dicimus, & *leges natura* quarum à natura ipsa deductionem nunc aliquo modo ostendimus.

Non mihi animus est in legum singularum quarumvis deductionem descendere, propositum est ostendere quasdam esse à natura præscriptas sententias de Bono & Malo, & quâ ratione (philosophicè loquendo) *naturales* ejusmodi sententiæ dici possint, neque tamen frustra beneficiis atque officiis naturæ momenta æstimamus, cum hæc ipsâ in re elucescat adeò Virtutis & Vitii notio eaque ab ipsa natura, non autem à legibus humanis exorients, ut cum nulla ferè gens actionem aliquam in ingratos Forenses admittat, nihil sit tamen sanis omnibus ipsâ turpius ingratitude, magisve detestandum. Sunt itaque ipsâ naturâ ordinante, & ad ea quasi provocante, iudicia de Bono & Malo

Malo, quod iustum etiam & iniustum omnes ante Hobbium appellare solebant, atque uti ex pulsu atq; agitatione cerebri, inducuntur atque exagitantur iudicia atque principia Mathematicorum, ita ex variarum rerum atque actionum perceptione & collatione (quæ ingerunt sese intellectui, & quas effugere non possumus) oriuntur principia quædam syntereoseos, quæ sub legis Naturalis nomine intelligimus.

Sunt hæc quidem principia Mathematicis istis posterius hausta ab objectis, notionesque quæ subsunt iis sunt magis contextæ, verum naturalia non minus sunt dicenda, neque puer aliquis (ab elementis naturæ exordiendo) distinctè atque ordine interrogatus in istis à veritate magis deflecteret, quàm puer iste Socraticus, de quo sumus locuti.

Hæc (inquam) ratione explicari aliquatenus potest, ista impressio, de qua loquantur in generali: quod ad regulas particulares vel singulares attinet, illa ex variâ objectorum comparatione oriuntur.

Ita ex nostrum, atq; mundi ipsius contemplatione, in causâ primæ agnitionem, primique motoris attributa (Adolescente aliquantulum ratione) paulatim evehimur. Ex consideratione primi illius motoris & nostrum, in principia Religionis atque Cultûs naturalis; ex nostri ipsorum atque aliorum hominum contemplatione, in principia iustitiæ naturalis incidimus, eâ quidem necessitate & certitudine, ut nulla unquam Gens tã fera fuerit & barbara, quæ ista principia (hujusmodi iudicia atque *προλήψεις*) non fuerit palam professa, hinc ista principia *τὸς Θεῷ νόμος*, legem *sempiternam*, *ὑποδίνμων* ex Deorum præscripto immutabile, antiqui Philosophi appellarunt, hinc legem hanc cordibus inscriptam Paulus esse asserit. Neq; inventus est præter unum aut alterum (Carneadem aut Epicurum) qui

qui justum & iniquum à natura sejunxerit, atque illud utili & inutili definiverit.

Verum non obstat in omnibus naturæ legibus, conspicua ubique utilitas, quo minus à natura hæc esse dicantur, nam neque partium corporis usus (Physico aut Anatomico se statim ostendens) evincit à causa finali, partium figuras, motusque Harmonicos fieri; at illa ab Agente moventur & fiunt. Ita in istis naturæ effatis accidit, modo licet difficulter observando, uti imprimetur loquelæ, ambulationis, atque reverà ratiocinationis ordinatæ habitus acquirantur, quorum discendi modum, dum pueri sumus vix animadvertimus, adulti difficulter recolimus. Quæ tamen (minimè tum conscii) à natura olim stimulante, hausimus, & naturalia modo à nobis explicato sunt dicenda.

Atque hæc quidem hætenus de statu naturæ & de lege naturali *αὐτοχρηστικῆς* effudisse sufficiat. Liceat argumenti summam repetere.

Statuit Hobbius, illudque habet pro doctrinæ omnis Civilis fundamento, statum hominis Naturalem eum esse, ubi bellum est singulorum in singulos, ubi omnia æqualia, ubi omnia *ἀνάλογα*: evicimus ejusmodi statum nullum esse vel fuisse unquam, omnes ab uno parente originem traxisse, eum legem à mundi conditore accepisse, reliquos legem quandam naturæ habere, seu regulas boni & mali, neque eas omnes à legibus humanis mutuari, quare ad alterum Politicæ Hobbianæ cardinem aut fundamentum accedamus. Ubi de Origine Imperii ejusque Limitibus est differendum.

CAP. 2.

De Imperii limitibus ejusq; origine, sententia Hobbiana examinatur.

NOlo ut de limite Imperii alicujus materiali, me quis loquentem intelligat, neque enim terminum eo modo intelligimus, at illud ostendere animus est, quale statuat ipse Hobbius imperium Civile, quousque vim ejus extendar, & quibus rationibus atque fundamentis sententiam ejus inferat & stabiliat, ubi de Origine Imperii nonnulla erunt etiam brevissimè dicenda.

Meministi me illud suscepisse, duobus istis, doctrinæ Civilis Hobbianæ integrum corpus contineri, in Libertate Naturali atque in Imperio Civili, in eo quod omnia omnibus in statu naturæ æquè liceant, atque in eo, quòd nihil in Imperio liceat, nisi quod Magistratus (quem uno *Principis* nomine, licet variae sint species, deinceps brevitatis causâ indigitabo) jusserit, nempe in statu naturali omnimodam esse libertatem hominibus creditam à natura, in civitate nullam alicui, nisi uni principi relictam, verum servitutem summam ipsis impositam, nempe pecus hominum esse servum pecus.

Atque illud jam antehac innotuit, nunc autem hoc potius manet ostendendum. Ubi tamen brevissimus sum futurus, quia sententias specie non admodum amabiles sum prolaturus.

Dico igitur illam esse Imperii Hobbiani conditionem, ut nihil subditis relinquat, imò verò Deo ipsi nihil, quo possint tanquam Privilegio à Principis
pote-

Potestate subducto jure bono frui. Sententia illud requirit, ut per omnia rerum genera percurrento, etiam ex operibus Hobbianis evincam. Ego verò ex Leviathane illud faciam, possem autem, si res postularer, prius generaliter illud ostendere, deinde particulatim, per conditiones hominum & status, per rerum species omnes percurrento.

Nempe cum nihil sit naturā bonum aut malum, Principis est regulas boni & mali; cum omnia naturaliter sint omnium (ex ejus sententia) Principis est regulas mei & tui constituere L. 91. *Nempe proprietatis regula (sive Mei & Tui) item Boni & Mali, liciti & illiciti, sunt leges Civiles.* Miraris quò tendat oratio; Ecce enim bonum saltem & malum, meum & tuum, stabilitum & fixum, & existimare potes me ipso statim in limine impingere, quanquam etenim ante leges has latas omnia fuerint communia, *nunc* autem *Meum esse meum* planè, *Tuum esse tuum*, ut nemo illud jure possit eripere, sive de bonis *externis*, seu fortunæ, sive de *internis*, aut *Corporis* aut *Animorum*, dicatur. At falleris (vir Inclytissime) nam post leges latas manet ipsa distributio Mei & Tui principi adhuc integra, quasi leges nunquam latæ fuissent, eā de re; *Distributio (inquit) Mei & Tui, seu proprietatis constitutio, ad principem pertinet.* L. 127. Imò verò *ad civitates dissolvendas apta est ea doctrina, qua statuit privatos homines, absolutam habere bonorum proprietatem, que juxta principis excludat.* L. 169.

Cernis omnia esse principis, jure suo, subditisque cedendum esse statim, si forsan ipse

Diceret, hæc mea sunt, veteres migrate Coloni.

Deserendum nempe tibi esse Hortum illum amœnissimum & cultissimum.

— *Jugera pauca*
Hortis Hesperidum beatiora.

Ubi solemus, nemini invidētes, cælis nunc inhiare, Planetarum motus atq; facies observare; nunc Lunæ labores aut maculas, nunc Jovis satellites Venerisve cornua, nunc Saturni Anfulas variasq; formas, nunc Lunā ejus nonita pridem à nobis observatam, Telescopio cōinūs intueri. Deinde verò ad telluris ima, ad mineralia speculatione mentis, manusque ἐν χειρὶ σῆσαι descendere, tum demum Plantarum innumeris speciebus oculos oblectare & animos, atque ita per Animalculorum quorundam (æterno Maronis carmine celebratorū) observationes, transeūtes orbem naturæ universum, contemplando implere; atque ipse quidem, si mihi vena foret, si me furor aliquando Poëticus urgeret, non minore jure quàm Hobbius olim de *Peccis Mirabilibus*, de horto hoc tuo Carmen componerem, sed cui bono aut fini? cū deferendus sit ipse tibi amantissimus hic hortus (princeps si jusserit) eaque omnia quæ vitam faciunt beatiorē.

Ast ego faciam, inquires, virtute & optimarum rerum studio (quibus jamdiu inclytissimus evasisti) ut jure hoc mihi minimè contingat, vi quidem fieri hoc posse, jure non posse; at falleris V. D. *neq; enim ullam injuriam Princeps facere potest.* L. 90. Non? inquis! Ergo potest vel vitam ipsam homini innocenti absque injuria tollere. Et tu forsan credis ἀτοπον μὲν te nunc Hobbio objecisse; nihil est. Imò (inquit) *Princeps subditum innocentem interficere absq; injuria potest.* L. 109.

Quare nihil esse cernis relictum, bonorum aut corporis, aut Fortunæ quod sit *meum* vel *tuum* dicendum;

dum; neque enim de libertate dicendum erit post ista, quoniam conjuncta sunt ea, & qui vitæ & necis potestatem habuerit, ita ut possit de iis ad arbitrium (etiam post leges constitutas) discernere, ipse certè humana omnia in manu habebit, atque istud reverà argumento (quod aiunt) à fortiori inferetur.

Scio te ista V. D. non multum movere, cui illud studium est, ut mundum eo quo dignus est contemptu prosequaris, ita nimirum ad cælestia compositus, ut terrestria despicias, imò verò valeant hæc (inquis) atque in ea jus habeant Terrarum Domini, modo ea quæ Dei ipsius sint facta atque tecta ipsi relinquant. Neque etenim metuendi sunt ipsi, qui corpus interficere valent, animam autem mittere nequeunt in Gehennam. Quare hominibus in humanis, Deo ipsi in divinis parendum erit, neque curanda est ædèo vita hæc brevis, modo statim è carcere hoc excedentes, exceperit beata immortalitas.

Atque tu quidem immortalitatem illam meditari soles, atque animi è corpore excessum, verum aliam Hobbii mentem esse ostendimus; cui mens est motus Organorum, qui quidem morte penitus cessat, neque poterit unquam idem reviviscere. Tu legem divinam meditaris, ipse legem, quæ in homines vim habeat, præter Principis voluntatem nullam agnoscit. Scio te excandescere hæc legentem; nempe zelo Dei ipsius correptum, ferre ista non posse, annon (inquis) legem naturæ cordibus inscriptam à Deo accepimus? annon legem Scripturæ? eritque in hominis potestate leges istas abolere, earumque vim tollere?

Quin tu verò festina lentè V.D. de lege naturæ, si-ve regulis boni & mali, dicentem eum audivimus, accipe de Scripturæ lege nonnulla, ut mentem ejus perfectè intelligas,

Te

Te quidem eā in sententia esse novimus, libros Scripturæ à Deo ipso traditos, vim eam habere ut omnes obligent ad fidem pariter atque obedientiam, neque posse nos sive Papam, sive Principem eximere hâc obligatione.

Per libros Scripturæ, intelligis *Canonicos*, benè habet! *At libros Canonicos Princeps solus constituit.* L. 199.

Existimas forsā fallaciam aliquam subesse voci *Canonicos*, attamen teneri omnes ut credant Scripturis, atq; illud Hobbium etiam velle. At falleris ipse, nam *nemo nisi legibus humanis tenetur Scripturis credere (si forsā Deus ipsi supernaturaliter eas non revelaverit)* L. 205.

Quid est (inquis) quod audio? num verbo Dei ipse non erit credendum, nisi princeps hoc jusserit? *Imò (inquit) Princeps solus illud definire debet & determinare, quod sit nempe verbum Dei.* L. 250.

Itane verò? inquis! Usque adeone Deus omnia Principi reliquit; Quid si legem traditurus, miracula in testimonium simul exhiberet? Quid si virga serpentem devoraret? flumenve in sanguinem converteretur? quid si Locustas omnia consumentes cerneremus? si tenebras palpando sentiremus? si in legis ipsius traditione montem fumantem conspiceremus? tonitrua mugire, fulmina præmicare? terramque demum ipsam, factō hiatu, rebelles atque legem averſantes vorantem cerneremus? Vel si forsā aliquem legem Dei nomine ferentem, in universam simul naturam, absolutum imperium exercentem conspiceremus? In Angelos & Dæmonas, in Stellas atque elements, in Meteora, plantas, animalia, homines, in morbos eorundem, in vivos & mortuos; si mortuum ipsum aliquando cerneremus

eripientem se faucibus inferni, si ista (inquam) & ejusmodi alia contingeret intueri: vel si de facto ita constaret, ut nullus esset homini sano locus dubitationi relictus, quid tum porro agendum? an esset de voce divina dubitandum? an oporteret ad Pharaones, Caesares aut Pontifices rem istam deferre, atq; ab ipsis licentiam petere, ut vocem divinam agnoscere-mus? Attende igitur. Si de miraculis audiamus, recur-rendum erit (inquit) L. 237, 238. ad magistratum, e-jusq; judicio standum. An factum fuerit, vel non fue-rit, an miraculum fuerit, vel non: credere possunt, profo-teri non debent, nisi jusserit Magistratus. (Nempe hic sensus est eorum quæ loco citato pluribus traduntur) Quærendum est primum an aliquis *ἢ ἀρχόντων* credi-derit (vide Joh. 7. 48.) præstatque hominibus quam Deo obedire (vide Act. 5. 29.)

Imò verò non vox sola, sed ratio ipsa est magistra tui in obsequium tradenda (*ratio inquit nostra, non debet de istis judicare, (loco jam laudato.)*)

Scio tibi mentē illam esse, posuisse Christū in terris Ecclesiam, in Ecclesia ministros, quorum est alios ordinare, Evangelium prædicare, Sacramenta minis-trare, de Hæresibus judicare, potestatem Clavium exercere; Ministros, inquam, à mundi hujus Principi-bus diversos, qui ministerium ab Imperatore Roma-no non acceperint, illudque, reclamante licet Nerone aliisque principibus, exercuerint. Atque aves, opinor, audire quid de his sentiat noster Politicus.

Quid? nisi hæc omnia Principi ipsi temporali eo no-mine convenire quod princeps sit? Nempe Principes supremi sunt populorum Pastores (*ποιμνῆ λαῶν* Home-rus principem appellat, Rex idem hominum Phæbiq; sacerdos) & potestatem habent Pastores ordinandi, quos-cunq; voluerint, L. 295.

Imò

Imò à Principe reliqui pastores omnes jus suum docendi atq; predicandi accipiunt (ita Apostoli, opinor, à Cesare jus suum obtinuerunt) Rex ipse pastor est jure Divino, reliqui nonnisi jure Civili. L. 296.

At alia (inquis) sunt munera ministrorum, ea nimirum à nobis jam supra enumerata, forsan aliaque. Vis igitur ut Principes sacramenta ministrent? *Possunt si velint, nempe potestatem habent Baptizandi & Χειροτονίας, non aliter ac scientias (putà Astronomiam) legendi. L. 297.*

Neque est ut multis ego te detineam, *Judex Hæresium præter principem Civilem nullus est. L. 317.*

Et quod ad potestatem Clavium attinet, *quomodo-cumq; debent illa intelligi, dubium nullum est, quin ea potestas sit principum Civilem. L. 302.*

Imò verò qui Principem audit, Christum audit, & qui eum non audit, Christum non audit. 309. Atq; ipse demum Persona ea est, cui est credendum. L. 323.

Credendum (inquis) in omnibus? imò in omnibus atque obediendum. Quid igitur si Princeps juberet ut aliquis Christum linguâ negaret? faciendum est (inquit L. p. 271.) *Cùm ista professio oralis, nonnisi res externa sit, & gestus quidam corporis. Quare (inquis) Christianus, si jubeatur, debet se Mahometanum, verbis & communiione profiteri, & Mahometanus ex adverso Christianum. Imò verò debet ex mente Thomæ hujus nostri, atque illud disertè profitetur loco jam laudato.*

Nunc autem quid faciam V. D. vis ut ista argumentis evertam singula? longa certè instituenda esset oratio, oratio meâ sententiâ inanis, utpote quæ illud ageret quod millies jam ante actum est. Vides ipsum Christianam Politiam instituentem illud admittere quod maximè detestandum Ethnico (circo) videbatur, aliud mente gerere, aliud linguâ profiteri.

Χρη μὲ δὴ τὸν μῦθον ἀπληγῶς ἀποπειν
 Ἐχθρὸς γὰρ μοι κτείνῃς ἰμῶς ἀίδαο πύλῃσιν
 Ὅς ῥ' ἔπειρον μὲ κ' ὕπαι ἐνὶ φρεσὶν, ἄλλο δ' βλάζεις, inquit A-
 chilles Homeri.

Cernis interim quid expectandum in Religione; vides sententiam ejus de Finibus Imperii, nempe nullos eos esse, verum omnia Divina atque Humana ex Principis Hobbiani arbitrio pendere; videndum est quas adduxerit sententiæ tam immanis rationes, etque ad ima usque fundamenta sunt referenda.

Nosti eum illud suscepisse, omnia sua Politica (vno excepto, quod est de optimo Imperii genere) esse legitimè demonstrata, cernis porismata & theoremata, quorum primò lemmata videbimus, deinde lemmatum ipsorum ultima principia, ut ita rem integram penitissimè perspectam habeamus; ero autem brevissimus.

Vides duo esse rerum summa genera, in quibus absolute atque illimitatum est ipsi imperium Civile, nempe Humanarum rerum atque Divinarum, Accipe utriusque rationes.

Unusquisq^{ue}, (inquit) civis unicuiq^{ue} obligatur, agnoscere ut suum, quodcumq^{ue} fecerit Princeps. L. 89. Nempe Principis actionum omnium authores sunt subditi (vel ipsis auctoritatem dederunt) imò suæ ipsorum sunt Principis actiones. L. 128.

En lemmata ea, quorum illud est porisma; principem nemini injurium ullo modo esse posse, quoniam in omnia (sive res spectemus, sive personas) omne jus habet. Quare tollitur omnis subditorum proprietates, proprietates bonorum.

Quoniam autem Principis est leges condere, easque interpretari, quoniam voluntas ipsius lex est, inde

de cætera ea porismata de divinis rebus consequuntur. Nempe Princeps est cui omnia in universum licent, subditus cui nihil præter illud unicum, quod Princeps voluerit. Cernis ex ipsa Principis Hobbiani definitione hæc ipsa constare, atque hæc quidem satis manifesta, nisi illud ulterius prosequaris, quærendo unde factum sit, ut ea sit Principis potestas; reverà maliciosus es (quod tamen non soles) ista importuniùs urgendo. Sed si tantus amor— habebis ea brevissimè, quæ integram sententiam Hobbianam complectuntur.

Primum igitur homines in statu naturæ considerandi sunt, deinde in regimine Politico; status naturæ est status belli omnium in omnes, ubi justum aut injustum, bonum aut malum nihil est, ex hoc statu transeunt in Rem-publicam, quæ est vel pactis, vel victoriis acquisita. Reipublicæ ex instituto (vel pactis acquisitæ) hæc ipsa est generatio.

Huius (inquit L. cap. 17. pag. 87.) rei via sola ea est, ut populus in unum hominem vel societatem vim omnem suam & potestatem conferant, qui personam eorum gerat, atq; ut unusquisq; agnoscat seipsum autorem esse, actionis cujuscunq; quam vel personam eorum gerens ipse fecerit, vel in causa fuerit ut fiat, in rebus qua ad pacem communem spectant, atq; ut voluntatem eorum ipsius voluntati, judicia judicio submittant— Hæc (inquit) est generatio magni istius Leviathanis, vel (revertentiùs loquendo) mortalis istius Dei &c. (Ecce iterum Deum à Thoma factum, nempe Leviathan est Dagon iste Philistæorum, sed intempestiva sunt ista.) Habes generationem Reipublicæ Hobbianæ ex pacto constitutæ. Verùm est aliud imperii genus vi adeptum (de qua voce nemo lites moveat, meminim enim me apud antiquum aliquem autorem, illam hoc sensu legisse) Quando homines vel singulatim

vel multi in unum collecti, suffragiorum majore numero, mortis vel vinculorum timore, auctoritatem dant istius hominis vel concilii actionibus, qui vitam & libertates eorum in potestate habuerint. L. c. 20. p. 101. Habes hunc Politicæ Hobbianæ ultima fundamenta, nempe Reipublicæ Hobbianæ generationem, unde omnia symptomata atque affectiones demonstrantur.

Meministi V. D. Philosophiam huic Philosopho esse *pari operæ* ex conceptis generationibus, & rursus generationum ex phænomenis acquisitam cognitionem; atque hanc quidem mihi definitionem increpatam eo nomine fuisse, quod Hypotheticæ doctrinæ, potius quàm reali, atque Geometriæ, potius quàm alteri cuicunque Philosophiæ (sive Naturalis, sive Civilis) parti, congrueret. Nempe Geometriæ illud opus est, ut ex principiis, sive veris sive concessis, consentanea deducat (quod etiam generaliter enunciatum de Logica est dicendum) verùm ubi de rerum ipsarum natura agitur, ubi de Bonis hominum universis, externis, internis, æternis; non satis est Generationes hominum, Rerum-publicarum, Ecclesiarum fingere, atque ex ficta vel præsumpta generatione, ejusque definitione, phænomena de bono & malo, de justo atque injusto deducere, verùm attendendum est potius ipsam ad rerum naturam, ad hominum statum, eaque dicenda sunt & statuenda, quæ sunt istis consentanea. Imò verò si quis ab eo quod esse potest, ipsius naturæ statum atque veritatem velit concludere, necesse est ut in infinitos errores atque absurditates minimè ferendas incidat; Est quoddam exemplum Hypotheticæ hujus doctrinæ, uti est à naturali diverfa, dialecticis usitatissimum. Si Asinus (inquiunt) volaverit, pennas habuerit: si quis in hanc rem animum intendens, eam Asini generationem supponeret, quæ alas

las ipsi tribueret, deinde (ista prosecutus) consequentias ex hypothesis deduceret, nempe volare ad Lunam usque asinum posse, ibique incolas Lunares quâ voce quâ aspectu terrere, faceret certè quod esset hominis otiosi. Verùm si Hypotheseos initio sumptâ oblitus penitus, ex eo quod fingi hæc possent, concluderet atque assereret eam esse asinorum naturam, ut & pennas habeant, iisque ætherem scindant, ad Lunam penetrent & quæ sequuntur; non illum otiosum esse diceremus, sed planè in animalis istius naturam transmutari (verbo, Asinescere.) Non est ut mihi succenseat hic vir, de Asino loquenti, nempe conatur unicè ut (Issacharis instar) oneribus se minimè ferendis, universa gens humana subjiciat, duobus nempe oneribus Civilibus in rebus atq; in divinis; cùm autem hoc nonnisi vi quâdam sit faciendum, videamus quâ vi rationis libertatem nobis, auctoritatem Deo ipsi, tollat.

Si, inquit, is sit hominum status naturalis qualem descripsit, si ea eaque sola sit Reipublicæ sive instituto sive vi constitutæ generatio, quam nuper ex ipso descripsimus, sequentur ea omnia quæ nuper ex ipso retulimus.

Benè habet, largiamur ista consequi (quod tamen non est necesse) quid deinceps sequetur? Sequetur, inquit, eam nunc esse Principis potestatem quam descripsimus. Nempe cujusunque Principis potestatem absolutam esse, nullis omnino limitibus restrictam, (verbo) eam quam ex ipso accepisti. Quinimò Principes (velint, nolint) eam reverà potestatem habere, sibi nimirum (ut Principibus) essentialem & inseparabilem, aitque se istam Principum potestatem demonstratione legitimâ evicisse.

Quæ sit mea de potestate Principum sententia, noli tu satis (vir summe) neque me ex eorum numero

esse, qui satis amplam ipsis inviderint; at tamen quem non ad rabiem usque moverent hujusmodi demonstrationes?

Hæc (inquit) est Principum potestas. Quare? Sequitur (inquit) ex definitione status natura atq; patet.

Verum unquamne fuit ô Thoma (liceat enim ipsum interrogare) is *hominum status* quem tu supponis, ubi nihil bonum aut malum, ubi libertas illa fuit &c. *Non* certè, inquit, *nunquam fuit is hominum status generalis.* L. pag. 63. Imò nec esse potuit ab uno Adamo prognatis omnibus qui legem ipsam à Deo accepit, posterisque tradidit, non verbo solum, sed ipsa animorum propagatione, modo à nobis suprâ descripto.

At, inquit, *Pactum* hoc, omnium cum omnibus illud habet, ut potestas absoluta ista atque indefinita, in omnia se extendens, principibus conferatur.

Verum unquamne fuit ejusmodi pactum initum ab hominibus? potestne ex omni temporum sive antiquiorum, sive recentiorum scriniis, & memoria, ejusmodi *pactum* aliquod proferre Thomas, ubi homines singuli hominibus singulis juraverint, alicujus unius judicio (qui fidem nullam de regulis imperandi sit iis daturus) in rebus omnibus vitæ hujus & futuræ se credere, cui deinceps jus omne sit futurum in corpora, in fortunas, in vitam ipsam, in animos immortales? Unquamne (inquam) in universi terrarum orbis parte aliqua, Respublica eo modo fundata est & constituta?

Ipsæ certè concedit L. c. 30. p. 176. *nihil tale unquam repertum fuisse in rerum natura*; imò necesse est ullam si frontem habuerit, ista vel ut concedat, vel ut contrarium evincat, quod nusquam eum acturum esse suscipio.

Cerè

Cernis quo tandem (ultimò) resolvatur Politia Hobbiana, omnesque ratiocinationes istæ de quibus tam magnificè sentiunt ejus discipuli, nempe si fuisset ea hominis natuta, qualis ea nunquam fuit, si forent ea pacta inita, quæ nunquam inituri sunt homines, quæ nunquam inierunt; quid tum? tum inquis futuram esse eam Principis potestatem, quæ nunquam est futura. Imò inquit Hobbius, tunc esse reverà nunc eam principum potestatem, eamque essentialem, inseparabilem. Dic obsecro vel dicant Hobbiani, annon eodem planè jure concludere possimus, Assionem eum de quo jam sumus locuti, mira in cælis perpetrare?

At sperat tamen Hobbius exoriturum esse (è terrâ opinor, aut spuma maris, unde ortus est Leviathan.) Principem qui ejusmodi imperium absolutum exercebit, atq; tum quidem Leviathanem ipsum S. Scriptura loco, pro verbo divino habendum fore. (L. pp. 193. 176. 177.) Nempe hic sensus est eorum quæ locis jam laudatis lector inveniet. Imò verò

*Qui Bavianum non odit, amet tua carmina Mavi,
Atq; idem jungat vulpes &c.*

Et tu nunc ad ista attendens (vir inclytissime) non illud (spero) mihi vitio vertes, quod longum adversus ea (quâ libertates, quâ Religionem spectant) tam profana dogmata orationem non institui. Nempe non fuit hic locus (quod tamen plurimis videri potest) de istis fusiùs inquirendi, neque enim de eo quæstiones nunc sunt, An verum sit, eam esse Principis potestatem, ut possit de divinis omnibus & humanis pro jure suo decernere, an possit Mahometum vel Diabolum, lignum vel lapidem hominibus proponere colenda, ea omnia Deo & Christo

sto præferre, illudque *jure suo*; an facere ut cultus omnis corporis & linguæ, (cùm mens interim nihil sit præter motum corporis) istis exhibeatur, atque hæc justè, ut homines sint in Deum & Christum Blasphemi: non (inquam) hoc quæritur, neque expectas ut in ista incurramus; verùm illud potiùs an ex principis, naturâ notis & veris, Politicam doctrinam (cujus magna pars ista sunt) deduxerit Hobbius, eamque (quod jactat ore minimè [opinor] verecundo) legitimè demonstraverit. Atque tu quidem V. D. eâ de re judicabis, interim nolo ut te fallat, ubi Principem dicit *legi divini atq; naturali* obnoxium esse, *civili non esse*; nempe popularia sunt ista, in quibus sæpius sibi contradicit. *Lex (inquit) naturalis & civilis se mutuò continent & coextenduntur* (loco à nobis antehac laudato) at Princeps subditus non est legi Civili. p. 137. At *(subditus est legi natura. L. 169. Subditus est (inquit) legi divina. ibid. At ejus est constituere de lege divina,* (ut suprâ) nempe lex naturæ nulla ipsi est (ubi principem ei subditum asserit) præter appetitum, nempe manet ipsi Princeps in statu naturæ, ubi nihil est in se bonum aut malum, (ubi eorum mensura est appetitus) è quo statu cæteri, pactis initis, dejiciuntur; hoc quidem disertis verbis alicubi habere eum memini, verùm non eâ de re lites ab ipso aliquando metuendas esse censeo, quare Civitatis Hobbianæ fundamenta aperuisse hæcenus, oculisque hominum exposuisse placuit, ad Religionem ejus transeamus.

SECT. VI.

CAP. I.

*Ubi queritur, an doctrina, Hobbiana sit Christianæ
Religioni amica vel inimica.*

Absolutis (pro exercitationis institutæ modulo) cæteris, restat (vir amplissime) ut de iis quæ ad Religionem pertinent nonnulla adjiciamus; quâ in re peragendâ oppressum me statim molestâ cogitatione profiteor, metuendum enim esse sentio, ne sit omnibus ingrata ea quæ futura est harum rerum tractatio: Cum etenim sententias eas quas maxime detestandas aliquis opinetur, vel referre sit injucundum, cum ulcus aliquod empyemate pestilenti tumidum attingere sit tangenti periculosum, laboranti grave. Vides quid mihi Thomæque nostro sit expectandum, si forsan eum in Religionem (quâ omnia tum divina tum etiam humana constant) impingere contingat. Quod si ea multa sint, si tetra admodum, quæ religioni adversentur, atque ipse breviori oratione ista transivero, vereor ne nihil aut parùm egisse plurimis videamur; si longâ orationem protraxero, epistolæ fines erunt necessario transiliendi; quid faciam V. D? Nempe exorandus es, & tecum omnes qui sunt futuri opellæ hujus lectores, ut ad Titulum ipsum atque ad opus initio propositum atque susceptum velint respicere, non patientur ea, ut res ista pro meritis tractetur.

Fuit ea mens mihi calamum in manum sumenti, ut quantus esset in Philosophia Thomas, paucis ostenderem, ubi mirificè seipsum jactare solet, atque quicquid est uspiam eruditorum hominum (in Academiis præsertim)

sertim) provocare atque laceffere, neque etenim Theologiam ipse proficitur, verum enimvero *Philosophus* ipse sum, inquit, *Philosophorum primus*, *Philosophus per motum*, cui, comparati reliqui velut umbræ vagantur.

—*Caput altum in prelia tollit,
Ostenditq, humeros latos, alternaq, jactat
Brachia protendens, & verberat ictibus auras.*

Atque ipse (uti nosti) steti aliquamdiu, expectans num quis vellet vires in Philosophia Hobbianas experiri, donec tuis aliorumque præclarissimorum hominum objurgationibus excitato, subiit ea cogitatio

—*Si nemo velit se credere pugna,
Qui finis standi? (Si nemo ex agmine tanto,
Audet adire virum, manibusq, inducere castus.)*

Quare calamus arripio, epistolam hanc scribo succisivis temporibus, quasi stans pede in uno; ipse interim in Theologia se minimè exercitatum proficitur, hominum millibus uti novit obnoxius. Atque ipse quidem, Deo vitam largiente, si ita necessarium videbitur, in hanc rem forsan aliquando latius atque accuratius inquirere potero.

—*At nunc non erat his locus.*—

Meministi eum in libello de Corpore, Academicarum Vindicem eo nomine præcipuè, *stultum, mendacem, sceleratum* appellasse, quòd ipsū (testè aliquantulum uti Hobbius opinatur, neque etenim illud disertè unquam affirmavit) ex libellis editis, atque ex communi nostratum sententia, religioni inimicum esse innuerit. Sufficiat de Vindici istius fide paucis disputare, *Extremum hunc Arethusa mihi concede Laborem.*

Statui autem quædam de Religione Christiana,
non-

nonnulla de religione in universum proferte: ubi statim innotescet, an fuerit vel non fuerit Religionis amicus vel inimicus. Cum autem vocabula ista Religio Christiana possint significare vel regulam Canonem, vel statum & conditionem eorum qui regulam istam profitentur se recipere, vel actum mentis ipsius internum quo regulæ & Canonis eorum conformes sunt homines, vel ab eo dissentiunt, nolo ista accuratius discutere, nempe in idem res omnis redit, ubi de Religione Hobbiana quæstiones moventur. Nempe Religionis Christianæ inimicus est ille qui regulam pervertit, ejusve auctoritatem minuit aut tollit, qui Christianorum Ecclesias perturbat, qui exercitium religionis istius Spirituale ex hominum animis evelle conatur; atq; ista etiam singula communem quandam & reciprocam habent ἐνεργείαν, unoq; eorum existente reliqua sequetur. Neq; verò opus est, ut Christianæ Religionis descriptionem aut delineationem aliquam accuratam, secuturæ disquisitioni præmittam, nempe notum est tibi aliisque (opinor) omnibus quicunq; hæc nostra sint lecturi, quid sit Religio Christiana, qualia habeat principia, quid præsupponat & summat, quæ scopū habeat, quid præstet, quid polliceatur. Quænam ea sint etiam, in quibus à Gentilium, Judæorum, Mahometanorum dogmatis abhorret.

Nempe Religio Christiana ea ipsa est quam nobis explicat & proponit Scriptura sacra (utroque Testamentò constans) quæ Canonica nobis appellatur & Verbum divinum, illudq; quod Canonicorum istorum librorum vel auctoritatem Divinam tollit, vel sententiam evertit, Christianæ Religionis inimicū est dicendū.

Nosti tu satis V. D. de Canonis hujus amplitudine, inter Christianos lites esse (nusquam fortasse dirimendas) & de eo etiam acriter disputari, annon & ea quæ traditio-

traditione solâ nituntur, sint etiam in Christianorum regulam vitæ trahenda; neque tamen hæc obstant quo minus res nostra & Vindicis discutiatur, istis minime diremptis, neque etenim Christiani isti qui traditiones Ecclesiæ, librosque nobis Apocryphos pro regula fidei aut morum habent, de Canonicis iis, quos nos vocamus, aliquo modo dubitant, eorumve autoritate: Quare manet istud Christianis omnibus divinæ autoritatis esse libros illos, & quicquid istis adversatur, Christianæ religioni inimicum esse.

Illud certè manifestius est, quàm ut fronte ullâ vel negari possit, vel operâ ad hanc rem institutâ *probari*, (ita nimirum Paterculus olim Catonem *laudare* nefas esse duxit) Scripturæ istius sacre divinam esse & fuisse semper Christianis omnibus autoritatem (neque illud nunc quæritur, an fidem istam & reverentiam meruerit hic liber, verum an inter Christianos illam obtinuerit) aio pro verbo divino habitum esse ab omnibus Christianis codicem illum sacrum, eorumque fidem atque religionem autoritate divinâ niti, nempe regulam hanc à Christianis receptam esse, eo nomine quod Deus ipse regulam istam præscripserit, nobisque eam proposuerit; ita ut in potestate non sit mortalis alicujus, adversus Dei ipsius verbum istud aliquid in religione constituere & stabilire. Hæc (inquam) est Christianorum omnium (nempe eorum qui religionem Christianam intimè colunt) sententia.

Dices quæstioni esse obnoxiam istam sententiam, illudque ostendi debere esse reverà Scripturas sacras Verbum Dei ipsius, iisque divinam esse autoritatem.

Nosti me alibi V. D. exiguo libello istam Scripturarum autoritatem divinam ex principiis rationi humanæ congruis ostendendam suscepisse, cujus sermonis

monis summa hæc est, si veri sint libri, divinos item eos esse, nempe ex sententia ipsorum librorum, omnis Scriptura *θεόμνηστος*, neque de veritate eorum ullo modo dubitandum esse iis, qui ratione sobriâ utuntur: si vera sit historia, de doctrina non esse dubitandum, sive in Veteri Testamento, sive in Novo, imò verò vetus Testamentum ex fide ipsius novi recipiendum esse, Novum iisdem argumentis quibus poterit quis aliquid in historia cum ratione credere & recipere.

Verùm intempestiva sunt ista hoc loco, quæ tamen obiter proferre placuit, ne quis existimet me ista neglexisse aut declinare voluisse. Sufficit nunc monuisse, illam esse mentem eorum qui religionem hanc intus in animo defixam habent. Quare ad Thomam ipsum provoco, atque ad communem hominum sensum illudque quæro, an Divinam regulæ alicui auctoritatem tollere, ejusque loco nonnisi humanam & civilem substituere, sit ipsi amicum esse, an inimicum.

Ipse certè in ea sum sententia, eum qui Scripturarum Canonicarum auctoritatem divinam tollit, fundamenta ima Christianæ Religionis evertere, neque ulla unquam gens tam barbara fuit, ut Religionem quam coleret à Deo minimè profectam esse parienter audiret. Religio nimirum sacra res est & seria, in intimis animorum penetralibus hærens, neque ullo modo cum eo potest sententia consistere, quæ statuit ex hominis alicujus voluntate, atque ex civili instituto originem traxisse. Nempe aliud est longè religiosum esse, aliud illud profiteri; aliud esse Christianum, aliud hypocritam, quo nihil est Deo aut hominibus odiosius. Qui autem Religionis vim omnem à Principis imperio deducit, nullamque illi obligationis vim relinquit, præter eam quam ex decretis civilibus hauserit,

ferit, ideoque parem Religionibus omnibus rationem atque locum relinquit, nã ille hypocrisis locum facit amplissimum, Religionem subvertit.

Hæc quia sensum apertum habent, hominum omnium judicio uti existimo accommodatum, videamus quæ sit Thomæ sententia de Scriptura, quæ lex est Christianorum, quid de Religione hac sentiat ipse, quem *mos patris & miraculorum fama* fecit, ut in Scripturæ sententia in quæstione de origine mundi acquiesceret. (Corp. c. 26.)

Ipse tu quidem in ea sententia es V. D. Scripturam
 “esse Verbum Dei à Deo ipso profectum, neque li-
 “bitu hominis allatam fuisse olim Prophetiam, sed
 “actos à Spiritu sancto locutos fuisse homines Dei
 “sanctos, 2 Pet. I. 20, 21. Totam Scripturam divini-
 “tùs fuisse inspiratam, 2 Tim. I. 16. verbo, Deum
 “autorem habuisse.

At alia Thomæ mens est, nempe *Scripturam totam non esse verbum Dei ut auctoris*. L. p. 203. Ubi rationem sententiæ puerilem eum afferentem invenies. Imò magno conatu illud agit cap. 33. Leviathanis item cc. 36. & 37. ut auctoritatem Scripturarum minuat, ut Scriptorum, Prophetiarum, Miraculorum verendam majestatem tollat, denique ut magistratui non Deo ipsi ejusve Spiritui vim suam debere eas videatur.

Generalia (inquis) sunt ista, minimèque probata! At non expectas ut integra atque inficeta Leviathanis capita transcribam, sufficiet per gradus quasi accedendo ad Sententiæ Hobbianæ culmen ascendere. Magna forsan te habet V. D. Prophetarum reverentia, qui Deo pleni oracula olim fuderunt; at quænam existimas eos miracula fudisse? *certè ea nonnisi somnia fuere*. L. 227. (Mosis oracula si fortè excipias, qui Princeps fuit, & summam habuit in civitate potestatem,

tem. Novi Hobbium visiones illic etiam memorare exstaticas, verum quæ mentis exstasis visio esse potest, ubi mens est motus organorum? Somnia (inquis) sunt! quid inde? divina tamen esse possunt, nam & istiusmodi somnia ἐν δὲς εἶναι. Nempe cum corpore sopiti, Divini vates mente interim Deo perciti, Spirituque pleni, omnia noscentis Dei præsentiam atque unionem perfruuntur. Imò (inquit ipse) *Spiritu Dei loquuntur*, at de ejusmodi Spiritus præsentia ἐστὶ ἐν ὁρίῳ (neque somniando) cogitavit. *Quando Propheta Spiritu Dei loqui dicitur, nihil aliud intelligendum est, quàm loqui eum secundum Dei voluntatem, à supremo Propheta (id est, à Principe) declaratam.* L. 229. At inquires forsan, Principes ipsos non solum Israeliticos, sed & Judæos à Prophetis correptos fuisse & increpatos, rebus non solum Religiosis sed & Civilibus; illud liberos Regum atque Chronicorum perpetuò ostendere, quare non fuisse Spiritum divinum in Prophetis sese exerentem, potestati Principum subjectum. Atque ipse quidem de facto ista contigisse concedit, at eà ratione quod neque Principes, neque Prophetæ officium suum intelligebant. (Hic sensus est L. p. 260.)

Quippe ut siue *Prophetia, siue Scriptura* quengquam obligent, illud habent à Civili potestate. L. 281. *Scriptura neminem obligat (ut & Prophetia, eadem est enim Thomæ utriusq; ratio) ad obedientiam; neq; aliquis cui non sunt supernaturaliter revelata, (quâ in re standum est Principis judicio) ullâ auctoritate præter Civilem ad obedientiam iis præstandam tenetur.* L. p. 205.

Vetus Testamentum, Esdræ auctoritate, Novum, Ecclesiæ (i. e. Rei-publicæ, neque enim diversa sunt Hobbio) in Consilio Laodiceno, factum est Canonicum, id est, vim recepit obligandi. L. p. 203. &c.

Cernis vim omnem Scripturarum ab imperio humano pendere, neque eâ ratione (uti omnes hætenus Christiani crediderunt) stabilitas fuisse (imperio civili) Scripturas, quòd forent divinæ originis, sed divinæ autoritatis. (quod contradictionem in se habet) credendas esse, quia sunt a civili imperio stabilitæ.

Cernis eversam esse à Thoma hoc Malmesburiensi Scripturæ sacræ divinam autoritatem, quod unum est religionem Christianam penitus convellere; istis admissis

*Non jam Religio Christi, non numina, magni
Pendeantur. —*

Duriora forsan ista esse judicas, & ejusmodi ut non sint alicui in Christiana Republica degenti temerè imputanda: atque ipse quidem tremisco aliquantulum ad cætera progrediens, dicenda sunt tamen ne quid in eum me hætenus deliquisse existimes, & ne quid Religio Christiana ex nostro silentio capiat detrimenti. Ecclesiæ Christianæ descriptionem compendio habet Paulus, Eph. 2. 20. Nempe superstructam eam esse super fundamentum Apostolorum & Prophetarum, existente imò angulari lapide ipso Christo. De Prophetis loquentem accepisti, existimas eum in Apostolos, quos Christus constituit, reverentiolem, iisque autoritatem saltem aliquam tribuere, iis (inquam) quos misit Christus, & quorum sermonem confirmavit signis subsequentibus, nempe mandata dedit ipsis Christus, ipsique Canones sanxerunt, quibus Christiani saltem omnes obedirent; imò potestatem clavium dedit ipsis, ut quorum remitterent peccata, remitterentur, retinerentur autem ea quæ retinerent, infinita nimirum in Scriptura sunt, quæ potestatem

statem iis traditam evincunt, atque auctoritatem.

At falleris, si modò vera sentiat Hobbius, *Christus enim nullam ministris auctoritatem jubendi reliquit.* L. 271. Fulmen illud, quodcumq; sit, quo Satanæ traduntur rebelles in Ecclesia, brutum est planè, atque *excommunicatio Christiani, qui Principi pagano obtemperat*, (etiamsi Christianos ferro & igne persequatur) *nullius est valoris.* L. 278. Quamplurima habet in Leviathane sparsa in eandem sententiam, adeò ut iis minime inhaerendum esse judicem.

Quare religio pedibus subjecta, vicissim Obteritur. ---

At metuendum esse censes, opinor, V. A. ne in blasphemiam ista desinant, ne Christo ipsi auctoritatem tollat, nam missi sunt ab ipso Apostoli eo modo quo ipse à Patre, "sicut Pater me misit (inquit) sic ego mitto vos: quare si destituti fuerint omni auctoritate Apostoli, vides quid erit de ipso mundi Salvatore statuendum.

Atque ego quidem ab istis libenter abstinere monstrofa sunt adeo, adeoque Christianæ adversa Religioni.

(Christus ipse (inquit L. p. 286.) potestatem nullam habuit Legislatoris, sed Invisoris, neque leges sed regulas vitæ solummodò nobis reliquit.

At ista (inquis) si concedatur, nemo erit aliquomodo Christo obstrictus, neque esse poterit crimen aliquod aut infidelitatis aut inobedientiæ adversus Christum, aut ministros ejus, quæ tamen Christus ipse summo pere solet exaggerare, minisque horrendis prohibere. "Quicumque (inquit) non exceperint vos, neque audierint vos, egressi illinc excutite pulverem, qui sub-

"erit pedibus vestris, ut hoc sit testimonium adver-

“suscipite eos. Amen dico vobis tolerabilior erit Sodomorum conditio aut Gomorrhæorum in die iudicii, quàm urbis illius. (Marc. 6. 11.) Hæc est, ut cernis, Christi sententia, quænam est Thomæ? datum (opinor) est Thomæ ut sint ipsi aliquantulum infideles. *Christus (inquit) non leges reliquit, sed regulas quasdam quas unusquisque, vel accipere possit, vel negligere absque iniustitiâ.* L. 285. *Non legimus usquam (inquit) peccasse homines legem Christi non accipiendo.* Neque tenemur Christi leges civilibus repugnantes recipere: quanquam enim Deus sit rex universi, non tamen tenemur pro lege accipere quodcumque, à quolibet ejus nomine proponitur. Hæc habet de Christo ipso loquens, L. p. 286. Sentio ipse horrore quidem atque indignatione membra rigere, neque dubito quin ipse etiam his lectis permovearis, (nempe zelus Dei nostri illud perficiet.) Sed tamen legenda sunt tibi ea quæ sequuntur. Annon (inquis) Apostolis alia mens fuit? Annon ipsi se obstrictos atque obligatos existimabant, ut legem Christi prædicarent? etiam si à mundi potestatibus prohiberentur. Quæ Paulo mens fuit? quæ Petro? quæ reliquis Apostolis? Nosti quantum laborem Christi ipsius gratiâ susceperint & peregerint.

— *Heu quibus illi*

factati fatis. —

Quæ regio in terris Pauli non plena laborum?

Quare loquentem pro omnibus Paulum audiamus? “Necessitas (inquit Paulus 1 Cor. 9. 16.) mihi incumbit, & vix mihi si non Evangelizavero. At quodnam erat illud Evangelium? nempe Judæis scandalum, atque Græcis, id est, Gentibus stultitiam (nempe illud quod & Gentium idolomaniam, & Judæorum superstitionem everteret) eoque nomine mundi hujus

Princi-

Principibus invisum ; atque è diametro adversum ; quod iram eorum & persecutionem excitaret. Injici-
 " ent vobis manus, & vos persequentur, tradentes in
 " conventus & carceres, adductos ad reges ac præsi-
 des, &c. Luc. 21. 12. inquit Christus ipse. His condi-
 tionibus Evangelii munus Apostoli acceperunt, illud-
 que necessarium existimabant. Quanam est Thomæ
 sententia. *Apostoli* (inquit) *obligati sunt, nisi à Prin-*
cipibus prohibiti forent, Evangelium prædicare. L. 286.

At quid si juberentur Christum negare (atque in
 eum *βλασφημῆναι*) *ista* (inquit) *Christi negatio, cum ni-*
hil aliud fuerit quàm motus lingue, parendum erat. 271.
 Quis non hìc clamaret illicò, O cælum! O terra!
 O tempora! O mores! Qualis est ista hominis licen-
 tia, Apostolos, Martyres, Christum ipsum, in Christi-
 ana Republica spernentis, contemptui & ludibrio ha-
 bentis? " Siquis me coram hominibus negaverit, ego
 " ipsum coram patre meo negabo, inquit Christus;
 " Ipsique Apostoli ne Christum negarent, ludibria &
 " flagella sunt experti, insuper & vincula, & carcerem;
 " lapidati sunt, dissecti sunt, tentati sunt, gladio ex-
 " si, mortui sunt, oberraverunt cum ovillis & capri-
 " nis pellibus, destituti, afflicti, & malè habiti. Heb.
 11. 37. Hæc (inquam) omnia aliaque ejusmodi innu-
 mera passi sunt, ne Christum negarent, ne colerent
 idola jussi à Principibus Gentilium, Sacerdotibus &
 Concilio Judæorum. At quanam est Hobbio ista ho-
 minum (horresco referens) insania? quanam demen-
 tia? Nempe, *Si jussi, Christum negassent, non ipsi ne-*
gassent, sed jubentes. L. 271. Imò si jussi Principis ipsum
 (vel Idola) coluissent, non fuisset ea idololatria. L. 360

Quid igitur de Martyribus, quorū sanguine semina-
 ta est olim Ecclesia, statuendū est? Nempe Martyres eos
 non fuisse, nisi testes (oculati) fuerint resurrectionis Chri-
 sti.

sti. L. 272. Quis mare terris non commisceat hæc legens, quis (quæso) tam ferreus ut teneat, si? Utinam (ex animo illud opto) fide salvâ ista in gentis nostræ & reipublicæ honorem reticere potuissem, ne indicetur hoc in Gætho, neq; annuncietur in plateis Ascalonis.

2. Atque hæc quidem hæcenus ipsa religionis Christianæ (uti mihi videtur) fundamenta evertere nituntur: neque plura tamen desunt criteria, quibus de Thomæ hujus sive amicitia sive inimicitia adversus religionem Christianam, statui posse videatur. Nempe si fuerint (ex ipsius sententia) Christus ipse, Apostoli, Martyres, primi pascentis Ecclesiæ parentes omnes jure merito (ut seditionis & inobedientiæ rei) à magistratibus occisi, illudque religionis, ab ipsis vel institutæ vel propagatæ, solius gratiâ, nemo erit qui de ipsa religione nesciat concludere quid sit dicendum. Quare quærendum esset (si modo quæstioni locus maneret post Hobbiana principia intellecta) an jure, an potius injuriâ morti traditi sint hoc nomine Christus ipse atque Christiani. Verùm quid opus est verbis? Prohibiti sunt à Principibus novam Evangelii doctrinam prædicare, abstinere noluerunt, occisi sunt ab iis qui potestatem gladii acceperunt, jure an injuriâ dicat ipse, mihi satis aperta est ejus sententia, imò omnibus statim occurrit quid sit ipsi necessariò statuumendum, nempe crucifigendus est denuò Rex ipse gloria atq; apertus est ludibrio habendus.

Cernis in argumento me nunc versari obi. (stimulante ad illud indignatione) facillimum esset moru animi justissimo incallescere, verùm silentio ista potius obtegere cupio, imò & obruere, ne hujus hominis unus gratiâ gens nostra, Christianæ hucusque religionis sincerâ professionē inclytissima, vilescat.

3. Facit

3. Facit illud animi desiderium, ut à sententiis innumeris, quæ totidem sunt dogmatis Christianæ Religionis adversa, vel refutandis, vel referendis penitus abstinere. Est (uti nôsti V.D.) qui Leviathanem istum infinitam hæresium malorumque dogmatum vim intus in intestinis continere & asseruerit, & evicerit, belluamque istam non tam Leviathanem quam equum Trojanum, imò Hydram, vel Antichristianam illam bestiam Apocalypticam, appellandam meritò fuisse. Nempe *Sabellianus* est, *Nestorianus*, *Sadduceus*, *Arahaus*, *Tacianus*, *Manichæus*, *Mahometanus*. At mihi non vacat (ad res potius, quam ad nomina attendenti) istis inhærerere; dicam liberè animi mei sententiam, mihi certè Christianus ille non est, qui tremendū illud & verendum Trinitatis mysterium negaverit, qui Christi domini & salvatoris satisfactionem; mallem ut vitam mihi eriperent, potius quam spem veniæ & Deo factæ reconciliationis, in Christi unius sanguine & meritis collocatam (quo nomine Socinianos ingemiosos esse posse, eruditos esse posse, Philosophos esse posse, Christianos mihi non esse libenter agnosco) de istis interim quid Hobbius? Eodem nempe modo dicendum esse Christum, Deum Filium, quo *Moses* dici possit *Deus pater*, aut quo *Apostoli Spiritus sanctus*, nempe Dei personam isti pariter gesserunt, L. pp. 82. 204. 256. 266. 267. 268. De Christi interim satisfactione hoc modo statuentem invenies. L. p. 248. Nihil Christum patri obrulisse, cujus valore peccatorum remissionem posset vendicare. Imò eodem modo Christi mortem fuisse pretium sufficiens pro mundo redimendo, quo fuit *Hirci sacrificium* pro peccatis *Israelis*. L. p. 261.

Cum ductus cornu stabat sacer hircus ad aram. Quis non denuò exclamat?

4. Verùm quid ego te detineo V. D. cùm universam Christianam religionis Oeconomiam & vim funditus (scopum ejus integrum pervertendo) tollere nitratur. Nempe Christiana Religio, qua parte à Judaismo reliquisque superstitionibus dissentit, ista præsupponit, in hac resoluta est, hætenus consentientibus ante Hobbium Christianis omnibus: Factum esse hominem & conditum in Dei imagine, quæ Dei imago in justitia & sanctitate vera constabat. Deinde lapsum fuisse peccante Adamo homines universos, lapsuque hoc vitam æternam (æternam nempe Dei ipsius in cælo fruitione) privatos fuisse, deinde in temporis plenitudine venisse Christum in hunc mundum, eoque fine carnem induisse, mortique demùm maledictæ se obtulisse, ut à peccati tyrannide & Diaboli nos liberaret, atque in libertatem filiorum Dei assereret, peccatorum reatum sui ipsius oblatione, eorumque vim omnem & turpitudinem Spiritum nobis sanctum largiendo tolleretur, denique eo fine venisse Christum in hunc mundum, ut esset nobis Rex, Sacerdos, & Propheta, ut nos regeret, redimeret, doceret: hæc autem omnia Spirituali prorsus modo esse intelligenda, non Carnali, inde futurum ut fideles Deo (in æternum eum videndo) fruituri sint, impii autem & infideles æterno (cum Diabolo ejusque Angelis) dolore sint cruciandi, ubi vermis eorum non morietur, & ignis eorum non exstinguetur. Hæc (inquam) fidei Christianæ quædam summula dici possit, hic sensus Scripturæ universæ. Vide interim quale monstrum Hobbius effinxerit.

1. At Deum ipsum Regnum Civile in Judæos exercuisse.
2. Regnum illud Mosi (veluti locum ejus tenenti) tradisse.

tradidisse. L. p. 217. 218.

3. Deinde verò regnum Sacerdotibus contulisse, atque hoc regnum, fuisse regnum Dei, pontifici Israelitarum creditum. L. 218.

4. Donec populus temporibus Samuelis, à regno hoc Dei deficeret, ab eoque tempore non fuisse regnum Israelitarum Dei regnum. L. 219.

5. Venisse autem Christum, ut istud Dei regnum restitueret, nempe ut novo fadere, Deo regnum illud restitueret, quod rescissum est in electione Saulis. L. 263.

Summam prædicationis Christi atque Evangelii, hanc esse, futurum esse post generalem corporum resurrectionem ut *Christo obediētes* vitam immortalem sub tali Dei regimine degant. Ut *Christo inobediētes*, nubant, filiosque æternum vicibus gignant, ipsi secundò morituri, id est, in nihilum redituri. L. 264. 242. 244.

Nos autem cū petimus in oratione Dominicā, ut veniat regnum Dei, regni istius restitutionem petere, quod defectione Israelitarum interruptum est in diebus Saulis. L. p. 219.

Hæc est (inquam) Theoria Religionis Hobbianæ, quæ Christianam penitus evertit, atque illud facit non nisi frivolo & planè ridiculo argumento, imò verò absque omni fundamento quod speciem habeat veritatis.

De regno Christi Spirituali innumeri autores tractarunt, de statu beatorum & damnatorum loquuntur ubique Catechismi: Imò nihil est monstrosius, nihil homine sano indignius, quam istam velle Theoriam carnalem & quasi Mahometanam Christianismi

nismi loco inducere. Quodnam est illud futurum regnum carnale *Sacerdotum* (ut ipse loquitur) ubi *mortalitas corporibus his vilibus in vitam aeternam suscitabimur*. Phil. 3. 21. *Erimusq; ut Angeli in calo*. Math. 23. 30. *Postquam in nubes rapti ut Domino obviam eamus fuerimus*. 1 Thef. 4. 18. Quamnam est ista mors secunda seu annihilatio impiorum, ubi cum Bestia & pseudo propheta vivi conjicientur in stagnum ignis ardens sulphure, Apoc. 20. 20. & torquebuntur die & nocte in secula seculorum. Apoc. 20. 10? Quamnam argumenti vel umbra suppetit, quod non sit pueriliter Sophisticum, unde inferatur nupturos esse post resurrectionem improbos? Dixit Christus nullas in resurrectione futuras nuptias, inde Corollarium deducit aliquos saltem nupturos esse.

Cernis quàm facile esset ista omnia diffare, si vel tibi V. D. (Christiano existente) necessarium illud esse judicarem, vel instituti ratio illud pateretur, quin potius sententiæ tam portentosæ fundamentum brevissimè contemplemur.

Nempe *Regnum Dei in Israelitas fuit* (inquit) *Regnum Sacerdotale, atq; populus regem postulando à Deo defecerunt*. Hæc universa ea habent, quibus ista tam profana, carnalis, barbara de Evangelio sententiâ, quovis modo stabiliri videatur.

Dicimus temerè ista atque inscitè admodum affirmari, neque etenim Deus regnum unquam Sacerdotibus dedit, sibi in perpetuum tenendum, neque populi Israelitici rebellio in eo sita est, quòd Regem postulerent.

Primum quod ad jus attinet, manifestum est non prohibuisse Deum ut Regem sibi statuerent Israelitæ. "Quum ingressus fueris in terram quam Jehova dat tibi—si dixeris statuam super me Regem—tantum statuito

"statuito Regem quem elegerit Deus tuus è medio
 "fratrum tuorum, statuito super te Regem. Deut.
 17. 14. &c.

Imò ut de facto loquamur, *Moses* primus in eos regnabat, deinde *Iosue*, postea *Judices*, in judicium interregnis *Seniores*, iisque tanto oneri imparibus exstentibus (ob duram populi cervicem) *Judices* nunc ex exercitibus, nunc ex aliis à Deo excitati; neque magis dicendum erat illud *Dei Regnum* sub *Judicibus*, quam sub *Regibus ipsis*. Atque hæc manifesta sunt, cuivis Scripturas sobriè & cum veritatis desiderio legenti.

At verò probat, inquis, Regnum Dei fuisse Regnum *Sacerdotale* ex Exod. 19. 6. Verùm Textus Hebraicus habet מַמְלֶכֶת כֹּהֲנִים regnum ex Sacerdotibus (i.e. viris sanctis) constans, atque hoc modo *Petrus*, 1 Pet. 11. 9. hoc modo *Johannes*. Apoc. 1. 6. locum intelligunt.

At, inquis, & Num: 27. 21. ordinatum est, ut *Josue* coram *Eleazare* staret, qui Dei voluntatem inquireret &c. unde constat regnum penes *Eleazarem* fuisse. Verùm ridiculum est istud, nam eodem modo sub *Regibus* regnum erit sacerdotale, quia ipsi voluntatem divinam à Sacerdotibus petebant. Quare figmentum est planè Regnum istud Sacerdotale.

Imò & *Rebellio* ista, de qua supra, non erat adversus Sacerdotem, sed adversus *Samuelem* facta, qui declaratione divinâ factus est judex eorum perpetuus; ita ut, ante ejus excessum, regem petere illicitum foret.

Hæc quia luce meridianâ clariora sunt, locos SS. ab *Hobbio* laudatos legentibus, nolo iis inherere.

Cernis interim Theologiam *Hobbianam* Philosophiæ ejusdem affinem esse nimium, atque ubique ipsum

sum solere ex paucis minimè consideratis, imò falsis, atque absurdis, temerè assumptis, res maximas vel astruere, conari vel evertere. Interea temporis quam sit *Christiana Religioni* amicus Hobbius, intelligis; restat ut de *Religione in universum* paucissima dicamus.

CAP. 2.

*Ubi de Religione in universum ex sententia Hobbiana
quaritur, atque exercitationi huic Episto-
lica Coronis imponitur.*

Quaquam ex omni ferè exercitationis hujus serie, præcipuè autem ex iis quæ superiori Capitulo habuimus, neminem latere possit quæ fuerit de omni Religione sententia Hobbiana, placuit tamen rem istam eo ipso sub titulo resumere hoc loco, eamque paucissimis tractare. Neque verò illo fine hoc facimus, ut hominem bonorum atque piorum odio opprimamus; verùm ut nos ipsos à calumniis ejus verbisque durioribus (si quid eum regerere contingat) aliquantulum liberemus. Nosti V. D. quid vindici Academiæ acciderit eo solo nomine, quod locum hunc de Religione tam leviter attigerit. Dixerat *Thomas Philosophiam in Academiis nullum omnino locum habere, nisi ut ancilletur Religioni Pontificiæ*: Calumniâ hâc in Religionis negotio, permotus Vindex, respondit inter alia, dictum à nonnullis esse non alio nomine ipsum Pontificiæ isti professioni inimicum fuisse, nisi quod Religionis haberet nomen. Tu autem nosti quantas hoc unum tragædias excitârit? Nempe *Stultus, Mendax, Sceleratus* est Vindex: quid ita quæso? quid fecit? quid commeruit? quid patravit?annon

annon hoc dictum à nonnullis est? ad teipsum pro-
voco. V. D. quoties illud ipsi audivimus, imò verò
quis locus est? quæ gentis nostræ plaga? quæ regio?
Sive in urbe, sive in Academia, sive demum in agro,
ubi non illud communi hominum famâ increbruit,
solere tum Hobbium ipsum, tum ejus discipulos, de
Deo ipso & de Christo infanda sentire & loqui, imò
de Religione universa quasi impostura ea foret, blate-
rare. Cur igitur mendax ille vindex? quodnam est
scelus quod commisit? rem verissimam, rem notissi-
mam narravit; at inquit, *quem non novit, eum Religio-
nis inimicum esse ex fama communi innuere*, hoc unum
omnia ista tam præclara meruit epitheta. Anne verò
existimandum est eum Thomam hunc nostrum non
novisse? Manifestum est libros ejus illum legisse; ora-
tio autem virum indicat. Summa est igitur, scelera-
tum eum Thomæ fuisse, quòd non ostenderit longâ
forfan atque manifestâ oratione, Thomam religioni
non solum Christianæ, sed omni inimicum fuisse. Cer-
nis igitur in angustias aliquas redactum me esse, mihi
que illud ferè nunc accidere quod Vindici ista scri-
benti accidisse crederem; nempe invitum eum atque
tristem ad ejusmodi quæstiones, ubi de hominum Re-
ligione agitur, accedere solere; quin & ea loca
quàm potuerit levissimè eum transilire, cum tamen al-
tius inhærendum iis esset. Cernis animo quàm aversan-
ti superius illud Capitulum absolverim, quàm multa
intacta reliquerim, quàm molliter, si rei ipsius merita
spectemus (ubi de spei omnis humanæ fundamento
actum est) eum tractaverim. Atque ipse quidem ab ul-
teriore rei hujus prosecutione abstinuissem, nisi per-
spectum jam antea fuisset viri ingenium, exigen-
tis ea prorsus, atque ad ultima ejus arcana referenda
ferè provocantis; quasi sceleratum illud esset à sce-
lere

lere alieno detegendo. abstinere. Cernis quæ me necessitas cogat, ut pergâ aliquantulum hanc rem patrefacere, ut facio

—testor

*Vos, aterni ignes, & conscia numina veri,
Fas mihi nunc Thoma secreta resolvere—
Fas odisse vias, atq; omnia ferre per auras
Si qua tegat, teneor Thoma nec legibus ullis.*

Atque reverà V. D. si forsan eum Religioni, non solum Christianæ, verum omni in universum, inimicum esse disertè affirmarem, & simul sententiæ hujus (libertate eâ prolata, quæ solet esse Philosophorum) rationes afferrem, quis me sobrius atque pius, quis Philosophus aut eruditus reprehenderet?

Verum istud non faciam, modestius atq; temperantiùs cum eo agam, quasdam solummodo quæstiones ipsi tuâ cum veniâ (V. D.) proponam, quas ipse si solvendo tibi satisfecerit, solutus omni hoc crimine, per me licet, abear.

I. Memini, quæstionem mihi olim (puero Catechumeno) proponi solitam, cupio ut *narrare velit quam ipse Religionem colat*. Num Christianismum, vel Judaismum, num Mahometismum, vel Gentilismum? Vel quanam est ea Religio, quæ æqualem ad omnes indifferentiam patiatur? quæ vim suam Principis imperio se debere fateatur? Certè nihil quicquam ab hominis ingenio excogitari posse mihi videtur, quod ad religionem funditus ex animis hominum eradicandam sit accommodatius, quàm est ista sententia, quæ statuit ex humanâ institutione, non autem divinâ, religionem & ortum habuisse olim, & jam constare. Imò verò attestatus est olim Deus Mosi & Christo mundi servatori, neque ratio ulla est ut ea de re dubitet

Philoso.

Philosophus aliquis, momenta rationis ad normam veritatis æstimans; neque etenim ratio ulla est, ut de historiarum veritate dubitetur, nisi quis velit omnem antiquitatis lucem rejicere, neque si veræ sint historiae de Mose & Christo, poterit aliquis de Dei ipsius attestacione cum ratione dubitare: Quod autem in Religione Christiana stabilienda manus ipsa Dei fortis præstitit & brachium nudatum, illud κατ' ἀνολογίαν τίνα in cæteris fecit ut obtineret, impostorum versutia, & hominum credulitas; hinc nempe factum est ut Mahometem paroxysmos Epilepticos patientem, visione extaticâ in Deum sublatum fuisse crederent Arabes; hinc etiam crediderunt Romani antiqui, Numam cum Egeria congressum fuisse: verbo, omnis Religio si ve vera, si ve falsa, illud habet, ut à Deo, non ab hominibus originem traxisse credatur: atque ille quicumque illum non Dei ipsius vel Deorum sed hominum inventum esse statuit, Philosophus utcumque esse vel dici possit, Religioni in universum inimicus est dicendus.

Si quidem Thomas illud solummodo dixisset, Religionem ab hominibus excogitatam fuisse, ut homines (metu forsan inani) in obedientia principibus præstanda contineret, quanquam rem indignissimam & turpissimam fecisset (qualem nonnisi unus forsan aut alter inter Philosophos paganos eo ipso nomine omni adhuc ævo infames, fecerunt) nos tamen adversus ipsum disputantes, utcumque sententiæ tam prodigiosæ insaniam ostendere possemus, utcumque hominis infelicitatem dolere, non eum quasi contempti atque ludibrio habitæ rationis humanæ accusaremus. Nempe ejusmodi est sententia, quæ cum intelligi possit & contradictionem (ut aiunt) in adjecto minimè involvat, vim non infert rationi humanæ ut supponatur.

Verum

Verùm ut istud enuncians, simul illud etiam contendant, non esse se Religioni inimicum. Quis ista patienter audiat? quis mare terris non confundat? Certè

—*Clamet Melicerta perisse
Frontem de rebus.*—

Qui principia ejusmodi proponit, quibus fugit omnis Religio, sive vera, sive falsa, quæ ipsa Religionis natura averfatur, oro illum ut ipse explicare velit quâ ratione fiat, ut non sit Religionis hostis appellandus. Imò reverà

*Hoc argumento timefacta Religiones
Effugient animo.*—

Verùm ista generalia atque in antecessum solummodo proposita; alia sunt eaque plurima (nisi me brevem esse cogeret præsentis argumenti injucunditas) quæ faciunt ut illud ab ipso explicandum desideremus; nempe quomodo fieri vel intelligi possit, ut non sint inimica Religioni; adeò in ipsa Religionis omnis fundamenta ruere mihi videntur & impetum facere,

2. Si sit nulla hominibus in statu naturali non solum *justi* atque *injusti* (quas voces à communi hominum usu ad forensem transtulit, ut nubeculam sententiæ offundat) verùm etiam *Boni* & *Mali morales* differentia, si nulla lex, nullum rationis dictamen, quo scerni ista possint; verùm ea omnia ex Principis institutione & oriantur & dependeant; quænam esse potest Religio? cujus illud est, ut in iis ubi lex humana locum non habet, subveniat.

Expecto ut regerat sese alicubi, imò sæpiùs de lege naturæ, de bono & malo naturali locutum. Atque ego quidem

quidem eum, si mille contradictionibus liberare se hoc loco possit, ingeniosum esse prædicabo. Contradictionem vel ἀνομιαν manifestam habere mihi videtur, fundamentum ipsum Politicæ Hobbianæ. In statu (inquit) naturæ scœdera non obligant, at scœdus de constituendo magistratu initum, obligat; quid ita quæso? Obligat (inquit) ex lege naturæ, & est inviolabile scœdus. Cur ita tandem? nempe alias evertetur Politia ejus omnis — sed me reprimo.

Mihi certè omnia ejus lustranti, constat nihil esse, ex ejus sententia, naturâ suâ bonum aut malum moraliter loquendo: si istâ sentiens deceptus fuerim, cupio ut de re istâ disertè loquendo eximere me velit hoc errore. Certè si quod in omni rerum complexu sit malum dicendum, illud erit quod omni omnium hominum judicio tale hæcenus existimatum est, nempe quod sit renitente rationis dictamine, quod sit reclamante conscientiâ. Profligatæ scelerumque vi atque dominio obrutæ quasi, adeoque insanientis mulierculæ ideam proponens Poëta ista eam proferentem infert

— *Video meliora probeg,*

Deteriora sequor.

Ipsium interim Hobbium *peccatum non esse, quod sit reclamante conscientiâ*, exercitationis hujus ferè sub initio dicentem, introduximus.

Ipsè quidem hac in re ferè unicâ sibi constat, atq; ego bonum aut malum quomodo aliquid esse possit non video, si omnia fato fiant (eo modo què ipse asseruit) atque absolutâ causarum necessitate; propositionem, tum in libello de *libertate & necessitate*, tum de Corp: habet, imò ipse *πένοντα* istud agnoscit; si bonum sit nihil aut malum, si meritum nullum aut demeritum, (ut loquun-

loquuntur) quis sit religioni locus, nullas ipse video: velim ut denuò ostendat annon sit hoc etiam Religioni (in universum) inimicum.

Verum ut abruptam ego statim hanc omnem orationem. Omnis Religio illud habet, & Deum esse & esse remuneratorem eorum qui pii fuerint & religiosi. Nempe religione *ad Deum accedimus*, oportet *ad Deum accedentem*, ista præsupponere & credere. Neque tam luscus esse potest aliquis, ut illud non videat, non solere Deum pietatem hominum aut virtutem (si mundi hujus regimen spectemus) hac in vita remunerare: Est etenim vir sapiens & bonus, cui res accidunt ad modum atque normam improborum; exercuit illud ab initiis ultimis Philosophiæ, maximorum hominum ingenia, *cur bonis mala contingant*, neque aliter hoc loco se extricare unquam potuerunt, nisi dicendo cum Socrate (cùm jam in manu mortiferum istud poculum teneret) “duas esse vias, duplicesque “excessus animorum à corpore exeuntium, piorum “hominum faciles esse ad Deum (unde exceßerunt) “aditos, impios interim cruciatibus atque tormentis flagellandos, nempe

— *Clausi tenebris & carcere cæco
Illi exercentur pœnis, veterumq; malorum
Supplicia expendunt.*

Hæc (inquam) omnis habet Religio, etiamsi in præmiarum præmiorumque natura atque ingenio explicando dissentiant. Verbo, *Religio* illud præsupponit, animam è corpore exeuntem præmia virtutum atque victiorum ferre posse. Quid ad hæc Thomas?

Mihi certè videtur, duas esse Thomæ sententias, quarum altera est Thomæ Philosophi, altera Thomæ

ex præsupposita (magistratûs jussu) Scripturæ authoritate differentis. Quarum hæc statuit animam dormire usque ad diem longissimam, postea resuscitandam, vel ut liberos homo gignat (dirum proculdubiò tormentum) vel ut eo modo regatur in æternum, quo ante Saulis electionem regebantur Israelitæ. Hæc (inquam) est Thomæ sententia, quem *mos patris & miraculorum fama* voluit esse *Christianum*.

At alia est Thomæ *Philosophi* sententia, nempe *mentem esse motum organorum*, neque proinde fieri ullo modo posse (vel absolutâ Dei potentiâ) ut morti superstes sit animus, vel ut idem numero animus reviviscat; si ista non fuerit ejus sententia, si ista non consequantur sententiam hanc positam, velim ut errorem mihi ostendat: istis autem ita se habentibus, dicat mihi ingenuè quis sit omnino religioni relictus locus. Imò verò, inquires, etiamsi eo modo hæc se habuerint, etiamsi mortales simus penitus, neque ulla spes sit relictæ beatitudinis olim consequendæ, eum tamen Religiosum (uti est) futurum, Deum nempe agniturum illum esse eique ut potentissimo felicissimoque honorem & adorationis cultum præstiturum. *Fieri non potest* (inquit L. p. 53.) *ut causarum seriem profundius contemplantes ad primum motorem, qui Deus est, non perveniant*. Hinc autem necesse est ut exoriatur in animo Religio.

*Quin & formido mortalis continet omnis,
Quòd multa in terris fieri cæloq; tuentur,
Quorum operum causas nullâ ratione videre
Possunt: ac fieri divino numine rentur.*

Nempe causas sive intelligat, sive non intelligant homines, tollet naturæ profundior contemplatio Atheismum,

theismum, quo uno sublato aliqua saltem religio sequetur. Vidisti autem quantus sit *Philosophus* hic noster, credis, opinor, Atheum eum esse non posse, Religiosum igitur aliquo modo esse debere.

Atq; ipse quidem concedo religiosū eum esse posse, sive Sadduczorū, sive Epicureorū sententiam amplectatur; nempe istorum hominum Religione, modo Deum esse concedat; neque ipse crimen illud Atheismi volo unquam huic imputare, spero certè meliora (quanquam Atheismum ipse pro crimine non habeat, modo corde prematur, atque adversus leges humanas minimè quis illud profiteatur. *Fides etenim, atq; interiores cogitationes hominum non subjiciuntur mandatis (Dei) verū operationi solū ejus, aut Ordinaria, aut Extraordinaria.* L. p. 149. Nolo (inquam) unquam Atheismum ipsi objicere, oro tamen eum atque obtestor, ut faciat, sententiam ejus explicando, ut Deum esse statuere mihi videatur. Ipse nunc petitionis hujus (qui tibi forsan inurbana videri possit) rationē accipe.

Nempe si *neq; corpus esse Deus possit* (à quo remouentur corporeæ affectiones omnes. L. p. 190. C (Amsterodami impresso, Anno 1647) p. 270. *Neq; esse possit aliqua substantia incorporea, quia verba ista se mutuo evertunt,* Quomodo Deus esse possit ex mente Hobbiana, non intelligo.

VERUM quò feror, vir Dignissime atque Amicissimè? quò me præcipitem rapit suscepti operis necessitas? quis hic locus? quæ mundi plaga? ubi sum? quid facio? Ego quidem meipsum nullo modo satis admirari possum, postrema hæc relegens. Egone unquam existimâssem me inter homines tetricos atq; immites istos reperendum? Quis unquam expectaret hominem (qualem ego me esse credebam) non è rigidioribus

dioribus illis atque morosis, verum ex iis qui libertatem in sentiendo ingenuam & profiteri solent & in aliis libenter admittere, eousque trahi potuisse, ut datâ operâ in hominis Religionem publicè inquireret, ut ostenderet hominem eruditum Religioni inimicum esse. Odi certè Sycophantas omnes, nihilque (quantum ipse intelligo) detestabilius habeo, quàm ingenium petulans illud atque invidum, quod homines eruditos, famâ inventis suis benè partâ, frui non patietur. Quid igitur dicam V.D? quo me defendam modo, si quis mihi forsitan ista objecerit; succurre tu mihi qui vales humeris, horumque omnium crimine levato. Nosti tu satis rei nostræ historiam universam, animo quàm tristi atque avergente, ista primùm susceperim, quàm fuerit mihi injucundum atque involupe in omni hac controversia versari, quantâ vi trusus in arenam initio fuerim, & quàm libenter me militiæ subducere voluisssem; neque me quidem ullo modo ad certamen adduci potuisse, nisi duo illa Nomina tam sacra *Academiarum* atque *Religionis* mihi læpius in aures intonuissent. Credebam autem illud non hominis modesti, sed stupentis esse, matrem afflictam atque contemptui habitam negligere. Dictum est, hunc Autorem lethale vulnus *Academiis* infixisse, eas indoctas atque inutiles, oratione eo fine institutâ ostendendo.

--*Pudet hac opprobria nobis
Et dici potuisse, & non potuisse refelli.*

Ex ipsâ Leviathanis lectione, didicerat juvenus incauta atq; indocta adversus institutiones Academicas, ore impuro blaterare,

--*Stultum est cum quis ubiq;*

Hostibus occurrat, peritura parcere charta.

Stabam tamen aliquandiu attonitus,

*Multaq; dura meotristi cum corde putabam,
Cum signum agnovi, atq; afflicta jussa parentis.*

Signum (inquam) accepi, neque in Academicarum atque Religionis causâ metuendas hominum censuras statim judicavi, etiamsi magis adhuc magisque incaluissem; audiveram in parentis olim periculo filium à nativitate mutum, in clamores erupisse; quid si ipse hâc occasione balbutirem, aliquantulum (cogitabam) etiamsi eodem modo cum *Vindice* tractandus forem. Atque ipse quidem nunc expecto, imò initio (ut meminisse potes) expectavi ut mala verba omnia in me effundant Hobbiani, quæcunque vel scientiam vel mores hominum maculare solent: non eos vel scriptum ipsum vel scribendi modus sat scio effugiet. Dicent incomptam, ineruditam, inelegantem fuisse nobis omnem orationem: fateor certè ipse hæc omnia, at

*Parcius ista tamen (Thoma) objicienda memento,
Novimus & qui te. —*

Dicent me in versiculos hîc illic incidentem, gravitatem Philosophicam minimè tenuisse, fecisse quod Pedantium potius deceret. Verùm, Platonem, Aristotelem, Ciceronem, nobilissimosque ex antiquis ab eo scribendi genere non abstinuisse sentio.

*Quorum emulari exopto negligentiam,
Potius quàm ipsorum obscuram diligentiam.*

Dicet me duriora ipsi aliquando verba dedisse, verùm
exceptis

exceptis iis locis, ubi vel Religionis vel Academiarum res agitur, non temerè illud reperiendum esse spero.


Dicet mille viros habere Academias, qui melius ista potuissent; hoc etiam concedo libentissimè, quare spernendas non esse eas adeò existimarem. Expecto ut huic viro, *stultus, mendax, sceleratus* audiam: feram, si potero, patienter, neque etenim ista Vindici in dedecus magnum cessisse comperio. Verbo, eo animo impositum à teipso onus, initio suscepi, ut omnia ferrem, modo nihil in Academias aut in Religionem ipsam (quæ sunt mihi charissima, uti esse debent) opprobrii regerentem eum inveniam. At hæc si deinceps lacerare pergat, certè non feretur illud omni modo inultum — ἐμὲ ζῶντος καὶ ἐνὶ χόρῳ διακομένοιο.

Tu interim, Vir Dignissime, perge facere ut facis, Religionem nempe Christianam, atque Academiam hanc nostram Oxoniensem, eruditione summâ atque pietate, immensum ornare, simulque amare tibi deditissimum

SETHUM WARDUM.



FINIS.



Errata

Pag. Lin.	Corr.	Pag. Lin.	Corrige.
2. 15.	pro suo, lege Hobbii	194. 8.	ei
8. 2.	l. opprobria immotus referat	198. 19.	Feeit
9. 8.	l. Simia	200. 7.	duracione
12. 28.	l. alii	202. 1.	assensum
13. 16.	l. aliusque	204. 10.	in aliquibus exem- plaribus l. Glandu- lam Pinealem
15. 15.	l. peragrat	25. l.	Dum pro Num.
16. 3 & 4.	l. somnium, illudq;	108. l 26.	absque pro ubique.
41. 18.	l. exors	207. 24.	dele fieri
45. 31.	l. Leviathanis	208. 31.	dele motus partium
61. 1.	pro nempe, l. nemo	32. pro	motisque l. motus.
70. 10.	l. invenisse	232. 15.	pro non l. neque
73. 31.	l. adjunxerit	235. 25.	ex ipso
74. 4.	l. plura habet	240. 1.	eundem
75. 28.	l. Chimara	243. 14.	dele praterire
76. 29.	l. eum	21.	quam
102. 24.	pro jam l. imd	26.	ut jurare
116. 14.	l. protrahere	267. 30.	exorsus
119. 10.	l. resonat	281. 18.	Epistolii
121. 12.	l. cujus	283. 17.	Leviathanis
123. 18.	l. habere	285. 15.	quantum
123. 9.	l. nihil concludi	288. 15.	inixtentem
126. 10.	l. Secundum	21.	eam esse dele l. lin. 22.
19.	l. constat	291. 24.	ostendi
133. 24.	l. Suetorem	299. 3.	excitantur
134. 6.	l. deferant	296. 19.	producta
14.	l. succedente	300. 10.	dele imprimuntur
135. 19.	dele :	12.	acquiruntur
137. penult.	l. recipiat	304. 4.	l. discernere
144. 19.	l. solems	307. 14.	debeat
149. 8.	l. luxia	314. 13.	divina
150. 1.	l. planam	317. pen.	nunquam
152. 20.	l. ficto	318. 2.	obstant
153. penult.	dele tamen	320. 32.	Oracula
154. 3.	l. regerere	321. 2.	dele visio
166. 15.	elegeris	326. 13.	l. nascentis
170. 29.	motusque	330. 17.	existenti
32.	urgescencia	331. 8.	pro Exercitiis lege Sacerdotibus
174. 18.	l. obcaluis	336.	qua fugit
181. 17.	eum		
185. 3.	plane		



Postscriptum ad eundem Amplissimum Vi-
rum D. I. W. sive APPENDICULA,
ubi de Calumniis ab Hobbio in Au-
torem congestis agitur.



Perabas proculdubio V. D. post vale-
dictionem istam, non fore te denuò
importuniùs sollicitandum: hoc idem
Lectores inexpectatione & votis ha-
buerunt, mihiq; præcipuè ea spes
erat & expectatio; miraberis quid acciderit, quid de
novo dicendum habeam, quod faciat ut te nunc de-
nuò interpellem, & quousque tandem hoc sim factu-
rus.

Atque ipse quidem nolo te diutiùs detinere; hoc
primum habeo autem quod libenter (opinor) audies.
Novi occupationes tuas, & quàm sit tibi inæstimabilis
temporis jactura;

*Cùm tot sustineas & tanta negotia solus,
Musarum sedes tuteris, moribus ornes,
Consilio emendes, in publica commoda peccem
Si longo sermone morer tua tempora.—*

Est tamen quoddam, quod te celare nullo modo
possum, quod nequeo suppressere; hoc accipe modo,
& fac deinceps tibi ipsi quod visum fuerit, *Rediisse nem-
pe me penè totum in gratiam cum Thoma Hobbio Phi-
losopho Malmesburiensi*, hoc est quod tibi narrare vo-
lui

lui, nunc autem licet tibi V. D. vel libellum abjicere, vel si placuerit, rationes hujus rei deinceps secuturas accipere.

Post absolutam Exercitationem istam Epistolicam, tibi hactenus satis injucundam; stabam sæpenumerò conjiciens quid foret mihi ab Hobbio deinceps, ejusque discipulis, atque amicis expectandum. Divinabam fore, ut quod Ciceroni olim acciderat, in Patria & Rei-publicæ Romanæ negotio, hoc idem mihi contingeret in causa hac Academiarum & Religionis; ut depulso ab ipsis inimicorum impetu, telisque in conjuratos reverberatis, in me statim ruerent, in me rabidissima illorum ora converterent, in me tela vibrarent. Neque difficile est tibi ipsi V. D. imaginari quid hâc occasione suggerere posset mens timida, sibi, suiique diffidens viribus, quid fortè præcineret

præfaga mali mens.—

Ut in omnia ea quæcunque in lucem edideram (animo non admodum propitio & favente) inquirerent, hoc certè absque omni dubio statuendum esse decrevi, quare omnia mea (neque magna neque multa) continuòolvebam in animo atque revolvebam, si quid obscurè dictum, si quid ratione clarâ minimè munitum, si quid ex incuria atque negligentia (quæ mihi planè naturalis est) aut libertate nimia in dicendo, inelegans occurrebat; Eccum ex hoc loco (mihi tacitus dicebam) argumenta sumet Hobbius, & statim defensiones meditabar.

Non est ut verbis explicare contendam, quam fuerit mihi injucunda hæc animi conditio, quam perplexa cogitatio, quanquam etenim recurreret mihi sapius in levamen, *Horatianum* illud

—*Hic murus abeneus esto*

Nil conscire sibi, & nullâ pallescere culpâ.

nesciebam

Nesciebam tamen quid ingenium hujus viri insensissimi, occasione sive datâ sive arreptâ, in contumeliam atque opprobrium trahere posset.

Noveram libellos à me scriptos omnes sive (nomine subscripto) à meipso agnitos, sive absque auctoris nomine in publicum antehac emissos, grave annorum aliquot examen apud ipsum subiisse, narratum est, ipsius Exercitationis hujus schediâ, à przlo statim excepta, Hobbio ipsi continuo transmissa (ab exploratore quodam quem novimus) fuisse; inter hæc omnia percussit aures fama, illum librum hunc arte malâ nactum; eum nondum in lucem editum refutâsse!

Inter hæc omnia quomodo me affectum existimas Vir Dignissime? Dicam ingenuè, quanquam hæc omnia absque metu aliquo insigni ferebat *mens conscia recti*; neque placentem tamen, neque jucundam, fuisse mihi rerum mearum incertitudinem, verùm (quod de Stoico quodam dictum est) quanquam *nihil agerent* cogitationes istæ, *attamen molestas*, aliquo modo fuisse.

Miraris quò tendat oratio V. D. ast ego statim admirationem istam tollam universam. Eò quidem tendit ut intelligat quâ occasione conciliatus sit mihi Thomas, omnisque adversus ipsum animi indignatio penè evanuit.

Siquis reipsum (qualis es ad clementiam atque benignitatem compositus) ex animi perplexâ cogitatione animique fluctuantis suspensione atque anxietate liberaret, Annon pramium acciperet? nihil certè iniquius est quàm illud negare.

*O Tite siquid ego adjuro curamve levasso
Numquid eris prami.*

Nosti cujus sit versiculus. Egone igitur Thomæ in-
gratus sim, qui maximo me beneficio cumulavit, qui
in ærumnis existentem liberavit, qui metus omnes mi-
hi molestos expulit, qui famam restituit? nunquam
dicetur: Nemo mihi refricet in memoriam injurias
antiquas, nemo voces istas *Stulti, Mendacis, Scelero-
rati*, quæ viros mansuetos provocare solent: certè de-
cet atque æquum illud est, ut vetus quodcunque ma-
leficium beneficio novo oblitteretur. *Stultum appella-
vit?* At famam restituit, ostenditque demùm stultum
non esse. *Mendacem dixit?* At irrefragabili argumen-
to sibi ipsi hanc laudem asseruit, atque vindicavit.
Sceleratum vocavit? At famam restituit, fecitque ut in-
telligant omnes, *suum cuiq; tribuere*. Quare condo-
nandum esse ipsi sentio (illudque ex animo profiteor)
quodcunque vel contumeliæ vel opprobrii, in me un-
quam effuderit.

Miraris proculdubiò, unde ista tam subita rerum
mutatio, numquid, inquires, pœnitentiâ injuriæ ductus
Hobbius, confessione ingenuâ atque publicâ teipsum
vindicans? num testimonio aliquo ornavit? numquid
scribens atque in publicum protrudens à contumeliis
novisque opprobriis (à styli sui deliciis) absti-
nuit?

Nihil certè horum, neq; reverà sunt ista vindiciarū
earum genera quas ab ipso experimus, vel expectamus;
imò verò (ut nodum hunc solvam citissimè) libellum
edidit (sub nomine *Sex Documentorum ad utrumq;
Professorem (Geometricum atq; Astronomicum) Savio-
lianum*: Libellum præclarum in omni (malè) dicendi
artificio excellentem, libellum omni spurcissimorum
opprobriorum genere factum atque onustum, libel-
lum omnia ea efferentem quacunque usquam protu-
lerit scurra, rabula, lixa, lanista. Conciliavit me
Tho-

Thomæ hic liber, fecitque ut omnia ipsi Condonare possim, flexit animum ingenii Hobbiani Contemplatio, fecitque ejus in meum animus & voluntas, ut mihi planè religio sit aliquid Hobbio non ignoscere.

Scilicet, *tanti est (inquies) esse Christianum!* hoc quidem aliquid; ast ego reverà non sine summa ratione; (etiam religione sepositâ) hoc expectandum esse judico; imò ratione longè majore, quam si palinodiam cecinisset. Ne te diutiùs detineam habe rem rotam; Si vir, *tali ingenio* quale est *Hobbianum*, odio adversus meipsum flagrans *immortali*, *nervos omnes* eo fine *intendens, animosque*, ut notas maculasque æternas nomini inurat. Si, inquam, *hujusmodi* Vir, (non verbis verùm) reipsâ ostenderit, nihil esse sive in *Doe* *Erina* sive in *moribus* nostris quo minùs *famâ* omnino *integrâ* ac *illibatâ*, quo minùs gratiâ atque benevolentiam bonorum atque eruditorum hominum *frui possim* & debeam, existimo Conclusionem illicò nostram secuturam. Cernis argumentum, de quo nobis desinceps est dicendum.

Ut autem contrahantur ea in ordinem, finesque brevissimos, quæ sum dicturus, monendus es V. D. *Documenta* ista sive *Nocumenta* (nempe *uadiuata* *uadiuata*) omnia, quamvis in *Astronomum* æquè atque *Geometram* Savilianum directâ fuisse videantur, ex iis tamen quinque priora in Collegæ mei Clarissimi libros (*Elenchum Geom: Hob: Arithmeticam infinitorum, Tractatum de Angulo Contactus &c.*) scripta esse, neque facturum esse Thomam donatione suâ, ut in libros præclarissimos, plagio manifesto, jus aliquod (eos vel defendendo) sumam; Relinquam Clarissimo Collegæ, quæ sua sunt, ipsiq; autorem hunc (in sales ab ipso citissimè minuendum) tradam; vide-

bunt sat citò Geometra pœnas luentem Hobbium,

Rarò antecedentem scelestum, deseruis pede pœna claudò.

Quod igitur ad provinciam meam spectat, ego eam jam statim aggredior, ubi

1. Ostendendum est hominis ingenium, atque ad versus meipsum benevolentia.
2. Dicendum est de iis quæ ad doctrinam.
3. De iis quæ ad mores spectant: de omnibus inquam istis dicendum est brevissimè.

1. Quanquam igitur multa sint quæ ingenium Hominis indicant, multa quæ Animi in me dispositio, nem, ego ex eo loco ubi ingenium & ipse (non immeritò) admiratur suum, specimen unicum exhibebo: faciàmque ut nemo ea de re dubitet; infiniti sunt loci ubi stultos, asinos, insanos, scurras, nos vocat, ingeniosa sunt ista; verùm audi eum documenta Epiphonemate concludentem. *Nè forsan (inquit) existimetis, ingenium mihi defuisse, ut nomina dem vobis fastidiosa—experiar quid possim—Valete (inquit) vos Ecclesiastici Inciviles. Theologi Inhumani (gratiam aliquantum perdit jocus iste in latinum versus) Dedoctores moralitatis, Collega Unasini, Egregium par Issacharium, miserrimi Vindices, atque Indices Academicorum.*

Vides (opinor) atque admiraris hominis ingenium (de benevolentia non opus est ut loquar) num tu quæso existimabas eum ingenio destitui? Num senio delirare? habet (ut cernis) sub canis istis juvenile ingenium, (aliquandiu est, ex quo repuerascere eum homines notaverant) Senex (uti cernis) est senex bonæ indolis. Senex revera jocularis, ipsè certe grammaticam

maticam vulgatam purgandam censerem, quæ duo ista vocabula uno versiculo conjunxit,

Sibilus atque jocus—

Sed instat mihi Typographus, non vacat jocos istos venerandos diutius admirari, cernis eum ingenio non destitui, quod ad rem nostram plurimum conferet ostendisse; vides etiam quo animo adversus me fuerit, quare Argumentum ulterius prosequamur, ad ea quæ de *Doctrina* habet, paucissima; ad ea quæ de *moribus*, pauca, proferamus.

Noli quæso existimare (vir modestissimè) me eo fine sermonem hunc instituere: ut me virum esse eruditum evincam argumentis, certè ab istiusmodi stultitia atque arrogantia abhorret animus, neque tamen indecorum illud esse existimo quod sum facturus. Nosti quidem Academiæ nostrarum rem agi illudque *Hobbium* conari, ut nostri errores Academiæ ipsi in opprobriū redundant, non opus erit igitur apologiā aliquā prolixiori, quare uno adhuc pede promovebo reconciliationis hujus nostræ argumentum.

Licebit certè de *Hobbio* omnia bona dicere, & laudare fortunas meas, qui *Senem habuerim tali ingenio præditum*, qui argumenta præbuerit unde possim de nostris (pusillis) mediocriter; imò benè, sentire simul & sperare.

Existimandum est vidisse eum edita à nobis omnia. Imò plurima in manibus aliquot annos eum habuisse, narratum est mihi, eo solo fine ut errores detegeret, atque refutaret, *Tentamen Philosophicum*, (inquam) *Trigonometriā*, *Prælectionem de Cometis*, *Inquisitionem in Bull. A. P. F.* Probabile est vidisse eum *Astronomiam Geometricam*, sub prælo Londini diutius laborantem, *Objectiones has nostras*, in *Philosophiam* ejus se

vidisse significat, ut de *Vindiciis* interim nihil dicam. Quare anxie quarendum existimabam, quid adversus ista haberent Documenta, ut si iusta objiceret, errores agnoscerem, si iniqua, veritatem defenderem.

Ecce autem (præter omnem expectationem atque spem) nihil in ipsis omnibus invenire potuit, de quo sibi publicè disputandum esse existimaret; quid igitur? num laudavit tua? (inquires) non certè. Num intacta prætermisit? neque hoc quidem. Quid igitur? tibi dicam.

Audiverat de quodam, qui magna etiam volumina uno isto verbo (*Mentiris*) refutaverat, miratus est hominis ingenium simul & fortunam; hunc igitur sibi imitandum proposuit: *Mala* (inquit) *sunt omnia*, imò *peffima*, *qua habet iste Astronomus*, nihilq; præterea in ejus confutationem adjecit.

Vix crederes (opinor) tantam mihi felicitatem obtigisse, imò victoriam tam insperatam. Imò verò V.D. ego vix oculis meis credebam, quare libellum (*Documentorum*) lepidum, pulchellum, elegantem (amo nunc eum) volvi & revolvi (nemo existimet me perlegisse tamen) nihilq; volventi occurrebat præter ista. *Exercitationem hanc nihil habere, vel stili, vel ingenii, vel rationis.* (p. 54.) *Credere se nunquam fuisse visam peiorem ratiocinationem, quam habet TENT. A-MEN Philosophicum,* (p. 56.) atque meipsum unà cum Collegâ nihil intelligere, sive in *Philosophiâ*, sive in *Geometriâ*. (p. 61.)

Hæc (inquam) omnia ea habent quæ mihi hæcenus vidisse contigit. (ea inquam omnia) quæ vel ad libellos meos spectant, meamve (quam sentio quàm sit exigua) eruditionem.

Nolo hoc loco, vel argumentum repetendo *inve-*
box ostendere, nolo ab ingenio *Hobbiano*,

aut studio, aut voluntate, Correlaria deducere. Nolo illud importunius urgere, non solere homines generalia, eaque minimè probata obicere, nisi ubi defecerint singularia. Imò *satiùs est ista consemnere*, (ut alibi habet) *quod facere possunt, tam Eruditi tum etiam Idiotæ*. Video nunc certè rationem cur me fugiat adeò, cur tantâ curâ atque diligentia subducere se soleat, (non sine magnâ aliquando ventriculi jacturâ) iis ex locis ubi me sibi occursurum esse credit. Adversus me meaque omnia laborat Antipathia manifestâ, habetque odii occultas atque ineffabiles rationes, quod de Sabidio Martialis, — *Non amo te Sabidi, nec possum dicere, quare*; hoc idem Thomas hic noster. *Non amo* (inquit) *ista Astronomi Saviliani*, cur non amat (obsecro) *mala quia sunt, cur mala? pessima quia sunt. Cur autem pessima? pejora nunquam vidi*; at quæso annon alia aliis pejora? non (inquit) omnia sunt pessima. *Quid faciam? V. D. quid dicam?*

*Pro captu Lectoris habent sua fata libelli, ac
Invenies alium si te hic fastidit Alexis.*

Interea magno me metu liberavit, fecitque ut spem me posse tempus illud bonarum rerum studio impendere, quod frivolarum contentioni destinatum fuisse metuere incipiebam. Hactenus ea quæ ad doctrinam spectant; accipe de Moribus paucissima.

Atque hic quidem non est ut de Ingenio aut de Voluntate Hobbiana aliquid tibi in memoriam refricemus, quanquam hæc basis sit, hoc fundamentum maximum novæ istius amicitiae quam nunc colere incepimus. Egone ut Hobbi-um non amarem? qui tot mihi in boni nominis controversia vel triumphos (si vicero) ministrat;

strat, vel tot saltem purgationis occasiones obtulit; argumenta subministravit?

Dixit *mendacem* esse *Vindicem* & *sceleratum*, addidit in hoc libello præclara etiam quamplurima Epitheta. Ecce me provocatum ad illud & coactum, quod non sine aliqua forsan *καυδοβῆτας* aut animi pusilli suspicione suscipere potuissem. Mihi certè nihil molestius esse solet, quàm de moribus vel propriis vel alienis contentiones inire, neque etenim verbis sunt ista, sed vitæ ipsius observatione atque experienciâ, decidenda. Verùm quid faciam? provocat me Thomas

Immiscetq; manus manibus pugnamq; laceffit.

Ait igitur *sceleratum* & *mendacem* fuisse *Vindicem* (neque etenim aliunde præterquam ex vindictiis argumenta sumit) quod ipsum (Hobbium) reum egerit—

1. *φιλαυτίας* atque Arrogantiæ.
2. Iracundiæ.
3. Plagii in doctrinâ de Visione.
4. Læsarum Academicarum.
5. Inimicitia adversus Religionem.

De Iracundia quidem nolo lites movere, cupio sospitam esse omnem fabulam eo loco haber, nugas nugacissimas, fictum Dialogum cum *Vindice*. Oro ut nemo eum Iracundum esse existimet. De cæteris brevissimè dicetur. Tuum est V. D. rationum utrinque momenta atque pondera in trotina pensare, tandemque de mendacii atque sceleris honoribus decernere.

1. Primum igitur de *Philautiâ* atque *Arrogantiâ* inquirendum est. De re ipsa, de argumentis brevissimè dicendum, *Vindicem* ait *Philautiæ* atque *Arrogantiæ* eum accusasse.

Quòd Circuli quadraturam pollicitus fuerit.

Quòd

Quòd Leviathanem absoluto volnerit imperio Academiis imponi.

Quorum ipse primùm negat (p. 56.) dicitque *Quadratura circuli* se nunquam aut *pollicium* fuisse *inventionem*, aut *profeſſum*.

Secundùm, defendit ab Arrogantiâ crimine, aut Philantiâ,

Dicitque (p. 55.) *nihil in operibus ejus eſſe quod aut Philantiâ sapiat aut Arrogantiâ*. De iſtis breviffimè.

Non ipſe certè memini Vindicem Academiarum de *philantia* atque *arrogantia* locutum uſpiam fuiſſe, verùm res ſolummodò atque Hobbii ſententias fideliter tranſcripſiſſe, Academiâs defendiſſe, à verbis iſtis abſtinuiſſe.

Ad illud de *Quadratura Circuli*, libet iſta ſolummodò regerere, exemplar meum primæ *Quadraturæ* (Corp. c. 20. quam poſtea ſupprimere nitebatur) p. 175. lin. ult. iſta habere, *Inveni ergo Circuli Quadraturam.* -- *Tu verò -- Vindex, Accuſator mei mendax*, quinimò etiamnum habere Corp. p. 174. Corol. 2. *inventæ erit -- quæ eſt Quadratura Circuli*, ubi denuò Vindicem mendacem appellat. Attende obſecro V. C. ut de mendacio verum ipſe judicium ferre poſſis.

Ad cætera quod attinet, dixit *Vindex* velle Hobbium ut absoluto imperio, Leviathan imponeretur Academiis, verbaque ea protulit quæ deſiderium illud continebant, de *Arrogantiâ* aut *Philantiâ* nihil adjecit. Aio nunc, Thomam omnes quotquot uſpiam fuerunt homines, Scholas, Academiâs fœdiſſimo contemptui habuiſſe (uti Cap. 1. Exerc. oſtendimus) & Leviathanem, non ſolùm Scholis atque Academiis, pro Acroamate Philoſophico, verùm & Pulpitis, pro concione ſacrâ imponi velle (vide locum citatum) eâ tamen fronte

fronte esse, ut asserat nihil habere ejus opera quod *Arrogantiam sapiat*. Quare iterum, de mendacio & scelere V.D. & cui demum laudes istæ sint deferendæ. Ista brevissimè de *Arrogantia Hobbiana*; transeo ad Tertium Capitulum de *Plagio*.

3. Ait (p. 59.) dixisse Vindicem (nempe aut erit ista mens Hobbii aut nihil ista ad vindicem pertinebunt) *Accepisse eum doctrinam de visione ex schediasmatis Warneri*; dicitque *Warnerum ab ipso, non ipsum à VVarnero, doctrinam istam, (quâ visio per pulsum perficitur) accepisse.*

Accipe obsecro rem integram, Triumphos in Omnes totius orbis Academias egerat Hobbii, quod ista per species, ipse per motum Visionis opus explicasset.

Indignum hoc ratus vindex ista inter alia reposuit; Verum non fuisse, omnes Academias ita visionem explicare. Receptum fuisse à plurimis inter nos hypothesein quæ motum adhibet.

Explicatam fuisse à *Gassendo, Digbeo, Cartesio*, ejusmodi hypothesein Hobbianis adhuc *arrendentibus* Existentibus; quibus adjicere potuit *Regium* atque ante eum *Gilbertum Nostratem* ex novitiis, Ex Antiquis, Scholam universam *Epicuri & Democriti*.

Denique Contineri istiusmodi doctrinam in Schediasmatis Warneri, Narratum autem Vindici fuisse, habuisse ea aliquando Hobbium in manibus.

Hæc ea sunt V.D. quæ in plagii accusationem infiat Hobbii, tam dicam & scelestam, ut omnia deinceps ei in Vindicem licere judicaverit. Non eum *Plagii* Vindex accusavit, innuit solummodo nullam fuisse rationem ut Thomas, Hypothesis istius quæ motum adhibet se inventorem venditaret. Tu quæso V.D. rem istam perpende, vide quomodo hoc etiam loco se expediat.

Annon

Annon recepta est ea doctrina? immò recepta est. Annon explicata est ab aliis? novitiis? Antiquis? Explicata est.

Annon novit eam doctrinam Warnerus? imò novit, neque negat in Schediasmatis ejus Contineri. Annon habuit in manibus quædam Warnari Schediasmata? habuit. An de visione? etiam de Visione. Vidè nunc quâ ratione à plagio se liberet. *Ait ista Schediasmata se nunquam habuisse, Imò Warnerum accepisse ab ipso hanc hypothesin, fortasse! at unde Cartesius, Digbeus, Gassendus? aut ab ipso, aut à Warnero; unde autem Gilbertus? (qui multos ante annos, fato cesserat;) ab ipso forsan, in Cunis vagientes: mirum! at unde tandem Lucretius, Epicurus, atque Democritus? quid hic, quæso, dicendum, nisi Thomam esse valdè senem (ipsumq; Democritum ista ab ipso didicisse?) Neque Veterem esse modò Thomam sed & veteratorem. Cernis si plagium hoc fuerit, quomodo sit eo crimine eximendus: Ast ipse, mortuos nec mordere sciens, nec loqui, satis habet ad Warnerum rem totam referre. Vult igitur ut ipsum Warnerum hac de re Consulamus.*

*Ignoscas petimus bone Thoma, tanti
Non est, ut placeam tibi perire.*

4. Verùm me tædet istiusmodi naniis detineri, ad alià celerrimè transeamus, De *lasis Academiis*, de *Inimicitia in Religionem*.

In negotio de *lasis Academiis* multa vindici affingit, uti *questum esse vindicem lasisse eum Academias*, conando ut *Leviathan* ipsis imponeretur.

Quamquam autem ipse existimem V.D. impossibile esse ut magis eas ladat, quam si forsan votum illud
ejus

ejus obtineret : quia tamen hoc minimè metuendum esse judico, ad veras vindicis querelas, accedam. ubi etiam de mendacio & scelere facillimè judicabis.

1. Questus est Vindex, quod *utilitatem* Scholarum (etiam antiquarum) in universum negaveris, atque asseruerit *Geometriam* nos scholis non debere, nempe evicit vindex debere; quid habet Thomas quominus injustitiæ in Academiis condemnetur?

Respondet (62) *injuriæ se futurum, nisi de Scholis philosophia distinctè locutus fuisset.* Corripuit eum ut cernis vertigo, quæ fecit ut veritatem, aut sensum, hac in re neque locutus fuerit, nec loquatur.

2. Gravissima fuit Vindicis queremonia, quod dixerit Hobbius, *philosophiam nullum HABERE in Academiis locum, nisi ut ancilletur Romanæ Religioni;* (nam cætera quæ habet de libertate philosophandi, de studio Mathematicarum artium falsissima sunt & leviora.)

Fateor, hoc ipsum fuisse quod me movit adeò ut incallescere: qui fuerit status temporum meministi, quis furiatorum clamor; omnia sc: in Academiis fuisse ad *superstitionem* Composita —

Sed videamus qua ratione non sit injuriarum de quo condemnatus, vide obsecro quis *mendax*, quis *sceleratus*.

Annon impressum est *non habere?* proferatur Leviathan: at hoc modo imprimi (inquit) non debuit, annon ita scriptum est in codicillis? non negat. quid igitur habet quo se defendat? vide quæso Cani Capitis frontem.

Annon inquit pudet? litera unius (aut alterius) diversitatem objicere? habere nempe pro habuisse (ante aliquot retro sæcula.) p. 61. quasi de Tempore non foret, omnis controversia. ô Tempora! ô Mores!

Cernis V.D. quali cum homine rem habeamus, non me

me nunc movet, quod adversus nos atque adversus ipsas Aeademias magistratum savissime studet incitare p. p. 60. & 62. didicimus eum ejusque omnia rectius æstimare. At movit me fateor aliquando ista tam inhumana in negotio religionis contumelia, ut de hominis Religione ea proferrem quæ audire (uti videtur) noluisset.

5. Verba ea quæ ad Religionem spectant, habet p. 62. nolo ego ea repetere, nolo huic rei insistere, fateor me mollius ista proferre potuisse, forsan & debuisse; at illud opinor concedet, (exercitationis ultima legens) non defuisse mihi sententiæ rationes.

At satis est V. D. meminerit à vindicta oblata abstinuisse me, non ille me deinceps vocabit *Theologum inhumanum*, non *Dedoctorem moralitatis*, non (opinor) *mendacem*, aut *sceleratum*; ut Vindicem *miserum* appellet simul & *mendacem* revera nimis est.

— *Nec si miserum fortuna maligna
Finxit, Vanum eadem mendacemq; improba finget.*

Verùm abrumpendum esse sermonem hunc monet non solum Typographus, sed & *Horatianum* illud,

— *Tenet occiditque legendo.*

Ne de proluxa atque importuna epistola illud non immeritò dicatur.

*Iterum Vale, Vir amplissime
cúmque qui totus est tuus
amare perge. S. W.*


FINIS.



CA
1

C

Y



INDEX CAPITUM.

SECT. I. De Computatione Hobbiana.

CAP.

Præfatio.

1. Enumeratio Librorum eorum quos in Philosophia edidit Hobbius, eorumque per notas designatio. Censura Hobbiana de reliquis Scriptoribus nonnullæ. Judicia item de suis. Suscepti operis designatio, ejusque una & methodi propositio. pag. 4
2. De Philosophiâ. 14
3. De Vocabulis, ubi de universali, & Substantia incorporea. 26
4. De Propositione, ubi de Veritate & falsitate. 39
5. De Syllogismo. 49
6. De Erratione, Falsitate & Captionibus. 52
7. De Methodo, ubi de Analytica Geometrarum nonnulla. 57

SECT. II. De Prima Philosophia.

CAP.

1. Animadversiones in Hobbii caput septimum libri de Corpore, de Spatio, Tempore, Consiguo &c. pag. 64
2. Examinatur operis Hobbiani de Corpore caput octavum, de definitione Corporis, Accidentis, Locis &c. 72
3. De Causa & Effectu, de Potentia item & Actu, quæ sunt operis Hobbiani (de Corpore) capita 9 & 10, ubi de Necessitate & Contingentia nonnulla. 82
4. De Eodem & Diverso. 91
5. Considerantur cap. 12. de Quantitate & 13 de Analogismo. Et Primæ ejus Philosophiæ finis imponitur. 100

SECT. III. De Physica Hobbiana.

CAP.

1. Examen capitis 26 libri de Corpore, quod est de Universo & Syderibus. pag. 110.
2. De Luce, Calore, & Coloribus. 152
3. Examen cap. 28. de Frigore, Vento, Duro, Glacie, Flexorum resti-

Index Capitulorum.

restitutione, Fulgure & Tonitru.	pag. 163
4. De Sono, Odore, Sapore, Tactili.	174
5. De Gravitate.	181

SECT. IV. De Homine Hobbiano.

CAP.	
1. De Sensu, & Phantasmat.	196
2. De Imaginatione, ubi de Memoria, & Somniis.	210
3. De Discursu.	225
4. De Comparatione Hominis & Bruti ex sententiâ Hobbianâ.	241
5. De Animi humani naturâ ejusque duratione.	260


SECT. V. De Cive Hobbiano.

CAP.	
1. De Homine, ut est in statu Natura, ex Hobbii sententia. De Præ-Adamitis nonnulla. De Lege item Natura, seu regulis Boni & Mali.	281
2. De Imperii limitibus ejusque origine, Sententia Hobbiana examinatur.	

SECT. VI. De Religione Hobbianâ.

CAP.	
1. Ubi queritur, an doctrina Hobbiana sit Christiana Religioni amica, vel inimica.	315
2. De Religione in Universum ex sententiâ Hobbianâ inquiruntur.	332





WARD I Exercitatio in Hoesii Philosophiam.

